

DISCOVERS
DE L'YVRESSE,
ET YVRONGNERIE.

Auquel les causes, nature, & effects de
l'yvresse sont amplemēt deduiçtz, avec
la guerison & preservation d'icelle.

*Ensemble la maniere de carouffer, & les combats
Bacchiques des anciens yvrongnes.*

Le tout pour le contentement des
curieux.

Par I. MOVSIN Conseiller & Medecin
ordinaire de son ALTESSE.




A TOVL.

76984

Par SEBASTIEN PHILIPPE Imprimeur
Juré

1612.

Avec Privilege du Roy.



MEMORANDUM

TO : Mr. Tolson
FROM : Mr. Clegg
SUBJECT: [Illegible]

[Illegible text]

[Illegible text]

[Illegible text]



A SON ALTESSE.

MONSEIGNEUR

Ce liuret plus curieux
de veoir le monde par l'aduis
de ses amys que par l'adueu de
son autheur, s'en va premiere-
ment vers vostre ALTESSE,
pour obtenir congé de son
maistre, & sauf-conduit de son
Prince. La loy du debuoir l'o-
blige au premier, puis qu'il se
vante estre vostre pour auoir
esté tracé sur voz terres par la
plume d'un de voz subiects,
seruiteurs, & domestiques: &
les trauerses du voyage qu'il

entreprend l'aduertissent de
rechercher l'autre, pour se te-
nir à l'abry de vostre protecti-
on cōtre ceux qui la voudroiēt
outrager. Il preuoit que sans
vostre assistance il court for-
tune d'estre accompagné du
mespris, guetté de la calom-
nie, & poursuuiuy de la mesdi-
fance: Il craint d'estre mal re-
ceu de certains delicats qui de
premier abord s'offenceants
de son inscription le relegue-
ront tout aussy tost avec le vi-
ce duquel il traicte: il scait que
plusieurs accuseront son lan-
gage mal sonnant françois aux
oreilles bien francoises, & que
bien peu excuseront son hu-
meur qui le porte plustost au

mieux faire qu'au bien dire. Mais aussy s'asſeure il que s'il plaist à voſtre ALTESSE l'honorer d'une ſimple recõmãdation, il ſera bien veu & venu par tout, que chaſcun luy tendra la main, & que le ſubiect qu'il deduit ne ſera tant recherché pour ſa nouveauté, qu'aggreable pour voſtre reſpect. S'il eſt trop temeraire d'ẽtreprendre vn voyage tant hazardeux en ſi mauuais equipage, aussy le peux ie venter bien aduiſé en recherchant l'aſſiſtance neceſſaire là où il la peut trouver, & d'où il la doit eſperer, il ne pouuoit ſouffrir recommandation fauorable pour luy donner entree par tout, que

de la posterité des Charlemaignes, des Godefroys, des Renes, & de tant d'autres Monarques voz ayeulx; il ne se debuoit promettre vn plus asseuré support, que de la tige de la plus Illustre famille de la Chrestienté; ny esperer tant de courtoisie & bienueüillance, que d'un Prince du sang Lorrain. En vertu de ces considerations il supplie très-humblement vostre ALTESSE de l'honorer de sa faueur à son depart, afin que par le moyen d'icelle surmontant toutes les difficultés du chemin qu'il entreprend, il puisse entretenir les doctes, satisfaire aux curieux, & agreer aux ignorants.

Receués le foubz vofre pro-
tectiō, MONSEIGNEVR, &
confiderés, s'il vous plaift; que
ce n'est ce petit volume feul,
c'est l'autheur mefmes qui
vous eft entierement dedié, &
qui de toute fa deuotion vous
rend vn vœu folemnel d'efre
à perpetuité.

De vofre ALTESSE

Le tres-humble, & obeiffant
fubieét, feruiteur & Me-
decin ordinaire

I. MOVSIN.



TABLE DES CHAPITRES
& Problemes contenus en ce
discours.

- P**REMIER Chapitre. Des louables effects
du vin. fueillet. 1.
- Chap. 2. Que le vin tient le premier rang
entre tous les aliments. 6.
- Chap. 3. Que le vin est un aliment vraye-
ment salutaire & medicamenteux. 10.
- Chap. 4. Que le vin a plus d'efficace que
toute autre sorte de medicaments. 14.
- Chap. 5. En quelles maladies le vin peut
seruir de remede. 19.
- Chap. 6. Que le vin est un appast tres-dan-
gereux qui nous guide à l'yuresse. 21.
- Chap. 7. De l'origine signification, & diffe-
rence de ces mots yure & yurongne, yures-
se & yurongnerie. 24.
- Chap. 8. De l'yuresse des bestes. 31.
- Chap. 9. En combien de façon l'homme peut
s'enyurer. 39.
- C. 10. Diuerses descriptions de l'yuresse. 47.
- Chap. 11. Que l'yuresse ne peut estre sans
l'offence des actions animales, bien que

non de toutes.

49.

Chap. 12. Que l'yuresse git en la lesion des actions nobles & princieres.

53.

Chap. 13. Que l'yuresse ne consiste pas en toute sorte de lesion des actions princieres.

58.

Chap. 14. La vraye & parfaicte definition de l'yuresse.

60.

Chap. 15. Resolution de quelques obiections contre la definition d'yuresse.

64.

Chap. 16. Comment se faict l'yuresse.

70.

Chap. 17. Quelles parties sont offencees par l'yuresse & les effects qui en reussissent.

75.

Chap. 18. Raison de beaucoup d'effects de l'yuresse.

81.

Probleme 1. Pourquoi les obiects exterieurs demeurants immobils semblent à l'homme yure se mouuoir & tourner en rond?

82.

Prob. 2. Pourquoi l'homme yure pense quelquefois que la teste luy tourne?

84.

Prob. 3. Pourquoi est ce qu'une chose semble estre deux à l'homme yure?

84.

Prob. 4. Pourquoi est ce que l'homme yure ne peut bien iuger des couleurs?

86.

Prob. 5. D'où vient que tant de sons bruyent ordinairement aux oreilles d'un homme yure?

87.

Prob. 6. Quelle est la cause du besgayement & mouuement depraues des hommes

yures?

87

Prob. 7. D'où vient que le vin prouoque quelquesfois le sommeil, aultrefois excite les veilles?

88

Prob. 8. Est il vray que ceux qui sont enyurés de biere ou ceruoise tombent en arriere & à la renuerse seulement, & que ceux qui le sont de vin, se laissent cheoir de tous costés comme dit Aristote?

90

Prob. 9. Pourquoi attribuons nous la cause de l'yuresse aux vapeurs esleuees du breu-uage, & non à sa chaleur, comme Aristote & Galien nous l'enseignent?

91

Prob. 10. D'où vient quel'Opium, l'areca ou fausel, la racine de Iusquiame, & aultres tels corps extremement refrigerants ont vertu d'enyurer?

92

Prob. 11. D'où vient que l'yuresse engendre si grand nombre de maladies froides, & specialement celle qui procede du vin, comme l'apoplexie?

95

Chap. 19. Problemes concernant la pratique.

97.

Prob. 1. Pourquoi les hommes fort esmeus & eschauffés de trauail ou aultrement, venants à boire en telle disposition sont ils facilement surpris d'yuresse?

97

Prob. 2. D'où vient que ceux qui boient au commencement du repas auant que d'auoir

- faict bon fondement (comme l'on dit) en-
 courent plustost ceste passion que ceux qui
 mangent beaucoup deuant que boire? 98.
- Prob. 3. Pourquoy est ce que l'on s'enyure plu-
 stost dans vne vaiselle doree que dans un
 verre? 99
- Prob. 4. Est il vray que le vin mediocrement
 trempé enyure plustost que le vin pur? 101
- Prob. 5. pourquoy pareille quantité de vin
 prise à petits traicts enyure moins que
 prise à grands traicts? 104.
- Prob. 6. D'où vient que quelcuns se des. eny-
 urent en beuuant? 105.
- Prob. 7. D'où vient que les vns sont plustost
 & plus profondement enyurez que les
 autres? 105..
- Chap. 20. Si le vin excite la luxure? 109
- Chap. 21. Que la verité est tousiours au vin,
 & comment cela se doit entendre. 119.
- Chap. 22. Que le vice d'yurongnerie est fort
 ancien. 132.
- Chap. 23. Que l'yurongnerie a esté familiere
 à toutes nations. 134.
- Chap. 24. Que les breuuages des diuerses na-
 tions tesmoignent leur yurongnerie. 147.
- Chap. 25. Diuerses nations subiectes à l'yuron-
 gnerie & premierement les Hebrieux &
 Egiptiens. 157.
- Chap. 26. Que les Grecs se sont addonnez

- excessiuement à l'yurongnerie. 162.
- Chap. 27. Que les anciens Romains & leurs voisins se sont laissez aller laschement au mesme vice. 166.
- Chap. 28. Aultres nations moins celebres entre les anciennes abandonnees à la mesme passion d'yurongnerie. 172.
- Cap. 29. Pourquoi les Septentrionaulx sont plus subiects à l'yurongnerie, que les aultres nations. 177.
- Chap. 30. Si l'on boit plus en esté qu'en hyuer. 192.
- Chap. 31. De quelques prodigieux beueurs. 260.
- Chap. 32. Que les femmes n'ont esté exemptes du vice d'yurongnerie. 209.
- Chap. 33. Assemblée conuiuiale des anciens yurongnes. 221.
- Chap. 34. Quelle posture & situation les anciens tenoyent à table. 223.
- Chap. 35. Quelle façon particuliere auoit chasque nation à table. 227.
- Chap. 36. Que les anciens se plaisoyent à la variété des vins. 230.
- Chap. 37. Quel ordre tenoyent les anciens en leurs brintz. 232.
- Chap. 38. Si les anciens s'addonnoyent plus particulièrement à boire en vne saison qu'en vne aultre? 235.

- Chap. 39. Des couronnes & chapeaux de fleurs
que les anciens auoyent en vſage en leurs
festins. 237.
- Chap. 40. Des onguents dont les anciens
uſoyent en leurs banquets. 242.
- Chap. 41. Comme les anciens couronnez, ou
parfumez redoubloyent la charge avec les
plus grands verres qu'ilz euſſent. 244.
- Chap. 42. Nouuelles inuentions de boire des
anciens ſur la fin de leurs festins. 248.
- Chap. 43. La ſuite du banquet. 250.
- Chap. 44. Ce qui ſe faiſoit apres auoir deſſer-
uy les viandes. 254.
- Chap. 45. La Cataſtrophe de l'yueſſe. 255.
- Chap. 46. Comment les anciens trempoyent
leurs vins. 259.
- Chap. 47. Des pris propoſez aux bons beu-
ueurs. 270.
- Chap. 48. Des vaiſſeaux à boire des anciens.
275.
- Chap. 49. S'il eſt ſain de ſ'enyurer quelques-
fois. 286.
- Chap. 50. Comment il ſe faut preſeruer de l'y-
ueſſe. 309.
- Chap. 51. Des remedes preſeruatifs contre l'y-
ueſſe & le vin: & premierement d'au-
cuns vains, ou dangereux qui nous ſont
enſeignez par les anciens. 316.
- Chap. 52. De l'Amethyſte, & du poulmon de

TABLE

<i>mouton rosty.</i>	320.
<i>Chap. 53. Des becs d'arondelles avec myrrhe.</i>	323.
<i>Chap. 54. Des amandes ameres, absinthe, & noyaux de pesches.</i>	325.
<i>Chap. 55. Du saffran.</i>	327.
<i>Chap. 56. Du vin de myrrhe, & de lyerre, de l'huile, de la cygue, & pierre ponce.</i>	329.
<i>Chap. 57. Des choux, & refforts,</i>	334.
<i>Chap. 58. Diete preservative de l'yveresse.</i>	339.
<i>Chap. 59. Des vins plus ou moins enyurans: & premierement des artificiels.</i>	350.
<i>Chap. 60. Des vins mixtionnez de plastre, ou resine, ou poix, ou chaux.</i>	353.
<i>Chap. 61. D'autres vins mixtionnez par diverses artifices.</i>	356.
<i>Chap. 62. Des vins naturels plus ou moins enyurans.</i>	358.
<i>Chap. 63. Si le moust ou le vin nouveau enyure plus que le vieil?</i>	362.
<i>Chap. 64. Si le vin doux est plus enyurant que l'autre.</i>	366.
<i>Chap. 65. Si le vin blanc enyure plus que le rouge?</i>	368.
<i>Chap. 66. Par quel moyen l'on peut rendre le vin moins enyurant.</i>	369.
<i>Chap. 67. Guérison de l'yveresse.</i>	378.



AD CLARISSIMUM D.

I. MOVSIN SERENISSIMI LO-
tharingæ Ducis Consiliarium &
Medicum ordinarium.

DE Semeles nato nona dum ac miranda
requiris:

*Ebrius & morbos quos sibi conciliet.
Sobrius id tentas, nisi te fecere disertum
Vina, quibus vatum turgida vena fluit.
Hoc erat omissum de tot scriptoribus, ecce
Artibus est Medicis addita summa manus.*

Bertemius suæ Celsitudinis
Consiliarius ac Medicus
ordinarius.

IN LEPIDISSIMUM D.

MOVSINI TRACTATVM DE
Ebrietate. Nicol. Guiberti Doct.
Medici Lothar. Tetraſtichon.

GAudia quanta ferat Bacchus, quot damna
rependat

*Noſſe potes, bibis qui ſine mente merum,
Hos voluens vana haud conſcriptos arte libellos
Quos hominum generi ſobria muſa dedit.*

A MONS^R. MOVSIN
DOCTEUR EN MEDECINE, ET
Conseiller Medecin de son Altesse
de Lorraine, sur son traicté de
l'yurongnerie.

QVATRAIN.

EN descrivant de Bacchus la puissance.
Et le moyen d'empescher sa fureur
Docte Mousin, on voit qu'une liqueur
Autre que vin cause ton eloquence.

Iean le Febure.

SONNET AV SIEVR
Mousin sur sa laborieuse
recherche de la nature
du vin.

*P*romethée à Mousin convient en une chose.
Cestuy la fust larron aussi l'est bien Mousin.
L'un pour le feu du ciel, & l'autre pour le vin.
Pardonne moy Mousin si publier se l'ose.

Freillerant

*Feuilletant les anciens hardy tu te propose
Monstrer à noz nepueux la nature du vin,
Si nourriture aux sains aux malades venin,
Car toute sa vertu icy tu l'as enclose.
Viens donc yrongne & sobre à lire ce discours
Afin de prolonger tes ans, tes mois, tes iours:
Or de voz deux, Mousin, la fin est bien con-
traire.*

*L'un pour son larrecin chante IO triomphant,
L'autre a le cœur rögé d'un vaultour ramissant:
Iuge donc le lecteur qu'est plus seant de faire.*

AV MESME.

A *Nacreon se souuenant de boire
Chante en ses vers & conclud que tout
boit*

*Disant que Mer, Soleil, Lune, arbre, &
Terre,*

D'un bon accord tous boient à souhait.

Or beuons donc à TIRE-LARIGAV.

*Mais que personne en beuant ne s'enyure,
Ne plus ne moins que la lune, arbre, ou eau,
Car la mesure est escrete en ce liure.*

Par Estienne Regnard
Docteur en Me-
decine.



ODE A M^r MOVSIN sur son traicté de l'yuresse.

Plus de carous qu'on ne m'y presse
J'apprends assez que pent l'yuresse
Des escrits du doct^e Monsin.

Pluton, les Parques, les furies,
Pour trencher le fil de noz vies,
Sont ilz pas auteurs du raisin?

Le fer ne faict tant de carnage,
Le feu, la mer si grand ravage,
Que sa venimeuse liqueur:

La Cigue est bien moins cruelle,
Et nostre endormie morelle
Ne nous porte à telle fureur.

Non, Monsin menstre par l'histoire.
Que noz maux viennent du trop boire,
De nous mesmes, & non du vin.

Mais le doux Nect^r de son liure
Chasse l'yuresse, & nous enjure
D'un plus grand effort que le vin.

C. CACHET Conseiller
& Medecin ordinaire
de son Altesse.

ACROSTICHE SVR LE NOM DE
Monsieur Moufin, dialogisant en rithme
feminine sur le subiect de son liure
avec vne Muse contrefaisant
vn Echo.

LEHANT MOUSSIN.

*e ne sçay, ma Clion, quelle humeur de lyresse
nyure mon cerueau, aupres de ceste presse!
nille & sin elle sent, quel genre de liure est-ce.
riere: ha que dis-tu? veulx tu l'apprendre à suyre?
on; trop sobre tu es, pour aupres d'elle & iure:
use, d'où te vient donc vn tel subiect de liure.
eure paradoxal! si c'est digne besoigne,
se d'un suc vermeil: mais si ce n'est vergoigne,
cay tu d'autre liqueur, qui les bords du liure oigne.
upporte au moins l'auteur, qui de ton nō s'appuye,
l'est si docte & gay, que la melancholie
e peut, que du subiect, non du liure on ne rie.*

ECHO
de l'yureffe.

ECHO
de l'yure.

ECHO
del'yurôgne.

ECHO
l'yurôgnie.

Maistre SEBASTIEN
THIERY Aduocat
à Toul.



Eloge audiēt Autheur.

*Je m'estōne Moulin, comme ces deux fureurs
De ces grands petits dieux, differents en humeurs,
L'yurongnet Nysean, & Apollon le sobre,
Qui animent tes sens, ne te font de l'opprobre,
Et que tel, que de nom, tu demeures d'esprit
Moult sain, comme on te veoit par fait, &
par escrit.*

*Amusement subtil, belle Andiperistase,
Vertu Moult signalee, & de diuine emphase.
C'est de là qu'on te doibt croire grand Medecin,
Te conseruant parmy ce danger intestin:
Ce n'est encore assez de cest honneur & gloire,
S'on ne vient t'adiouster la palme & la victoire
Entre tous ceux, qui ont, par calices feconds,
Ou par air naturel, l'honneur d'estre faconds;
Au moyen, que si bien de l'onde Cheualine
Tu te vads enyurant, que ta fureur diuine
N'en fait rien toutesfois veoir que sobrieté:
Et tant bien l'on te veoit, par ton ample traitté
Sobre te receler, qu'il ne semble autre chose
Qu'une fureur d'yresse en ton esprit enclose.
Ainsi parlant comme yure, & viuant sobre & coy,
Ta vie enseigne au sobre, à parler comme roy,
En n'y contreviuant; ton liure à l'yure monstre,
A viure comme toy, ne parlant à l'encontre.*



Ad clarissim. D. Io. Moufinum
suæ Celsitudinis Consil. &
Med. ordin. Authorem
huius operis Bacchana-
liorum.

Bacchum *inter Musas, olim retulere vetusti*
Sic Musis itidem, & Baccho cōmercia quādā
Hoc & idem noua vult tēpestas nostra fatendum,
Dum nobis Baccho & Musis produxit amœnum,
Omine Bacchantem hoc, Moufinum nomine
Musæ,

In eiusdem honorem, Apage
contra Zoilum.

Que tibi Moufino foret aduersaria ΜΟΥΣΑ?
Quis tibi Bacchanti quoq; debaccharier ausit?
Num sibi Musarum vindicta timenda Pyreno?
Num sibi Bacchantum furor instigabilis Orphee?
Sobri° haud Musis, Baccho nec id Ebri° unquā.

Sic sibi suggerebat
M. Seb. Thiery Tull.
Aduocatus.

Extraict du Priuilege du Roy.

LOVIS par la grace de Dieu Roy de France & de Nauarre. A noz amez & feaux Conseillers tenans noz Cours de Parlements, Baillifz, Seneschaux, Preuosts, leurs Lieutenans, & à tous nos aultres Iuges & Officiers salut, nostre biē amé Sebastien Philippe Imprimeur Iuré à Toul nous a faict remonstrer qu'avec labeur & despence il a recouuert vn liure grandement vtile au publicque, intitulé *Discours de l'Yuesse & Turongnerie, par IEAN MOVSIN* Conseiller & Medecin ordinaire de nostre Tres-cher Cousin le Duc de Lorraine lequel il feroit volontiers imprimer & mettre en lumiere s'il ne craignoit que quelque autre Libraire ou Imprimeur voulust faire le semblable, & par ce moyen le fruster de la recompence (que cest œuure & la despence qu'il y conuient faire) luy promettent. Occasion qui luy a faict nous supplier luy octroyer nos lettres de permission necessaires à ces causes. Le voulant fauorablement traicter, & afin qu'il soit recompencé de ses labeurs & despens, auons de noz grace speciale, pleine puissance, & auctorité Royale, permis & permettōs d'imprimer faire imprimer, vendre & distribuer par tout cestuy nostre Royaume, & Seigneurie de nostre obeissance ledit liure, sans que durāt six ans autre que luy & ceux qu'il voudra se

puissent entremettre en l'impression, vente & distribution d'iceluy, soubz quelque pre-
texte & deguïsement que ce soit, à peine de
cinq cens liures d'amende, despens domma-
ges & interets, declairant à ces fins tous les
exemplaires & liures contrefaicts acquis &
cōfiskés audiect Philippe, qu'il pourra faire
saisir la part où ilz seront nonobstant opposi-
tiōs ou appellatiōs quelcōques. Si vous man-
dons & à chacun de vous tres-expressément
enioingnons que du contenu en ces presen-
tes vous faictes, souffries, & laissies iouir &
vser plainement & paisiblement lediect Phi-
lippe, ses assocyez & ayant cause, sans per-
mettre qu'ilz y soiēt troublez. Voulons qu'en
mettant au commencement ou fin dudiect
liure ces presentes ou vn bref extraict, quel-
les soient tenues pour d'heüement signifiees,
& qu'à la copie collationee par l'vn de nos
amez Conseiller, Notaire, & Secretaire,
foy soit adioustee comme au present origi-
nal. Car tel est nostre plaisir. Donné à Paris
le dernier iour de Ianuier l'an de grace Mil
six cens douze, & de nostre regne le deu-
xieme.

Par le Roy en son Conseil



DISCOVRS
DE L'YVRESSE,
ET YVRONGNERIE.

CHAPITRE I.

DES LOVABLES EFFECTS DU
Vin.



I les anciens Babyloniens haut-louoyët & magnifioïët la Palme, comme arbre qui leur apportoit trois cëts soixante sortes de diuerſes vtilités, nous pouuons bien & avec plus grãde raiſon priſer la vigne, de laquelle ſans comparaïſon nous tirons plus de commodités & beaucoup plus ſingulieres que la palme ne leur en produïſoit. Pour preuue de mon dire, ie ne veux m'arreſter à celles qui prouiennët de ſa plâte (qui ſont ſi fertiles & abondâtes que meſmes ſon bois a autrefois ſeruy de matiere pour tailler Images, & drefſer temples aux Dieux) Et pour le iour d'huy encore nous employons ſon tronc à diuers vſages autant vtils comme il ſeroit inutile de les repreſenter en ce lieu, mon ſeul but eſt

de mettre son fruit sous le pressoir pour en tirer le suc, & le vous faire sauourer à loisir, & en fin d'un commun accord tenir pour conclusion tresasseuree qu'il n'y a plâte dans le giron de la terre qui soit plus noble en son fruit, ny plus fructueuse en ses vertus, ny plus vertueuse en ses effects admirables que la vigne. L'auteur de l'univers ne voulut pas seulement loger l'homme chef d'œuvre de sa diuinité en vn lieu sortable à sa nature, descourât la face de la terre, auparauant inondée, & comme noyée de la vasteté des eaux, pour la luy rendre habitable, mais aussi destina à son seruice tout ce qu'elle germeroit dans ses flancs, & rapporta tout le contenu du grand monde au bien & contentement du Microcosme, qui en est l'abregé. De là vient que côme il n'y a rien qui ne soit créé pour nous aussi ne se peut il rien retrouver ou imaginer, de quoy nous ne tirions quelque profit, il n'y a plante si vile & abiecte, entre celles que nous foullons ordinairement aux pieds qui ne nous soit fort aduantageuse, & sur toutes la vigne, laquelle a si grande prerogative sur les autres, qu'il semble que sans elle l'homme ne pourroit pas viure, ou bien que sa vie seroit fort racourcie, trauersée, & affoiblie d'un nombre infiny de contrarietez. Or d'autant que l'age de nos premiers peres, se ressentant encores de la premiere perfection de son origine, laquelle il touchoit comme au doigt, se maintenoit longtêps en sa force & vigueur, sans aucune trauerse, aussi n'estoit il

encore besoing du vin ny pour son entretien, ny pour remede de ses maux: mais incontînēt apres le deluge vniuersel que la briēfueté de la vie fut reduitte & restraite à ces bornes que nous experimentons, & que cest importun esquadron de maladies courut sus au genre humain: soit que nostre misere procedast, comme il est vray semblable, du déffault de la terre, laquelle pour auoir esté deteriorée de sa premiere perfection par l'inōdatiō deseaux salees ne peust plus rien produire d'assez vigoureux pour conseruer long tēps & sainement les humains, Ou soit que le secret iugement de Dieu, ou quelque autre cause eust ouuert la porte à ces calamitez, aussi tost le souuerain medecin y pourueut descourant l'vsage du vin à son bien aymé le bon Patriarche Noel, comme le souuerain Antidot & preseruatif contre noz infirmitéz, & le vray viatique pour nous retirer du chemin espineux d'vne vie si courte, à vne autre plus longue & plus heureuse. Ceste Philosophie chrestienne a esté bien recognue par le diuin Platon, lors qu'il nous assure que le vin n'a esté donné aux hommes à autre fin que pour la seule conseruation de leur vie & de leur santé. Les anciens Mythologes ont aussi effleuré ceste doctrine & nous l'ont laissée couuerte soubz le voile de leurs fables: car tantost il nous apparioient sur vn mesme autel Bacchus dieu du vin, avec Apollon autheur de santé, & dieu de medecine, autrefois ils nous representoiēt Bacch^o ores avec visage de

Iouuanceau , ores avec visage de vieillard: voulants faire entendre par celuy cy la vertu du vin propre à nous faire aborder au mesme aage: & par l'autre la propriété qu'il a de nous conseruer & maintenir en la fleur & verdure de ieunesse. Ce qui a esté suffisammiēt confirmé par l'asseuree experience , & le veritable tesmoignage de l'ancien Romain Pollion Romul^o, lequel interrogé par l'Empereur Auguste, quel moyen luy auoit peu entretenir & la vie & les forces entieres, l'espace de cent ans & dauāta-ge: respondit que c'estoit l'huile par dehors & le vin miellé par dedans. A ce mesme propos l'Emperiere Iulia Augusta disoit ordinaiemēt que le vin croissant es enuiron du Chasteau de Pezzino, l'auoit faiēt viure octante & deux ans pour s'en estre tousiours nourrye. Et de faiēt si Democrite estant aux abbois de la mort; pour gratifier ses amys peut encore par l'inspiration de la seule odeur d'une crouste de pain trempee au vin, arrester & cōme tenir en bride son esprit prest à le quitter; que ne deons nous pas esperer si de bonne heure nous estançons les fondements fresles de nostre vie mortelle sur vn si fort appuy? se rencōtrera il rien capable de les esbranler ou destruire, si ce n'est la force mesme du temps qui en fin consume & demolit ce qui sembloit defier la corruption, & se promette l'Eternité? Aussi les plus curieux chercheurs des secrets de nature philosophants subtilement sur les marques externes qui nous introduisent à la cognoissance de la

vertu interne des choses produites pour nostre seruice, nous enseignent que la longue vie particuliere à la vigne sur toutes aultres plantes, & la duree presque eternelle de son bois incorruptible, sont signes certains & asseurez d'un mesme effect que nous pouuons attendre de son fruct. Le Roy des Æthiopiens Macrobie, considerant tous les presents que Cambyse Roy des Perses luy enuoyoit, se mocqua des robbes de pourpre, chaisnes d'or, pierres, onguents pretieux, & aultres d'os semblables: mais quand il vint à ietter l'œil sur le vin de Palme, qu'il trouua entre ces dons Royaux, il le pris comme le souuerain support, & principal entretien de la vie & sãtẽ des Perses. Que s'il eust pour lors tant soit peu gousté du vin de vigne, ie m'asseure qu'il l'eust iugé la vie mesme de la vie de ceux qui en vsent: car soit que nous voulions considerer le vin ou cõme destiné à nostre nourriture, ou comme donné du Ciel pour soulager les infirmitẽs de la terre, nous le iugerons entre to⁹ les aliments le plus louable, & le plus grand amy de nostre nature: & entre les medicaments le plus puissant & plus salutaire. Considerons le premierement en qualite d'aliment.



*2^{VE} LE VIN TIENT LE
premier rang entre tous les aliments.*

CHAPITRE II.



Es principales qualitez qui rendent l'aliment recômandable, sont premierement qu'il se torne & chāge prôprement & facilement en vne substance propre & conuenable à celuy qui en est sub-

stanté, sans grande resistance, & sans que noz parties soient beaucoup trauaillees ou empeschees en ceste action. D'auantage que non seulement ceste substance soit bonne & louable, mais aussi copieuse, à proportion de la quantité du suiect duquel elle est tirée, en vn mot il faut qu'un bon aliment nourrisse beaucoup soub vne petite quantité : & finalement de ceste dernière condition s'ensuit que tant moins l'aliment contiendra d'excrements en soy (c'est à dire, de parties inutiles, qui ne peuvent estre conuerties en la substance du corps nourry) tant plus sera il à estimer. Toutes ces cōditions sont puisees de la nature & de l'essence mesme de l'aliment; car puis que son debuoir & son propre est de restaurer & reparer, au corps tout ce que par vne continuelle effluxion se dissipe peu à peu, il fault necessairement qu'entre la substance de l'aliment, & celle du

corps nourry, il y ait quelque conuenance & ressemblance, laquelle plus elle sera grande, plus sera prompte & facile la transmutation ou assimilation de l'un à l'autre, tant moindre la resistence de l'aliment aux parties, tant plus copieuse la nourriture, bref tant moins d'excrements & parties inutiles en resteront dans le corps nourry. Or entre tous les aliments solides ou liquides quelz ilz puissent estre, il n'en y a point vn seul auquel on recognoisse si parfaictement toutes ces conditions comme l'on faict au vin. Car s'il est question de la propre conuerfion, & consequẽment de la soudaine assimilation de l'aliment en nostre substance, le vin a seul tout ce que les autres ensemble. En premier lieu, la consistence liquide est sans comparaison plus aisee à surmonter par la chaleur naturelle que la solide. C'est ce qu'enseigne le docte Hippocrate, quand il escrit qu'il est plus facile de s'emplir de breuuages que de viandes: emplir c'est à dire nourrir, ou refectionner, car ainsi interprete-ie le verbe *πληρῶσθαι* dont il vse. Mais bien pl^s soudaine encore est la cōuerfion qui se faict des vapeurs vineuses vraiment alimentaires en esprits viuisans, qui de sa promptitude surpasse d'autant celle du breuuage, que celle icy l'emporte sur les viandes solides. Le vin doncques est le vray Elixir de vie que les Medecins doiuent auoir en main pour le presenter à ceux qui, ou par vne longue & violente Diarrhee, ou par vne dissipation excessiue des esprits vitaux

venants à faillir, ont nécessité d'un prompt reſtaſſement de leurs forces perdues par la perte des humeurs & des eſprits. Auſſi Alexādre Trallian trescelebre Medecin no^r teſmoigne auoir remarqué pluſieurs malades guarantys de la mort, contre toute eſperance, par le benefice du vin, remis comme en vn moment en leur eſtre premier, reprenants auſſi toſt les forces que le courage. Or ſi le vin nourrit viſtement le corps, auſſi le fait il fort benigne-ment & doucement ſans beaucoup peiner les parties naturelles, lors qu'elles le cōuertiffent en leur ſubſtance. Car où il y a conformité de ſubſtance & temperature, telle qui ſe voit manifeſtement entre le vin & noſtre ſang, il n'eſt beſoing de grande alteration ou changement pour venir à vne tranſmutation parfaicte. D'icy nous tirons conſequence que comme il n'y peut auoir grande actiō de la part du corps contre le vin, auſſi reciproquement que l'alteration que le vin imprime au corps eſt bien petite & ſans preiudice de ſa ſanté. Quand eſt de la quātité de nourriture que le vin no^r confere, lors principalement qu'il eſt ſurchargé de couleur, ſi nous ne voulons no^r en rapporter à ce que Galien en a laiſſé par eſcrit ſuiuy de toute l'eſchole Pæoniēne, croyons en l'experience iournaliere. Nous voyons que les grands beueurs ne ſe rempliſſent gueres d'autres viandes, & pour l'ordinaire ſont fort gras & rebondis. D'auantage ceux qui commencēt le repas par boire en māgent beaucoup moins,

estants'incontinent rassasiez par la soudaine & copieuse nourriture qu'ils en reçoient. Toutesfois ie ne veux pas qu'on estime que l'on donne du vin pur à ceux qui ont cest appetit desordonné que nous appellons faim canine pour besoing qu'ilz ayent de nourriture, autrement il en faudroit faire de mesme à ceux qui apres de longues abstinences, ou de grands flux de ventre, ou de sang, ont l'appetit fort ouuert, & grand besoing d'estre restaurez, qui neantmoins se trouueroient fort offencez, & tomberoient en delire & conuulsions, si l'on leur offroit du vin pur en quantité auant toute autre viande. C'est donc la qualité mesme du vin & non la quantité de sa nourriture qui suruiuent à la faim canine, cōme l'enseigne Galien. Mais l'abondance de sa nourriture paroist beaucoup mieux en ce qu'elle fournit à tant de parties tant diuerses & differentes, leur maintiēt le leur, & leur restitue leurs deffaults. Nous sommes nourrys des mesmes choses desquelles nous sommes construits, disoit Aristote ce grand Genie de nature : nous sommes composez de parties solides, humorales, & spiritueuses, ainsi nous l'apprend Hippocrate nostre souuerain dictateur, il faut donc que ce qui doit satisfaire à tout nostre corps soit doué des mesmes parties. Elles se retrouuent toutes ensemble en peu d'aliments; le vin seul les a toutes, & sur tous le plus coloré, qui par sa consistance plus crasse & grossiere, contribue aux parties solides : par sa fleur ou li-

queur repare les humeurs : & par ses vapeurs & odeurs remet & restablit les esprits espars & esparus. Ainsi n'y a il rien au vin qui ne nourrisse, & consequemment rien ou peu de superflu. Voila comme en gros vn abregé des commoditez qui nous reüssissent de la nourriture du vin, oultre lesquelles nous en pourrions produire vn cayer entier d'autres, s'il n'o^e estoit loisible de specifier par le menu, & tirer en ligne de compte toutes les dotes & graces particulieres que nous en ressentons en ceste seule qualité d'aliment, laquelle seruant cōme de furet, faict glisser & penetrer au plus profond de noz moelles la vertu medicamenteuse qui l'accompagne, ainsi que no^e verrons cy apres.

90-0690-0690-0690::0690-0690-0690-0690

*QUE LE VIN EST VN ALIMENT
vrayemēt salutaire & medicamenteux.*

CHAPITRE III.


LE sage a raison de dire que le vin beu moderément est la resiouissance de l'ame & du Corps, & la santé de l'un & de l'autre: Car le vin esueille & excite la chaleur naturelle, esiouit les esprits, fomenté l'humide radical, donne l'appetit, refait l'estomach debile, sollicite & a luance la concoction des viandes,

engendre vn bon sang, distribüe l'aliment par tout le Corps, ouure les obstructions, attenüe l'humeur pituiteuse, desseiche les humiditez superflües, purge la bile, prouoque le sommeil & finalement chasse la froidure du Corps. Voulez vous releuer l'embonpoint d'vne personne affoiblie, & extenüee par vne longue maladie? nourrissez la de bon vin: desirez vous d'entretenir vostre couleur viue & floride? l'usage du vin vous la conseruera. Voulez vous metamorphoser vn grand poltron en vn vaillant soldat? vn Demosthene, en vn Themistocles? ostez luy l'eau, & luy faite boire de bon vin, vous luy verrés changer son visage bleüme en vne contenance fiere & courageuse. Est il question de subtiliser vn esprit grossier? de façonner vn Xenocrate sur le moule d'vn Aristote? Il ny a rien qui ayt plus d'energie pour cest effect que le bon vin. Suivez donc la pratique des Poëtes Æschilus, Alcæus, Aristophanes, Anacreó, Ennius, & de beaucoup d'autres auquelz le vin apportoit vn esprit si asseuré, vne inuention si gaye & deliberée, vne veine si fluide quilz ne couchoient iamais si bien par escrit, que lors qu'ilz estoient remplis de l'influence de leur bon precepteur Bacchus. Car ayât le vin vertu d'eschauffer le Corps & l'ame, cōme dit Platon, il desploye les plis de l'ame, rēd le Corps penetrable, & ouure tous les pores de sorte que les imaginations le courent facilement, attirant quand & l'assurance la raison. Voila pourquoy le Philosophe Bias ne

voulut resoudre les ænigmes qui luy furent proposez au commencement du Bancquet; mais en différâ la resolution iusqu'après boire, disant qu'il scauoit bien que Bacchus estoit vn sage, & puissant Dieu; & que pour sa sapience il estoit nommé Lisien, c'est à dire desliât tous neuds, & voidant toutes difficultes. Aussi Lâprius se môstroit plus docte, plus aigu, & plus riche en inuention, quand il auoit beu, qu'il ne faisoit en tout autre temps, & disoit qu'il ressembloit l'encens à qui la chaleur fait rendre tout ce qu'il a de bonne odeur. Faut il resiouyr le cœur? effacer tout ducil? oublier tout soucy? Il n'est besoin d'aller iusques en Perse pour recouurer l'herbe solitaire Sissitieteris, mais sans sortir d'icy prenez seulement ceste medecine tant exquisite, par laquelle Thelemachus fut guaranty de toute la tristesse & fascherie, qu'il auoit conceu pour l'absence de son Pere Vlysses, Prenez moy (dis-je) du Nepenthe lequel ie ne veux interpreter avec Galien la racine qu'il appelle Oenopia: ny aussi la bourrache comme pense Plin: ny mesmes la force de l'eloquence, comme a estimé Macrobe: & beaucoup moins la composition que Diodore de Sicile dit auoir esté encor de son temps en vſage entre les femmes de Thebes en Ægypte: Mais ie pense avec Oribase, & Ruffustres celebres medecins que ce Nepenthe n'a esté autre que le bon vin, lequel (comme dit le sage) a esté donné dès le commencement aux hommes pour ioye & liesse. C'est pourquoy les anciens

faisoient sacrifices à Bacchus comme l'autheur & donneur de ioye. Qu'ainſy ne ſoit? voulez vous entreprendre d'adoucir le ſielleux chagrin d'un vieillard? d'amolir la dureté de ſes infirmités; & le faire reculer en arriere iuſqu'au printēps de ſon aage paſſé? Laiſſez les ſōges des ſectaires Chemiques; auſſy vains que les charmes de Medee, allaités moy ſeulement ce vieillard de bon vin vieil, & vous le verrez ſain & gaillard raieunir de iour à autre. La chaleur du feu rend le fer mol, ployable & maniable autant en fait celle du vin à ceſte dureté rigoureuſe de la vieilleſſe. Le bon vieil Philoſophe Zenon uſoit d'une autre comparaifon qui ſemble tirée de plus pres, l'eau douce (diſoit il) attrempe & adoucit l'amertume des lupins; & la douce liqueur du vin rabat & amoindrit ceſt aſpre fiel de mon aage: Mais ce n'eſt rien de la ioye, qui n'a les forces pour ſ'oppoſer à toutes les iniures de tant de contrariétés qui nous combattent, & de tant d'ennemis qui nous courent ſus à to⁹ moments; C'eſt icy où nous auōs plus affaire du ſecours du vin. Pline nous eſt teſmoing que ceux qui en ſont biē munys, ſont rendus auſſi forts & auſſi roids à ſupporter toutes ſortes de trauaux, que l'intemperature des Poles, ou de la Zone torride ſcauroit rendre ceux qui habitent naturellemēt ſoub leurs climats: Auſſy voyons nous que les nations qui ne boient que de l'eau, ou du laiēt, ou qui n'ōt autres breuages que bieres ou ceruoises, n'ōt les corps ſi fermes, ny ſi duits au labeur que les

autres qui se nourrissent de vin. Laissons à part toutes experiences pour satisfaire aux preuues de propositions si certaines, ne courons plus l'antiquité pour apprendre les graces & faueurs que nous pouuons ressentir de ceste liqueur gratieuse & fauorable sur toute autre. Aussi bien ayie peur si nous la vantons d'auantage au lecteur pour aliment, qu'il en preine si copieusement en santé qu'en estant desgouté, par apres il la rebute en maladie, & fasse difficulté d'en vser comme de medecine: Je croy neantmoins qu'il se trouuera peu de malades qui la refusent cōme desaggreable, mais plusieurs qui l'aprehenderont comme nuisible, contentons l'appetit de ceux qui la desirent, & leuons le soubçon aux autres.



*QUE LE VIN A PLUS D'EFFICACE
que toute autre sorte de medicaments.*

CHAPITRE III.



I nous voulons faire vn denombrement de toutes les parties du corps humain, nous n'en trouuons gueres à qui le vin ne confere quelq; vertu medecale. Car en premier lieu s'il est question des parties nobles, qui ne sçait comme le vin entretient & corrobore le cerueau, d'où s'ensuit par apres la viuacité

des actions qui releuent de ce principe, que nous appellons animales. Ce que recognoissant le Diuin Platon, disoit, que le vin est vne souveraine fomētation du cerueau, & des forces de l'esprit & de l'entendement. Le foye n'en reçoit pas moins de vertu, c'est ce qui entretient sa temperature luy fournissant vne substance conforme en qualité à la sienne, luy excite & accroist sa chaleur naturelle, par celle que nature luy a donné à cet effect : luy suscite ses forces, lors qu'elles se monstrent endormies en leurs fonctions, les resuscite lors qu'elles sont sur le poinct de mourir. Passons oultre, qu'y a il de plus cordial que le cœur de noz cœurs ? la n'en desplaie aux remedes Bezoardiques, & Theriaquaux, ie pense sans faire tort à la panacee, nepenthe, or potable, & aultres telles inuentions chimiques qu'il n'y a plus grand Antidot contre tous les assauts pestilents & venimeux que le bon vin. C'est ce qui a meu quelques Medecins d'escrire, que l'homme yure n'est iamais attaqué de Peste. Pline enseigne qu'au terroir de Thasie se trouue vn plan de vigne qui sert de Theriaque contre la morsure des serpents, beuuant de son vin ou mangeant de ses raisins. Mais quant à moy ie pense que non seulement ce vin de Thasie, mais aussi to^o autres ne fortifient pas seulement le cœur contre le venin des serpents, mais aussi qu'ilz le preseruent singulieremēt contre tous aultres poisons. Car ne plus ne moins que la Royne des cōpositions medicales, ceste

grande Theriaque d'Andromachus, peut estre indifferemment administree contre presque toutes sortes de maladies, chaudes & froides, encore qu'elle soit de temperature fort chaulde: aussi le vin [vraye Theriaque du cœur] se peut prescrire contre toutes indispositions du cœur bien que chaudes. Ainsi guerisons nous le feu qui nous ard par le mesme feu. Or si le vin est si profitable & necessaire à toutes les parties nobles, qu'en debuons nous moins esperer pour les autres qui despendent d'elles comme les ruisseaux de leurs sources? Hippocrate donne le vin contre la douleur des yeux; il appaise les infirmittez des reins & de la vescie avec le mesme, qui de sa subtilité se glisse & penetre dans leurs tuyaux, de sa chaleur fond ce qu'il y rencontre, renforce la chaleur expultrice pour s'en descharger. C'est le vin, qui est la matiere principale, & plus assure instrument de la generation, il multiplie la semence, l'enfle & viuifie d'esprits fretillants, dispose la matrice à la conceuoir & retenir, engendre vn sang loüable, pour la reuestir de ses parenchymes: Bref c'est le vin qui desbouche toutes les obstructions internes & externes, passant au trauers des pores plus cachéz à nos sens, qui nous releue des bailleuëts, horreurs & anxietés ordinaires qui nous importunent. Voila l'opinion d'Hippoerat. Gallen y adioute encôre que quelques vins fortifiet à merueille l'estomach & les intestins, que les vns retiennent le ventre trop lasche, les autres laschent le trop

le trop retenu, qu'aultrefois ilz mitiguent la douleur de teste quand elle. prouient des vapeurs esleuees des humeurs qui croupissent dans le fond de l'estomach, & que l'estomach mesme en est fort soulagé en ses douleurs. Que le vin doux odorât secourt la poictrine en toutes ses afflictions: que c'est vn bon remede aux lassitudes, & aux conuulsions, & qu'il les guerit en eschauffant les nerfs. Si vous ne vous contentes de ces rapports asseurés des plus fidelles tesmoins de l'Eschole de Medecine, ie vous en produiray d'aultres qui sont sans reproches. Mais quelz fruiçts de tant d'auctorités? recueillôs plustost ceux du vin. Puis monstons comme non seulement il foisonne de soymesme en vertus, mais que facilement il s'imprime celles de toutes sortes de medicaments pour durs & solides qu'ilz soyent pour les imprimer en nos corps.

Le docte & graue du Bartas nous les a ramassees presque toutes en ce peu de vers comme en vn faisceau.

Le vin pris par compas les esprits viuifie,

Enhardit vn cœur mol, le cerueau purifie,

Resueille l'appetit, redonne la couleur,

Les conduits desopile, augmente la chaleur:

Engendre le pur sang, le trouble subtilise,

Chasse les excrements, l'entendement esguise

Espierre la vescie, & preserve nos corps

Du Lethe ia voisin de cent sortes de morts.


Vous auez entendu briefuement les effects

du vin simple, escoutez ceulx du vin mixtionné. Le vin acieré c'est a dire auquel on aura esteint l'acier flamboyant, sert à la ratele obstrue & scyrrheuse, reprime la sueur, fortifie les dents, affermit les genciues, ayde aux reins, est profitable aux venes, & vniuersellemēt aux ioinctures de tout le corps. Que ne faict pas le vin dans lequel on a infusé la limure d'acier l'espace d'une seule nuit? Le Rhabarbe, Lagarie, le Sené (i'apporte ceux icy en ieu comme les plus familiers) purgent ilz iamais si bien qu'avec le vin?

Le vin trempé dans la coloquinte purge doucement les corps endurcys des nochers. Les iuleps préparatifs de l'Allemagne (lors qu'il ny a point de fiebure) ne se font que par le vin.

La Theriaque mesme ce chef d'œuvre des boutiques anciennes & modernes ne se peut faire sans le vin. Si vous recherchez de moy vn denombrement complet des Antidotes, Syrops, Iuleps, infusions, electuaires pilules, clysters, gargarismes, liniments, onguents, fomentations, parfuns, epithemes, & aultres semblables, qui pour estre fidèlement dispensés, ou sainement administrés requierent l'adiunction du vin, ie m'enuyroy moy mesme, & vous quand & moy, auant que satisfaire entierement à vostre curiosité. Il sera plus vtile & plus à propos d'estendre nostre discours sur les maladies contre les-

quelles ce remede se trouue propre & efficace, puis que desia nous y sommes tōbez.



EN QUELLES MALADIES LE
vin peut seruir de remede.


CHAPITRE V.



Es anciens traitāts des maladies contre lesquelles le vin faict son effort, & rend preuue de son pouuoir, tiennent qu'il est fort bon à ceux qui sont empoisonnés de Champignons, de Ciguë, de Coriandre, d'Aconit, de Gomme, de Chamaeleon, d'Opium, ou de vif argent: qu'il est singulier aux picqueures des scorpions, des mousches à miel, des mousches guespes, des frelons, des araignes phalanges, aux morsures des serpents. Et specialement de ceux qu'on appelle Hæmorrhoides, & d'autres que les Grecs nomment Prester ou Dipse, & generallyment à tous venins mortels ou par corrosion, ou par froidure excessiue. Bacchus (disent les Mythologes) se reposant à l'ombre soubz vn arbre fust mordu à la iambe par vne enuoye ou amphysbene (cest vn serpet effroiable à double teste & double venin) mais s'esueillant il la tua d'vn sarmēs qu'à la bonne heure il rencontra près de

foy d'aautant que cest animal ne se peut tuer par aultre chose que par bois de vigne, ce qui nous signifie assez l'admirable vertu de la vigne & de son fruiet contre les venins des serpents voire des plus pernicioeux & cruelz. Mais ce n'est pas seulement contre ces puissants ennemys de nos vies, que le vin desploye sa vertu, il s'attaque aux moindres pour enpescher leur accroissement, rebarre les plus violentes, & destruit les plus opiniastrés. En particulier il sert grandemēt aux ventosités du Diaphragme, aux distensions & erosions des parties præcordiales, & voisines du cœur, aux vomissements & desuoyements d'estomach, aux fluxions qui tombent au ventre, & aux intestins, aux dysenteries, aux toux inueterées, & à toutes fluxions vehementes. Appliqué sur le tetin gauche avec vne esponge ou autrement, il est souuerain aux foibleesses de cœur. Il esueille & euertue le poulse languide, dissout le laict caillé dans l'estomach, & destorne les accidents qui en prouiennent, attrempe les prurits & erosions de la vescie, consolide & cicatrise les playes, modere les inflammations, deterge, nettoye, corrige la malignité des vlceres sordides, corrosifs, ambulatoires & rhumatiques. L'auroy peu de loisir & trop de subiect, si i'entreprenoye de rapporter non par nom toutes les maladies qui se guerissent par le vin, duquel comme d'un Arsenal de vie, nous pouuons

tirer nos prouisions & deffences contre les aduersaires de noz santés. C'est pourquoy il fut anciennement commandé par l'Oracle de nômer Bacchus Dieu sain & salubre: aussy les anciens le tenoient ilz pour grâd & souuerain Medecin, côme aucteur d'un si grand & souuerain remede, duquel la puissance indomptable & qui dompte tout, se peut esgaller, & parangonner à celle des Dieux selon le dire d'Asclepiades. Mais tout beau Messieurs ne vous hastez pas de boire, voicy vn refrain.



*QUE LE VIN EST VN APPAST
tresdangereux quinous guide à l'Yvresse.*

CHAPITRE VI.

DE tout les discours precedents l'on peut conclure avec asseurance que le vin entre toutes sortes d'aliment est le plus exquis, entre tous breuuages, le plus agreable, de toutes liqueurs la plus pretieuse, & de tous medicaments le plus salubre. Mais c'est vn grand cas qu'il n'y a chose tant recommandable pour ses vertus, qui d'autre costé ne soit à craindre, pour les inconueniens & dangers qu'elle porte quand & elle, qui se tiennent comme

clos & couverts sous le voile de ses perfections pour piper & surprendre les maladeux, Belle inuention de nature pour nous tenir en haleine, & donner exercice à la raison, afin qu'elle demeure sans cesse sur ses gardes recognoissant les alarmes & assaults continuels qui luy sont liurez, par ceux mesmes de qui elle a plus de confiance, & desquels elle ne peut se passer. Ceste nature se plaist du tout à la contrariété, faisant souuent naistre des effects du tout contraires d'un mesme suiet, la vie & la mort d'un mesme principe, opposant le mal à son bien, pour faire d'autant plus reluire & esclatter, non tant son pouuoir, que celuy de nostre cognoissance, & de nostre liberte. La terre ne nous produit point seulement l'angelique, la melysse, le chardon benit, le chammaraz, la scorzonere, & aultres telles plâtes tressalutaires, mais elle mesme aussy nourrit la cygüe, l'aconit, la mandragore, le napellus, poisons trespornicieux au genre humain. Si la ronce nous resiouit par l'odeur & beauté de la rose qu'elle porte, elle ne laisse de nous molester par la pointure des espines, qui l'enseignent de toutes partes. Le traual des Abeilles nous repaist des saueurs delicieuses de leur miel, mais la pointe de leurs esguillons nous empesche de iouyr librement de sa douceur. De mesmes le vin n'a rien en soy qui ne soit sauoureux & delicieux à nos sens, qui ne nous promette de

l'aduancement à nos santez, mais ce sont autant d'amorces aux sens des insenses qui ne veulent se rendre à la raison, pour leur faire perdre tout sentiment. Mnesitheus ancien Medicin Athenien, auoit bien raison de croire que le vin estoit le plus grand bien, & le plus grand mal ensemble que les dieux eussent iamais donné aux hommes, confidez s'il vous plaist, combien la mediocrité est requise en tout & par tout comme sans sa conduite nulles des actions humaines ne peuvent estre louables ny vertueuses, nulles des choses crées pour nostre soulagement ne nous peuvent estre commodés ny profitables. C'est l'eau du ciel qui de sa douce rosée abreuant la terre luy fait esclorre tant de belles & bonnes plantes, les esleue, les nourrit heureusement, multiplie leurs fleurs, leurs fruiets, & leurs semences. C'est la mesme qui d'un torrent impetueux les flectrit, les abbat, les pourrit, & les moissonne. Le vin n'en fait pas moins en nous selon qu'il nous est diuersement appliqué: sy cest par mesure, vous verrez foisonner nos corps en toute sâté, l'accroistre de iours en iours en toutes sortes d'actions saines & vigoureuses: si vous en vsez desmesurement il en réussit aussy tost vne iliade de malheurs, ses fleurs sont vn desgoust du vin mesme, & de toute autre viande, appesantissements d'estomach; nausées & vomissements: les fruiets, sont les douleurs, les

amertumes, & toutes les miseres que les Poetes attribuent à Pandore. Les plus miserables & deplorables de tous sont l'Yuresse, & l'Yurongnerie, comme nous ferons veoir à l'oeil par le tableau que nous vous en dresserons.

Et afin de ne vous fouruoyer en ceste speculatiō autāt agreable qu'vtile, ie veux vous dresser la veüe de suite en suite sur les obiects que ie pretends vous despeindre, ie vous descriray premierement l'Yuresse & son essence, en apres ie vous descouriray ses appasts, ses embuches, ses effects, entre aultres l'Yurongnerie, le moyen de s'en præsuer, & en fin la guerison. Mais auant que vous conduire à la chose mesme ie desire que vous appreniez son nom.

*DE L'ORIGINE, SIGNIFICATION,
& difference de ces mots Yure, & Yurong-
ne, Yuresse, & Yurongnerie.*

CHAPITRE VII.

LEs plus esueillees esprits de ce temps, & plus curieux de la langue Françoise ne se trouuent d'accord entre eux, touchât l'Ethimologie, ou deriuation de ces mots Yure, & Yuresse, ne consequen-
ment de ces aultres Yurongne & Yuron-

gnerie : d'autant que les vns les veulent
puiser de la source latine, les aultres les
tirent de la langue grecque : aucuns, qui
n'ayment d'aller à l'emprunt estimants leur
langue naturelle assez riche & feconde d'elle
mesme, les font purement françoys, Ces
derniers se fondent sur leffect que la semen-
ce de l'herbe dicte Yuroye produit en nous,
concluent que comme sa force engendre les
mesmes accidents que l'Yuresse, aussy que
son nom a engēdré celui d'Yuresse & d'Y-
urongnerie. l'en entends icy murmurer quel-
ques vns des plus delicats qui s'ombragent
que ie vueille auctoriser de moymesme le
nom d'Yuresse, & le trouuent nouveau au-
pres des François. le les trouue bien plus
nouveaux en leur langue, & en la lecture
des bons aucteurs, de se rendre ignorants
d'un mot si commun, & si bien receu de
longtemps des mieux enlangagez. le me
contente de leur mettre en contrequare ce
Ciceron François, c'est honneur de nostre
langue, le parangon de tous interpretes,
l'unique Amyot: ilz ne peuuent me repren-
dre sans le reprendre. Voicy sa version au
septieme liure des propos de table de Plu-
tarque question dixieme que i'ay choisi en-
tre plusieurs aultres : comme Theophrastus
souloit appeller les boutiques des Barbiers
des banquets sans vin : aussy y a il vne Y-
uresse sans vin triste & malheureuse. Voila
le mot d'Yuresse auctorisé d'un personnage

qu'ilz n'oseroient contredire : mais quel inconuenient que nous disions d'Yure Yuresse comme d'Yurongne Yurongnerie ? ceux qui le veulent rendre françois de son origine se portent à mon aduis plustost au son de la diction, qu'à l'essence, & à la verité de ce qu'elle signifie. Car ie ne voy point pourquoy l'Yuresse prendra plustost son nō de l'Yuroye que l'yuroye de l'Yuresse ; veu que l'Yuresse est plus particulieremēt attribuee au vin qu'à l'Yuroye : & mesmes que l'on n'appellera iamais en façon vulgaire de parler Yuresse (si ce n'est par metaphore) l'accident prouenant de l'Yuroye. Aussi est ce à bon droit que ceste opinion est contrariee par les plus scauants, qui s'attachants plustost aux choses qu'à la consonance des parolles, veulent que l'Yuroye soit dictē d'Yuresse, autrement l'on pourroit, chacun à sa poste, forger de nouveaux noms pour exprimer la mesme chose, tiréz de l'herbe dictē Cyclaminus, ou de l'Opium, ou du Iusquiamē, ou de beaucoup d'autres simples qui enyurent.

Ceste opinion neantmoins a autant de vray semblable que l'autre qui veut reuestir ces dictionns d'un habit gregeois, car encor que beaucoup de dictionns françoises soient puisees des Grecs, & ce principalement depuis l'enuahissement de la Grece par les Gaulois Senonois, sous la conduite de leur Capitaine Brenno, qui à leur retour ont peu transplanter au terroir François beau-

coup de dictions grecques, lesquelles par apres soigneusement cultiuees fleurissoient encor entre les Druydes lors que Iules Cesar, ce general dompteur des Gaules & de l'uniuers y arriua. Neantmoins de tant de dictions grecques qui semblent fauoriser ce party, voir mesmes au contentement des opinants, il n'en y a point qui leur vienne plus à gré que celle de *ὑβρις*, c'est adire iniure, incontinence, petulance, ou contumelie. Mais les effects de l'Yuresse signifiéz par ce seul mot, ne peuuent suffisamment conclure à leur intention; & si tant estoit, il eust faillu, pour mieux en tesmoigner la source, garder la naifue façon d'escrire & de prononcer le mot *ὑβρις* qui est avec aspiration, laquelle est si curieusement obseruee entre les Francois, qu'au lieu d'une marque seule dont vsent les Grecs, ilz luy ont destineez vne lettre particuliere. Mais quelle raison plus forte auons nous de nommer plus tost Yuresse, le vice que nous appellons Yuresse, que plusieurs autres vices & presques tous qui le meritent, à cause des mesmes effects qu'ilz produisent, si nous le voulons prendre du mot *ὑβρις*? n'en demeurons donc deormais non plus redevables aux grecs, qu'à ceux de nostre nation; receuons ce mot pour primitif, si ce n'est que nous voulions fauoriser le party de ceux qui le font latin, & assuret qu'il vient d'Ebrius.

La ſignification des deux dictions ſe rapporte à vne meſme choſe & la conſonance n'en eſt pas fort eſloignée. Que ſ'il y a quelque petite diuerſité de voix, elle n'eſt pas plus remarquable qu'en beaucoup d'autres dictions françoiſes, leſquelles ſans aucune controuuerſe ſourcent de la langue latine. Ores ſi les doctes ſont differents touchant l'origine du mot yure, pour le moins ſont ilz bien d'accord quand à celui d'Yurongne: car le commun conſentement le fait naiſtre de celui d'yure, tant la conſonance ſ'y accorde, & la ſignification auſſy. Mais il n'importe de beaucoup ſi nous habillons ces dictions à la Françoïſe, ou autrement, pourueu que nous tombions d'accord touchant leur eſſence, & que l'on compreigne le ſuieſt de noſtre traicte. Comme donc nous appellons yure celui qui pour auoir trop beu manque en l'vſage de la raiſon, & de toutes les actions princieres, ou pour le moins de pluſieurs d'icelles: ainſi l'Yureſſe nous ſignifie l'accident qui arriue de la trop grande quantité de vin ou autre breuuage ſemblable, & corrompt la raiſon, la memoire, & autres fonctions animales, ou quelqu'vnes d'icelles, ou pour le moins les depraue, & diminue. D'où vient que l'on voit trouble & double, que l'on beſgaye, l'on ne peut marcher droit, l'on ne ſe peut ſupporter, & en vn mot que l'on ſe monſtre intéreſſé ou en toutes, ou en la meilleur partie des actions

animales.

Or il y a tant d'affinité entre ces deux dictions yure & yurongne, tant à cause de la deriuation, signification, & consonance, qu'il semble quasi qu'elles ne signifient qu'une seule & mesme chose. Et de fait encor que plusieurs recognoissent quelque difference entre elles, neantmoins ilz hesitent en cest endroiect, voyants que le mot de sobre est opposé au mot yure, & yurongne: dont ilz forment leur argument, que puis que le mot de sobrieté ne signifie qu'une seule chose, aussy les mots d'Yuresse & Yurongnerie n'en peuvent signifier plusieurs différentes, ou aultrement la reigle des Philosophes seroit faulse, qui enseigne que toute opposition est d'une seule chose à une aultre. Il ne faut toutesfois se laisser emporter legerement à ceste opinion esleuee sur vn fondement mal asseuré. Car encor que ce mot de sobre ne semble n'estre qu'un (le semblable se doit entendre de sobrieté) si est ce qu'il a double signification, denotant ores celuy qui fuyt le vice d'yurongnerie, ores celuy qui actuellement est exempt de l'effort du vin, encor qu'aultrefois il s'y soit laissé surprendre.

Que si les François signifient l'un & l'autre par une mesme voix ou diction, cela se doit imputer au default de leur langue, laquelle en cest endroit se retrouue plus defectueuse que la latine, qui distingue l'acte de l'habitude par ces deux mots, sobrius, &

sobriofus, diametralement opposés à ces deux autres, Ebrius & Ebriofus. Puis dōc qu'il y a difference entre l'yure & l'yurongne, & cosequemment entre l'yuresse & l'yurongnerie, il est besoin de la faire sortir au iour, afin de proceder plus distinctement. Mais premierement il me semble bon d'advertir ceux qui ont moins d'estude, que l'yurongne veut dire vn homme subiect au vin, & qui fait mestier ordinaire de s'enyrurer: & que l'yuresse signifie le vice ou affection de celuy qui de faict est surpris de vin. Ces deux qualitez different entre elles comme l'habitude, & la passion, l'yurongnerie estāt l'habitude de l'homme addonné au vin: & l'yuresse la passion de celuy qui est surmōté par la force. Toutesfois delaisant les plus serieuses differences que les Philosophes y recognoissent, comme sont celles qui remarquent que l'habitude determine la nature de son suiect, & que la passion modifie le mouvement passible d'iceluy; que l'habitude s'acquiert par exercice frequent, & que la passion se produit par l'action de quelque cause exterieure. Nous nous contenterōs de proposer les plus vulgaires, lesquelles neantmoins seront suffisantes pour l'esclaircissement de nostre suiect. Donc l'hōme yure differe de l'yurōgne, d'autant qu'il ne peut estre dit tel que lorsqu'il est surpris de vin, mais l'yurongne se peut dire en tout temps, soit qu'il soit yure ou non, L'homme peut estre dit yure

pour estre vne seule fois prins de vin, l'yurongne ne se peut reputed tel que par plusieurs recidiues à son vice. L'homme yure pátit principalement en son corps, le vice de l'yurongne sēble plustost infecter l'ame. L'homme peut estre yure sans estre yurongne, & au contraire il ne peut estre yurongne sans auoir este yure auparauant, & finalement l'homme yure est quelquefois excusable, à cause qu'il peut s'estre enyuré par mesgard, & l'yurongne est tousiours vituperable à cause de sa gourmandise. Voila quant aux principales differences de ces deux affections, desquelles nous traiterons cy apres plus amplement cōmençant par l'yuresse des bestes.

DE L'YVRESSE DES BESTES.

CHAPITRE VIII.

LE Philosophe traictāt des ornemēts & perfections d'un docte & serieux discours, enseigne que pour le bastir tel il faut deuant toutes choses se rendre clair & intelligible, en cuitant soigneusement toutes les ambiguites, & exposant fidelement toutes les differēces de la chose de laquelle on traite, ou autrement ne s'en peuuent ensuyure que disputes & controuerses, lesquelles en fin s'es-

peffissantes en vne nuë de tenebres, obscur-
eissent le iour & la clairté, qui doibt re-
luire on l'oraison. Suyuons donc la do-
ctrine nous auons inseré ce present, & le
suyuant chapitre pour garantir le lecteur de
l'erreur & ambiguité qui luy pourroit
suruenir touchât nostre subiect, en l'aduer-
tissant qu'il y a beaucoup d'affections qui se
peuvent dire, & se disent vulgairement
yureses, esquelles mesmes les bestes brutes
sont subiectes, mais nostre intentiõ n'est pas
de nous estendre sur toutes ces especes,
nous nous contenterons de traicter de cel-
le qui est particuliere aux hommes, & leur
arriué par l'exces du vin, ou de quelque-
aultre breuusage seruant de nourriture or-
dinaire. Je ne doubte point icy que plusi-
eurs ne doibuent faire difficulté d'admettre
l'enyurement des bestes, & qu'il ne le doib-
uent trouuer aultant ou plus estrange que
l'Asne d'Apulee qui contre l'ordinaire de
son naturel, se monstroir fort afriandé aux
pâtisseries, saulpiquets, saulses aigrés, &
bons vins au grand estonnement de tout
le monde. Car quelle apparence trouuez
vous diront ilz, que les bestes puissent s'ëy-
urer, puis qu'elles ne goustent vin ny aul-
tre breuusage enyurât, ny pasture quelcon-
que de mesme force? que si elles se portoient
de leur inclination naturelle á telles sortes
de breuages, á la verité la nature ne leur
seroit pas mere (contre l'aduis des mieulx

Philosophants) mais bien marastre, leur donnant vn appetit contraire à leur santé, sans choix ny discretion de ce qui leur est plus vtile, & consequemment leur presentant le poison pour pasture, le mal en apparence de bien, la mort pour la vie.

Et d'auantage si nous admettons, que les brutes se puissent enyurer, nous serons contraincts aussy d'accorder que par la frequēte recidiue en ceste affection elles pourront estre yurongnes: tellement que nous eslançant dans vn præcipice d'absurdités, il faudra bon gré malgré que nous en ayons, les recognoistre pour vertueuses, & vitieuses (veu que l'yurongnerie est vn vice & bien notable) ce que toutesfois ne peut compe-ter à aucun des animaux finon à l'homme seul. Mais quoy si l'yuresse attaque principalement la raison affoiblissant ses forces, & quelquefois renuersant tout son pouuoir, comment pourrōs nous dire qu'elle se puisse retrouver aux animaux, esquelz n'y a vn seul brin de raison? Il faut donc necessairement conclure ou que les bestes sont raisonnables, ou qu'elles ne sont aucunement subiectes à ceste affection, & que les accidēs semblables qui leur suruiennent, se doibuent plustost appeller estourdissement, perturbation & maladie de cerueau qu'enyutement ou yuresse. Mais s'il plaist aux fauteurs de ceste opinion me prester tant soit peu de loisir, ie leur prouueray si clairement & as-

ſeulement le contraire, qu'ilz ne feront par apres aucune difficulté de ſe ranger à mon party (ie diſ aſſeulement) d'autant que là où l'experièce nous enſeigne, il n'eſt beſoin de raiſon, & là où le ſens de la veuë nous conduit, nous n'auons que faire de cerueau pour guide. Premièrement nous ne pouuons reuoquer en doubte que les beſtes ne boient aulcunefois du vin, & que quelqu'vnes n'en ſoient fort friandes, & d'aultres breuages enyurants, d'où par apres elles peuuent facilement encourir ceſt accident. Le fidel hitorien François nous rapporte qu'à la bataille de Montleheri ſe trouua vn cheual extremement laſſe, & vieil, lequel ayant mis le muſeau dans vn plein ſeau de vin, qu'il rencontra d'auanture, le vuida entierement, dont il ſe trouua plus fray, plus gaillard que iamais. En faueur des moins rufez en matiere de courterie, ie vous prie qu'il me ſoit loifible de vous raconter ce que i'ay remarqué en quelques maquignons Allemands. Ie les ay veu preſenter du vin en quantité, & du meilleur à leurs cheuaulx, qui en gouſtoient auſſy volontiers que leurs maiſtres, & s'en monſtroient par apres plus ſouples, plus promptes, & plus courageux, voire quelquefois yures & furieux. Ce n'eſt d'aujourd'uy ſeulement que cela ſe fait, il a eſté pratique par les anciens Romains, leſquelz ſelon le recit de Pline contraignoient quelquefois leurs iuments à boire du vin.

Ce ne sont les cheuaultx seuls qui en boient, il se nomme quantité d'autres animaux qui ne l'abhorrent pas: pour preuue de cecy, Pline escrit que la Mule qui aura beu du vin, sera gardee de ruer, & que tous quadrupedes au pied forchu ne croissent iamais si on les accoustume au vin. Nous lisons dans Ioseph que Ptolomée surnommé Physcon frere de Ptolomée Philometor Roy d'Égypte fit prendre & garroter tous les Iuifs qui estoient en sa puissance, & les fit exposer tous nuds au deuant de ses Elephâts qu'il auoit fait enyurer, afin que les Iuifs fussent plus cruellement brisés, foullez, & meurtrys. Comme donc les animaux boient quelquefois du vin, aussy peuuent ilz par mesme moyen encourir l'yuresse.

Ainsy la Vipere, & la Dipse s'enyurent & se noient dans le baril plein de vin duquel elles se monstrent fort friâdes; ainsy le Singe pris du vin qui luy est cauteleusement présenté, se laisse prendre aisement par les chasseurs: ainsy avec la mesme ruse les Leopards se prennent au pays d'Afrique. Opian escrit que les chasseurs Affricains descouurans quelque fontaine où les Leopards soulent boire, y jettent force vin pour infecter son eau, & la rendre enyurante; Les Leopards ne laissent d'en boire, s'enyurent, puis se iouent entre eux esgaillardis de ceste liqueur, en fin s'endorment profondement, & ainsy sont attrapez sans peine & sans crainte.

Mais quand bien les brutes ne gouſteroiēt iamaïs vin ny autre breuuage enyurant, & que de ce coſté ilz ſeroient garantis de ceſte paſſion, ſi eſt ce qu'ilz ne laiſſeroient d'encourir le meſme accident par beaucoup d'autres manieres: ſoit par fumees, ou vapeurs exterieures, ſoit par les corps ſolides qu'ilz auallent leſquelz ont vertu d'enyurer. Les peſcheurs ſçauent dix milles paſtes & amorces qui enyurant le poiſſon, leur ſeruent de rets & d'hameçons. Il me ſouuiēt d'auoir autrefois veu grande quantité de poiſſons enyurés par du bois de cheſne récemment couppé, lequel eſtant poſé dās vn ruiſſeau pour dresser vn moulin, infecta l'eau de couleur, & odeur eſtrangere, que les poiſſons ne peuvent ſupporter.

Je n'euſſe oſé rapporter en ceſt endroit ce que j'ay leu dans Ariſtote, n'eſtoit qu'Ariſtote meſme la laiſſé eſcrit. Les mouches à miel (dit il) ſont tant offencees de l'odeur des onguents, & parfuns, qu'elles s'en enyurent & pour ceſte occaſion elles traitent fort mal, & chassent hors de leurs ruches celles qui ſont parfumees, craignant qu'elles ne viennent à infecter, & enyurer toutes les autres. Mais à qui eſt incognuë la vertu du coc, ou baye de Leuant, laquelle eſt ſuffiſante d'enyurer tous poiſſons grands & petits? Qui ne ſçait que les pourceaux s'enyurent en mangeant du Iuſquiamo, ou du marc de raiſins récemment preſſurés? Les plus ſignalés

Medecins d'Italie nous assurent, pour en auoir veu l'effect, que la ciguë mægee enyure incontinent les Asnes. Le Pline Grec Athenæe nous rapporte que les corbeaux, & les Chiens s'enyurent facilement en mangeant vne certaine herbe qui s'appelle Oenutha (autres lisent œnothera, & la tiennent pour le Rhododaphne des recents) les chasseurs s'en seruent à la chasse des Corbeaux. Vous estonnez vous de ces discours? Je trouue bien plus estrange que le scorpion tombe demy mort par le seul atouchement de la racine d'aconit: la truë se faict malade en flairant la mariolane; l'odeur du Dietâ chasse les bestes venimeuses, & sa seule appension les tue: pourquoy donc ferons nous difficulté de croire que quelques animaux puissent estre surprins de plus legers accidents en beuuant, mangeant, ou odorant quelque corps qui ait vertu de les produire? Mais pourquoy l'affaction que le vin peut causer à vne brute ne sera du tout telle & semblable à celle qu'il cause à l'homme? n'est ce pas la mesme partie affligée? ne sont ce pas les mesmes symptomes qui suruiennent à l'vn & à l'autre? Ouy à la verité. Faudra il pour cela que les bestes accusent leur nature comme desnaturee, d'auoir si mal pourueu à leur vie & nourriture? non certes, ce n'est pas la qualité seule des aliments qui opere, c'est sa quantité excessiue. La nature leur a donné le pouuoir d'agir & nourrir

tout enſemble & les hommes & les beſtes, les vns & les autres abuſants de leur nourriture, ſe reſentent de leur action. C'eſt ſe qui condamne leur gourmandiſe, & la punit juſtement. Nous ne deuons pas auſſy inferer que les beſtes pour eſtre ſubiectes à ſ'en-yurer, ſoient ſubiectes au vice d'yurongnerie & conſequemment raiſonnables, comme capables du vice & de vertu, ainſy que les arguments deduits au commencement ſemblent prouuer. Nous entendrons au ptoꝓꝛs de noſtre diſcours vne pleine reſolution ſur ce different: il ſuffira pour le preſent que le lecteur ſçache que l'en-yurement, ou yureſſe ſe peut prendre en trois ſortes. Premierement en vne ſignification ample & generale, denotant vniuerſellement toutes perturbatiōs & alterations du cerueau, cauſees des vapeurs qui ſ'eſleuent des corps exterieurs ou interieurs, lesquelles venant à le rencontrer & ſ'emparer de ſon ſiege luy renuerſent toutes ſes fonctions ou bonne partie d'icelles pour quelque temps.

Autrefois l'yureſſe ſe prend plus proprement pour ces affections que nous voyons aux perſonnes yures prouenant de quelque breuages alimetaires ſoit qu'elles ſe retrouuent aux hommes, ou en quelque autre eſpece d'animaulx, elle ſe prend encor plus eſtroitement & diſtinctement pour vne paſſion qui touſche l'entendement particulier & propre à l'homme, ſeul entre tous

animaux doué de raison, subiect de vertu, & de vice, de merite, & demerite. En la premiere signification elle est trop generale, s'estendant à tous subiects capables, & pour toutes causes. En la seconde les bestes peuuent proprement estre dictes enyurees: en la derniere l'homme seul est subiect de l'yuresse & de l'yurongnerie. Nous auons parlez de la secóde sorte iusques icy, nous parlerons de la premiere & derniere es chapitres qui suiuent, où nous dresserons tous nos discours aux hommes seuls pour les retirer du danger. Et afin qu'ilz cognoissent de quel costé ilz se tiendront en garde monstrons leur qui les peut offencer, & comment.

EN COMBIEN DE FACONS L'HOMME
se peut enyurer.

CHAPITRE IX.

Ln'estoit ia besoing que l'homme pour satisfaire à sa gourmandise recherchat curieusement tant de diuerses sortes de breuages qui enyurent, ny mesme que son industrie passast sy auant que de trouuer l'inuentiõ de rendre l'eau enyurante en la preparant, cuisant, & tournant, en ceruoise. Car nature qui semble quelquefois l'auoir

produit comme vn subiect de mocquerie & risée luy auoit mis en main trop de moyens pour troubler, & renuerfer ses plus belles fonctions par l'yuresse qu'elle luy procure, tantost par la bouche, tantost par les narines, & ce qui est bien plus estrange, quelquefois par les oreilles. Herodote pere de l'histoire escrit que les Massagetes ont des arbres qui portent fruiçts de telle nature que si vous en iettez sus le feu, tous ceux qui en seront proches demeureront yures de l'odeur, comme s'ilz estoient pleins de vin & plus vous ietterez de ces fruiçts sur le feu, plus vous espenderez leurs odeurs, plus vo^s accroistrez l'yuresse des assistants, iusques à la qu'ils seront contrainçts de chäter & dâser. Cecy ne sèblera pas trop esloigné de créace à ceux qui scaurõt la vertu de la Nicotiane qui de sa fumee recëue par le Palais, & les narines produit vn mesme ou quasi sèblable effect aux prebstres des Indières Occidètaux.

Si on iette dedäs le fourneau d'vne estuue de la graine d'yuraye, elle exhale des vapeurs qui apportent des douleurs & pesanteurs de teste, des esblouissements, & autres telz accidents d'yuresse à ceux qui se lauent ou estuuent. Nous scauons par experience annuelle que le vin nouvellement boüillant & le marc recent des raisins principalement resserrez dans vne caue, enyurent par leur odeur & fumee ne plus ne moins que le vin beu excessiuement.

De ceste façon furent enyurez Pholus, & les autres Centaures ses compagnons, ouurâts vn muid de vin pour bienueigner Hercules qui les visitoit: car l'odeur qui en sortit fut si forte & genereuse que se glissant des narines au cerueau elle leur renuersa tout l'entendement. Mais quelle merueille qu'une exhalaison aye le pouuoir de susciter ces allarmes que ne sont que le chemin à la mort, si elle suscite d'un prinfault la mort mesme? il y a des champignons si veneneux que de leur odeur seule ilz tuent ceux qui les viennent à flairer, comme à escrit Rhasis. Le charbon nouvellement allumé dans vne chambre closte suffoque ceux qui en respirent la fumee mortelle, l'Empereur Iouinian & plusieurs aultres en on faict l'espreuve & en sont morts. Il y a des bois infects qui n'en font pas moins. Le Seigneur Francesco Ordelafo Capitaine de Forly auoit vn poison si contagieux, qu'estant ietté sur du charbon ardent nul ne pouuoit fuyr la mort qui eust serty son odeur. Les histoires modernes font elles par mentiõ de flambeaux, de fleurs, de bouquets, empoisonnez? qui n'a ouy parler de la grotte du chien qui est pres de Pouzole? c'est vne petite cauerne de laquelle sort vne vapeur si maligne, que si vous y tenez vn chien l'espace d'un bien peu de temps, vous le verrez sans sentiment & sans mouuement estendu comme mort, & mouroit infailliblement sans la faire longue

si l'on ne le faisoit reuenir promptement à soy, le plongeant dans vn petit lac voisin. Le victorieux Roy Charles huitieme ayant cōqueté le Royaume de Naples voulut contenter sa curiosité par l'experience de l'effect de ceste maligne vapeur sur vn asne, qui introduit dans ceste grotte en sa presence, demeura incontinent estourdy assoupy & demy mort : de telle malignité estoit infectee la fosse Situs auprès de Hierapolio de Phrygie nommee la gueule Plutonique dans laquelle Strabo ayant mis des passereaux les en retira morts incontinent. Ores si les vapeurs externes sont si puissâtes que d'engēdrer comme en vn moment tant de fascheux accidents, à plus forte raison le seront quelques substances plus materielles prises & receuës interieurement ou par la bouche ou mēme par les oreilles : comme l'huile de la graine de iusquiamo, laquelle (comme dit Pline) tenant du naturel du vin ou du venin, trouble le cerueau, & cause douleur de teste à qui elle est instilee dans l'oreille, Mais beaucoup plus souuent & plus facilement l'yuresse trouue l'entree dans nos corps par la bouche, & avec plus d'instrumēts differents, entre lesquelz quelqu'vns rapportent l'encens, la mēlysse, & les anacardes, qui par le trop frequent vsage offensent le cerueau, & troublent l'entendement.

Democrite aux liures de magie, intitulés Chirocineta, dict que le long du fleuve Indus

croist vne herbe dicté Thalassegle, & Potamantis, laquelle transporte le sens à ceux qui en prennent, & leur faict voir des visions sauuages & estranges. Garcias ab horto Medecin Portugais décrit vn fruit Lenantim qu'il appelle Fanfel, ou Areca, ressemblant aucunement à la noix muscade, sinon qu'il est vn peu plus petit, lequel estant deuoré auant sa parfaicte maturité enyure, & quelquefois stupefie tellement les sens, que quelqu'vns en māgent pour ne point ressentir les douleurs des torments. Le mesme Autheur traitant des simples qui viennent des indes Orientales, rapporte vne histoire bien plaisante d'vne plante appelée des Indîes Datura, laquelle se retrouve en Malanar, & porte vne fleur de grād efficace pour enyurer, Les larrons du pays s'en seruent pour desrober avec plus d'asseurance; ils en meslent parmy la viande de ceux à qui ilz en veulēt, si tost qu'on en a māgē c'est de rire à gorge desployee, & faire mille folies qui durent l'espace de vingt & quatre heures, cependant les larrons ioüent leur rooler, & taillent toute la matiere qu'ilz peuuent de pleurs & de plaintes à ces beaux rieurs. Aultre s'en seruent pour gaufferie, & s'en entretiennent des bouffons à bon marché. Les Deruis Religieux Turcs, pour faire apparoisire en eux quelque diuinité, mangent allant par pays vne herbe appelée par eux Matlach, qui par sa violente

operation les faict deuenir maniaques, enragés, & hors du sens, de ceste equipage ilz se mettent en vn aultre plus pitoyable, & qui leur dure dauantage, car ilz se decouppēt les bras, le col, l'estomach, & les cuisses à grands coups de cousteaux ou de rasoirs, se taillants sur la chair des chausses & pourpoints balaffrez à la Suisse. Les Turcs ont encore vne aultre maniere de s'enyurer avec l'Opium, quilest vne composition faicte avec du pauot blanc, de laquelle vsent ordinairement les Perses, & aultres peuples du Leuant, aussy bien que les Turcs: ilz ont opinion qu'elle les tient en ioye, faict oublier toute melancholie, & les rend plus courageux & furieux en guerre. La verité est qu'en ayant aualé vne Dragme en pouldre si tost qu'elle vient à faire son operation, ilz sortent de leur bons sens, & sont effarouchez comme brutes. Mais qui a il de plus suffisant pour enyurer l'homme que la racine de iusquame? qui ne sçait que le pain dans lequel y aura de l'yuraye meslee enyure aussy puissamment que le vin pour fort qu'il soit? il y a beaucoup d'autres telles substances solides, lesquelles receties dans l'estomach causent la mesme affection, mais les liqueurs enyurantes tant naturelles, qu'artificielles les surpassent en nombre.

L'eau du fleuve Gallus qui trauerse la Phrygie doit estre prise par mesure, selon l'aduis de Callimachus, aultremēt si on en boit

elle trāsporte la personne; ne plus ne moins que la fontaine rouge qui est en Æthiopie, laquelle fait perdre le sens à ceux qui en boient. Theopompus escrit qu'aupres du fleuve Ergates se retrouue vne certaine eau fort aspre au goust, enyurante neantmoins cōme le vin fort & genereux. L'isle de Chio ou Scio n'est tant recommandee pour le mastiche qu'elle produit, qu'admiree pour vne fontaine, qui (selon Vitruue) est de telle nature, que si quelqu'un en boit par inaduer-tence, il deuient soudain troublé de son entendement. Semblable effect cause l'eau du fleuve Lynceste.

*Quem quicūq; parum moderato gutture traxit,
Haud aliter titubat quā si mera vina bibisset.*

dit le Poete Ouide,

*Lequel comme vin pur fait l'hōme chancelier,
Bien que moderement il vienne à l'aualler.*

Il n'est pas necessaire de nous arrester icy d'auantage, ou que nous courions les fleuves & les mers pour rencontrer quelques eaues enyurantes, veu que nous ne voions guerre d'yuresse que celle qui est causee par les liqueurs & breuuages ordinaires des hommes, qui a il qui enyure plus souuent ou plus suffisammēt que le vin, la ceruoise, l'hydromel, & aultres tels breuuages alimētaires? à la verité le nō d'enyurer leur est si propre & si familier qu'il sēble ne pouuoir estre appliqué à d'autres si ce n'est improprement & par metapho-re, & l'yuresse qui en prouient est seule pro-

prement dicte yuresse.

Que si les accidents causez par autres moyens, comme ceux dont nous auons discoutu iusqu'à present, se peuent qualifier du mesme nom, ce n'est que par ressemblence : du moins ceux qui y recidiuent & choppent souuent ne peuent sans tort & iniure estre dits & reputez yurongnes, comme l'on verra par après. Parquoy nous bannissons de ce discours tous enyurements causez par fumees exterieures receües par le palais, ou par les narines, ou prouenants des liqueurs instilees dans les oreilles. Nous nous entretiendrons seulement sur la consideration de l'yuresse engendree des corps vaporeux, contenus en l'estomach, & non point encor de tous ; les solides n'y auront point de part il n'y aura que les liquides, & sur tout le vin. Nous laisserons la byerre aux Flamans, Anglois, & autres Septentrionnaulx, le cidre aux Normands, l'hydromel aux Polonois, le poiret & la despée ou piquotte à nos paisants : & à chacun en particulier, son boire particulier nous reseruant celuy qui est le plus commun & plus general, qui a plus d'attrait & plus de vigueur pour nous allescher, & faire succomber en ce vice que nous allons vous despeindre de ses viues couleurs.



DIVERSES DESCRIPTIONS
de l'Yuresse.

CHAPITRE X.



E n'est sans cause que le graue
Philosophe de Cheronce dit qu'o
ne se sçauoit doubter de l'yures-
se, que c'est, ny quelle elle est: car
outre ce que son essence est d'une
recherche assés difficiles, les definitions que
les anciens nous en ont laissees sont tant di-
ueres & differentes, qu'elles entretiennent
plustost nostre ignorance, qu'elles n'engen-
drent vne cognoissance distincte & hors de
doubte. Tous ont eu esgard à ses effects au-
tant diuers que sont leurs definitions: d'où
vient que celuy cy s'est contenté de la defi-
nir par l'un d'iceux & cestuy la par l'autre.
Seneque dict que l'yuresse n'est autre chose
qu'une folie volontaire, & quelquefois l'ap-
pelle vne fureur soudaine, & qui se passe
bien tost. Caton le Censeur semble s'accor-
der avec luy, disant que l'yuresse est vne
espece de fureur volontaire. A l'opinion
desquelz Plutarque soubscriuant, dict que
la cholere est bien de mesme rang que la
fureur, mais que l'yuresse demeure & loge
toufiours quand & elle, ou (pour mieux

dire) que c'est la fureur mesme, moindre quand à la duree du temps, mais plus grieve, quant à la cause, d'autant qu'elle est volontaire, & que nous l'encourons de nous mesme sans y estre contraincts. Quelques autres Philosophes entre lesquelz est le mesme Plutarque, descriuent l'yuressse pour vne chose pleine de tumulte, vuide de sens & de raison; aucuns la definissent vn trop parler à table, ou bien vn follastrer en beuant, & disent que ce follastrer n'est autre chose qu'vser de parolles vaines, folles, & indiscretes. Tellementqu'ilz ne reprennent point le bien boire pourueu qu'on y garde modestie & silence, mais bien le trop & follement parler, qui (à leur aduis) fait que le boire soit yuressse. Sophocles considerant la ioye & liesse que le vin donne à ceux qui le boient, disoit que l'yuressse n'estoit autre chose qu'une deliurance de tout soing & soucy. De contraire opinion fut vn autre Poëte, lequel ayant esgard à tant de maux que l'yuressse traine à sa queue, l'appelle ville capitale de tous malheurs.

Plaute voyant les hommes yures chanceler de tous costés, & ne se pouoir tenir debout, despeint l'yuressse selon son humeur autant facetieusement qu'il estoit facetieux Poëte, disant que c'est vn lutteur cauteleux & rusé qui des le commencement attaque les pieds en donnant (comme l'on dit) le croc en iambe pour terrasser son homme.

Aultres estimēt que ce soit vne indigestion de vin qu'on ne peut cuire. Vous voyez autant d'images de l'yuresse que vous en reconnoissez d'effets, images (disje) qui ne representent que sa superficie, & n'en y a vne seule qui touche entierement au vif, & penetrer son interieur & son essence. Vsons d'une methode vn peu plus exacte & curieuse qui mieux nous descouvre la nature de ceste passion.

*QUE L'YVRESSE NE PEUT ESTRE
sans l'offence des actions animales,
bien que non de toutes.*

CHAPITRE XI.



Remierement nous supposons du consentement general de tout le monde, que l'homme yure est offensé en ses actions animales, & que sans ceste offense il ne seroit ià reputé tel : car tant qu'un homme aura la ceruelle bien faicte, tāt que ses sens interieurs & exterieurs se monstrent bien reglés à leur debuoir, tant que le mouuement & maniement de son corps se fera à sa volonté, il ne sera iamais dict yure, encores qu'il soit affligé de cent aultres affections contre nature, encores que les vertus vitale & naturelle soient vitiees ou

du tout ou en partie. Pour plus claire & facile intelligence de cecy les moins verſez en Philoſophie & medecine apprendrôt qu'il y a trois facultez principales qui regiffent & gouvernent paſſiblement toute l'Oeconomie de noſtre corps: la premiere ſe nomme vitale & reluit au cœur comme le ſoleil en ſon ciel, communique ſes rayons viuifiants à toutes les parties comme le ſoleil à tous les coings de la terre, fait eſclatter par tout l'influëce de ſes eſprits de vie, qui pour cela ſont appellez vitaulx, afin de conſeruer ceux qui naiſſent & ſe forment quand & nous. La vertu naturelle l'avoisine & la ſecôde, prenant ſon ſiege au foye au deſſous d'elle (auſſy luy eſt elle inferieure) & luy fournit de nourriture qu'elle luy diſtribue comme à tout le reſte du corps par les venes, qui ſont autant de canaux deſtinez à ceſt effect. La troiſieme eſt la vertu animale ſi non tant neceſſaire pour l'entretenement de la vie, pour le moins beaucoup plus noble & excellente, que les deux præcedentes, laquelle pour marque de ſa grandeur præſide au plus hault & plus eminët donjeon du petit monde, auquel elle confere trois ſortes d'actions, ſçauoir les nobles ou principales, les ſenſitiues & les motrices. Nous diſons donc pour conclure noſtre premiere ſuppoſition, qu'encores que l'homme ſoit interreſſé en ſes actions vitales ou naturelles ſi eſt ce que nonobſtant il ne peut eſtre dict

yure qu'il ne le soit ez actions animales qui dependent du cerueau.

Secondement nous supposons vn autre principe aultant cognu à chascun que veritable: c'est que toute læsion des actions animales, n'est & ne peut estre dicte yuresse: car personne n'a iamais appellé yure vn Phrenetique auquel la raison est deprauce: iamais on n'a avec raison, estimé yure vn sobre vertigineux, encores qu'il ait l'imagination vitiee: & iamais le tremblement & mouuement affoibly des viellards ne fut réputé yuresse: nous scauons iusques icy que l'yuresse est vne læsion des actions animales, que toute læsion d'icelles n'est pas yuresse.

Iugeons maintenant en quoy elle differe des autres passions qui semblent de mesme nature, produisēt mesmes effects, & en quoy particulièrement elle consiste. Prenōs pour exemple la faulsc imagination des vertigineux, ausquelz tous obiects qui se presentent à leur veuē semblent tourner perpetuellement, comme aussy à l'homme yure. Qu'est ce qui faict que ce tournoyment à celuy cy soit & s'appelle yuresse, & à ceux la non? ce n'est pas pour ce que l'imagination deprauce de l'homme yure, se forme soudainement & se passe incontinent, pour n'estre procréé par vne cause ferme & permanente en son subiect: car aussy bien les vertigineux ont quelquefois des accez fort legers & qui ne sont de longue duree. Ce

n'est point aussy pour ce que cest accident est causé à ceux qui sont yures par vapeurs & fumees qui remplissent le cerueau: car tout demesme la vertigine se cause souuent des fumees qui s'esleuent des humeurs crou-pissantes aux parties inferieures, & s'enuoyent à la teste. Ce n'est aussy pour la diuerse qualité de ces fumees: car & à l'vn & à l'autre elles peuvent estre de mesme temperature, sçauoir chauldes & humides. Qui a il donc qui puisse constituer vne differēce entre ces deux affections, & qui fasse que l'vne soit yuresse, & l'autre non? rien autre chose que la cause efficiente qui necessairemēt en l'yuresse est vn breuueage ou liqueur alimentaire: à la vertigine quelque autre cause externe ou interne telle qu'il vous plaira. Le lecteur prendra garde icy en passant que nous n'auons adioustē en vain les termes de breuueages ou liqueur alimentaire, car toutes sortes de breuueages qui troublent ces actions animales ne sont suffisātes pour causer l'yuresse, mais ceux la seulement qui sont pris pour nourriture: Les autres qui sont medicamenteux, ou veneneux comme ilz tendent à la mort, ou autre affection contre nature, & non à la nourriture, aussy leur effect se nommera plustost ou maladie de cerueau: ou empoisonnemēt qu'yuresse. Nous aurions tort de dire que Socrates pour auoir pris du suc de Cigüe qui offensa ses actions animales fut mort yure

& non pas empoisonné. Mais ie vous prie
passons oultre, & profoundons d'auantage
ceste matiere pour mieux descouvrir la vraye
idee de l'yuresse. Car ce n'est pas assés de
sçauoir que l'yuresse est vne lésion des acti-
ons animales, causee par le boire, si nous
ne sçauons si c'est de toutes, ou d'vne partie, &
desquelles.

*QUE L'YVRESSE GIST EN LA
lésion des actions princieres*

CHAPITRE XII.

NOus auons rapporté cy deuant
qu'il y a trois sortes ou espes ces
d'actions animales, sçauoir la
principale, sensitive, & motrice,
& pour le present nous adiou-
stôs à nostre premier propos qu'a chascune
de ces trois sont rapportees beaucoup d'aul-
tres, comme inferieures & cōprises en icel-
les. La raison, la memoire, & l'imagination
sont comprises sous la vertu principale
les sens exterieurs comme la veüe, l'ouÿr,
& les aultres, sous la vertu sensitive. Et fi-
nalement toutes sortes de mouuemēts pro-
gressifs & volonaires, sous la vertu motri-
ce. Cela declaré nous disons que l'offence
ou lésion de la vertu sensitive, n'est, & ne
peut estre dicté yuresse, encor qu'elle soit

causee par le vin ou autre breuuage enyurant. L'on le voit clairement en ceux qui pour auoir trop beu ont quelque leger ressentir de douleur, ou à l'estomach, ou à la teste, & pourtant ne sont estimez yures s'ilz n'ont aultre action blessée. Autant en dirons nous de ceux qui ont le tact, ou le goust depraué apres auoir beu sans auoir autre sentiment du vin. Nous disons d'auantage que l'yuresse ne consiste aucunement en la seule lésion ou offence de la vertu motrice ou du mouuement volontaire: car si ainsi estoit, la seule peine de respirer qui arriue souuent par compressiõ de Diaphragme à ceux qui ont la panse bien pleine, & estendue de vin, seroit yuresse, encor que lors toutes les autres vertus animales fussent saines & entieres, ce qui toutefois n'est aucunement receuable. Tout cecy se prouue encor plus clairement par le commun dire de tous, qui iugent qu'un homme est desenyuré, & hors de son vin, lors qu'il a recouuert son iugement bien qu'il ait la teste encor toute lourde & pesante, bien qu'il soit encor tout engourdy, lent, ou immobile. Puis donc que l'essence de l'yuresse n'est en la lésion de la faculté sensitiue, ny de la vertu motrice, reste necessairement qu'elle soit en la seule lésion des facultez soubmises à la vertu noble ou principale, sçauoir de l'imagination, memoire, & ratiocination; l'offence de chascune desquel-

les prouenante du trop boire est proprement
yuresse. Qu'il me soit loisible afin d'esgayer
le lecteur de m'esquarter vn peu de ces hal-
liers & sentiers espineux pour suyure vne
route plus aisee, & me seruir d'vn iugemēt
pareil à celuy que nous cōsultons bien qu'en
faict dissemblable. Ceux qui s'estudient à
l'histoire auront leu qu'apres que les ligues
Grecques eurent autant heureusement que
valeurusement repoussé les forces tant re-
doubtees du Roy Xerxes, elles voguerent
de l'Isle de Salamis en l'Istme Corinthien,
pour donner comme on dit voix de mieux,
& condigne louange à celuy de tous leurs
capitaines qui l'auoit mieux meritē. Arriués
qu'ilz furent ilz departirent les balottes sur
l'Autel de Neptune, ou chascun des opināts
auoit escrit le nom des capitaines, ausquels
selon son aduis estoit deu le premier & se-
cond honneur de la victoire; chascun ayāt
trop bonne opinion de soymesme se donna
le premier lieu, quant au second chascun
en defera librement l'honneur à Temistocles.
Les iuges, nonobstant que les voix de pri-
mauté fussent esgales, ne laisserent de la de-
cerner à Temistocles comme à celuy qui
pour estre vnanimement & sans contredict
declaré le second emportoit sur tous au-
tres la gloire & reputation du premier. De
mesme aussy puisque nous voions que quel-
qu'vns accusent bien les sens exterieurs en
l'yuresse, les autres l'attribuent aux mouue-

ments desreglez, sans nyer neantmoins que tousiours la faculté Princiére y ait la meilleure part, nous pouuons avec assurance conclure sous l'adueu commun que l'yuresse estale sa puissance premiere & principale, & son essence mesme dans le siege plus noble & plus releué de toutes nos actiôs.

Si nous prenons aduis des anciens *Ægiptiens* sur ceste difficulté nous en tirerons responce du tout conforme à la nostre. Car nous lisons qu'ilz estimoient que le vin fust le sang de ceux qui iadis firent la guerre aux Dieux, duquel meslé avec la terre fut produicte la vigne: le fondement de leur opinion estoit que ceux qui s'enyurent perdent tousiours l'entendement & la raison, comme estants remplys du sang de leurs predecesseurs,

Les Theologiens sont tellement portez à nostre sētēce que mesmes ilz sēblent du tout cōstituer l'essēce de l'yuresse à la seule lēsio de la vertu raisonnable. Car quand ilz rendent raison pourquoy l'yuresse est peché, ilz nous enseignent que cela prouient à cause que le Caractere par lequel l'homme est faict & créé semblable à son Createur, est offusqué & effacé en luy, c'est à sçauoir la raison, laquelle est tousiours vitiee & troublee en l'yuresse. *Aristote* ce grand genie de nature nous enseigne que la raison est blessée en ceste affection, estant tantost abolie du tout, comme en la profonde yuresse; & tan-

toit deprauee, comme quand elle est plus legere & superficielle. Nous n'aduouons pas pourtant que l'yuresse consiste seulement en la lésion de la raison, no⁹ adioustons encor l'offence des aultres vertus nobles, sçauoir de l'imagination, & de la memoire. Car mesmes de l'autorité du mesme Philosophe c'est vn indice certain & asseuré de l'yuresse, lors que les obiects exterieurs semblent tourner apres auoir trop beu, qui est vn vice de l'imagination deprauee. Aussi que la lésion de la memoire qui vient du trop boire soit yuresse, le commun propos de tout le monde le preuue suffisamment, car pour asseurance qu'on se souuient de ce que l'on rapporte, l'on dit, ie ne suis pas yure. Et d'auantage quand nous voyons qu'un homme ne se souuient le matin de ce qu'il a fait ou dit au soir precedent apres auoir trop beu, nous luy disons ordinairement qu'il estoit yure, en supposant que quand la memoire est offencee par le trop boire, c'est yuresse. Que si nous accordons que les brutes, qui n'ont nulle vertu raisonnable ou intellectuelle, soient subiectes à l'yuresse, il ne restera nulle difficulté, il nous faudra conclure, voulions ou non, que l'essence de l'yuresse consiste aussi bien en la lésion de la phantasie ou imagination, & de la memoire que de la raison. Je m'asseure que personne ne me contredira à ceste conclusion, mais ie n'entend pas, que l'on accorde comme d'une suite ne-

cessaire que toute sorte d'offence qui arriue par l'excez du vin aux actions principales se doieue appeller yvresse.

*QUE L'YVRESSE NE CONSISTE
pas en toute sorte de lésion des actions
principales.*

CHAPITRE XIII.

DLine entre aultres pernicious effets que le vin cause à l'homme, rapporte la diminutiõ & perte de la vertu memoratiue, laquelle se retrouve ordinairement fort affoiblie en ceux qui font mestier de s'enyurer, estant le vin le poison de la memoire. Cleomenes Roy de Sparte apres auoir long temps fait mestier de carousser, deuient en fin tout fol & furieux, & toutes-fois personne ne dira que ces deux affecti-
ons, sçauoir la perte de memoire & l'aboli-
tiõ totale de la raison, soyent yvresse, enco-
res qu'elles soient causees par l'vsage im-
moderé du vin. Il faut donc noter que cõme
l'yvresse se fait, & s'engendre soubdainement
en beuuant, ou incontinant apres le boire
aussy que pour mesme raison elle ne dure
gueres. Car cõme les vapeurs qui la pro-
creent montent promptement iusques au

cerueau, où elles viennent à vitier les facultez qui y resident, aussy pour estre leur substance fort aisee à resoudre & dissiper, se passent elles bien tost, tellement que l'on peut dire que leur fin est aussy soudaine que leur naissance.

Mais quand aux passions croniques, ou de longue duree qui suruiennent aux vieux yurongnes, contractees non par vne yuresse seule, mais par vne continuelle recidiue en icelle, comme elles se font petit à petit à mesme que le cerueau y est disposé par les excez ordinaires, aussy sont elles plus fermes, & stables en leur subiect, & consequemment plus difficiles à estre arrachees, d'autant qu'elles ne despèdent plus des vapeurs & fumees legeres, mais sont habitudees & essentielles que nous appellōs à la substance mesme du cerueau par la longueur de l'offense, qui demolit & destruit sa temperature. D'auantage il faut considerer que ces passions contractees de longtemps par le trop boire, ne sont immediatement causees par le vin, ou aultre breuuage semblable, mais bien par le moyen de quelque imbecillité, obstruction, ou aultre affection imprimée au cerueau, laquelle prouenant premierement des yuresses passees, y engraue par apres, comme cause moyenne & seconde, ces maladies croniques & habituelles; mais celles d'yuresse, naissent comme à l'instant du breuuage, par l'entremise des

vapeurs. Concluons donc maintenant que de toutes les difficultez & lésions des fonctions nobles causees par le vin, celles la seules meritent le nom d'yuresse, lesquelles sont causees, entretenues, & fomentees par la force du breuage n'agueres auallé, la vertu duquel venant à cesser & s'aneantir, fait quant & quant que l'yuresse cesse, que si par apres il en reste quelque impressiõ estrangere elle ne se doibt plus nommer yuresse. Il ne reste à present que de rapporter toutes nos pieces ensemble, & tirer des discours precedents vne definition entiere & parfaite de l'yuresse.

LA VRAIE ET PARFAICTE DEFINITION de l'Yuresse.

CHAPITRE XIII.



'Yuresse est vne lésion des actions nobles, ou principales, causee par les vapeurs d'un breuage alimetaire n'agueres auallé, voila la definition que nous

auons cherchee par tant de discours toute trouuee & accomplie: mais encor est il bon de nous remettre vn petit sur le discours pour la rendre du tout claire & facile. Nous disons que l'yuresse est vne lésion des acti-

ons nobles il fault d'oc ſçauoir qu'elles ſõt ces actiõs. Et en cõbiẽ de façons elles peuuẽt eſtre vitiees ou offencees. Ce qui fait que l'homme ſoit admirẽ comme chef d'œuure de la diuinitẽ, miracle de nature, & le plus excellent de tous les animaux ſont ces trois puiffances nobles & princiẽres, l'imagination, la raiſon, & la memoire, lesquelles ſont dictes nobles, pource qu'elles conferent à l'homme toute la nobleſſe & perfection qui reluit en ſon ame, & le releuent d'vn eſtre animal vil & abiect, à l'excellence de la nature angelique.

La premiere de ces trois que nous appelons imagination, ou phantaſie, eſt celle qui receuant, apprehendant, & retenant les eſpeces & reſſemblances des obiects extérieurs, voire meſme ſe forgeant, & ſe feignant des nouueaux phantaſmes ſans aucun obiect precedent (car elle a liberte de conceuoir ce qu'il luy plaift) vient par apres à les repreſenter à la raiſon, ou vertu intellectuelle, laquelle eſtant excitee par ſon rapport, ſe guindant plus hault ſelõ le port de ſon vol, ſpecule les idees immaterielles des choſes, diſcourt & ſillogiſe en elle meſmes, procedant des cauſes aux effets, & des commencements aux fins. Apres auoir bien ratiocinẽ, & conceu vn nombre ſans nombres de belles conſolutions, elle donne letout en garde à la memoire, celle icy cõme fidele gardienne, conſerue ſoigneuſement

tout ce qui luy est mis en depost, & en rend fidelle cōpte quād elle en est recherchee, quottant le temps, l'ordre. & les circonstances requises. Chascune de ces trois vertus peut estre vitiee ou offencee en trois sortes; sçauoir estant deprauee, diminuee, & de tout abolie ou esteinte. Deprauee dis je, cōme la raison aux Phrenetiques & Hypochondriques; diminuee cōme aux fols que nous disōs fats & idiots : & du tout abolie, cōme aux pauvres insensez, que nous appelons ordinairement innocents.

Or bien que le plus souuent, & presque tousiours ces trois facultez soient tout d'un coup attaquées par l'yuresse, comme l'on voit en ceux qui sont dictz morts yures, si est ce toutefois qu'il n'est besoing pour constituer sa nature & son essence, que toutes les trois ensemble soient interessees par trop boire, il suffit que l'une ou l'autre le soit. Car encor qu'un homme forcené par le vin & consequemment blessé en l'usage de sa raison, ait bonne memoire (ce qui arrive assez souuent) il ne laissera pourtant d'estre dit yure, & surpris d'yuresse. Aussi suffit il pour estre yure que l'une ou l'autre de ces actions soit simplement offencee en l'une ou l'autre des trois manieres susdites, sçauoir ou par deprauation, ou par diminution ou par abolition. Vray est si elles se retrouuent seulement vitiees ou deprauees, qu'alors l'yuresse en sera plus legere, & superficielle,

& au contraire elle sera beaucoup plus grande & profonde, lors qu'elles seront du tout assoupies & aneanties. Plus grãde encore & & pl^o forte sera elle alors qu'elle fera ressentir ses coups à plus grand nombre d'actions. Tout cecy est conformé à la doctrine d'Aristote lequel nous enseigne que l'yuresse est legere, lors que le iugement est seulement depraué, mais qu'il ne peut estre du tout assoupy, que par vne grãde & excessiue yuresse. Et ne plus ne moins qu'une fiebure de mesme espeece & nature, peut estre tantost plus grande, & tantost plus petite, selon que la chaleur & les Symptomes qu'elle produit s'augmentent, ou diminuent. De mesme l'yuresse est vne essence qui peut subir intention & remission, c'est à dire accroissement & diminution, & consequemment elle est tantost plus legere, tantost plus grieve, selon que les actions principales sont plus ou moins lasees, & en plus grand ou moindre nombre. Les autres parties de nostre definition sont suffisammēt expliquees par les chapitres precedents, il nous faut neantmoins donner celuy qui s'uyt à ceux qui y trouueront quelque difficulté.

RESOLUTIONS DE QUELQUES
obiections contre la definition d'yuresse.

CHAPITRE XV.

Este maintenant à esmousser la
pointe de quelques obiections
lesquelles on nous pourroit op-
poser pour bouleuerfer nostre
definition. Car en premier lieu
quelqu'un trouuera estrange que les affections
que l'on appelle ordinaiement yuresse, cau-
sees ou par les fumees exterieures, ou par les
viandes, ou substances solides prises interie-
urement ou autrement ne sont comprises
en nostre definition, ce sont neantmoins les
mesmes accidents, la mesme lésion, les
mesmes actions lésées, les mesmes ou du
tout semblables causes, sçauoir les vapeurs
ou fumees qui se campent au cerueau, &
apportent du trouble à ses actions princie-
res. Et encores que les vapeurs, ou autres
causes mediatees ou immediates soient, ou
puissent estre de diuerses especes, cela n'em-
peschera pas que les effects qui en resultent
ne soient d'une mesme nature, & que l'y-
uresse produicte par l'yuraye ne soit ny plus
ny moins yuresse que celle qui est causee par
le vin, & consequemment elle debura estre
comprise en vne mesme definition comme
represen-

representant vne mesme essence & nature; ne plus ne moins que la chaleur produicte par le feu, & par les rayons du soleil, sont aussy d'une mesme espee, selon la cōmune & plus probable opinion des Philosophes. Pour responce à cest argument, nous permettons au vulgaire de comprendre ces effects procedents de tant de diuerses causes sous vn mesme nom, & d'estendre sa signification tant qu'il luy plaira, mais s'il est question de parler proprement, il se faut restaindre, l'yuresse resserree dans ses limites ne peut exprimer autre passion que celle qui vient du vin ou d'autres breuuages alimentaires, puis quelle tend à l'yurongnerie qui cōsiste en vne vitieuse auidité de boire & non pas de manger. Au reste nous aduouons bien que la diuersité des causes efficientes, n'est assés valable pour prouuer vne diuersité essentielle de leurs effects, mais aussy nyons nous qu'elle ne soit suffisante pour arguer au moins vne difference accidentelle entre eulx, laquelle (comme positieue & reel) est suffisante de nous faire apprehender & concevoir vn suiet de mesme nature, tantost d'une facon, & tantost d'une autre, selon la diuersité des relations qui nous feront considerer ores vne cause, ores vne autre.

Ces accidents donc desquelz est quæstion, pour grande ressemblance & conformité qu'ilz ayent entre eux, ne peuvent estre

appelez d'un mesme nom; car ceux qui fluent d'autre cause que des aliments sont plustost empoisonnements ou maladies qu'en-yurements, comme nous auons dit cy deuant. Nous auons pour praecepteur en ceste doctrine le graue Plutarque qui tient que l'accident que la grappe de lyere trempee dans le vin faict à ceux qui en prennent, ne se peut bonnement appeller yuresse, mais plustost troublement d'esprit, & alienation d'entendement, comme faict le Iusquiam ou autrement Hanebame, & plusieurs autres plantes desquelles nous auons faict mention auparauant: quand aux viandes solides leur effect est bien dissemblable à celuy des breuages; voulés vo⁹ que nous nous en rapportions à Macrobe? Il y a grande diuersité (dit-il) entre l'effect du boire & du mager, car qui est ce qui a heu iamais l'esprit troublé pour auoir trop mangé comme ont ceux qui ont beu trop largement? celuy qui est farcy de viandes a seulement le ventre ou l'estomach greué. Mais celuy qui a trop beu est incontinent rendu semblable à un insensé. D'autant que le breuage doué d'une nature plus legere & halitueuse, gaigne incontinent le hault & frappe le cerueau par ses fumees chaudes & vapoureuses. Venons au second poinct que l'on nous peut obiecter qui est de nous accuser de contradiction en ce qu'au-
parauant nous auons dit que nous ne voulions discourir de l'yuresse des brutes.

laquelle neantmoins est comprise en nostre definition. A la verité nous confessons que les bestes peuuent estre surprises de vin, & d'autres breuuages alimentaires, mais nous n'admettons pas pourtant qu'elles puissent estre yurongnesses, nous ne receuons pas ceste consequence, les bestes sont suiectes à l'yuresse, donc elles sont suiectes à l'yurongnerie, c'est pourquoy nous reiettons leur yuresse de ce traicté, d'autant que ce que nous discouons de l'yuresse est pour venir à l'yurongnerie. Et encores que nostre but fust autre, si est ce que tousiours il n'y auoit nul inconueniēt que nous le rapportassions entierement aux hommes, nonobstant que les bestes y peussent auoir quelque part. Ainsi Galien & les autres Medecins apportent des definitions & guerisons communes aux maladies des hommes & des bestes, rapportent neantmoins le tout aux hommes seuls, sans faire mention quelconque des bestes. L'on nous obiectera d'auantage que nous auons trop estroitement resseré l'essence de l'yuresse à la lésion seule des actions nobles, puis qu'elle semble aussi bien consister en la seule offence de la vertu sensitiue, ou motrice, car vn hōme qui chancellera pour auoir trop beu, vn homme qui apres soupper verra du blanc pour du iaune, sera yure, & réputé tel par tout le monde, ce que toutesfois nous n'admettons par nostre definitiō. Nous respondons qu'il est bien difficile voire

presques impossible que ces deux vertus soient notablement interessees, que les premieres & principales ne soient aucunement offencees, car les parties qui seruent d'instrument à leurs actions se voysinent de si pres, ont vne telle confederation & liaison par ensemble, que l'offence qui se communique à l'une ne peut qu'elle ne touche l'autre, si bien les effects en sont quelquefois diuers pour la diuersité de resistance, Or l'on fait iugement de ce qui arriue plus ordinairement, & l'on a raison d'entrer en soubçon ou en creance d'yuresse par ces signes extérieurs, qui nous descouurent l'indisposition des sens intérieurs, & des facultez princiéres. Mais quelque esueillé nous traictera bien plus rudement que les precedents, & monstrera par viues raisons que tant s'en fault que l'yuresse consiste en la lésion de la faculté, qu'au contraire sa vraye essence est d'estre cause de la lésion, & consequemment l'yuresse se deura mettre au nombre des maladies, & non des symptomes, car à vn homme mort yure, & endormy dans son vin, on ne voit aucune lésion des actions nobles lesquelles n'operent point pour tout, ains se reposent pour lors. Tout de mesme donc que la santé ne consiste point en l'operation des vertus corporelles (ou autrement vn homme ne seroit iamais sain en dormant) ainsi la nature de l'yuresse ne consiste point en la lésion des actions

nobles, mais en la cause de ladite lésion, ou aultrement iamais vn homme endormy, encor qu'il soit noyé de vin, ne pourroit estre dit yure, ce qui toutesfois est faux.

Pour satisfaire à ce doubte nous respondons que l'homme endormy apres auoir trop chopiné est veritablement yure, en ce que ses actions nobles sont offencees, car lors elles ne se reposent point, & ne cessent point naturellement, comme il arriue aux hommes sains qui dorment: mais elles sont abolies du tout par l'effort du vin, qui les assoupissant contre nature, abbat quant & quant toutes les aultres actions animales.

Mais soit que ce soit il n'importe beaucoup si on veut constituer l'essence de l'yuresse en la lésion mesme des actions, ou bien en la cause qui produit ceste lésion. Car ne plus ne moins que les Medecins considerent la Lethargie tantost comme maladie, lors qu'ilz la definissent vne intemperature du cerueau froide & humide, avec vne matiere pituiteuse, & putrescée: & tantost la considerent comme le symptome de ladicte maladie, quand ilz disent que c'est vn sommeil profond, avec fiebure, & oubly. Ainsi pouuons nous diuersement considerer l'yuresse ou comme maladie, & la definir vne affection contre nature causee par les vapeurs du breuuage alimentaire, qui offense les actions nobles: ou bien la despeindre comme symptome, ainsi que nous auons

faict, à desseing de plus clairement représenter son essence, & la rendre aisée à connoistre d'autant que les effects des maladies sont plus faciles à estre cognus que les maladies mesmes. Nous sommes maintenant hors de doute touchant sa nature, sçachons comme elle se faict.

COMMENT SE FAICT l'Yuresse.

CHAPITRE XVI.



E n'est assés de sçauoir que c'est que l'Yuresse, il faut passer plus auant & apprédre comment elle se fait. Nous l'enseignerons à present, & mettrons ses causes en euidence, puis ferons veoir les parties du corps qu'elle afflige, & comment, afin que l'on puisse mieux parer & preuenir ses coups. Quand le vin fort & genereux ou aultre breu- uage chauld & fumeux est receu dans l'estomach en quantité notable, & de la porté iusques au foye par les venes mesarrai- ques, alors la chaleur naturelle, qui n'est iamais oyseuse, qui traueille incessamment entout l'aliment, le præpare, le façonne, & conuer- tit en Chyle, ou aultre suc louable, vient à agir contre luy, ne plus ne moins que le

feu contre vn vaisseau plein d'eau, & petit à petit l'alterant, eschauffant, & faisant bouillir, esleue d'iceluy, comme d'un corps halitueux, & facile à estre resould en fumées, force vapeurs chaudes & humides, qui tenantes d'un naturel plus legere que leur matiere terrestre, quittent aussi tost son sejour inferieur, se poussent d'elles mesmes & se guident en haut, s'esleuent du fond de l'estomach, & du foye iusqu'au sommet de la teste. Ores comme il y a beaucoup de parties & fort diuerses entre les naturelles, & animales, entre l'estomach & le cerueau, aussi ces fumées tiennent elles diuers chemins pour s'eslâcer de l'une à l'autre; & cōme elles sont subtiles & penetrantes elles trouuent passage tantost par vn endroit, & tantost par vn aultre. Certes encore que selon l'aduis de plusieurs, la force du vin sans la cōduitte de ces vapeurs puisse penetrer iusques au cerueau, pour estre le corps tout vn & continu en soy mesmes, ne plus ne moins que la chaleur du feu empreinte à vn bout d'une lame de fer se communique incontinent à l'autre: ou bien que par les pores insensibles & autres conduicts qui ne sont apparents à la veüe, le vin puisse donner entree aux vapeurs & à sa force ensemble dans le chef, si est ce que nous ne deuons pas facilement nous laisser persuader, qu'il se trouue d'autres canaux plus commodes à cest effect, que ceux mesmes qui de la

cuiſine de nos corps (i'entend de l'eſtomach & du foye) s'eſtendent iuſqu'au toict, ou pour mieux dire au teſt. Ces canaux ſont L'oſophage & les venes, les arteres auſſi y contribuent. L'oſophage ne ſert pas ſeulement à la deſcente de la viande de la bouche dans l'eſtomach, mais auſſi reciproquement donne ouverture aux fumees, vapeurs & corps flatueux qui par vn mouuement contraire ſont pouſſés de bas en hault. Quelques bons yurongnes pour euitter vn plus profond enyurement apres auoir trop beu, & obuier aux douleurs de teſte qui en prouiennent, dorment touſiours la bouche ouverte, afin que les fumees qui ſont montees par ce tuyau ne trouuant rien qui les retiennent faſſent plus librement leur ſortie ſans la chercher plus haut, au detrimēt du cerueau, où infailliblement elles ſe porteroient, y trouuāt leur entree non ſeulement par les pores de l'oſ Cuneiforme, & delà à la glande pituiteuſe, de ceſte glande, dans ſon troiſieme ventricule; mais beaucoup plus aiſement par les conduicts notables & ſpatieux du palais aux narines, des narines aux trous de l'oſ ſpongieux, de ces trous aux productions mammillaires, & de ces productions aux premieres vètricules, & quelquefois à certains aultres petits trous, & cauitez qui vont des narines aux orbites des yeulx, & de là à diuerſes parties du cerueau. Ce chemin eſt familier aux fumees qui

sortent de l'estomach : celuy des venes est pour celles qui se suscitent au foye, celles qui sortent du tronc entrent dans la vene caue ascendente, de celle icy, aux iugulaires; des iugulaires, à vne infinité de petits rameaux du tissu Choroide, qui sont destinez à la nourriture du cerueau; finalement elles se coulent au cerueau mesme par l'extremité de ces rameaux, & l'éplissent en telle abondance, qu'elles suffoquent quelquefois toutes les puissances. D'icy les Medecins ont pris l'vsage des Pilules peu auant ou apres soupper, estimants que leur vertu purgatrice se sert des vapeurs alimentaires comme de vehicule, & en produict plus promptement & plus heureusement ses desirez effects. Mais pour retourner à nostre propos, cependant que le pot boult en l'estomach comme en la cuisine humaine, pendant que le foye, & les aultres parties naturelles eschauffees de plus en plus par le vin le cuisent & l'eschauffent reciproquement d'auantage, la chaleur s'espand, & se fait sentir par tout, le sang eschauffé, bouillonnant & vapoureux luy sert de guide iusqu'au milieu du cœur, & au dessus du cerueau; les arteres participent aussi tost à l'intemperature de leur principe, & de leur voisinage, & commencent à redoubler leurs mouuements: ceste emotion redoublée redouble quand & quand la poussee & la quantité des vapeurs, tout fume, tout foudt, tout brusle; voila

le cerueau bloqué & assiégué de toutes parts, plus de moyen de resistance, il se rend à la mercy, ses thresors plus reseruez sont exposés au pillage, rien ne luy reste, ny sens, ny raison, ny parolle. Pauvre miserable de se captiuier à ses sens pour se veoir en fin la proye d'une passion insensible & insensee? or cōme les parties inferieures sont abōdantes en matiere vaporeuse qu'elles fournissent continuellement à l'abandon: aussi le cerueau est fort capable de les receuoir, tant pour son sit eminent qui est, l'abut des corps halitueux, que pour sa grandeur & vasteté qui donne lieu suffisant pour les heberger. Voila donc cōment ces fumees enyurantes sont euaporees du breuuage, voila les quartiers d'où elles descampent, voila les chemins qu'elles tiennent: voila comme elles abordent furieusement la retraicte des sens, le domicile de sapience, le palais de la raison: reste de faire reueuë des morts ou blessez en ceste charge, c'est à dire des parties qui en sont naurees.



*QUELLES PARTIES SONT
offencees par l'Yuresse, & les effects
qui en reüssissent.*

CHAPITRE XVII.



Ant de diuers sentiers que les vapeurs enyurantes tiennent pour liurer l'assault au throsne souuerain du gouuerneur de nos corps, donnent asses à iuger qu'il n'y a nulle de ses parties qui s'en puisse garantir: aussy le cognoit on euidément par les effects. Ses nerfs, ses venes, ses arteres, ses membranes, ses ventricules, sa température tout patit. Ses nerfs s'amolissent, se relaschent, & s'abatardissent: ses venes s'emplissent & se bandent, ses arteres battent avec violence importune, les membranes sentent vne extension outrageuse & douloureuse, les ventricules nous ombragent par tournoyments pleins d'espouuente, la température s'eschaufe hors mesure; que reste il? Apres que ces ennemys iurez de la raison ont par surprise emporté son fort, & s'en sont emparez, lors comme nouveaux vsurpateurs, ilz viennent à renuerser toute la police qu'ilz y ont trouuee, taschant d'effacer, & aneâtir les actions, & l'autorité du maistre naturel tant qu'il n'en reste aucun vestige. Reconnoissants

donc que l'admirable structure du cerueau, & sa conforme temperature, estoient les deux ressorts que la raison faisoit auparavant iouer pour produire ses actions, ilz dressent toutes leurs machines pour destruire l'un & l'autre, ilz contrepontent sa temperature, parvne du tout contraire, chaulde & humide à excez: ilz esbranlent & difforment sa structure par extension violente, par repletion & obstruction de ses meninges, venes, & arteres, nerfs, & ventricules. Que la temperature, ou pour mieux dire l'intemperature des vapeurs ennemyes soit pour l'ordinaire chaulde & humide, ie le collige iettant l'œil sur le corps dont elles sont extraites, sur la cause efficiente qui les a esleuës, & les effects qu'elles produisent. Bien aduoüe ie qu'elles ne sont pas tousiours en degret egal de chaleur & humidité. La chaleur comme elle est beaucoup plus active que l'humidité, aussi tient elle le premier lieu à la production de l'Yvresse: c'est ce qui a fait dire à Aristote que l'Yvresse arriue principalement lors que la teste vient à s'eschauffer. De ceste chaleur s'esmeut la rougeur du visage, le brillement des yeux, l'ardeur de la teste, l'ouuerture des pores, le babil importun, la présomption de soy mesmes, la promptitude à toutes actions, la facilité des veilles, ou impuissance de dormir, la promptitude à la cholere, l'inflammation des esprits, &

quelquefois la fureur, ou quelque chose de semblable. De l'humidité sourcent les larmes inuolontaires, la frequente salivation, l'engourdissement, & pesanteur de la teste, la faitardise à toutes actions, l'endormissement, la molesse, & humectation des nerfs: d'où sensuit la difficulté de se soustenir debout, le chancellement en marchant, le bescayemēt en parlant, & finalement vn assoupissement & pesanteur de tous les membres. Des repletions, agitations, distentions, & obstructions causees par ces mesmes vapeurs, n'aist vne fourmilierie d'autres accidents dangereux & pernicioeux, trespitoyable à raconter, tref-durs à supporter.

D'icy les plaintes, des douleurs intolerables, les faulses imaginations, les vertigines ou tournoyements, la berluë aux yeulx, le tintin aux oreilles, la diminution ou perte totale de tout sentiment & mouuement, & mille aultres que nous serions longs à descrire. Oultre l'experience que nous auons de ces maux en voicy le rapport d'un Poëte trefdocte.

Cum vini vis penetrauit

Consequitur grauitas membrorum, prepediuntur

Crura vacillanti, tardescit lingua, mædæmens,

Nātoculi, clamor, singultus, iurgia gliscunt.

*Quand la force du vin se glisse dans nos corps
Tous nos membres sont lourds, nostre iambe*

chancelle,

*Le parler est tardif, l'œil pleur', l'esprit,
ruisselle,*

*L'on n'entend que clameurs, que sanglots
que discords.*

De ces discours on peut aisement entendre comme sont offencees les actions nobles en la lésion desquelles nous auons constitué l'yuressse. Et comme elles sont diuerses, aussy sont elles diuersement assaillies, tantost par l'intemperature des vapeurs qui suscite celle du cerueau & des esprits animaux: tantost par leur substance, qui de son agitation desreglee emporte quand & soy les esprits à vn mouuement desreglé, & de sa quantité occupe leurs conduits, leur bousche, & empesche le passage ordinaire. Mais d'autant qu'au chapitre suiuant nous voulons rendre raison de plusieurs effects du vin, de peur qu'il ne nous faille entrer vne aultre fois sus vn mesme discours, nous mettrons fin à ce chapitre par vn exemple d'yuressse autant admirable que plaisante à raconter. ie le doibs à Athenee qui le rapporte au chapitre premier du second liure de ses Deipnosophites en ceste sorte. Iadis en Sicile quelques ieunes hommes Agrigen-tois, apres auoir bien beu ensemble se trouuerent tellement surpris d'yuressse, & alie-nez de leur entendement, qu'ilz croioient tous voguer sur mer dans vne gallere agitee de vents impetueux qui esleuoient vne dan-

gerense & furieuse tempeste. Estants donc en ceste folle opinion & continuant à leur aduis de plus en plus le danger du naufrage, ilz ietterent de hault en bas par les fenestres tous les meubles qui estoient dans leur chambre, d'autant qu'il leur estoit aduis que le capitaine de la galere, leur auoit ordonné de descharger le vaisseau pour le mieux deffendre contre la tourmète: en fin apres que plusieurs eurent ramassé & emporté tout ce qu'ilz auoient ietté dehors, le magistrat curieux de scauoir ce qui se passoit & recognoistre la cause de ceste folie qui duroit encor au iour suiuant, entra en la maison où il trouua ces ieunes hommes tous couchez, lasses, & recreus, tant pour auoir trop beu, que pour auoir seruy à la deffence de leur vaisseau imaginaire contre l'orage. Et apres que les iuges les eurent interrogez sur leur estat & deportements, ilz respondirent qu'ilz estoient extrêmement fatiguez de la violence de la tempeste, pour laquelle euit leur auoit esté necessaire d'alleger leur vaisseau par la descharge de beaucoup de fardeaux inutiles qu'ilz auoient iettez en mer. Et comme ces iuges estonnez de plus en plus admiroiēt avec compassion la grande folie, & stupidité de ces yurongnes, l'un d'iceulx qui sembloit estre plus aagé que les aultres s'adressa à eux disant, quant à moy (hommes Tritons) la peur du naufrage & la crainte de perir m'a

tellement saisy, qu'elle m'a faict coucher au plus profond de la carene pour me tenir mussé le mieux qu'il me fust possible. Alors les iuges pardonnants au vin, & à l'yuresse sortirent apres leur auoir deffendu de ne boire de là en auant plus que de raison.

Ces ieunes hōmes pensants tousiours voguer sur mer les regratierent fort courtoisement, & vn d'iceulx, prenāt la parole pour les aultres, leur dit: messieurs si nous pouuōs estre garantis de ce danger, & arriuer à bon port, nous vous reputedons en nostre pays noz cōseruateurs & vous colloquerōs entre les aultres dieux marins comme ceux qui en vn si grand peril se sont apparus à nous avec præsage de salut asseuré. Voila à la verité vne plaisante & notable yuresse laquelle fut cause que la maison où elle se passa fut depuis nommee la Galere.

Mais les effects de l'yuresse ne sont que trop cognus, nous en voyons tous les iours de nouveaux, les plus ignorāts nous en dressent des volumes entiers, rendons les sçauant des causes.

RAISON

RAISON DE BEAUCOUP D'EF-
fects de l'yuesse.

CHAPITRE XVIII.

DE ce que nous auons discoursu iusques icy sur la nature & description de l'yuesse, on peut aisement tirer les causes de tous les effects qu'elle produit, & quant & quant la resolution de beaucoup de problemes qui sont ordinairement agités sur ce subiect, lesquels pour plus grand esclairecissement de ce qui est dit, & plus grande facilité de ce qui reste à dire, no⁹ diuiserōs en deux chapitres. Au premier nous rapporterons ceux qui regardent la Theorie, au second nous viendiōs de plus pres à la pratique. Que si d'auanture il arrive qu'en quelques endroicts nous nous esquartions de la doctrine d'Aristote, nous prions le lecteur de ne penser que ce soit par vne vaine & presumptueuse volunté de contredire à sa doctrine tant admirable, & de laquelle nous ne nous esloignons que le moins qu'il nous est possible, mais par vn affectueux desir de la verité, qui nous oblige autant que l'amitie de Platon ou d'Aristote. Recherchons en premier lieu vne des causes de cest exemple que nous venons de rapporter,

I. PROBLEME

Pourquoy les objets extérieurs demeurent immobiles semblent à l'homme yurer se mouvoir & tourner en rond? Aristote en rend la raison, mais outre ce qu'elle est trop obscure elle ne satisfait pas à tout le monde. Alexandre Aphrodisée (duquel la doctrine est suivie de beaucoup d'autres) répond que les vapeurs du vin s'espandent deçà delà, & se coulent confusément par le cerueau, se glissent desreglement & sans ordre du cerueau dans les nerfs optiques, & des nerfs, dans la prunelle de l'œil, où estant esmeues & agitées font apparaitre les choses externes bien qu'immobiles avec agitation & mouvement, représentant comme extérieure, ceste émotion intérieure. Quelques autres, auxquels ceste response ne satisfait, car à leur avis ny fumées, ny vapeurs ne peuvent passer par la substance solide du nerf optique & quand ainsi seroit, si est ce qu'elles ne pourroient penetrer la tunique, ou taye retiforme, & encormoins l'humeur cristalline pour venir iusques à l'humeur aqueuse, où il faudroit neantmoins qu'elles abordassent pour troubler ou depraver la veüe, ceux icy du nombre desquelz est Iean Baptiste Porte tresdocte Philosophe & Medecin, respondent que le cerueau eschauffé de vin vient quant

& quant à eschauffer ses parties voisines, & principalement les yeulx dans lesquels par le moyen de la chaleur s'esleuent force vapeurs, qui renfermees dans la tunique cornee, ne trouuant yssue, se meuuent circulairement & meuuent quand & elles la ligne visuelle, d'où vient que les obiects externes semblent se mouuoir en rond: mais quoy que ce soit de ces raisons, encores que nous les puissions admettre pour veritables en quelques cas, si est-ce que nous ne les receuons tousiours pour causes suffisantes de tous les tournoyements qui suruiennent à l'homme yure: nous en imputons pour la plus part la faulte à l'imagination plustost qu'à l'oeil, d'autant qu'ilz n'arriuent pas moins par l'obscure des tenebres plus espais- ses qu'en plein iour, & à yeulx clos, qu'à yeulx ouuerts. Nous disons donc que lors que la chaleur agit cōtre le vin dans le stomach & aultres parties naturelles, elle esleue des nues de vapeurs, qui s'emparant tout à coup des ventriculs du cerueau, & s'entremes- chant l'une l'autre de sortir tant à cause de leur mouuement impetueux, que de leur quantité demesuree, viennent à girer, & tournoyer dans iceux, ne plus ne moins que la flamme dedans vn four, tellement que les esprits animaulx se laissant emporter à ses mouuements despraez, representent à l'imagination les especes des obiects externes se mouuants & tournants comme eux. A

ce premier Probleme cest aultre est fort approchant.

II. PROBLEME.

Pourquoy l'homme yure pense quelquefois que la teste luy tourne? la cause de ceste fausse imagination, est la concussion, & agitation des membranes, des venes, des arteres, & du cerueau mesme qui suyent le mouuement violent des vapeurs, lesquelles comme elles se meuuent circulairement, engendrent quand & quand vn tournoyement imaginaire ez parties dont elles se sont emparees tout à coup.

III. PROBLEME.

Pourquoy est ce qu'une seule chose semble estre deux à l'homme yure? ie ne veux icy m'arrester à l'opinion de ceux qui tiennent que la veüe ne se faict qu'avec vn œil seul, ains suiuant la doctrine d'Aristote & des aultres optiques, ie dict que la vision se faict moyennant les lignes visuelles, ou perpendiculaires qui partent de tous les deux yeuls ensemble, & se rencontrent en vn seul & mesme poinct du corps qui est veu. Ceste rencontre egale, faict que les corps ne paroissent qu'vns, bien qu'ilz soient vus de deux yeulx. Que si les lignes visuelles tirees du centre de la prunelle, ne sont

iettees iustement sur vn mesme point de l'obiet, alors il apparoit double: de qui arriue en l'homme yure par la distortion des yeulx & peruertissement de leur situation naturelle. Car les muscles qui les retiennent attachez dans leurs orbites, & qui leur donnent les diuers mouuements qui leur conuiennent estants remplis de fumees, & vapeurs vineuses viennent les vns à se grossir & retirer: les autres à s'amolir & relascher: tellement qu'estant l'un tiré en hault, & l'autre en bas, ilz peruertissent le fit des yeulx: ainsi leurs rayons, ou lignes directes portees à l'obiet visible ne se rencontrent en vn seul & mesme point, & comme leur rencontre est double, aussi représente elle vne chose double pour vne simple. Cecy se confirme tres veritable en ce que si les hommes yures ferment l'un ou l'autre des deux yeux, alors l'obiet qui leur sembloit double auparavant leur paroistra simple. Que si d'auanture quelcun s'opiniastroit que la veüe se faict d'un oeil seul, ou bien si l'on nous oppose que l'homme yure en fermant vn oeil apperçoit de l'autre seul les objets extérieurs ainsi doubles, que respondrons nous? nous nierons l'une & l'autre supposition: car la verité est qu'un oeil seul n'apperçoit pas son obiet double, mais bien tremblotant. Comme il en soit si nous voulös tomber d'accord avec ceux qui estiment le contraire, nous disons que cela prouient

de la grande eſmotion & agitation des eſprits par la chaleur & fumee du vin, laquelle fait mouuoir, & varier la ligne directe ou viſuelle par laquelle nous voions aſſeurement & parfaictement: comme ceſte ligne varie, auſſi ne peut elle continuellement eſtre appliquee ſur l'obiet extérieur, dont apres en auoir eſté empeschee venant de rechef à ſe poſer ſur iceluy, fait qu'un ſeul & meſme corps veu ſoubdainement par deux fois apparoiſſe double.

IIII. PROBLEME

Pourquoy eſt ce que l'homme yure ne peut bien iuger des couleurs, pensant tātost le blanc eſtre iaulne, le verd eſtre bleu, & ainſi des aultres? d'autant que l'organe de la veüe eſtant mal diſpoſé, & trouble par tant de corps halitueux euaporés du breuage, empesche que les eſpeces, ou images des corps colorés ſoient portees pures & ſans eſtre infectees iuſques à la pupille en laquelle ſe faiet la viſion, d'où vient que les couleurs qu'elles representent apparoiſſent quelquefois aultres qu'elles ne ſont ne plus ne moins que les corps extérieurs veus au trauers d'un verre coloré ſemblent eſtre de meſme couleur que le verre. Mais c'eſt aſſez demeuré ſur la veüe, paſſons à l'ouyr.

V. PROBLEME.

D'Où vient que tant de sons bruyent ordinairement aux oreilles d'un homme yvre? ilz sont causés par la grande quantité des vapeurs contenues és parties cerebrales, lesquelles estant portées aux cauités des oreilles & à l'air connaturel y contenu, & s'ahurtant à tout moment contre le tambour, & les trois osselets destinés à l'ouyr, causent diuers sifflements, tintons, & bruiets confus, qui se font entendre comme prouenant des corps extérieurs. Car ne plus ne moins que l'air extérieur affecté des qualités du son vient à agir contre l'air intérieur des oreilles, & luy fait recevoir par l'alteration qu'il luy imprime, ainsi le mesme air intérieur peut estre alteré par l'agitation des fumees du vin, & percevoir le bruiet & son qu'elles excitent.

VI. PROBLEME.

QVelle est la cause du besgayment & mouuement depraues des hommes yvres? qu'estce qui les faict marcher de travers, vaciller, & tomber bien souuent? ne plus ne moins que les enfans nouvellemēt nays ne peuuent se soustenir debout, ny manier agilement leurs membres à cause de la grande moleste de leurs corps, & principal-

lement de leurs nerfs encores tous confits en humidité & mucosité, qui empesche la solidité requise en leurs actions, laquelle prouient d'une seicheresse moderee: ainsi ces mesmes parties humectees par la grande affluence des vapeurs vineuses, sont tellement amolies, & relaxees qu'elles ne peuvent tenir ferme ny prestre au corps vn mouvement assésuré. Oultre ces vapeurs l'abondance de la salive retient le maniement de la langue & empesche la prononciation, voire quelquefois oste entierement la parolle.

Seroit ce point aussy d'autant que ces vapeurs viennent à boucher & estoupper le passage des esprits animaux dans les nerfs qui ne peuvent fournir à leurs charges sans l'influence de ces esprits? mais que diriez vous que le vin produit des effects du tout contraires, escoutez les, & leurs causes.

VII. PROBLEME.

D'Où vient que le vin prouoque quelquefois le sommeil & autrefois excite les veilles? La diuersité de ces effects prouient quelquefois de la diuerse qualité du breuuage, & quelquefois de la temperature de l'homme yure, & peut estre de tout les deux ensemble. Nous lisons qu'à l'Isle de Taso se retrouuent deux sortes de vin, l'un desquelz endort ceux qui en boiuent, & l'autre au contraire les fait veiller: Si donc les

fumees enyurantes sont plus chaudes qu'humides, ou bien si elles sont desiccatiues (comme quelques opinent assez probablement touchant quelques especes de vin) & si le cerueau qu'elles rencontrent est aussy de semblable temperature, elles causeront des veilles opiniastrs, & vne promptitude à toutes actions, voire mesmes si ces deux causes sont fort intensés, vne inflammation des esprits animaux & consequemment des deportemens furieux. Galien rapporte que iadis en Pergame ville d'Asie lieu de sa naissance vn ieune garçon fut enfermé dans la maison par son maistre pendant qu'il alloit à l'estuue, ce garçon se trouuant extremement alteré sans eau au logis, & sans pouuoir sortir pour s'en pourvoir, fut contrainct de boire de bon vin vieil fort & fumeux, & en quantité demesurée, tant que sa soif le requeroit, cest excés luy fut si importun qu'il en demeura par apres en veilles continuelles, puis surpris de fiebure & trauaillé de delices finit ses iours. Ces yurongnes icy sont dicts porter vn vin de Singe quand ilz sont plaisants & recreatifs, aussy sont ilz redoubtés pour leur vin de Lyon quand ilz sont turbulents, choleres & tempestatifs. Que si au contraire les fumees esleuees du vin humectent le cerueau, plus qu'elles ne l'eschauffent (comme sont celles qui sont euaporees d'vn vin moderement trempé d'eau qui selon Galien inuite le sommeil) &

que le cerueau soit desia de son naturel fort humide, lors suruient vn sommeil ou assoupissement ineuitable. Ceux qui sont portés à telz accidents sont dits communement auoir vn vin d'ours ou de pourceau. Ce qui semble estre tiré d'Albricus lequel ez images des Dieux represente Bacchus môté sur vn Tygre ayant aupres de luy trois autres animaux, vn Singe vn Lyon, vn pourceau, pour signifier les diuers effects du vin.

VIII. PROBLEME.

Est il vray que ceux qui sont enyurés de biere ou ceruoise tombent en arriere & à la renuerse seulement, & que ceux qui le sont de vin, se laissent choir de tous costés côme dit Aristote? ou bien selon l'aduis de quelqu'vns qu'ilz tombent sur le deuât seulement? Certes Athenée, & beaucoup d'autres voire entre les modernes tiennēt qu'il est ainsi. Mais s'il nous estoit loisible de cōtredire à l'autorité de si grands personnages nous pourrions nous seruir de l'experience iournaliere, qui nous enseigne le contraire.

Je pense auoir veu, & diligemment considéré tant en la haulte que basse Allemagne cent & cent hommes enyurés de biere, qui chancelloient & tomboyent aussy bien de tous costés que ceux qui sont surpris de vin. Aussi l'aueugle Homere, clairuoyant neantmoins en la cognoissance de toutes choses, ne sem-

ble s'accorder avec les Auteurs de ceste opinion, quand il represente le Cyclope Polypheme enyuré par la force du bon vin, qu'Uliſſes luy auoit fait boire, renuerſé & couché ſur le dos, encor qu'auparauât il n'eust beu n'y bierre n'y ceruoise. La raison qu'ilz nous en donnent est autant imaginaire que l'effect qu'ilz supposent: car ilz veulent que le vin cōme guide de quelque cognoissance gaigne tousiours les parties anterieures du cerueau, & que la ceruoise attaque seulement les posterieures.

Mais comme cela leur est fort aisé à alleguer, aussy est il encor plus subiect à estre nié, d'autant que les diuerſes voyes par lesquelles les vapeurs enyurâtes sont portees de bas en hault, sont aussy bien ouuertes à celles de la bierre, que du vin; de l'hidromel, que du poiret: des corps liquides que des solides.

IX. PROBLEME.

MAis pourquoy attribuōs nous la cause de l'yuresse aux vapeurs esleuees du breuillage & non à sa chaleur, cōme Aristote & Galien, nous l'enseignent? Quand ces deux admirables explorateurs des secrets de nature disent que la chaleur cause l'yuresse, ilz entendent la chaleur des vapeurs du breuillage enyūrant, laquelle ilz considerent cōme instrument & cause immediate de ceste passion. Et encores que les vapeurs ne soient

ſeulement chauldes, mais auſſy humides (& quelquefois ſeiches quand elles ſont eſſeues des vins extrememēt chaulds) ſi eſt ce qu'ilz mettent pluſtoſt en ieu la chaleur que l'humidité, ou aultre qualité, d'autant qu'elle eſt beaucoup plus active, à cauſe dequoy elle tient le premier lieu à la production de l'yureſſe. Ores que ceſte indispoſition ſoit procreée par vapeurs chauldes eſſeues des parties inferieures, & conduites au cerueau, l'on le peut colliger de ce que l'eau pure, la ptiſane, & autres ſemblables breuuages refrigerants n'enyurent point encor qu'ilz ſoient fort halitueux ou vaporeux, d'autant que leurs vapeurs n'impriment aucune chaleur dans le cerueau.

X. PROBLEME

Mais ſi ainſi eſt d'oū vient que l'Opium, l'areca ou Fauſel, la racine de Iuſquiamme, & aultres telz corps extremement refrigerants ont vertu d'enyurer? ſ'il nous eſtoit permis de doubter de ce qui ſe rapporte touchant ceſt effect nous aurions beau loilir deſchapper de ceſte difficulté. Mais puis qu'il eſt eſcrit par pluſieurs auteurs dignes de foy, & principalement par doctes Medecins, cōme Monardes, Garcias ab horto, & aultres bien verſez en la cognoiſſance de la vertu des drogues & de la nature de l'yureſſe, il vault mieux expliquer leur dire

que le nier tout à plat. Nous auons cy deuant distingué l'yuresse en deux especes: l'une est celle que nous auons desiny qui est proprement yuresse, l'autre est plus generale & s'extend à toutes les affectiōs qui participent aux accidents de la vraye yuresse, & qui luy ont quelque ressemblance. C'est de ceste derniere que nous deuons entēdre les aucteurs sus-alleguez. Ce que ie trouue de plus espineux en ceste difficulté est de sçauoir d'où prouient que l'Opium & aultres semblables refrigerants peuuent causer tant d'actions & mouuements extraordinaires à l'homme qui en aura vsé, veu que telles actions ne prouiēnent que de la seule chaleur? Mathiole celebre commentateur de Dioscoride, & beaucoup d'aultres de ses adherents en seroient quittes à bon prix, s'il n'estoit question que de l'Opium, qu'ilz tiennent de temperature chaulde: comme aussi seroit Serapion, & ses sectateurs s'il ne se faisoit mention que du Faufel ou Areca, lequel aussy ilz estiment de complexion chaulde contre l'opinion des modernes.

Mais que diront ilz de la racine de Iusquiamme, & aultres semblables, qui enyurent ceux qui en māgent, ou pour mieux dire leur causent cent milles actions folles, & extraordinaires, & aultant de promptitude à tous mouuements, ils pourront respondre que leurs vapeurs sont esleuees par la chaleur dans vn lieu chauld, transmises au cerueau

qui est aussi chaud actuellement, & se font passage par des voyes & conduicts de mesme temperature, dont elles conçoient en elles vne chaleur presente & actuelle, laquelle surmontant pour vn temps leur vertu refrigerante, agit aussi pour quelque temps selõ sa nature, & faict reüssir des effects proportionnez à son action. Que s'il est vray cõme Galien nous l'enseigne que la viande receüe dans vn estomach froid se peut tourner en vn chyle de mesme qualité, pourquoy est ce que le contraire ne se fera ou pourra faite contre vn corps froid dans vn estomach chaud, d'où il est porté à vne partie chaude & par vne aultre partie toujours chaude? ceste respõce ne semble estre du tout improbable, car puis que l'Opium appliqué exterieurement assoupit le corps, & pris interieurement le resueille à beaucoup d'actions, il y a apparence que l'interieur du corps dans lequel il est ingeré luy communique quelque vertu qui cause ceste promptitude, & agilité, laquelle ne peut estre aultre que la seule chaleur.

Je veux bien que ceste chaleur externe & accidẽtaire acquise dans le corps humain perisse en fin, & que la froidure vertuelle de l'Opiũ reste par apres demonstrent par ses effects quelle est sa qualité naturelle: mais aussi faut il qu'on m'accorde que pendant que les vapeurs sont doüces de chaleur, qu'elles agissent contre le cerueau par la qualité qui

leur est presente & actuelle n'y ayant rien qui empesche son action: que si ceste response semble trop foible qu'il nous soit permis de dire que quand la chaleur naturelle du corps sent ceste froidure mortelle & veneneuse, elle s'unit & se r'assemble & se fortifie soy mesmes pour se conseruer en luy resistant, & qu'en ceste façon s'esuertuant, & s'augmentant contre son aduersaire, elle cause ces promptitudes d'actions pour estre plus intense qu'auparauant.

XI. PROBLEME

Reste encore vne aultre difficulté à soul- dre sur la chaleur enyurante sçauoir est, d'où vient que l'yuresse engendre si grand nōbre de maladies froides, & specialement celle qui procede du vin, comme l'Apo- plexie, paralisie, conuulsion, mal caduc, af- fections comateuses, ou somnolētes, & sem- blables? Galien en accuse la trop grande quantité qui ne pouuant estre surmontee par la chaleur naturelle, viennent à l'estouf- fer. ne plus ne moins que beaucoup d'huile suffoque aisement vne petite flamme, enco- res qu'aultrement elle soit la vraye amorce & pasture du feu. Aristote (cest autre œil de nature) rendant raison pourquoy ceux qui sont pleins de vin n'ont tousiours chaud mais au contraire sont bien souuent surpris de froid? dit que l'abondance du vin ne

pouuant eſtre alteree, ou ſurmontee par la chaleur naturelle qui eſt plus debile, vient à ſe refroidir & conſequemment refroidir le corps.

Ores commes les deux quæſtions qu'ilz ſe propoſent ſont ſemblables, auſſi les raiſons qu'ilz y appoſent ſemblent vne ſeule & m'eſme reſponce: elles different en ce que l'un ſemble conſiderer la cauſe efficiente & l'autre pluſtoſt la materielle; ſ'il vous plaiſt que nous les ioignons toutes deux enſemble, nous rendrons vne ſolution du tout accomplie, diſants qu'il eſt impoſſible que le vin pris trop copieuſement, n'attaque, n'altere, & ne diminue la chaleur naturelle du corps, mais principallemēt celle du cerueau, laquelle aſſoiblie par ſa vehemente action ne peut ſuffiſamment cuire & diger le ſang qui luy eſt tranſmis pour ſa nourriture: & conſequemment laiſſe quantité de ſuperfluité & de crudité excrementeuſe qu'elle ne peut conſumer, qui par apres redondent à grand excès dans le cerueau, ou bien ſ'écoulēt dans les venes, nerfs, & autres parties inferieures, & y cauſent diuerſes maladies froides correfpondantes à leur temperature. L'on pourroit mettre en ieu pluſieurs autres demandes curieuſes, celles icy ſuffiront pour en tirer les raiſons, venons à la pratique.

PROBLEMES CONCERNANTS
la pratique.

CHAPITRE XIX.



Ous les discours de Medecine butent à la pratique comme à leur fin premiere & principale, toutes noz speculations ne visent à aultre fin qu'à la conser-
vation de santé, ou guerison des maux, ceux qui se paissent de curiositez sans les adresser à ceste intention derniere sont indignes du nom de Medecin. Arrestons nous d'icy en passant sur les effects desquelz nous pouvons tirer quelque enseignement pour nostre regime & gouvernement, attendant le lieu d'en traicter plus à plein afin de joindre le plaisir à l'vtilité, & voyons ce qui peut aduancer l'yuresse, & luy donner quelque aduantage sur nous, continuant le fil de nostre discours par Problemes.

I. PROBLEME

Pourquoy les hommes fort esmeus & eschauffez de trauail ou autrement, venants à boire en telle disposition sont ilz facilement surpris d'yuresse? nous respon-

drons qu'en tel cas la chaleur du foye, & aultres parties naturelles, est plus grande que d'ordinaire, & que les venes, arteres, & aultres plus petits pores du corps sont lors tout ouuerts: d'où vient que le breu- uage est plustost & plus auidement attiré par les parties inferieures, les vapeurs en sont plus copieuses, plus soubdaines, plus chaul- des, plus aisement esleuees & transportees à la teste. Oferions nous adiouster à ces rai- sons que les parties superieures pour estre desseichees & eschauffees ou par le feu, ou par le vehement excercice semblent desja tenir de l'yvresse, ou pour le moins fort dis- posees à icelle, & attirent plus vistement ces vapeurs enyurantes desquelles elles desi- rent estre humectees?

II. PROBLEME.

D'Où vient que ceux qui boient au commencement du repas auant que d'auoir faict bon fondement (comme l'on dit) encourét plustost ceste passion que ceux qui mangent beaucoup deuant que boire? D'autant que le vin ingeré dans vn esto- mach vuide, n'y trouuant aucune viande solide qui l'arreste, passe soubdainement par les venes mesarraiques & penetre iusques dedans le foye fort auide de telle liqueur; Le foye promptement & fort eschauffé du vin qui n'a rié trouué, qui rabbate ses forces,

excite soudain forces vapeurs chaudes, ces vapeurs bouillonnantes, trouuans le passage libre par tout sans meslange de chose quelconque qui leurs resistent se rendent facilement maistresses du cerueau. C'est pour la mesme occasiõ (comme Galiẽ nous enseigne) que l'usage du vin pris deuant la viande cause bien souuent des conuulsions, & delires, principalement à ceux qui de long temps n'ont mägé. Mais au contraire quand l'estomach est remply de viandes solides, le vin n'est pas seulement empesché de passer oultre, ains estant comme arresté & absorbé par icelles, les vapeurs en sont estouffees, & petit à petit dissipees par la chaleur naturelle de l'estomach: d'où sensuit, qu'il n'en-uoit au cerueau quantité suffisante pour procreer l'yuresse. Oultre ce qu'estantes affoiblies par la commixtion d'autres vapeurs elles perdent vne partie de leur force, comme la semence de moustarde, laquelle encor qu'elle puisse vlcérer ou pour le moins rubesier la peau exterieure se prent neantmoins fort salubremēt en viande sans qu'elle nuise à l'estomach, quand elle est meslee & prise avec autres viandes.

III. PROBLEME

Pourquoy est ce que l'on s'enyure plustost en beuant dans vne vaisselle doree que dans vn verre? il en y a qui tiennēt l'opinion

erronee de ceux qui l'estiment ainsi : car ne plus ne moins que les anciēns Romāis sōt taxez de trop grande credulitē pour auoir iugē que le vin chauld est plus agreable au goust beu dans vne coupe de Cassidoine, ou Porcelane (cōme encor pour le iourdhuy beaucoup tiennēt l'eau, & le lait meilleurs beus dans vne vaisselle de terre de faenze que dans vn verre) ainsi ceux qui pensent que le vin beu dans vn gobelet doré enyure plustost qu'estant pris dans vn verre, semblent se laisser plustost emporter à vne opinion imaginaire que se ranger à vne certaine experiēce. Neantmoins puis que tant d'excellents yurongnes, & maistres carousseurs nous assurent le contraire, pour l'auoir tousiours experimentē en d'autres & en eux mesmes, croyons les comme experts en leur art, & en cherchons la raison. Seroit ce point pource que la lueur de l'or brillāt disgrege, & esbloūt la veüe, & quant & quant dissipe les esprits animaulx, à la dissipation desquelz suruiuent vne debilitē des fonctions animales qui se font par le ministere d'iceulx ? ou bien cela peut il prouenir de la refraction des rayons visibles, lesquelz ne pouuants penetrer le vaisseau doré (pour n'estre transparent comme vn verre) viennent à rejaillir sur les yeulx, & penetrants dans iceulx dissipent les esprits animaulx, & agissent aisement contre les parties cerebrales lesquelles sont desja disposees à patir par le vin qui les al-

tere? mais la mixtion de laquelle se seruent les orfebures pour appliquer l'or sur l'argent composee d'antimoine, visargent, & aultres semblables nuisible au cerueau, pourroit elle bien communiquer ceste vertu au vaisseau doré pour rendre le vin plus enyurant?

IIII. PROBLEME.

Est il vray que le vin moderement trempé enyure plustost que le vin pur; on nous a laissé ceste proposition pour veritable, mais neantmoins fort mal appuyee de raison.

Car de dire que le vin arrosé est plus subtil, & consequemmēt qu'il penetre mieux à l'interieur du cerueau pour estre l'eau d'une consistance plus tenue que le vin, si cela s'entend generalemēt de tout vin, c'est contreuenir à la raison à l'experience, à l'autorité d'Hippocrate, & de Galien, & à la verité mesmes, tellement que dire que le vin n'est si subtil que l'eau, c'est dire que le soleil n'est si luisant que la lune. De rapporter aussi cest effect à la moindre quantité de vin duquel on ne boit tant quand il est pur que quand il est trempé, ce n'est respōdre à propos, car on sçait bien qu'un homme qui ne boira qu'un verre de vin pur, n'aura la ceruelle alteree comme celuy qui en aura engorgé dixhuiēt, ou vingt, encores quilz soient un peu trépez ou arrosez, car cela se doit

imputer à la quantité du vin, & non à l'eau. Et puis il est question de pareille quantité de mesme vin, sçauoir si celuy qui sera arrosé enyurera plustost que le pur, estâts tous deux pris en pareille mesure.

Pourquoy premier on met encores en ieu vne troisieme raison beaucoup plus plausible, mais aussi peu valide que les aultres, sçauoir que le vin pur comme plus chaud cuit & digere beaucoup mieux ce qui se retrouve dans l'estomach, & consequemment soy mesmes, & ses vapeurs, ce qui ne se fait ainsi quand sa chaleur est affoiblie par l'eau: car par la mesme raison nous pourrions conclure que le vin fort & genereux n'enyurerait si tost que quelque petit vin, ce qui toutesfois est faux. Nous dirôs d'oc selon Hippocrate, Galien & l'experience, que le vin pur pris en esgale portion enyure plustost que le vin trempé ou meslé. Les termes d'Hippocrate sont tresclairs au liure des maladies aiguës, le vin trempé (dit-il) offence moins toutes les parties superieures, & la vésie, comme au contraire le vin pur soulage d'auantage les intestins. Galien son commentateur au neuuiesme liure des decrets d'Hippocrate & de Platon & ailleurs tient le mesme. Et l'experience, ceste asseuree touche & espreuue de toute verité, nous enseigne que ceux qui meslent de l'eau dans leur vin, ne sont si tost surpris d'yvresse que ceux qui le boient tout pur, encores qu'ilz en ayent

auallé en pareille, ou plus grande quantité. Car l'eau ne rabbat point seulement les fumées enyurantes du vin, mais aussi par sa qualité refrigerante tempere la chaleur d'iceluy, tellemēt qu'affoiblissant les causes de l'yuresse elle diminue quant & quant leur effect, si ce n'est que nous supposiōs sa quantité si petite qu'elle ne puisse rien oster de la force du vin, & que neantmoins elle ne laisse pas de luy seruir de vehicule, principalement s'il est grossier, mais comme nous ny recognoissons aucun pouuoir qui fasse bresche à celuy du vin, aussi ny a il grande apparence qu'il arriue beaucoup de subtilité par vne mixtion tant inegalle. Je sçay bien que quelques vns disent que le vin trempé est tousiours vin comme auparauant retenant sa mesme forme, & que partant il produira tousiours son effect: comme aussi l'eau fera paroistre le sien à part: mais ces propos sont tant alienez d'apparence qu'ilz ne meritent aucune responce. Il les fault seulement r'enuoyer à vn bain d'eau chaulde, & s'ilz se trouuent aussi bien, & supportent aultant facilement l'eau bouillante, que celle qui est temperee par aultre eau froide ie suis content qu'ilz y demeurent tant qu'ilz soient bouillis, & du tout cuits.

V. PROBLEME.

Pourquoy pareille quantité de vin prise à petits traicts enyure moins que prise à grands traicts? Chacun n'est pas d'accord de la verité de ceste proposition, quand à nous, nous l'admettons, fondez sus la raison & l'experience. Nostre raison est que le vin engorgé soudainement, & à grands traicts, enuoye aussy soudainement beaucoup de vapeurs au cerueau, esquelles il ne peut resister, tant pour estre comme surpris tout à coup par la promptitude de leur mouuement que pour estre surmonté & suffoqué de leur quantité: au cōtraire lors que l'on boit en petits gobelets, ces vapeurs montent lentement & petit à petit si bien qu'auant qu'il en y ait à suffisance pour causer l'yuressé celles qui y sont abordees les premieres sont desia atténuees, surmontees & dissipées par la chaleur naturelle, d'où vient que l'yuressé ne s'en ensuyt, ou pour le moins, qu'elle n'en est si soudaine ny si grande: & pour ceste occasion voions nous les plus grands carouisseurs d'Allemagne se rendre bien souuent à de moindres beueurs. Car d'autant qu'ilz ont accoustumez de commencer l'escarmouche avec petits gobelets, si d'auanture on les assault viuement, & de premier abord l'on leur porte quatre ou cinq grāds verres, & sans respit, vous les verrés telle-

ment estourdis de ceste première salüe, que pour peu que vous les pressiez par apres ilz seront renuersés sous la table.

VI. PROBLEME.

D'Où vient que quelcuns se d'esenyurēt en beuuant? nous en rapporterons la raison tirée de la précédente, apres vous auoir aduertý que cecy ne se fait qu'en beaucoup de temps que l'on employe à boire, & que ceste maniere de se d'esenyurer ne compete qu'aux bonnes ceruelles, lesquelles apres auoir esté soudainement surprises de l'effort du vin auallé en grande quantité venant à moderer, & allentir la charge, les premières fumees se resoudent peu à peu à la resolution desquelles l'yuresse vient à cesser.

Et tant s'en faut que les vapeurs qui sourcent des derniers carouffes puissent l'augmenter, qu'au contraire elles attenüent les premiers, dont la chaleur naturelle les resout plus facilement: d'auantage ces dernières sont en si petite quantité qu'elles ne peuuent luy faire grand bresche ny grand effort.

VII. PROBLEME.

D'où vient que les vns sont plustost, & plus profondemēt enyurez que les autres? cela peut prouenir de quelqu'une des trois

causes suivantes, ou peut estre de plusieurs ensemble, sçauoir ou de la force du breu-
uage, ou de la naturelle indisposition de ce-
luy qui boit, ou bien des affections acci-
dentaires qui luy suruiennent. Quant aux acci-
dents qui peuvent accelerer l'yuressse nous
en auons touché quelqu'vns cy deuant,
comme la chaleur & le grand mouue-
ment, boire soudain & à grands traicts
auant manger, & en vaisselle doree, & aul-
tre semblable en telle affaire. Le breuua-
ge'aussy y est bien considerable, voire beau-
coup plus que les causes precedentes. Car on
sçait assez que le bon vin enyure bien plustost
que la ceruoise, & qu'entre les vins mes-
mes s'en retrouuent quelqu'vns plus forts
& plus genereux que les aultres qui enyurēt
aussy plus puissamment. Mais d'autant
que nous en traicterons plus particuliere-
ment ailleurs, nous considererōs presente-
ment la seule disposition de ceux qui s'en-
yurent, lesquels s'ils ont vn estomach &
aultres parties naturelles fort chauldes, s'ilz
ont les veines, & aultres passages de bas en
hault fort ouuerts, la teste petite hors la
proportion des aultres parties du corps, &
principalement vn cerueau intemperé en
chaleur, & debile en quelle façon que ce
soit: ceux icy (dis-ie) seront beaucoup plus
enclins à l'yuressse que ceux qui seront ha-
bituez au contraire. Je dis que le cerueau
doibt estre principalement consideré, d'au-

tant que c'est la seule partie de nostre corps affligee en cest accident, laquelle estant d'une temperature affine à celle qui est causee par l'yuresse, ou tellement debilitée qu'elle ne peut resister aux vapeurs ennemyes, elle se trouuera plustost saisie des accidens ordinaires à ceste passion, mesmes qu'ilz ne sembleront estre tant engendrez de nouveau, qu'augmentez & accreus par ce surcroist, comme l'on peut tirer des raisons precedentes, de là vient que les enfants, & vieillards ne supportent pas si bien le vin que les ieunes hommes, tant pour la debilité de leurs cerueaux, que pour la trop grande humidité. De là vient aussy qu'entre les ieunes hommes de mesme aage, ceux qui ont la teste mieux faicte & moins intemperee en humidité & chaleur, supportent mieux leur vin. De là vient que quelques femmes (s'il estoit loisible de croire à Plutarque & Aristote) ne s'enyurent pas aisement à cause que leurs cerueaux sont naturellement froids. De là vient que ceux qui ont les sens exquis, les yeulx, & le visage entier rubiconds, qui sont prompts au parler, soudains en leurs actions, proclives à la cholere (signes d'une ceruelle chaude) sont aussy plustost surpris d'yuresse (j'excepte toutesfois ceux qui ont une grosse teste). De là vient finalement que ceulx qui aultrefois ont esté blesez à la teste ou qui aultremier sont subiects aux douleurs, & maladies d'icelle, ne peuvent beaucoup

boire à cause de la debilité contractee: mais sur tous il n'en y a point qui soient plus subiects à ceste infirmité que ceux qui ayants vn grand & large ventre, & vne petite teste, sont au reste fort remuants & prôpts à leurs actions. *In parua vasa meri si multum iacis subuertit intus omne quàm facillimè.* Car vn petit cerueau de chaulde complexiõ est tout à coup remply plus qu'il n'est besoin, & eschauffe d'auantage par les vapeurs chaudes du breuuage, qu'vn vêtre ample & capable luy suggere cõtinuellemēt. Je veux bien toutesfois aduertir le lecteur qu'en tout ce que nous auons rapporté cy dessus il est besoin d'vn bon & exact iugement, pour prudemment ramasser toutes les circonstances, & les mettre à la balance auant que rendre sentence sur les ceruelles plus ou moins exposees aux iniures de ceste passion. Les questiõs suiuanes se pourroyent ranger au nombre des problemes, mais parce qu'elles sont debatues de part & d'autre par opinions & raisons contraires, nous leurs auons donné lieu entre les questions, recherchons en la decision, la recherche nous en sera agreable & profitable à noz mœurs, si nous y prestons attentiuement l'aureille.



SI LE VIN EXCITE LA LVXVRE.

CHAPITRE XX.



Ncores que ceste question sem-
ble estre assés esloignee de nostre
subiect, si est ce toutesfois qu'elle
n'est du tout hors propos, comme nous ferons paroistre
par la resolution, en laquelle noz auteurs
ne se trouuent pas bien d'accord. Ceux qui
tiennent que le vin & l'yuresse sont l'amor-
ces & les allumettes de la luxure, se for-
tifiant des raisons suiuanes lesquelles à leur
aduis sont du tout inuincibles. Il est certain
(disent ilz) que l'homme n'est iamais tant
proclive au ieu d'amour que lors qu'il est
bien & suffisamment nourry, exempt de tout
soing & soucy, curieux de passer son temps,
& que ses parties destinees à la generation
sont irritees du chatoüillement assidu d'une
semence copieuse & pruriente. Or puis que
le vin produit tous ces effects, & qu'estant
pris copieusement il nourrit beaucoup, de-
liure l'homme de toutes fascheries, l'excite
à se recreer, engtendre des esprits fretillants
à foison, emplit les vaisseaux de matiere
seminale, fort louable pour luy approcher
du tout en tēperature, nous debuons croire
que plus abondamment l'on en peut pren-
dre, plus on excite & allume les estincelles

amoureuses, Ce que recognoissât cest Historien Romain Valere le grand, a fort bien dit que *Proximus à libero patre intemperantia gradus ad inconcessam Venerem esse consuevit.* Que le pere Liber nous faict le chemin par l'intemperance à Venus qui nous est deffendüe, Les anciens aduouäts ceste verité instituerent iadis en l'honneur de Bacchus certaines festes dictes phalliques du nom grec *Φαλλός* qui signifie vn mēbre viril, pource que tant les hommes que les femmes qui assistoient aux ceremonies d'icelles en portoiēt vn de bois pendu à leur col, pour dōner à entendre que le vin estoit autheur de l'act de generatiō, & apres de toute luxure & lubricité. Les Poetes nous ont descouuert ceste doctrine en la couurant du manteau de leurs fables, car lors qu'ilz nous descriuoient vn Priapus Dieu & gardien des iardins, avec vne corpulence monstrueuse de ses parties naturelles, & nous le representoient en cest equipage pour filz de Bacchus & Venus, ilz nous donnoient à entendre que l'excez de Bacchus nous conduit à vne paillardise du tout excessiue. Les anciens Autheurs portant tesmoignage à ceste verité appellent le vin, tantost la douceur de Cupidō, tantost le laiēt de Venus, tantost la fomentatiō des amours, & finalement disent que sans Ceres & Bacchus la bonne dame Venus se montre du tout refroidie. Sainct Hierosme ce grand trompette de l'Eglise, aultant enten-

du en la speculation des effectz de nature, que bien versé en la cognoissance des langues, disoit à ce propos que dès que le vin commençoit à bouillir dans le ventre, tout aussi tost s'en esleuoient les escumes de pail-lardise. Diodore de Sicile raconte qu'aux monts Eriens de Sicile aultant agreables à la veüe que riches en beaux fruiçts pour estre tous couverts de belles vignes & arbres domestiques, fust nay, & eslevé vn beau & amiable iouuanceau nommé Daphnis, lequel par les agreables traictez de son visage, auquel reluisoit vne beauté nompareille, auoit tellement charmé les sens, & endormy la raison d'une Nymphé nommée Diane, qu'en viuant elle sembloit mourir pour le feruent amour qu'elle portoit à son bien aymé Daphnis. Ores (comme le desdain, & l'orgueil accompagnent ordinairement la beauté) Daphnis se voiant caressé & recherché de l'amoureuse Diane, ne laissa pourtant de l'escōduire avec vn trop grand mespris de ses merites, dequoy la Nymphé indignee oultre mesure, luy predict avec menaces, que si apres l'auoir desdaignee il sou-blioit tant que d'en caresser vne aultre, que dès aussi tost qu'il l'auroit embrassée il seroit priué de la veüe. Daphnis persista quelque temps sans se vouloir ranger à l'amour, pour euitier l'accident duquel la Nymphé l'auoit menacé: mais en fin ayant vne-fois entre autres beu extraordinairement

maistrisé du vin, il fut quant & quant maistrisé de l'amour qu'il couuoit dans sa poitrine: & apres auoir defloré la fille d'un certain Roy, se trouua incontinent aueuglé. L'on raconte le mesme de Macareus, lequel apres auoir longtemps cōbattu l'incestueuse affectiō qu'il portoit à sa sœur Canace, en fin eschauffé de vin, s'eschauffa aussi à l'amour, tellement, qu'il la deflora & engrossa. Cynippe Siracusain sacrifiant à tous les aultres Dieux fors qu'a Bacchus fust en despit de ce enyuré par le mesme Dieu, d'où il vient à despuceler sa fille Diane. Aruns aussy ayant tousiours detesté le vin, finalement par l'indignation de Bacchus s'estant enyuré viola sa fille Medulline. Plutarque nous enseigne que ce cruel dictateur des Romains estant encor fort ieune, ne bougeoit ordinairement d'avec les farceurs, bouffons, & basteleurs à yurongner, & gourmāder en toute dissolutiō, de laquelle proceda le vice de luxure auquel il estoit fort subiect. A ce mesme propos l'Historien Ecclesiastique rapporte, que le Tyran Maximin (commendant à l'Empire d'Orient en mesme temps que Maxence dominoit en l'Occidēt) estoit fort excessif en bāquets à boire & manger, & s'enyuroit souvent, d'où naquist vn desbordement si desreglé à toutes delices, lubricités & paillardises qu'il n'y auoit non pas cité, mais bourgneville où il ne forceast quelques nobles matrones, ou violast quelques vierges. Mais ie

vous prie qu'estce qui perdit les Ambassadeurs Persiens delegués à Amynth Roy de Macedoine, sinon l'excez du vin qui les charouillant & eschauffant à l'incontinence, leur engendra vn desir effrené de coucher avec les Princesses Macedonienes? Qu'estce qui induisit les Centaures à vouloir rauer les femmes aux nopces de Pyrithons, sinon l'yuresse? Ces histoires nous donnent assés à cognoistre comme le vin excessif rend tousiours l'homme conuoiteux des plaisirs Veneriens. Que si quelqu'un les reiettoit comme particulier & refusoit d'en tirer vne consequence generale nous luy metterons en ieu des peuples entiers. Les anciens habitans de l'une & l'autre des Isles Baleares sont remarquez dans les Histoires pour auoir esté fort friands au vin & fort addonnez aux femmes: car ayants aultrefois porté les armes pour le seruice des Carthaginois, ilz ne voulurent rien du tout remporter de leur soulde, mais en firent vne emploitte de vin & de femmes, ausquelles ilz s'abandonnoient outre mesure apres auoir beu de mesme. C'est donc vn des effects du vin que la pail-lardise, aussy voions nous ordinairement que les femmes desbauchees, & du tout vouees à Venus, sont fort auides des presents de Bacchus. Ainsy Gnathæna, Hœca, Nanuium Lais, & autres putains fameuses, sont notees d'y-wrongnerie dans les anciens Autheurs, cōme si Venus ne se pouuoit pratiquer sans Bacch^s.

ny Bacchus marcher en campagne sans mener par la main sa compagne Venus. C'est ce qu'autrefois le Poëte Ovide a chanté en ces carmes amoureux.

Cum Veneris puero, non malè Bacche facis.

O Dieu Bacchus que tu fais bien

Avec le petit Cyprien.

Mais qu'est il besoin de plus ample preuve, ny de rechercher plus loin d'autres tesmoings, puis que ce grand Oracle saint Paul nous veut mettre hors de doute? ne vous enyurez pas de vin (dit il aux Ephésiens) d'autant qu'il prouoque la luxure.

Le Sage ia de longues années auparauiant S. Paul auoit condamné l'yurongnerie comme mere nourrice de paillardise. Voila la premiere opinion fondée sur le tesmoignage des anciens Poëtes, les raisons des Philosophes, l'autorité des saints Theologiens, & la verité de la voix diuine. Reste de mettre en campagne la partie aduerse sous la conduite de ce grand Aristote, qui ne tient point seulement que les hommes yures soient impuissants à l'exercice Venerien, mais bien d'avantage que ceux qui sont à ieun sont plus prompts à ce mestier & s'acquittent plus tost de leur deuoir. Ce party ne veut estre flatté, il ne mendie aucune faueur, il ne veut que vous croiez à l'auctorité seule de son conducteur, mais bien aux raisons qu'il rapporte, oyons les. Le vray ministre de toutes noz actions, c'est le chaud: la froideur

n'a point de lieux fructs de nature: de toutes les fonctions naturelles, celle qui semble auoir plus de necessité de chaleur, c'est celle dont il est question: or est il que le vin luy estouffe, luy destorne, luy raut: qu'en peut il donc reüssir sinon vn' rafroidissement à la conuioitise, & vne lascheté aux combats amoureux? Le vin estouffe la chaleur par sa quantité: la destorne des parties destinées à la generation en l'espan-dant egallement par tout le corps, & principalement aux parties superieures esquel-les il a vne inclination naturelle. La raut en la dissipant par sa chaleur propre qui est plus grande & intense: d'où sensuyt la debilité ou diminutiō, & quelquefois l'entiere abolition de la puissance generatiue. D'auan-tage la chaleur naturelle, ne laisse seulemēt les parties basses destituees de son secours pour monter à la teste, mais beaucoup plus pour se retirer dans l'estomach où elle est appelée pour cuire & digerer, le vin & la viande. Ainsi la semence demeure sans con-coction & perfection, elle ne peut estre en-flée ny animée des esprits viuifiants qui ont sonné la retraicte vers la cuisine, les vapeurs crües des viandes indigestes les rendent tout engourdis, & appesantis, quelle apparence d'amour, ou à peine reste il quelque senti-ment des obiects plus sensibles: nous auons pour tesmoing de ceste verité Alexandre le grand, lequel pour estre trop grand beueur

n'estoit si chauld, ny aspre apres les femmes. On lit de luy qu'estant vne fois couché avec Calixene (garſe autant ſinguliere en beauté du corps, qu'infame en ſa vie deſbordée) il ſe trouua tellement peſant & engourdy, quelle impatiente, d'vne telle laſcheté, fut contrainte de le ſolliciter pluſieurs fois, & le prouoquer au congres. Vous avez aultrefois ouy dire qu'Holofernes ayant en ſa puiſſance l'aultant belle que chaſte veſue de Bethulie, entra incontînât à vne rage amoureuse, & bruſlant d'un deſir ardent des embraſſemēts de la captiue & victorieuſe Iudith, ſe conſumoit en langueur tant luy tarδοit d'aſſouir ſa deſbordée volonté.

Le voules vo' voir reſroidy en ſes chauldes pourſuittes, endormy en ſes ſollicitations, exempt de ſa concupiſſence, & gelé entre ſes flammes amoureuſes? voiez le apres qu'il ſ'eſt enyuré, l'adiouſte que les nations plus abandonnées à l'yurongnerie ſont moins portées à la paillardie. Vøyons les Allemās, Pollonois, Danois, & aultres peuples ſubiects au Nort, cōferons leur intemperāce avec la ſobrieté des Italiens, Eſpagnolz, Afriguains, & aultres peuples Meridionaulx, & de là mirons vn peu la continence de ceux la, & la conſerons avec la deſbordée concupiſſe de ceux icy, & ie m'aſſeure que nous aurons ſubiect de croire que la ſobrieté rend l'homme plus procliué à l'amour. Et au contraire que la frequente yureſſe l'en deſtorne

du tout. Je ne puis taire en cest endroit le
tesmoignage de quelque escriuain François
fort notable entre les modernes, lequel tiët
que ses compatriots semblent de iour à au-
tre racourcir l'usage de bien boire, non point
pource qu'ilz vueillent dire à Dieu à leurs
vices, & se rendre plus curieux sectateurs
de la sobrieté que leurs deuanciers, mais
d'autant qu'ilz sont plus subiects à la pail-
lardise qu'eux, & que pour vaquer à icelle
plus valeureusement, il faut necessairement
qu'ils quittent la pratique de Bacchus, d'autât
que ces deux occupations s'entremeschent
l'une l'autre en leur vigueur, & d'auantage
la sobrieté rend l'homme plus ioly, plus
accort, & plus Damieret, & consequemment
plus agreable aux Dames, & plus propre
à l'exercice amoureux. Voila cōme en parle
le Sieur de Montagne, aux propos duquel
attachans la fin de ce discours, nous con-
cluons avec le Plutarque latin que les grâds
bruits rendent l'homme moins idoine, &
plus inhabile au combat amoureux. Vous
auez entendu ces deux opinions armées
de leurs raisons différentes, & de tout ce
qui semble pouoir servir à la deffence de
leur cause, appointee en party contraire,
essayons de vider leur different, & les ac-
corder paisiblement ensemble: car encores
qu'elles semblent bien contrepointees, si est
ce (à mon aduis) qu'il ny aura plus grande
difficulté de les rallier, pourueu que l'vne

& l'autre yueille tant soit peu rabbatre du bon droit qu'elle pretend luy estre acquis; voicy les articles de paix. La nourriture ordinaire du vin, voire mesmes pris gayement allume le feu de paillardise, & y rend l'homme plus porté; & brulant d'amour. Le vin ordinairement pris excessivement, & iusques à creuer, (comme l'on dit) empesche & amortit le deduiet de Venus. Le vin pris moderement, voire mesme à bon escient, est le vray esperon de luxure; l'yvresse est tousiours son frein. L'homme yvresse peut quelquefois rendre opiniastrement courageux en ce deduiet, comme il y est fort stimulé, mais apres tant de coups de tonnerres, tombera bien peu de pluye. Bref l'homme yvresse est du tout inutile au cōgres pendant qu'il est tel; mais quelque temps apres qu'il est des enyuré, il y peut estre fort valeureux, tant pour abonder en matiere chaulde, & prurjante, en esprits flatueux & en temperature idoine des parties destinees à ceste actio, que pour estre exēp de tous les empeschements que l'yvresse pracedente luy avoit procuré. La decision d'Ouide est conforme à la nostre, il luy faut croire comme bien experimenté. Escoutons le parler.

*Vina parant animos Veneri, nisi plurima
sumas*

Et stupeant, multa corda sepulta mero

Nurritur ventio, vento restinguitur ignis

Lenis alit flammam, grandior aura nocet.

Le vin nourrit l'amour, s'il n'est pris à excès,
Et ne nous assoupit demy morts sous son faix.
Le feu s'estaint au vent, & au vent se r'allume
L'amour se paist au vin, & au vin se cōsume.

QUE LA VERITE EST TOVSIOVRS
au vin, & comment cela se doit
entendre.

CHAPITRE XXI.

IOseph suiuant l'Histoire sacree
recite que Darius Roy des Per-
ses & des Medes estant vnefois
couché en son liēt sans pouuoir
dormir, s'aduisa, pour euitier l'en-
nuuy des veilles, de passer le temps en deu-
sant avec trois ieunes hōmes gardes de son
corps, lesquels veilleiēt lors à leur debuoir
& qu'entre aultres parolles, il leur proposa
trois diuerses questions, demandant l'aduiz
d'vn chacun sur la resolution d'icelles, pro-
mettant au surplus grands honneurs, & re-
compenses à celuy des trois, qui plus pru-
demment, & doctement satisferoit à ses
demandes. L'vne d'icelles estoit, quelle chose
pouuoit estre iustement reputeē la plus
forte.

Adonc le premier d'iceulx dit que le vin
estoit bien fort, le second que le Roy estoit
plus fort, & le troisieme (nomé Zorobabel)

tient que les fēmes estoient plus fortes, mais que la verité passe tout. Ces trois sentences estantes par le commandement du Roy remises au iugement de ses magistrats & conseillers, les deleguez prononcerēt d'vn commun accord que le troisieme auoit mieux opiné que les deux aultres, disant que la verité estoit la plus grande & la plus forte. Iugement certes tresueritable, voire la verité mesmes portant tesmoignage pour la verité; toutesfois quand ie considere particulièrement ces trois sentences, il me semble que la premiere qui attribuoit la præeminence au vin ne deuoit estre du tout defraudee de sa louange, & peut à bon droit contester de l'honneur de la victoire, veu que la verité (comme dit le prouerbe) git au vin, voire que le vin, & la verité ne semblent estre qu'vne mesme chose, ou pour le moins (comme dit Plin) que la verité soit tousiours la fille du vin. Ce que recognoissants les anciens, & rencontrants la verité tousiours logee avec le vin dans vne mesme poitrine, attribuerent à leur Dieu Bacchus vn trepied aussi bien qu'au Dieu Apollon, & luy mirent en son temple en signe de verité; les vns disent que c'estoit vne table à trois pieds: les aultres que c'estoit vne cuvette, ou bassin d'airain qui se posoit sur ceste table. Ores les vaisseaux d'airain dās lesquels Apollon faisoit retentir sa voix, & resonner ses oracles estoient de deux sortes, les vns dits

balneateurs qui se posoient sur le feu : & les aultres estoient certaines couppes ou hanaps dans lesquels ilz versoient, & meslangeoint le vin, & lesquels les anciens reputoient pour les plus propres, & les plus conuenables à la verité, ces couppes du commencement furent dediees & cōsacrees au Dieu Delphique pour ses diuinations, & prædictions, & depuis situees au temple de Bacchus à cause de la verité qu'ilz recognoissoient aussy bien au vin comme es oracles de Delphes : voire mesmes les Ligyriens (peuple de Thrace) ont eu aultrefois vn temple dedié à Bacchus dans l'intime reces duquel se rendoient des oracles, mais seulement par ceux qui auparauant auoient bien beu, & Euripide tesmoigne qu'anciennemēt on tenoit Bacch^o pour dieu des prædictiōs & deuinemēts. Ce qui a aultrefois meu Aristote de croire qu'Apollon Dieu de vaticination, & Bacchus Dieu du vin, n'estoient qu'une seule & mesme deité ou puissance, Telle a esté l'opinion des anciens touchāt le vin, tel a esté leur iugement touchant son effect : telle a esté l'origine du proverbe qui dit que la verité est tousiours au vin. Et non sans cause puis que le vin qui est le poison de toute dissimulation, & la mort de tout mensonge, met en euidence les plus secretes & cachees conceptions de nostre cœur, à cause dequoy Albricus es images Dieux depeint Bacchus ayant la poitrine descouuerte. Quelques Medecins discou-

rants de l'assurance, & verité des signes par lesquelz ilz sont guidez à la cognoissance de la diuerse disposition de l'homme, tiennent que le poulx ou mouuement de l'artere est des plus certains pour estre du tout conforme au mouuement interieur du cœur duquel il est deriué, partie laquelle pour son excelléce & noblesse ne peut aucunement mentir. Le vin qui est de temperature fort conforme à celle du cœur, fort familier aux esprits vitaux qui (comme nous auons monstré) semble estre proprement le cœur du cœur, est si parfaict & excellét qu'il ne peut loger, ny souffrir quant & soy aucun mensonge. On dit que les Notaires Suysses ont encor ceste coustume de presenter à boire aux contractants par deuant eux, & à tous les assistans conuoquez pour tesmoigner du contract, afin de les faire proceder candide-ment & (comme l'on dit) à la franche Marguerite, le vin purifiant leurs cœurs de toute circonuention, dissimulation, & mensonges. Les anciens escriuent qu'en Æthiopie se retrouve vn certain lac tout carré, le circuit duquel peut estre de cent soixâte & dix pieds, & l'eau de couleur sēblable au vermiellō, & d'odeur fort souefue, & assez approchante à celle de quelque bon vin vieil: au reste qu'elle a vne propriété du tout admirable, car ceux qui en boiuent sont incontinct surpris de folie & forcez de manifester & confesser publiquement leurs fautes, & pechez plus occults.

Mais, soit que ce soit de ce lac, on ne me sçauroit persuader que le vin luy soit inferieur touchant la suscitation & production de la verité, laquelle il engendre tousiours en noz cœurs: au contraire, sa vertu est si grande & si admirable, qu'elle semble surpasser toute la force & violence que l'esprit humain ait iamais peu inuenter. Les iuges pour extorquer la verité des criminels sur les faicts dont ilz sont preuenus, les appliquent à la torture, & les gehennent en diuerses & cruelles manieres: mais le pl^e souuēt l'eschelle, la corde, les gresillons, & aultres tourments plus cruels ne seruent de rien contre l'opiniastreté constante & la constance opiniastre du malfaicteur. Le seruiteur de Marc Anthoine, estant iadis condamné & appliqué à la question, pour luy faire confesser ce qu'il sçauoit touchant vn inceste duquel son maistre estoit accusé, supporta patiemment toutes les douleurs, & cruaultez recelant obstinement la verité pour couvrir la vergoigne de son maistre, & luy sauuer la vie. En ce cas icy que feroit vn iuge curieux inquisiteur? nouvelle inuention (messieurs) question extraordinaire, mais plus humaine, & non moins asseuree que les ordinaires, presentez à boire d'autant au criminel, & du meilleur, portez-le au discours, faictes luy diuers interrogats, son esprit embarrasé sera transporté d'un effort indomtable du vin dās les pieges de verité:

le vin ne peut mentir. Il a cela de particulier, qu'estât pris largement il induit l'homme à parler, il luy voile l'esprit pour ne point descouvrir les embusches couvertes, sous les deuis familiers, il le rend assuré pour ne s'en point mesfier, il luy fait prononcer la verité encor qu'il ne s'en aduise: en fin il luy faict mettre en evidence tout ce qui estoit recelé au plus profond cachot de son cœur: Flaue Ioseph se seruit fort dextrement de ceste pratique pour tirer les vers du nez (comme l'on dit) & crocheter le secret d'un soldat que ses ennemys luy auoient enuoyé: car apres l'auoir faict bien boire, à quoy il l'incitoit d'auantage par le salaire d'une Drachme (ce sont quatre carolus) qu'il luy auoit promis pour chascun verre de vin qu'il boiroit (ainsi vn vice entraine l'autre, comme vn chainõ son compagnon) l'auarice conduisit le pauvre soldat à l'intemperance, l'intemperance à la perfidie, la perfidie à l'ouuerture veritable des desseings cachez & couverts de son party. Ou (pour mieux dire) le pauvre soldat forcé du vin se laissa plustost emporter à vne confession volontaire de la verité, qu'il ne recognoist l'importance de sa confession. Voila donc la vertu du vin, voila comme il est plus fort que les tourments, & comme il faict esclorre la verité de noz cœurs. Toutesfois il en y a plusieurs lesquelz s'apperceuants que les iugements des hommes yures sont fort cornus,

que leurs raisons sont ordinairement depra-
uées ne peuuent bonnement cōprendre n'y
admettre la verité de ce discours. Anachar-
fis (disent ilz) espousa autrefois vne femme
fort laide: Or comme cela luy fut reproché
par quelqu'un qui soupçoit en sa compagnee
il le confessa franchement, mais s'aduissant,
tout à coup dit à son seruiteur, hola garçon
donne moy bien à boire & du meilleur, a-
fin que ie fasse deuenir belle ma femme. Par
cela nous enseignoit il que le vin deceoit
le iugement, & qu'il faict souuent errer la
veüe, & prendre vn Adon pour vn Therfyte,
c'est à dire estimer qu'un subiect soit doué
de quelque beauté exquise lequel parad-
uanture sera plus difforme qu'une furie in-
fernale. A la verité nous cōfessons que la trop
grande quantité de vin surmontant les sens
& la raison de l'homme yure produit des
discours plus Chymeriques que raisonnables,
des iugemēts plus ambigus que bien exacts,
& qu'il n'y fault auoir aulcū esgard, non plus
qu'aux folles imaginations & ridicules pa-
rolles des insensez, tant s'en fault qu'on y
doieue asseoir vn certain iugement, & les re-
puter pour veritables. Mais aussy souste-
nons nous que le vin descouure tousiours
quelque verité, & particularité de celuy qui
en a trop pris, & la met en euidence aux
autres. Et si bien il empesche l'homme de
discourir librement, s'il faict errer ses sens
touchant la perception de leurs propres

obiccts, en fin s'il ne luy permet de reco-
gnoistre la verité, il ne s'ensuyt pourceant
qu'il ne descouure aux aultres l'interieur de
celuy qu'il possede, quj autrement demeu-
reroit incognu. Aussi le prouerbe qui dit,
la verité est tousiours au vin, ne veut dire
que toutes les parolles prononcées par vn
homme yure soient veritables: & moins en-
cor se doibt il entendre indifferemment de
tous ceux qui sôt yures, soit qu'ilz le soient
auec quelque reste de cognoissance, ou bien
qu'ilz soient du tout maistrisez & assoupys
par la force du vin. En voicy la vraye intel-
ligence. Premièrement que l'homme qui a
beu du vin en quelle quantité que ce soit
ne le peut celer: en second lieu que le vin
descouure tousiours les mœurs & le natu-
rel de celuy qui en a pris: & en fin que l'hom-
me qui est entre deux vins, ou qui panche
à l'yuressse, ne peut qu'à peine celer aucun
secret: oultre ce que ses parolles se retrou-
uent le plus souuent veritables comme nous
auons des-jà touche cy deuant. Quand au
premier escoutez le tesmoignage du Poëte
Comique.

Celare Pheidia

Exceptis duobus, omnia possit quispiam.

*Nimirum vinum si quis adbibit, & amore
corruptus est.*

Oculi quidem ambo illa prorsus indicant,

Atque etiam oratio: ut qui negant

Illis potissimum signis innotescant plurimis.

*Fors le vin & l'amour, il n'est rien qu'on ne
celle:*

*L'on ne les peut cacher, ilz se monstrent tous
deux,*

*Quoy que l'on dissimule, au parler, & aux
yeulx,*

De vray le vin & l'amour s'accordent fort bien & en cecy, & en beaucoup d'autres choses: l'un & l'autre est plaisant & agreable quand il est moderé: l'un & l'autre est fort facheux & difficile quand il saisit, surmonte, & captiue son homme: quiconque les veut cacher, les gestes l'accusent, les yeulx le tesmoignent, & le visage le iuge. L'homme est il du tout yure, & passé en galle (comme l'on dit) qui ne s'en apperçoit? Est il entre deux vins? il se descouurira par son babil & par ses actions plus gayer, & deliberees que de coustume.

Le vin peut tant que le sage il destrane

Il faict chanter l'homme, tant soit il graue,

Rire & gaudir & chanter & baller.

Que si le vin est pris moderement, il est plus difficile de iuger si l'on en a beu, neantmoins encore descouure il soy mesme si l'on y prend garde de pres. Les anciens pour recognoistre si les femmes en goustoient contre la deffence qui leurs en estoit faicte, introduisirent le baiser, par lequel le marit, les proches, ausquels il estoit permis de baiser leurs parentes, iugeroient par l'odeur qui sortoit de leurs bouches si elles en auoiet beu.

Quant aux mœurs ou humeurs de l'homme, il n'y a rien qui les descouvre plus asseurement, ou veritablement que le vin. Le feu esprouue le dur fer (dit l'ecclesiastique) pareillement le vin beu en yvrongnerie fera apparostre le cœur des orgueilleux. C'est pourquoy Platon disoit que les conditions du commun des hommes se descouvroient mieux en beuvant, qu'aultrement. Aussi les Roys du temps iadis n'admettoient iamais personne au nombre de leurs mignons qu'ilz ne l'eussent premierement contrainct par la force du vin à descouvrir son naturel, & se faire paroistre digne de l'affection Royale. Si vn homme est babillard, s'il a vne ame ambitieuse, s'il est bouffy de presumption, s'il est pesant & engourdy en ses actiōs, bref s'il a quelque autre imperfection cachee, le vin la mettra tout aussy tost en euidence.

Le sage Pitachus entre aultres enseignements qu'il communiquoit au Corinthien Periander luy deffendoit de s'enyurer, de peur qu'il ne fust reconnu d'un chacun tel qu'il estoit. Il estoit porté par l'ancienne coustume des habitans du Languedoc que devant qu'un pere de famille fist choix d'un marit à sa fille, il le devoit cognoistre à la table, & au vin, ne plus ne moins que les Septentrionaulx esprouent l'esprit de leurs gendres futurs au ieu des eschecs. Et de vray comme l'eau claire represente la forme exterieure du corps, ainsi le vin demonstre
clairement

clairement les mœurs & habitudes interieures de l'ame: quelques Philosophes s'estonnent que le vin cause tant de diuers, & du tout differents effects, assoupissant tantost l'homme, & le rendant du tout lent & tardif, morne & melancholique, tantost l'esueillant à mille discours, & deportemens gais & facetieux en toute allegresse: ores le picquant des esguillons de vanité & folie. Mais (saulue correctiō) il me semble qu'ilz se trauaillent en vain de rechercher au vin mesme les causes efficientes de ces actions contraires, ce n'est le vin qui les produict, mais bien qui les excite selon la diuersité des mœurs, & du naturel d'vn chascun. Ne plus ne moins que le feu par vne seule & mesme chaleur endureit le sel, & fond la glace conformement à la disposition des corps cōtre lesquelz il agit: ainsi le vin s'accommodant à chascun de nous descouure nos inclinations plus cachees & selon qu'elles sont diuerses nous faiet esclorre diuers effects: Alcibiades estant avec les austeres, & seueres Lacædemoniens estoit austere, laborieux, en continuel exercice & viuant de peu: avec les delicats Iouiens estoit ioyeux, superflu, & delicieux: avec les yurōgnes Thraces, il beuuoit tousiours: tant bien sçauoit il s'accorder aux mœurs des personnes avec lesquelles il conuersoit: le vin en faiet de mesme, pris par vn melancholique il produira des effects melanco-

liques : par vn homme Iouial, s'associera avec son humeur : par vn cholere, le monstrera tel qu'il est, & ainsi des aultres passions. Car depuis que le vin est auallé, il eschauffe, agite, & esmeut tout le corps, & principalement les humeurs & les esprits. De ces mouuements l'homme est tousiours ou souuent porté es actions esquelles il a de l'inclination naturelle, d'autant plus viement, & avec plus grand effort, que plus grande est la chaleur ou aultre cause qui esmeut le trouble. Les discours n'ont pas moins d'efficace que les actiōs pour mettre en euidence ce qui est interieurement resserté au profond de noz ames. Iadis vn certain Richart enuoya son filz desia grandelet au Philosophie Socrates afin qu'il le vist, & considerast diligemment ce qu'on en deuoit esperer : Socrates pour satisfaire au desir du pere dit à cest enfant, parlez mon filz, afin que ie vous voye, & que ie vous cognoisse, signifiant par là que la parolle est vn certain, & assuré miroir de l'esprit, & que les mœurs de l'homme ne reluisēt tant au visage qu'au discours. Ores puis que le boire (comme dit Plutarque) induit les personnes à beaucoup parler à raison dequoy de tous les oyseaux la seule Pie a este dediee à Bacchus à cause du caquet & babil des yutongnes, & puis que le long parler faiēt descourir beaucoup de choses qui aultrement seroient couuertes, nous pouuons

conclure par vne iuste consequence que le vin n'en faict pas moins que la parolle mesme: mais bien d'auantage la parolle ne luy est qu'un des moyens desquelz il se sert en cest effect: c'est pourquoy le sage Salomon en ses prouuerbes condamne le vin, d'autant qu'il ny a rien de secret ou regne l'yurongnerie. Aussi dit on en commun prouerbe que ce qui est en la pensee du sobre, est en la bouche de l'homme yure. Car ne plus ne moins que le moult bouillant dans le tonneau pousse en hault, & le plus souuent iette dehors tout ce quil y a dedans le fûd: ainsi le vin bouillonnant en nos corps, tire & pousse violemment les plus intimes secrets du profond de noz cœurs. Le bon *Æsop* auoit tort de chercher d'autres fenestres pour veoir ce que son voisin auoit sur le cœur: mais c'est assez parlé de l'yuresse, passons à l'yurongnerie, selon la promesse que nous en auons faict, commenceants le discours par son antiquité.



*QUE LE VICE D'YVRONGNERIE
est fort ancien.*

CHAPITRE XXII.



Ncores que Solon soit loué generallement pour toutes les belles loix, & constitutions qu'il dressa iadis en l'estat Athenien, si est ce qu'il est celebré particulièrement pour vne de ses ordonnances par laquelle il deffendit de mesdire d'un trespasse, car (comme dit Plutarque) c'est bien & deuotement fait de penser qu'on ne doibt toucher aux trespasses non plus qu'aux choses sacrees, & se doibt on bien garder d'offencer ceux qui ne sont en ce monde. Aussi est ce la vraye marque d'une ame vile, & peu genereuse d'attaquer ceux qui n'ayants rien laissé en ce monde que la memoire de leurs noms, ne peuvent estre presents pour deffendre leur renommee contre ceux qui la deschirent, ne plus ne moins que quelques Grecs sont notés de poltronnerie, pour auoir tirassé & indignement traicté le corps mort du vaillant Hector, le seul regard duquel vivant ilz n'eussent peu supporter. Mais comme il n'est licite de mesdire de nos deuanciers, aussi n'est il bien seant de cacher aulcunes de leurs imperfections qui

peuvent nous servir d'exemple pour nous faire abhorrer en nous mesmes ce que nous mesestimons en eulx. Soubs ceste consideration nous représenterons l'yurongnerie des siecles passés: siecles à la verité admirables en toutes sortes de vertus, seulement detestables en ce vice qui a pris sa naissance avec le vin, & qui a plustost faict reconnoistre l'abus pernicieux de ce Nectar celeste, que son vsage salutaire. Entre les Mythologes Stesimbrote estime que Bacchus Dieu du vin fust nommé Dyonise pource que naissant avec des cornes il picqua la cuisse de Jupiter son pere, ce qui nous signifie que le vin n'a iamaïs esté si tost produit en aucune region qu'il n'ait incontinent offensé & blessé par la pointe de l'yuresse ceux qui s'esgayoient en son vsage. Je ne veux en confirmation de ce propos mettre en ieu le bon Patriarche Noël qui fust le premier qui planta la vigne, le premier qui beut du vin, & le premier qui s'enyura. Ce seroit faire tort à ce saint personnage, de le ranger au nombre des yurongnes, & le produire pour exemple d'une offence de laquelle il ne pouvoit estre coupable avant qu'auoir cogneu la force du vin: oultre qu'une action seule ne le peut charger d'yurongnerie. Je me contenteray de feuilleter les histoires profanes, & monstrier comme en passant que les premiers inuenteurs, & beueurs de vin en diuerses contrees de l'univers ont esté quant

& quant grands & excellents yurongnes: Bacchus qui a esté reputé des anciens Payens Dieu du vin soit pour auoir premier transporté la vigne des quartiers de la mer rouge iusques en la Grece, comme escrit le medecin Philonides: ou pour auoir enseigné aux Grecs la façon de faire le vin, cōme estime Marcian Capelle. Ce Dieu (dis-je) autant esloigné de la diuinité que voisin de brutalité, estoit tant subiect à boire qu'il estoit ordinairement yure, & trainé en ceste disposition sur vn chariot en plein marché à la veüe du monde, à cause dequoy les anciens le figuroient, & representoient le plus souuent noyé de vin.

Quelques Autheurs discourants des chapeaux de fleurs desquelz les anciens se couronnoient en leurs banquets, en attribuent la premiere inuention au mesme Bacchus, & disent que comme il estoit continuellement affligé de douleur de teste, à cause du vin qu'il beuuoit excessiuement, il fut contrainct de se serrer le front, & les temples pour appaiser la vehemence d'icelle, & qu'à cest effect se seruant de lyere, il en laissa l'vsage à ses disciples qui par apres changeants en delices ce qui leur auoit esté delaisé pour vtilité, vindrent à mettre en vsage diuerses sortes de fleurs pour en couronner leurs testes. Diodore de Sicile recite que ce maistre yurongne a esté surnommé Mitrophors, c'est à dire porte mitre, d'au-

tant que pour soulager sa teste offensee de trop boire, il l'affubloit quelquefois d'une mitre, à l'imitatiō duquel les Roys par apres ont environné leurs chefs de couronnes & Diademes. Ores comme il estoit galland beuveur aussy instruisoit il fort bien ses disciples en ce mestier, lesquels profitoient tellement en son eschole, qu'ilz s'enyuroiēt en leurs banquets, & festins ordinaires, iusques à deuenir folz & furieux, de maniere que se mescognoissants quelquefois les vns les autres, ilz s'entrebastonnoient de telle sorte, que les vns demeuroient morts sur la place, les aultres s'en retournoient bien blessés. Pour obuier à ces accidents Bacchus les desarma des bastons forts & pesants qu'ilz portoient auparauant, & au lieu d'iceulx leur donna la ferule, qui pour sa legereté rendoit les offences & blessures qu'ilz receuoient les vns des aultres, plus legeres & moins nuyfibles. Que si ces premiers inuenteurs & beueurs de vin se plaisoient à s'en remplir excessiuement, & induire les aultres à faire le semblable, ceux qui les ont suivis d'aage en aage n'en ont pas fait moins, au contraire leurs desordres se sont accreus autant que la quantité du vin a pris d'accroissement.

Hercules (qui selon les Chronographes n'a esté gueres esloigné du temps de Bacchus) estoit bien gourmand, mais il estoit encor plus grand yurongne. Estant vne fois pro-

uoqué par vn certain nommé Lepreus à qui mangeroit plus, il ſe comporta ſi valeureuſement en ce combat de machoires qu'il en remporta le prix, Lepreus ne ſe rendât pour ce combat, deſia Hereules à boire, mais il fut de nouveau ſurmôté par le defendât, qui ſe mōtra meilleur pion que luy. Auſſy eſtoit il ordinairement représenté par les anciens chance lant, ou tombant, & tenant le verre au poing : d'autant qu'il eſtoit le plus ſouuent yure. A cauſe dequoy les fables anciennes rapportent que pour arriuer en quelque Ile d'Eſpagne, il trauerſa vne grande eſtendue de l'Ocean, voguant dans ſon gobelet, comme dans vne gondolle : ſignifiant par ceſt *Ænigme* l'extreme yurongnerie du pelerin, pour à laquelle ſatisfaire il tenoit toujours aupres de ſoy vn gobelet de grandeur deſmeſuree. Que ſi Bacchus, ſes diſciples & ſueceſſeurs, tant par l'inuention du vin qu'ilz apportoint, que par l'abus qu'ilz en faiſoient & par leur mauuais exemple, ſemoient l'yurongnerie de tous coſtés, auſſy faiſoient beaucoup d'autres, leſquelz transportants puis apres l'vſage du vin incognu en beaucoup de regions y transportoint quant & quant le meſme meſus, comme vn accident inſeparable de la nouueauté du vin, tellement que noſtre propoſition premiere ſe trouue generalement veritable, & que nous pouuons dire avec aſſurance que l'yurongnerie eſt autant ancienne que le vin,

n'ayant iamais la vigne si tost enfanté le vin en aucune contree, qu'elle n'ait tout aussy tost conceu l'yurongnerie. Il en y a qui estiment qu'Icarus pere d'Erygone apres auoir donné aux Atheniens l'industrie de faire le vin, s'enyuroit en telle sorte, que son yurongnerie fut cause que le peuple le tua.

Ilz disent d'auantage que Saturne fut le premier qui transporta la vigne de l'Isle de Candie au pays d'Italie, mais il y porta quant & quant l'yurongnerie. Car apres auoir enseigné l'usage du vin, & la façon de planter la vigne à vn laboureur en recompence de la beauté de sa fille Eutoria, laquelle il auoit defloré, la soüefueté de ceste nouuelle liqueur fust aussy tost communiquee par le laboureur à ses voisins, qui en beuuant trop largement, s'enyurerent, & yures qu'ilz furent, assommerent le laboureur à coups de pierres. Cyrus, premier instaurateur de la Monarchie Persienne, redoubtant les armes de Thomyris Royne des Massagetes, laquelle il vouloit attaquer, se delibera de pratiquer par ruse ce qu'il ne pouuoit executer par force: car suyuant le conseil de Cræsus, il s'aduisa de semer l'yurongnerie parmy l'armee des Perses en ceste façon. Il fist semblant de se retirer, & permit quant & quant à l'ennemy de se saisir de son camp, qu'il auoit à desseing faict fournir d'une notable quantité de bons vins, esperant que l'ennemy iouissant de telle friandise & alle-

ché de la nouveauté en prendroit en si grãde quantité qu'il ne seroit en disposition par apres de se deffendre contre la camisade qu'il luy dresseroit. En quoy il ne fut rien trompé de son opinion: car les Massagetes comme ilz furent maistres du vin des Perses, furent aussy tost maistrisés & rendus esclaves de leur proye: cause del'entiere perte de la tierce part de l'armee de Thomyris. Plutarque escrit que quelques anciens Gaulois s'arrestans entre les monts Pyrenees, & les Alpes, pres des Senonois & Celtoriens, goustèrent du vin qui leur fut premieremēt apporté d'Italie, & qu'ayants trouué ce breuvage si bon, ilz furent si transportez du desir, & de la volupté d'en boire, qu'estans desia yurongnes en volonté (comme ilz le furent par apres en effect entrés en Italie) ilz chargerēt leurs asnes emmenerēt femmes & enfans & prindrent leurs chemins vers les Alpes, pour aller chercher le pays qui produisoit vn tel fruiët, estimans toute aultre terre sterile & sauvage. Mais il ne se faut esmerveiller si l'yurongnerie a tousiours tenu fidelle compagnee au vin, ne luy ayāt iamais permis d'entrer en aucun pays où elle ne l'ait suiuy de bien près. Car le vin a cela de propre sur tous aultres breuvages, qu'il faiët souuent boire l'homme sans soif, estāt sa liqueur si agreable au goust, qu'elle nous incite bien souuent à en prendre plus par plaisir que par necessité: tellement que

par ce moyen il vient à ouurir la porte à l'yurongnerie, & la tenir close à la sobriété.

Je pourroye rapporter en cest endroit plusieurs tesmoignages faisant à ce propos, mais ie les reserue pour les chapitres sui-
uants, ausquelz comme ie deduiray que l'y-
urongnerie est vn vice commun à toutes
nations, aussy par mesme moyen prouue-
raye qu'il a esté curieusement pratiqué par
les anciens.

QUE L'YVRONGNERIE A ESTE
familier à toutes nations.

CHAPITRE XXIII.

Dlogenes voyant de son temps
l'auarice espondue presques par
toutes sortes de nations, disoit
qu'il ne s'estoient pl^s si l'or estoit
de couleur passe, puis qu'il auoit
bien à craindre les embusches qui luy es-
toient dressees par le monde, où il estoit
agueté de toutes parts, toutesfois encore que
cette affamee conuoitise d'amasser (stampee
dans le cœur des humains dès aussi tost que
l'or & l'argent ont esté tirez hors de terre)
semble auoir semé son poison presques par
tout l'vniuers, si est ce que l'yurongnerie a
encores heu la vogue d'auantage ayant esté
receüe indifferemment par toutes les nati-

ons du monde sinon tout à coup, pour le moins successiuellement & en diuers aages.

Pline escrit que la nation Susiane (où est Susa Palais des Roys de Perse que d'Arius filz d'Histaspes fit bastir) est seule entre les humains qui a l'oren haine, mais ie ne pense point qu'il y aie eu iamais natiõ qui ait tant abhorré l'yurongnerie, que la plus grande partie d'icelle ne luy ayt ouuert la porte, & ne l'ayt receu fort volontiers, ayant esté les breuuages delicieux & enyurâts recherchez par tout autant & plus curieusement que l'or, ce que recognoissant Socrates, qui aultrefois a esté grand beueur, comme nous dirons cy apres, disoit neantmoins qu'il differoit de tous les aultres hommes en tant qu'il ne beuuoit & mangeoit que pour viure, & que les aultres ne viuoient que pour boire & manger. A l'opinion duquel ont soubscrit plusieurs lesquels cõsiderâts qu'une infinité de Princes qui ont tenu soubz leurs loix diuerses nations de la terre, se sont aultrefois rendus esclaves de l'yurongnerie, estiment probablement que les subiects symbolisants à l'humeur de leurs Princes, se sont volontairement reduits au mesme esclavage. Et de faict le dire du Poëte n'est pas plus commun que veritable.

*Si le Monarque fault tât soit peu, la prouince
Se perd, car volontiers le peuple suit son
Prince.*

On rapporte que Clisophus Athenien es-

toit tant affecté guenon des actions de Philippe Roy de Macedoine, que si d'auanture le Roy auoit mangé quelque morceau si fort ou aspre au goust qu'il le contraignit de le demonstrier par quelque semblant ou geste exterieur, Clisophus contrefaisoit incontinent son visage & sa mine, comme s'il eust mangé quelque morceau semblable. Si le Roy Philippe estoit blessé à l'œil, vous eussiez incontinent veu Clisophus bander son œil: si le Roy estoit blessé à la cuisse, vous eussiez aussi tost rencontré Clisophus clochant du mesme costé que le Roy: semblablement les compagnons de table de Denis le ieune Tyran de Sicile s'estudioient si exactement à imiter leur Roy, que recognoissans qu'il auoit la veüe fort debile, ilz faignoient aussi ne cognoistre qu'à peine le vin & les viandes qui leur estoient seruies sur table. Et afin qu'on ne pense point que telles façons complaisantes & flatteuses ayent esté particulieres: ie veux vous faire veoir des nations entieres qui ont curieusement imité les actions & desportemens de leurs Princes. Les Anciens Arabes s'y sont monstré trop exactes iusques à là, que si d'auanture leur Roy estoit mutilé de quelque membre, ilz se priuoient eux mesmes de la mesme partie du corps, afin qu'en tout & par tout ilz se monstrassent semblables à leurs Princes. En ceste derniere saison, lors que l'on tenoit pour inciuile d'estre tondu, on a

veu en France tous les subiects au preiudice de la coustume se tondre à l'imitation de leur Roy, qui par le conseil de ses Medecins commença à porter le cheueux courts pour obuier à certaine maladie qui le trouuailloit. Que si où il va de la vie, & de l'honneur l'on pert tout respect pour suivre son Roy, que sera ce lors qu'en luy complaisant, l'on plaist à soy mesme. Doubterons nous que ceux qui ont esté gouuernez par des Roys subiects au vin, ne se soient librement rendus tributaires au maistre de leurs maistres? Ce nous sera d'oc assez pour preuue de l'yurôgnerie des nations diuerses, de prouuer que ceux qui les ont gouuernez ont esté yurongnes, car de descendre aux particuliers, ce ne seroit iamais faict; suiuant ceste proposition quel tort ferons nous aux anciens Perses si nous croions qu'ilz ayent esté subiects au vin, puis qu'ilz ont eu des Monarques, qui reputoient à honneur de bien boire, & s'enyurer. Cyrus tant renommé, se voulât preferer à son frere Artaxerxes pour emporter la couronne Persienne, escriuit iadis aux Lacædemoniens qu'en toutes choses il estoit plus digne d'estre Roy que son frere, & mesmemét en ce qu'il portoit mieux grâde quantité de vin que luy. Darius voulant celebrer ses louanges commanda qu'apres sa mort on posast sur son tôteau vn Epitaphe, par lequel il se vantoit d'auoir esté vn singulier & memorable beueur. Si nous vou-

lons quitter le Royaume des Perles pour entrer dans l'Assyrie, nous y trouuerons entre vne infinité de Monarques addonnez au vin, le vilain Sardanapale autant indigne du tiltre Royal, qu'il a deshonoré ceste dignité qu'il possédoit par vne vie brutale pleine de luxe & d'yurongnerie. Si nous passons iusques aux Indes, outre ce maistre yurongne Bacchus, qui les a aultrefois subiugués & regis par force, nous y rencontrons beaucoup d'autres Roys ses successeurs autant nays à boire qu'à commander à leurs subiects. Si vous desirez de retourner en Syrie vous ny recognoistres gueres de Roys qui ne se soient fort pleus au mesme vice. Là apprendres vous les excès d'un Antigonus, qui apres auoir bien dormy son vin, ne se resueilloit iamais que pour s'enyurer de rechef: là sçaures vous que le Roy Dametrius ne fut si subtile pour trouuer les inuentions deschapper des mains des Romains que pour s'enyurer. Là finalement trouueres vous un Antiochus, mais que dis-je un Antiochus? ouy deux, & trois Roys du mesme nom, autant excellents en yurongnerie, qu'illustres en Royauté.

Deuant que sortir d'icy ie vous feray veoir dans les sainctes escriptures, que Ben Adad Roy de Syrie, assiegeant Samarie a aultrefois esté trouué beuuant dans son Tabernacle tout yure, & trente deux Roys avec luy qui estoient venus à son secours.

Si vous desirez auoir quelques nouuelles des Roys de Iudee, ou de Palestine leurs voisins, lisés les mesmes escriptures & l'histoire de Ioseph dans laquelle vous trouuez, rez que Godolidas & ses gens s'enyurerent au banquet qu'il fist à Ismael; qu'Antipater filz d'Herodes estoit grand yurongne, & qu'Alexandre Roy des Iuifs deuint fort malade par son yurongnerie. Si vostre curiosité vous faict donner iusques en Ægypte pour apprendre comme aucuns de leurs Roys se comportoient en ceste affaire, Herodote vous dira que Mycerine & Amasis Roys d'Ægypte ont esté fort addonnez au vin. Et l'Historien Iustin apres Trogue Pöpee vous asseurera y auoir eu vn Ptolomee qui passoit iour & nuict à boire carouffe, & sans nous esquarter de ceste route d'Asie, nous trouuerons encores entre aultres monarques vn. Mythridates commandant à vingt deux Royaumes tous vsants de langues diuerses & differentes, tant gourmand & yurongne qu'il surpassoit à boire & manger tous les hommes de son temps. Mais ie vous ay assés pourmené par l'Asie, permettés moy que ie vous conduise en Europe, pour considérer avec moy par qui elle a esté commandee. La premiere contrée où nous surgirös sera la Grece en laquelle les Roys, les Princes, les Potentats (là où l'estat publicque n'admettoit point de Roys) ont esté fort addonnés au vin. Achilles a aultrefois reproché à Aganem-

à Agamemnon Roy de Sparte qu'il estoit grand yurongne. Cleomenes son successeur ne luy a en rien esté inferieur. Nestor beuvoit si volontiers que l'on dit qu'il cōbattoit avec son grand gobelet tant renommé, cōme Achilles avec son bouclier. Et longtēps apres eux vn Alcibiades, vn Tymoleon, vn Cimon, & beaucoup d'aultres Princes & Capitaines Grecs, ne se sont trouuez moins amateurs de carousser que leurs deuanciers. Mais que dirons nous des Macedoniens leurs voisins? certes la mesme raison nous induit à croire qu'ilz ont esté addonnez à boire comme les aultres, car ilz en tenoient l'exemple de Pere en Filz, ayants premierement esté regis par Philippe pere d'Alexandre qui menoit ordinairement quant & soy bon nombre d'yurongnes pour auoir qui luy fasse cōpagnie à boire, son dire ordinaire lors qu'il auoit desseing d'yurōgner, estoit, ça beuuons hardiment, il faut que le Roy Philippe boiue, il suffit que son mignon Antipater soit sobre. Son Filz Alexandre ne luy en debuait rien, car il passoit quelquefois deux iours & deux nuicts à boire, tant qu'il le failloit emporter de la table par les pieds & par les mains. Leurs voisins Roys de Thrace n'ont esté guerres plus sobres, plusieurs d'iceux faisoient mestier ordinaire de s'enyurer vn desquelz, nommé Cotys seruira d'exemple pour tous les aultres. Le iour des nopces de sa fille (qu'il marioit à Iphicrates) il goustā si bien le

vin qu'il fut le premier yure de la compaignee. Vne aultrefois apres auoir perdu l'entendement par trop boire, il se fit preparer vn liēt pour coucher avec la Deesse Pallas, laquelle il se persuadoit auoir espousé le mesme iour. Le pays d'Illyrie a aussi eu ses Roys yurōnes, entre aultres Teuthyon s'est trouué durant son regne tousiours yure, & nuict & iour. Vn aultre Agron se plaisoit tellement à carousser, qu'il y gaigna vne douleur de costé de laquelle il mourut. Mais i'ay peur de demeurer trop longtemps en ceste inquisition, ie veux taire les Roys de Scythie, & beaucoup d'aultres de l'Europe pour parler des Monarques Italiens, des Tyberes, des Claudes, Nerons, Vitelles, Bonoses, & beaucoup d'aultres Empereurs Romains, qui sauf le respect de leurs dignitez, meritent d'estre appelez plustost monstres ou bestes qu'hommes raisonnables, tant ilz estoient prodigieux en leur yurongnerie. Et qu'est il besoing de mettre en ieu l'vn & l'autre des deux Tyrans de Sycile? Vn Nysæus, vn Apollocrates, vn Hipparicus, tous commandants au mesme Royaume, tous ordinairement yures? Que si nous voulions passer oultre pour descouurir les aultres Prouinces de l'vniuers, & produire en tesmoignage les Roys qui y ont regnez es derniers temps, nous courrions fortune d'estre tenus pour mesdisants, ou importuns au Lecteur, Il vaut mieux sonner la retraite, & conclure que comme il y a peu ou

point de regions habitees qui n'ayent esté aultrefois gouuérnees par Roys subiects à l'yurongnerie, aussi s'est il trouué peu de nations au monde qui n'ayent esté touchees du mesme vice. Mettons en encore vn aultre argument en auant pour preuue plus suffisante, & pour le contentement des curieux.

*QUE LES BREVVAGES DES Di-
uerses nations tesmoignent leur
yurongnerie.*

CHAPITRE XXIII.

ENcores que le discours precedent soit bien considerable, si est ce qu'il semble assez debile pour prouuer suffisamment ce qu'il pretend. Ce ne sera donc mal faict de l'appuyer de quelques autres raisons plus preignantes tirees de la diuersité des breuuages enyurants. Comme la substance liquide ou potulente est absolument necessaire à tous hommes pour l'entretènement de leurs vies, & de leur santé, aussi la volupté qu'ilz ont tousiours tasché de conioindre à cest aliment, a tellement chatoüillé leur palais, que conuertissants en delices, ce qui estoit deu à leur necessité, ilz ont laissé l'eau que nature sembloit auoir produit pour leur commun breuuage, recherchant avec trop

de soing & d'artifice, d'autres liqueurs pour leurs boissons ordinaires. D'où vient que les anciens Payens ont eu vne si constante, & asseuree opinion de l'immortalité de leur dieu Bacchus. Car encores que les autres deitez, lesquelles superstitieusement ilz adoroient, ayant esté souuent ou incognues en quelques endroicts, ou mesestimees selon l'opinion que chascun s'en forgeoit à son bon plaisir, iamais ilz n'ont doubté de la diuinité de Bacchus, tous vnanimement luy ont rendus hommages comme au diuin Aucteur, non seulement du vin, mais aussi de la bierre, ou ceruoise pour ceux qui habitoiēt des plages infertiles en vins, ou la vigne ne pouuoit se nourrir & esleuer. Et de nostre tēps Theuet ce grand explorateur de la terre, nous asseure qu'il n'y a nation au monde, tant soit elle barbare & agreste, qui n'ayme plus de traualier à faire quelque liqueur pour son boire, que de se contenter de l'eau pure, disant l'auoir experimenté par les quatre parties du monde esquelles il a fréquenté.

Or ces breuuages que la Gloutonnie des hommes a substitué à l'eau, n'attirent pas seulement les hommes par leur friandise à en faire excez, mais aussi par leur qualité chaulde & vaporeuse, se saisissent incontinent du cerueau & procreent l'yuressé: tellement que ceste friandise connaturelle à toutes sortes de nations, comme fondee sur l'absolue necessité de l'aliment liquide, sem-

ble estre la source d'où s'est escoulé ce grand Ocean d'yurongnerie, qui par apres a inondé tout le monde, & qui aourny d'industrie aux humains pour se preparer des breuuages aultant enyurants que delicieux.

Nous auons cy deuant suffisamment prouué que l'yurongnerie n'a iamais abandonné les presents de Bacchus ayant tousiours tenu fidele compagnee au vin : de plus nous tenons asseurement tant des anciens que des modernes, qu'il ny a nation au monde qui ne se serue de vin, ou aultre breuuage de sēblable force: dont il nous est loisible differer maintenant que l'yurōgnerie cōme vn doux & gracieux poisō a infecté tout l'vniuers, ou pour le moins sa plus grāde partie.

Le ne doubte point que ceste conclusion ne doibue apparoiſtre trop generale à plusieurs, & principalement à ceux qui pensent que la vigne est cultiuee & son vin cognu en bien peu de lieu de l'Europe, mais en attendant le temps auquel ilz seront mieux informez de ce faict, ou par les voyages qu'ilz feront, ou par le tesmoignage des bons Auteurs qu'ilz liront, ie veux qu'ilz sçachent encores que la region des Paropamissades soit extremement froide comme estant directement subiacente au Pol Septentrional, à cause dequoy les estrangers mesmes n'osent y entrer, si est ce qu'elle ne laisse de nourrir la vigne qui leur produict du vin,

bien soit ilz contraincts de la couvrir de terre en hyuer pour la conseruer contre la violence du froid. De là pouuons nous estimer que la vigne n'est si rare comme pensent quelques vns, veu que tous les aultres climats de la terre moins subiects aux rigueurs du froid peuuent à plus forte raison produire & esleuer ceste noble plante, car ie ne croy pas qu'il y ayt manquement d'artifice & de culture, puis que ie recognois tous les humains tant amateurs, & auides de la douceur de son fruct. Aussi se-oit ce faire tort à la nature nostre bonne mere, ou plustost à son Autheur d'estimer qu'elle ait esté tant enuyeuse du bien humain, que de réserver la vigne en vn seul, & petit coing de la terre, laquelle neantmoins elle a crée pour la seule conseruation de la vie & de la santé des hommes espars par tout les climats du monde. Plin ce grand & curieux rechercheur des effectz & liberalité de nature nous asseure que le vin & la vigne sont communs à toutes les regions de l'vniuers, à quoy les Geographes s'accordants nous apprennent qu'en Asie, Afrique, Europe, & l'Amerique se retrouuent beaucoup de contrées fertiles en vignes qui fournissent du vin si abondamment à leurs culteurs, qu'ilz en peuuent faire part aux regions moins propres à la nourriture de la vigne, où neantmoins le vin est beu ordinairement avec plus d'auidité & de gourmandise, qu'es lieux où

il croist. Ainsy les Anciens Gaulois avant que d'auoir la plante de la vigne en leur terroir estoient tellement addonnez au vin qu'ilz l'acheptoient à prix excessif des marchands Italiens, & en beuuoient tant desordonnement qu'ilz en deuenoient quelquefois folz & furieux. Ainsy les Anciens habitants des Isles Baleares, dictes maintenant Maiorque & Minorque n'ayants point de vigne en leur contree, estoient si amoureux du vin, qu'ilz ont aultrefois portez les armes au seruice des Carthaginois seulement pour en boire: ainsy voyons nous pour le iourd'huy que les Anglois, Flamands, Danois, & autres nations qui ne peuuent nourrir la vigne, sont plus conuoiteuses du vin, que celles qui la cultiuent. De là colligeons que la consequence de ceux qui ont opinion que l'vsage du vin n'est cognu qu'en fort peu de lieux, est abusive & tresmal fondee, puis qu'il n'y a partie de la terre qui ne le produise, en diuerses contrees: desquelles par apres, il est porté & distribué aux pays qui en sont priuez. Mais quand bien nous aurions accordé, que le vin de la vigne soit aussi rare qu'il est curieusement recherché, si est ce que nous trouuerions vne infinité d'autres vins de mesme efficace qui ont esté en vsage aupres des anciens en diuerses nations, & sont encores pour le iourd'huy aupres des modernes qui en abusent souuent à yuronner. Les Anciens Perles, Indiens, Arabes, &

Parthes qui ont aultrefois estendu leur domination sur vingt & deux Royaumes, vsoiēt ordinairement de vin de Dattes qui leur estoit fort singulier : la plus grande partie des peuples de l'Asie, & generalement tous les Orientaux, en faisoient leur principal breuuege encor qu'il donnaſt fort en teste. Et pour le present les Indiens Orientaux, iusques aux Royaumes de Huſerath, hedroſie, Cabut, Moltain, Chirtor, & Dely, tirant iusques au Royaume de Biſnagar font tous leurs breuueges de groſſes Dattes fort meures, avec vn aultre fruiēt qu'ilz appellent Bulon, & en font en telle quātité qu'ilz en traffiquent avec leurs voiſins & peuples eſtrangers. Les anciens *Ægiptiens* oultre le vin de vigne n'vsoient pas ſeulement du vin exprimē d'un fruiēt dict *Sebeſte* fort familier aux quartiers d'*Ægipte*, & de *Syrie*, mais auſſi auoient pour breuuege fort frequent la biere, ou ceruoise, de laquelle ſe ſeruoient auſſi les anciens *Eſpagnolz*, *François*, *Flāmānds*, *Anglois*, & *Allemands*, & laquelle eſt encores pour le iourd'huy fort commune non ſeulement aux habitāts des quartiers *Septētrionaux* où elle ſe faict avec orge, aueine, ſeigle, & fromēt : mais auſſi aux *Meridionaux* qui la font de ris & s'en enyurēt : la ſuperſtitiō de leur loy ne leur permettāt de gouſter du vin de vigne. L'anciēne boiſſō des plus pauvres habitāts d'*Illyrie* (appellee *Sabaia*) ſemble auoir eſté de meſme nature que la biere des modernes,

car elle se composoit de grain d'orge, ou de froment cuit & tourné en breuuage. Le vin que les Indiens tirent de la graine de leur Mays cōuient encore fort bien avec la ceruoise pour estre faicte & cuite en mesme sorte; ilz mettent premierement tremper le grain de mays iusques ad ce qu'il se creue, puis le cuisent tant qu'il en deuient si fort & fumeux, qu'il en fault bien peu pour abbatre son hominne. Aussi est il deffendu par la loy à cause des grands inconueniens qui en suruiennent, encores que ceste ordonnance soit mal obseruee; car ilz passent les iours & les nuits à s'enyurer. Ce breuuage, appelé Acua, ou Chica par les Indiens, se cuit encore d'une aultre sorte, sçauoir en maschant le mays, pour en faire du leuain, puis le faisant bouillir. Et en ceste façon peut il estre aulcunement rapporté au vin artificiel duquel beuuoient les Anciens Scythes peuples Septentrionaux, habitants en partie de l'Europe, & en partie de l'Asie, qui se preparoient vn breuuage avec leuain, & sorbres aigrettes, duquel ilz s'enyuroiēt souvent employant les nuits entieres à boire & iouer. Cest ce que nous en rapporte le Poëte Virgile en ces vers.

*Hi noctem ludo ducunt, & pocula leti
Fermento atque acidis imitantur vitea sorbis.*
De ceste ancienne liqueur Scythique n'est trop esloignee la boisson que pour le iourd'huy quelques Maures s'accomodent du

fruiçt d'un certain arbre, laquelle eſt aſpre au gouſt comme le ſuc de cormes auant qu'elles ſoient meures. Les habitants de Malaca iuſques à la Mer de Mangi, & Royaume de Xanthon, Cambala, la Chine, voire iuſques à Quinſay, & finalement tous les Tartares Orientaux, font leur boiſſon d'un fruiçt gros, & tout tel que les noix d'Inde; & vſent preſques de pareille façon & induſtrie que les Normands à faire leur Citre; lequel a auſſi eſté iadis bien commun aux Grecs & Latins, comme il eſt à preſent fort familier aux nations Bretonne, Normande, & beaucoup d'autres. A ce breuuage peut eſtre rapporté celui des Lotophages habitants de Lybie en la marche des Gindanes leſquelz iadis ſe nourriſſoient du fruiçt de Lalifier, & en exprimoiēt un fort bon vin pour leur boiſſe ordinaire.

Le breuuage des Negres de la haulte Æthiopie, eſt fort approchant de ceſtuy cy, il eſt tiré d'un fruiçt gros cōme un Citron moyen, qu'ilz appellent Zazulich ſon ſuc ſe nomme Anahier, autres diſent Alkadin, le breuuage tire ſur le rouge, & a le gouſt fort ſauoureux ſauf qu'il eſt tant ſoit peu aigret. Plutarque eſcrit qu'anciennement ſe faiſoit un autre breuuage avec du miel, duquel on ſe ſeruoit auant que la vigne fuſt trouuée, & iuſques icy dit il, les Barbares qui ne boient point de vin vſent de breuuage fait de miel, corrigés ſa douceur avec la ſauueur de quelque

racine aigrette & vineuse. Diodore de Sicile attribue ce breuage à tous les peuples qui habitoient les quartiers qui regardent le Couchant & Septentrion, depuis les Celtes qui tenoient les Alpes, & Pyrenees, iusques à la region des Scythes.

Ceste sorte de liqueur semble encores durer en l'Hydromel, qui est fort en vsage entre beaucoup de nations de l'Europe, & spécialement entre la Moscouite, Polonoise, & Allemande, laquelle prise beaucoup celui qui se cuit & prepare à Ratisbone, n'estant moins fort pour enyurer, qu'aggreable au goust. Les Anciens Pæoniens, confins du Pays de Thrace & Macedoine beuuoient vne aultre liqueur qu'ilz appelloient Parauie, laquelle ilz accoustroient avec du millet & du ris. Ceste liqueur est auourd'hui contrefaite par les Canibales & aultres Americains, qui l'appellent Cahouin, & la composent d'une certaine racine, & gros millet, duquel ilz s'enyurent aussi bien que du meilleur vin que l'on scauroit boire. Anciennement les Troglodytes, peuple d'Æthiopie, auoient deux sortes de vin, l'un plus vil pour le vulgaire fait du suc d'un arbrisseau dict en Latin Paliurus: l'autre plus exquis exprimé d'une certaine fleur laquelle rendoit vne liqueur presque semblable au plus foible & debile moult qui se feist en Italie. Et pour le present se retrouuent beaucoup de nations qui se seruent pour breuage ordinaire d'un suc

descoulât de quelque arbre ou plante, comme est le Melt, ou Magnei en Mexique, duquel le suc destrempé en eau de fontaine purgé & nettoyé de son marc se tourne en bon & excellent breuvage doux au goust, agreable à boire, & enyurant comme vin de vigne. Ainsi en l'Isle de la Taprobane, autrement Sumatra, se retrouve vn arbre appelé Thal, lequel estant fendu & incisé red vn bon & doux breuvage qui sert de vin aux Insulaires. Ainsy au pays de Canada se retrouve vn arbre appelé Cotoni, duquel ouuert & couppé, distille vne liqueur si soüefue, qu'elle ne cede aucunement à la goutte du vin. Ainsi le mignol suc de la Palme, ou arbre semblable enyure les habitants de la Prouince Budomel, des Isles Zebut, Burner & Molucques qui en boient ordinairement, & beaucoup d'autres peuples qui en vsent comme font beaucoup d'Æthiopiens les habitants de la Guinée, plus de six centz lieües de coste de mer, & finalement le peuple du Promontoire verd, lesquelz entre eux font autant d'estat de leur mignol (tant il est plaisant à boire) comme nous faisons par deça de noz bons vins. Mais qu'est il besoing de rapporter aultres tesmoignages pour la verité de ce propos, veu que les Auteurs tant anciens que modernes en ont réplis leurs volumes? Qu'il nous soit donc loisible de conclure avec Plin que comme il n'y a quartier de la terre habitable où l'on ne trouue

du vin de vigne ou aultre breuuage qui ait vertu d'enyurer: Auffy qu'il n'y a nation au monde, qui ne soit ou n'ait esté aultrefois subiecte à l'yurongnerie, ce que nous monstres en particulier au chapitre suiuant.

*DIVERSES NATIONS SVB-
iectes à l'yurongnerie, & premiere-
ment les Hebrieulx & Egiptiens.*

CHAPITRE XXV.

DAultant que les raisons vniuerselles font moins apparoir la verité aux esprits trop materielz que les demonstrations sensibles du subiect duquel on traite, il m'a semblé bon de rapporter en ce chapitre & aultres suiuaunts vn tesmoignage aultant rare que curieux de l'yurongnerie particuliere de beaucoup de nations, afin que si les precedents discours ne preuent suffisamment les diuerses nations de la terre telles que ie les ay voulu despeindre, le present discours suruienne à ce deffault, auquel i'appliqueray particulièrement les viues couleurs pour représenter au naturel ceux que i'ay seulement crayonné au chapitre precedent. Ce grand genie de nature Aristote traictant de la volupté, que l'on peut percevoir des sens extérieurs, nous en-

seigne que comme la veüe, l'ouïe, & l'odorat sont beaucoup plus excellents que le sentiment du goust, & du toucher, aussy que la delectation d'iceux est plus tolerable aux hommes, & que le plaisir des deux derniers est plus conuenable aux bestes.

Aussy ne voions nous gueres de voluptueux, ou intemperants qui ne ressentent plus la terre que le ciel, & qui n'ayent plus de soing de la vile masse de leurs corps, que de l'excellence & perfection de leurs ames. Or si les nations les plus ciuilees, mieux instruites en la Philosophie, & consequemment plus temperantes, se sont neantmoins laisse conduire, & precipiter dans la Cloaque d'yurongnerie, comme nous prouuerons maintenant, pour s'estre emancipees de la conduite absolue de nature, qui demande seulement vne nourriture suffisante pour l'entretenement du corps, & s'estre rangees sous le gouvernement de leurs sens brutaux: il me semble qu'à plus forte raison les nations plus grossieres, & moins esclairees des rayons de la Philosophie, & partant plus proclives aux inclinations brutales sont facilement conuaincues du mesme vice. Le peuple Hebrieu (que ie prefere à tous autres du temps iadis, tant pour la science de diuers arts que pour la cognoissance particuliere d'un seul Dieu, de la religion, du culte, & des loix diuines) a esté aultrefois tellement porté au boire qu'il ne pensoit

bien honorer le iour du sabbat, qu'on se con-
uient l'un l'autre à boire à excez. Ce que
l'Ecclesiastique semble toucher en passant,
quand il luy deffend ceste façon de se pro-
uoquer à coups de gobelets, d'autant que
le vin endestruict plus que le glaue. Que si
nous voulons fueilleter les histoires sacrees,
cent & cent yurongneries se presenteront
à la premiere ouuerture d'icelles. Là ver-
rons nous comment Nabal faisant festin
s'enyura. Là trouuerons nous qu'Amnon se
laisa surprendre de vin au banquet Royal
que luy fist Absalon. Là apprendrons nous
qu'Ela regnant sur Israël beuant & yuron-
gnant en Thersa fut tué par son seruiteur
Zambri. Et finalement nous y remarquerõs
que quand l'on auoit dessein de deceuoir
quelqu'un on l'enyuroit auparauant que de
iouer le roollet. Ainsi lisons nous que les
deux filles de Loth pour cohabiter avec leur
pere, & conceuoir de luy, s'aduiferent de
le surprendre par le vin. La mesme ruse fut
pratiquée par le Roy Dauid, qui desirant
iouir plus secrettement de la beuté de
Bersabee, appella le bon Vrie son mari à
manger, & le fit tant boire qu'il l'enyura.
Pour conclusion les anciens Iuifs, estoient
tellement portés à boire, que de plusieurs
sortes de punitions qu'ilz auoient, la plus
honteuse estoit celle par laquelle on deffen-
doit le vin à ceux qui auoient meffaißt, pour
autant de temps qu'il plaisoit à celuy qui

auoit la puissance d'imposer la peine. Apres la nation Iuifue ie trouue que les *Ægiptiës* leurs voisins ont esté fort civilisés, tant à cause de leur modestie & bonnes mœurs que pour la subtilité de leur esprit, qui faict qu'*Herodote* les tient pour les plus limez & esueillez de tous les hommes, avec lesquels il eut iamais communication: & neantmoins ilz se sont monstres aultant barbares, & brutaux en ceste passion barbare & brutale, que la plus grossiere nation du monde. Ce que recognoissant *Phanes* homme de bon cerueau, & vaillant aux armes, se trouuant prisonnier d'*Amasis* Roy d'*Ægypte* qui l'auoit faict arrester comme il s'enfuyoit à *Cambises* Roy des Perses, se voulut seruir de leur gloutonnie, comme d'un moyen subtil, & assésuré pour eschapper de leurs mains: car il enyura si bien ses gardes, qu'il eut loisir d'euader, & se rendre au Persan. Cecy mesmes fut heureusement pratiqué par le larron *Ægyptien*, qui desirant d'enleuer le corps de son frere des creneaux des murailles où il estoit ignominieusement pendu & gardé soigneusement par des soldats *Ægyptiens*, vint finement à les faire boire d'aultant, & les mit en tel equipage, que non seulement il ioüyrt facilement de sa proye, mais d'auantage prit le loisir & l'assurance de raser la moustache droicte à vn chacun des gardes endormies. Quelques anciens ont aultrefois estimé que le remede de la soif auoit esté trouué

esté trouuë en leur contree, les voyant por-
 tez à la douceur de la liqueur destinee à cest
 effect plus passionement que les aultres. Mes-
 mes quelqu'vns ont creu que le vin auoit esté
 premierement descouuert aux enuirs de
 Plinthine ville d'Ægypte, & la ceruoise aus-
 sy pour supplémēt, voulant subuenir ensemble
 à la necessité, & au contentement de ceux qui
 ne pouuoient auoir du vin. Et de faict ce
 breuuage les a tiré à l'yurongnerie comme
 le vin mesme, & ceste yurongnerie aux dis-
 solutions, aux chansons, aux danſes, comme
 celle du vin. Sur la fin de leurs repas ilz fai-
 soient porter vne image de mort à l'entour
 des conuiés, celuy qui la portoit la presen-
 toit à chascun des assistants luy disant, boy
 & t'esioy pendant que tu es en vie, car
 apres ta mort tu seras semblable à ceste image;
 Ce qu'ilz pratiquoient pour s'inciter à boi-
 re d'auantage, pensants comme aultres Sar-
 danapales adoucir les traux, & la briefueté
 de ceste vie, par vn contētement brief, & vne
 volupté plus ennuyeuse que la mort. Pour
 mieux s'esueiller à tel exercice qui souuent
 endort les plus esueillés, ilz lioient & atta-
 choient aux courones qu'ilz portoient sur
 leurs chefs, des oisillons nommés Dagnades;
 lesquelz gazoüillants, becquetants, & vole-
 tants entour leurs testes empeschoient de
 dormir ceux qui desja assoupis par le vin se
 fussent laissé abbatre du sommeil au milieu
 des assaults.

Mais laissons les dormir tout leur saoul, ou veiller ou renuiellir tout ensemble, & venons cependant à recognoistre les Grecs plus Barbares en ceste action que toutes les nations qu'ilz ont appellés Barbares.

*QUE LES GRECS SE SONT AD-
donnés excessiuement à l'Yurongnerie.*

CHAPITRE XXVI.



'Est en Grece où les grands carousses, & les grands gobelets ont esté principalement pratiqués: c'est en la Grece où plusieurs mixtions de vin ont esté inuentees, où les diuerses façon d'Yurongner ont esté curieusement recherchees; où les combats de bien boire & les prix ont esté proposés aux meilleurs beueurs. Bref c'est en Grece où indifferemment toutes sortes de personne, iusqu'aux plus graues & plus seueres Philosophes se sont laschemēt perdus au vin. Socrates entre aultres a esté si vaillant en ce combat, qu'il y passoit les nuicts & les iours tout entiers. On racôte de luy qu'aultrefois s'estant trouué à vn soupper avec Agathon, Aristophanes, & beaucoup d'aultres, il ne voulut iamais quitter la table, n'y l'escarmouche Bacchique, qu'il n'eust auparauant terrassé tous les conuiues, qu'il

laissa endormys sur la place, horsmis Agathon avec lequel il se retira au point du iour, il appelloit puits les gobelets qui causerent ce deluge: à cause de leur profondeur ou grâdeur desmesurées. Nous lisons qu'après la mort de Socrates Platon prouquoit ses disciples à grands coups de verres, pour les consoler & resiouyr sur la mort de leur maistre. On nous a appris que Xenocrates à esté le meilleur yurongne de la table de Denis Tyran de Sicile. Anacharsis (si ie l'ose appeller grec pour auoir appris l'yurongnerie en grece) s'est aultrefois vanté d'auoir esté le premier enyuré de sa compagnee: on admire les banquets des sept sages de Grece tant celebres pour leur doctrine, & vertu, lesquels neantmoins s'assembloient bien souuēt pour faire des coups d'essays en matiere de carouffes. Polemon Philosophe grec admonestoit ceux qui estoient inuités à quelque festin de boire delicieusement non seulement pour le temps present mais aussy pour l'aduenir, Stratonicus de la mesme nation ne pouuoit dormir sans boire auparavant, non pour appaiser la soif mais pour la preuenir. Philoxenus Poëte grec souhaittoit auoir le col aussy long qu'une Grue pour iouyr plus long temps de la volupté que le vin cause en passant par la gorge, Archefilaüs Philosophe Grec s'enyura si excessiuelement qu'il s'en causa la mort. Antiphanes le Poëte disoit que viure n'estoit aul-

tre chose que bien boire. Mais quoy ? ce fut en la ville plus florissante ez bonnes lettres & vertus de toute la Grece ; en Athenes dis-je, où lon crea le magistrat des Oenoptes qui presidoit sur le vin, & donnoit ordre qu'un chascun beut esgallement sans tromper son compagnon.

C'estoit en Grece où il se trouuoit des personnes si delicieuses, qu'elles laissoient tous autres exercices pour les banquets, ie m'en rapporte aux Bæotiens, qui apres les guerres Leuctriques auoyent pris telle coustume de se festoyer les vns les aultres, qu'il s'en trouuoit parmy eux qui pour vn mesme iour estoient inuitez à aultant de soupper qu'il y auoit de iours en vn mois. Et pour le faire court les Rhodiés, Thasiens, Thesfaliens, Macedoniens, Thebains, Atheniens, Corinthiens, Lemniens & generalemēt tous les Grecs estoient grands beueurs & vray yurongnes. Quelqu'un peut estre s'esmeruillera que i'eroolle icy les Lacedemoniens en ceste compaignee d'yurongnes, veu que leur sobrieté, est tant & si souuent recomman-dee, & principalemēt par Platon & plusieurs aultres. Certes ie ne doute point qu'ilz n'ayent fort affecté la sobrieté comme ilz l'ont eu en grand estime, mais on ne me scau-roit aussy nier qu'ilz n'ayent esté enclins à l'yurongnerie comme les aultres Grecs, & qu'ilz n'ayent eu force yurongnes parmy eux, tesmoing la façon de parler dont ilz

vsoient en caroussant, Scythifons (disoient ilz, pour s'inciter à boire les vns les aultres). beuons à la Scytique, c'est à dire tout pur, & à grands traicts, & nous enyurons comme les Scythes.

Et pourquoy ie vous prie enyuroient ilz les Hilotes leurs seruiteurs en presence de leurs enfans, si ce n'estoit pour les destourner de l'yurongnerie à laquelle ilz les recognoissoient procliuës? Pourquoy eussent ilz dressé des loix & edicts contre les yurongnes s'il n'en y eut eu en leur Republicque, veu qu'ilz n'en voulurent iamais ordonner cōtre les Parricides, d'aultāt qu'il ne s'en trouuoit point entre eux? I'ay aultrefois remarqué dans Herodote vn notable exemple sur ce propos, Cleomenes Roy de Sparte estoit si grand beueur qu'il se trouuoit ordinairement surpris de vin; par l'excessif & continuel mesus duquel il deuint tant fol & furieux, que se taillant & hacheant luy mesme en pieces, il se fit piteusement mourrir. Tenons donc pour certain qu'anciennement tous les Grecs ont esté excellents & illustres beueurs, dequoy fait foy le prouerbe des Romains qui est fort frequent en la langue latine en laquelle *Pergræcari*, c'est à dire greciser, ou boire à la Grecque, signifie proprement se prouoquer l'vn l'autre à boire d'aillant & à grands traicts iusqu'à s'enyurer. Le voisinage m'oblige de rapporter en cest endroit vn traict remarquable de l'yurōgnerie

de l'ancien peuple de Constantinople voisin des Grecs qui estant vnefois estroictement assiegé ne pouuoit neātmoins en si extreme danger se ranger à son debuoir pour border la muraille, & demeurer en garde: mais au cōtraire se retiroit à la desbandade ça & là aux cabarets où il auoit accoustumé d'y-urongner auparauant: pour remedier à l'inconuenient qui les menaçoit Leonides leur capitaine s'aduisa de faire dresser des cabarets à l'entour des murs de la ville, ainsy arrestant ses concitoyens pres de soy & des murs il les retint par mesme moyé à leur debuoir.

Mais que dirons nous maintenant des anciens Romains?

*QUE LES ANCIENS ROMAINS
& leurs voisins se sont laissez aller
laschement au mesme vice.*

CHAPITRE XXVII.



Nous ne pouuons rendre plus asseuré tesmoignage des Romains que celuy qu'eux mesmes ont laissé par escrit, sçauoir qu'autant qu'ilz s'estimōient plus civilisés que les Grecs, d'autant les surpassoiēt ilz en yurōgnerie. Pline rapporte que Caton le grand se plaignoit des Grecs qui de son temps infectoient tous les latins par les vi-

ces qu'ilz feroient parmy eux, & le Poëte Horace dit que les Romains subiugants la Grece, se sont laissés eux mesmes surmonter par les vices des Grecs, entre lesquels l'yurongnerie tenoit le premier lieu. Mais certes sans leur desplaire il ne leur est bien seant d'excuser leurs vices en accusant les estrangers cōme premiers auteurs, veu que longtemps auparauant que les Italiens & Grecs eussent communiqué par ensemble, les Romains s'estoient rendus esclaves de l'yurongnerie: & entre aultres Caton mesme qui detestoit tant les Grecs, s'escrimoit neantmoins fort galamment du gobelet, resmoing ce Distiche d'Horace.

Narratur & prisce Catonis

Sepe mero caluisse virtus.

L'ancien Caton bien souuent

S'eschauffoit à boire d'autant.

Macrobe parlant des anciens iuges Romains les depeint comme vrayz yurongnes, les faisant à chasque quarre de rue vuidier leurs vescies pleines & estendües pour le trop de vin qu'ilz auoiēt beu les represētāt avec vn tel assoupissement, qu'ilz ne pouuoient quasi ouurir les yeux, & leuer leurs paupieres toutes bouffies & enflées. Et avec le temps ce vice entra en si grand credit parmy eux, que plusieurs ne faisoient estat que de boire. Pour mieux satisfaire à leur appetit desnature, les vns faisoient couler le vin par vne chauffe d'Apoticaire afin d'amortir sa force

autres voltigeoient & danſoient à la Moreſque, pour ſ'alterer & boire d'auantage : autres vomifſoient, & reuomifſoient deux & trois fois ce qu'ilz auoient beu pour recomancer de nouveau leur exercice, & finalement (ce que ie ne puis eſcrire ſans grand eſtonnement) aucuns ſe ſont monſtrés tant ennemys d'eux meſmes que pour ſ'obliger forcement à boire, ilz courroient volontairement fortune de leurs ſantés & de leurs vies. Car ilz aualloient d'une herbe nommee ciguë, ou bien de la pierre Ponce, ayant appris des naturaliſtes que leur qualité venimeuſe tue promptement ceux qui en ont pris, ſ'ilz ne ſont incontinent ſecourus prenant quantité notable de bon vin. Mais quoy ? tout y eſtoit tellement deſbordé que les Medecins meſmes flattants ce vice, ordonnoient des breuuages à ieun pour faire vomir, & diſpoſer à bien boire, voire meſmes du téps de l'Empereur Tybere certains medecins eſtrangers voulants eſtablir quelque recepte nouvelle mirent la couſtume à Rome d'en faire des efforts oultre les forces humaines. Galien parlant à Theſſalus inuectiue bien aſprement contre la charlatânerie effrontee de ces affronteurs, & en meſme lieu deſcrit ſi bien l'yurongnetie des Romains qu'il m'a ſemblé bon de la rapporter icy comme dernier crayon de leur gourmandiſe. La plus grande partie des Romains (dit il) adonnée à l'yurongnerie, & aux voluptés

corporelles se r'assembtent sur le soir en
baquets & festins dissolus, ausquelz il n'est
question de Philosophie, ny propos hōnestes,
mais seulement de se prouoquer l'un l'autre
à boire d'autant, & de combattre à grands
coups de verres. Car celuy la est reputé entre
eux le plus habile & le plus honneste qui
aura vuidé plus grand nombre de gobelets,
& des plus grands: tellement que le matin
suyuant quelqu'vns d'iceux ont la teste si
mal faicte, qu'ilz se monstrent encores tout
yures: & les aultres ont la bouche si puante
de l'odeur du vin qu'il semble qu'ilz ne font
que sortir de table. Ores les Romains n'ont
estés seuls en Italie addonnés à ce vice, mais
aussy tous les aultres peuples habitās d'icelle.
Ceux qui aurōt ouy parler de la voluptueuse
& delicieuse vie des Sybarites ne doubteront
aucunemēt de leur yurōgnerie, puis qu'à eux
l'on attribue la premiere inuentiō d'apporter
des pots à pisser aux banquets, pour rendre le
vin tout en le prenant sans partir de la place.
Platon dit auoir veu au temps des Baccha-
nales tous les habitans de Tarente enyurés.
Les Thoscans, Thyrreniens, Locriens, Fi-
denates voisins des Romains sont aussy no-
tés du mesme vice, & les Insulaires de la Mer
Thyrrene voisins d'Italie (si les histoires sont
veritables) ont tous tenu la mesme route.
Les habitans des Isles Lypare, Strombole,
Pinare, & aultres Æoliennes, de Corse, Ma-
iorque & Minorque, ont esté aultrefois grāds

yurongnes, & les Siciliens habitans d'une Isle plus grande & plus fertile, auſſy eſtoient plus grands & plus fameux yurongnes que les autres Inſulaires leurs voiſins. Ilz auoient vne ancienne couſtume de ſacrifier particulierement aux Nymphes en leurs maiſons priuees, auquel ſacrifice ilz demeuroient à yurongner du long de la nuit, beuuant & danſant à l'entour de leurs Idoles.

Les Syracuſains premier & principal peuple de Sicile ſe monſtrerent bien ſubiects & au vin, & à l'yurongnerie, lors qu'ayants chasſé Denys le ieune leur Tyran, qui neantmoins tenoit encores garniſé dans le chateau de Syracuſe, ſe laiſſerent tellement conduire à la bonne chere, & au bon vin, qu'apres auoir bien beu, danſé & ioüé tout le iour, les gardes du fort qu'ilz auoient eſleués dans la mer contre le chateau furent ſurpriſes endormies, & taillees en pieces par Nyphee Capitaine Neapolitain, enuoyé avec forces par Denys pour raitailler ſon chateau aſſié. Que s'ilz vacquoient avec tant de loifir à l'yurongnerie lors qu'ilz auoient vne ſi dangereuſe querelle ſur les bras, ayants affaire non à vn ennemy eſloigné, mais preſent au milieu de leur cité: non foible ou mal aſſeuré mais bien remparé & muni dans vn fort preſque inexpugnable: & qui auoit iuré l'entiere ruine de leurs moyens, de leur liberté, & de leurs vies, que penſez vous qu'ilz pouuoient faire lors qu'eſloignez de

tous dangers, ilz n'auoient aucune crainte ou soucy, qui les destournast de prēdre leurs contentemens en toute assēurance? Je pense maintenant auoir demonstrē que les plus ciuilees nations de l'vniuers ont estē aultrefois subiectes à l'yurōgnerie, d'oū nous pouuons inferer par vne consequence tresprobable que les aultres moins façonnees à la vertu, & plus abandonnees aux inclinations corporelles, se sont aussy laissē couler dans le mesme precipice veu que ny la religion, ny la Philosophie, ny la conduite de sages n'auoyent assēs de force aupres d'eux pour les en retirer: attēdu qu'elles tenoyent pour guide leur naturel grossier, & pour loy leur sensualité. Et de faiēt si nous croions le Poēte grec Aristophanes, les nations barbares faisoient tant d'estat de remplir leur ventre, qu'elles mesuroient la force & la vertu des hōmes par la quantité de ce qu'ilz engorgoyēt. Toutesfois ie veux encore m'arrester sur la preuue de mon induction commencee par la suite du denombrement de plusieurs natiōs qui ont suiuy la mesme piste que les precedentes, lesquelles soit qu'on les vueille ranger avec les plus ciuilees, pour auoir honorē des sages & Philosophes, & s'estre soubmises à leurs preceptes, cōme les Indiens, Perses, & Gaulois qui auoient leurs Sages, Mages & Druydes) soit qu'ō les vueille relegner avec les plus grossieres, rēdront suffisant tesmoignage de la verité de mō discours.

*AVLTRES NATIONS MOINS CE-
lebres entre les anciennes abandonnees
au meſme vice d'yurongnerie.*

CHAPITRE XXVIII.



Nous liſons que les Indiens ont eſté deſmeſuremēt deſreglez au boire, de ſorte qu'en leur faueur Alexandre le grand conduiſant ſon armee victorieuſe par leurs prouinces dreſſa des ieux & combats de bien boire, & propoſa des prix aux meilleurs pions, voulant complaire & gratifier à leur appetit & couſtume. Ceux qui auront tant ſoit peu leu des anciens Parthes ſçauront aſſés qu'ils reputoiēt à grand'gloire & hōneur de bien boire, & que celuy eſtoit eſtimé entre eux treſualeureux qui beuuoit & ſupportoit de vin plus que les aultres. L'exercice continuel qu'ilz en faiſoient leur engendra vne telle puāteur d'haleine, qu'ilz ne pouuoient ſe ſupporter l'un l'autre, & eſtoient contraints d'y pouruoir par artifice, ſcauoir par le meſlange de ſemence de Citrons qu'ilz mangeoint ordinairement parmy les autres viandes cōme les anciens Medos ſe ſeruoient de fleurs d'orangers pour corriger la puanteur de leurs bouches. Quant aux Perſes nous trouuons qu'ilz ont eſté au-

tant excessifs en yurongnerie, qu'ilz estoient superflus en sumptuosités, & delices: & qui plus est ilz faisoient tant d'estat d'une ceruelle parfumee de vin, & du conseil d'un homme yure, qu'ilz ne deliberoient iamais de chose que ce fut, & ne prenoient aucune resolution de leurs affaires qu'apres auoir bien beu. Pour se rendre tant plustost capables d'affaires, & d'aduis, ilz vsoyent en leurs festins de gobelets de grandeur desmesuree, appelez prochoides, & ainsy deuenoient incontinent maistres conseillers passez. Depuis rendus plus aduises par les inconueniens qu'ilz en ressentoyent ilz interdirent serieusement ces grands hanaps: l'yurongnerie ne laissa pourtant d'estre en regne, les carouffes se redoubloyent tellement qu'on reportoit ordinairement les conuiues de la table en leurs logis tout assoupys & morts yures. Ceste gourmandise Persienne seruit bien aux Macedoniens pour se garantir de la domination de Darius Roy des Perses, lequel enuoya par Megabise son lieutenant general sept seigneurs des plus apparens de son armee pour demander terre, & eau à ce bon vieillard Amyntas Roy de Macedoine, qui n'osant refuser le Persan, luy accorda avec toute submission ce qu'il demandoit. Au reste traicta si bien les sept Ambassadeurs que les ayant enyurez, ilz furent aisement massacrez par l'exploit cauteleux de son filz Alexandre. No⁹ auons cy deuant touché vn mot des depor-

tements des anciens Gaulois, nous adiousterons icy, qu'après qu'ilz eurent passé en Italie, conduits par la seule auidité de boire du vin, ilz furent rompus & désfaits deux fois par les armées Romaines, pour auoir autant de fois esté vaincus par celles de Bacchus. Mais passons les monts Pyrenees & entrons en Espagne pour veoir si l'yurongnerie y a iamais eu quelque entree. Certes nous trouuons bien que les anciens Romains conuerfants en Espagne ont esté aultrefois fort dissolus en yurongnerie : tesmoins en seront les soldats de Sertorius, lesquels hyuernants en la ville de Castulo es marches des Celtiberiens, trouuerent tant de viure & de vins qu'ilz ne faisoient que gourmander & yurongner, & commettre mille insolences apres qu'ilz estoient yures. Mais nous ne decouurons gueres de deportements des Espagnolz qui nous tesmoignent qu'ilz ayent esté addonnés à trop boire, au contraire Athenée nous enseigne qu'anciennement ilz estoient tant subiects à l'espargne, qu'ilz ne mangoient qu'une fois le iour, & ne beuuoient que de l'eau, encores qu'ilz ne manquassent de commodites : leur principale despence estant en habits sūptueux & manifiques. Toutesfois Platon nous les a laissés pour yurongnes, & pour dire librement ce qu'il m'en semble, il est bien difficile voire presque impossible, qu'un peuple soit bien sobre, apres auoir esté subiugué & gouverné

par soldats & capitaines subiects à trop boire, principalement lors qu'il abonde en notable quantité de bon vin, lequel (comme nous auons touché cy deuant) traine tousiours quant & soy l'yurongnerie. Et de faict les Espagnolz ne sont tant loués par Athenes pour leur sobriété, qu'ils sont accusés d'auarice par luy mesmes, encores que leur pompe semblast couvrir leur auarice pour descouvrir leur vanité. Aussi pouuons nous probablement soubçonner qu'ilz n'estoyent pas moins amateurs de bonne chere du temps passé quād il ne leur coustoit rien, que sont auiourd'huy quelcūs des leurs que l'on voit hors leurs pays & maisons & aux despens d'autrui boire aussi librement & copieusement que les plus grands yurongnes de Flandres. Voila donc comme l'yurongnerie a regné au Leuāt & au Couchāt: Voila comme elle a couru depuis vn bout de nostre Hemisphere, iusques à l'autre, & non sans infecter toutes les nations au milieu desquelles elle a pris passage, establisant son pouuoir non moins aux quartiers Meridionnaux, qu'es plages Septentrionales, si les Carthaginois (premier & principal peuple d'Affrique, estoient subiects à l'yurongnerie du temps de Platon il ne s'en fault esmerueiller, veu que Virgile sous la personne de Bitias nous les depeint pour auoir esté aussi tost grands carouffeurs, que fondateurs des haults murs de Chartage. Les

Nomades, Cyreniens, Æthiopiens, & aultres Meridionaulx se sont façonnez sur leurs deportements : neantmoins ilz ne se sont en rien monstrez plus intemperants que les habitants des terres Septentrionales. Car outre les peuples qui tendēt au Nort, lesquelz nous auons mentionē, cy dessus, les Scythes ne se monstroient en rien inferieurs aux Parthes, car ilz faisoient trophée de beaucoup boire, & reputoyent pour les plus vaillants ceux qui terrassoient plus grand nombre d'ennemys à coups de verres. Ce sont ceux que l'on tient pour les premiers precepteurs des Grecs en ce mestier. Aussi les Grecs (comme nous auons dit cy deuant, appelloient Scythiser ce que les Latins appellent Greciser, & nommoient vn vaisseau à boire Scyphus quasi Scythus par transmutation d'un θ en un ϕ , qui est fort familiere en la langue gregeoise, baptisant du nom du peuple qui leur auoit appris l'art de bien boire, l'instrument duquel ilz se seruoient en la pratique, Mais que dirons nous des Allemands, Polonois, Moscouites Noruegiens, Fimmarchiens, Biarmiens & aultres? comme nous croions qu'anciennement ilz ont esté aussi gourmands que les aultres nations, aussi sçauons nous pour asseuré que maintenant ilz sont tellement excessifs au vin & à la seruoise, qu'il semble que l'yurongnerie ayant quitté pour la plus part tous les aultres quartiers de la terre, se soit reserué ce seul coing

seul coing de l'Europe pour y establir son siege. A ceste occasion nous leur auons dedié le chapitre suiuant, auquel nous rechercherons diligemment les causes naturelles qui rendent le peuple Septentrional tant addonné à boire.

*POVR VOY LES SEPTENTRION-
naulx sont plus subiects à l'yurongne-
rie que les aultres nations.*

CHAPITRE XXIX.



Vand ie viens à lire l'histoire que Cornelius Tacitus nous a laissé des coustumes des anciens Germains ou Allemãs, & que ie les confere avec leurs mœurs & façons de faire du temps present, ie ne puis que ie ne m'esmerueille grandement d'une si grande & estrange metamorphose, voyant vne nation qu'autrefois a esté si farousche, & barbare, estre maintenant si humaine & courtoise: vn peuple si rude & grossier, tant ciuilité & industrieux; vne terre si sterile & deserte, rendüe maintenant par la culture entre les plus fertiles & peuplées de nostre Europe. Et neantmoins encor que le temps, ce grand ruineur de toutes choses subiectes à sa reuolution, ait peu causer vn si notable changement aux mœurs & naturel d'un peu-

ple fort curieux obseruateur des façons & coustumes de ses deuanciers, si est ce qu'il n'a eu tant de force que de luy faire quitter son yurongnerie, à laquelle comme iadis il estoit fort addonné, aussy en ce seul point se ressemble il à soy mesmes du temps passé. L'autheur susdit nous represente les excez qu'ilz commettoient à boire, & l'yurongnerie ordinaire en laquelle ilz passoient & les iours & les nuits : maintenant ils s'estonneroient de veoir que non seulement ces excez continuent de pere en filz, mais que d'auantage les plus modestes pressent leurs compagnons de table à faire raison dans les mesmes gobelets & à mesme mesure, & en viennent quelquefois aux contraintes, aux querelles, aux iniures, & aux coups. Et encores que Iule Cesar, le premier des Capitaines Romains qui ait fait retentir les armes Italiennes par delà le Rhin, nous ait laissé dans ses commentaires que les Chouanbes, ou Sueuiens le plus guerrier & farousche peuple de la Germanie (Ausburg est maintenant leur ville capitale) n'admettoient l'usage du vin, ne permettant pas mesmes qu'il fust apporté en leur pays, craignât par la friandise d'effeminer leurs courages & d'amolir leurs cœurs endurcis aux armes, si est ce qu'ilz ne laissoient ordinairement de s'enyurer avec la ceruoise, familier & principal breuage de toutes les nations Allemandes, lesquelles aussy ne manquoient

de s'affouir de vin lors qu'elles en pou-
uoient recouurer des marchands François
ou Italiens. Je ne dis cecy pour l'Allemagne
seulement, mais aussy pour toutes les au-
tres nations Septentrionales, lesquelles de
tout temps ont esté fort coustumieres de
boire iusques au creuer, & maintenant en-
cores sont tellement addonnees à l'yuron-
gnerie (en laquelle elles semblent colloquer
tout leur bon heur & felicité) que selon
l'aduis de plusieurs elles ne boient point
pour viure, mais viuent pour boire & yurô-
gner.

De cecy nous fera foy Olaüs le grand, Goth
de nation, lequel comme tesmoing oculaire
& comme patriot, nous rapporte merueille
des excessiues & prodigieuses façons de boire
des Septentrionaux. Mais comme ce vice
est si familier à ces nations qu'il leur semble
presque naturel, aussy nous a il semblé plus
expedient de rechercher curieusement les
causes de leur yurongnerie, que de la vou-
loir prouuer par vne superfluité de parol-
les. Si nous consultons les Astronomes sur
ce faict ilz nous feront contempler tant de
Planetes ascendantes, & descendâtes, tant
de conionctions des vnes aux aultres, ou
auec les signes du Zodiacque, fixes, mobi-
les, & communs: tant d'Horoscopes tirés
des aultres images qui paroissent hors le Zo-
diacque, & des quartes del'an, que toute ceste
difficulté selon leur calcul sera incontinant

uidee. Car selon leur doctrine si vn homme vient à naistre lors que Mars & Venus conioincts ensemble se retrouueront en couenable aspect, il sera subiect à gourmandise & yurongnerie. Le Poëte Astronomic nous en a chanté beaucoup de semblables.

*Vltima pars magni cùm tollitur ore leonis
Crater & auratis surgit stellatus ab astris,
Inde trahit quicunque genus, moresque sequentur.*

Et vn peu apres.

Gaudebitque mero, mergetque in pocula mentem.

Si Venus disent ilz est au signe de Capricorne en quel degré que ce soit, elle rendra l'enfant nay sous la constellation amateur de vin & d'yurongnerie. Lors que les Pleiades se leuēt (leur leuer est au sixieme lieu du signe du Taureau) si vn homme vient au monde, il sera du tout addonné à lasciuete & vinolence.

C'est ce que le susdit Manilius nous a rapporté entre beaucoup d'autres significations des images du ciel.

*Taurus in aduersos preceps attolitur ortus,
Sexta parte sui certantes lucis adoras.*

Pleiades ducit quibus aspirantibus almam.

In lucem educunt Bacchi Venerisque sequaces.

De telz & semblables discours les Astrologues iudiciaires entretiennent les curieux, pour leur persuader que les actions humaines sont causees par l'influence des astres

ou constellations Horoscopantes à la natiuité d'un chascun: Mais la monnoye de leurs raisons est de si bas alloy, qu'elle n'est valable pour bien payer vn esprit iustement auare des thresors de la verité. Et quant à moy tant s'en fault que i'estime que les corps celestes puissent necessiter ou violenter nos actions au vice, ou à la vertu, qu'à grand'peine puis ie croire qu'ilz nous y rendent disposés, & enclins, si ce n'est mediatement par l'alteration qu'ilz peuuent imprimer en nos corps en agissant contre leur temperatures & humeurs, lesquels par apres selon la diuerse impression ou dispositiō qu'ilz reçoient, nous impriment diuerses inclinations ou au vice ou à la vertu, Ores comme il est impossible que les biberons de tant & si grādes regiōs soient tous nay sous vne mesure & seule constellation qui les rende tous esgallement grands beueurs, aussi ne scauriōs nous acquiescer aux loix astronomiques, adressons nous donc aux raisons des escholes Physiciēnes, & medicinales, sans rien mendier es vaines boutiques des Astrologues iudiciaires. Nous tenōs par arrest de nostre souuerain Hippocrate, qu'à toutes maladies populaires & vniuerselles, il faut necessairement assigner vne cause generale, & vniuerselle, comme l'air ou la nourriture. L'yurongnerie est commune à tous les Septentrionaulx, il en faut donc rechercher vne cause commune & vniuerselle ou plusieurs

si elles se peuuent trouuer. Ceste passio est vne vraye maladie de l'ame fomentee bien souuēt par l'indisposition du corps, & comme elle touche l'vn & l'autre, aussy en de- uons nous r'apporter la source à l'vn ou l'autre, ou à tous les deux ensēble. Je trou- ue aux Septentrionaux que tous deux y ont part. L'ame par vne accoustumance vicieuse, cōtractee des le berceau par mauuaise nour- riture. Le corps par vne soif, ou naturelle, ou voluptueuse. La voluptueuse leur est toute commune pour le plaisir qu'ilz prennent à boire. La naturelle prouient, ou de la cha- leur, ou de la siccité de l'estomach. Ces deux causes sont fomentees, ou par le boire & manger, ou par l'air ambient ou par des humeurs de sēblables qualitez, qui eschauf- fent ou desseichent l'estomach. Quand tou- tes sont conioinctes ensemble elles produi- sent vne soif d'autant plus intense qu'elles sont en plus grand nombre, si donc nous de- montrons que tous ces esguillons de soif agacent ordinairement les estomachs des Septentrionaux, il ne faudra ce me semble rechercher plus loing la cause de leur y- urongnerie ordinaire, n'y s'estonner qu'vne grāde soif leur soit si difficile à tolerer, puis qu'à grand'peine les plus temperants peu- uent supporter vne alteration assēs legere. Ceux qui auront tant soit peu cognu & considéré les estomachs Allemands (le mes- me soit entendu des autres Septentionaux)

m'accorderont sans contrainte qu'ilz sont extrêmement chauds, & en cas qu'ilz le n'y-assent ie le prouueroye sans difficulté, par la facilité grande qu'ilz ont de cuire & digérer des viandes fort dures & difficiles à alterer, nonobstant la grande quantité qu'ilz en prennent, différente, & contraire en qualitez & substances, sans y observer ny tēps, ny ordre, ny mesure & sans en ressentir grand changement ou incommodité en leur santé. Ceste temperature fort chaude, n'est seulement imprimée naturellement en leurs estomachs, mais aussi soigneusement entretenue, & quelquefois augmentée par les causes externes, & accidentaires: tellement que par son excez elle vient petit à petit à consumer l'humidité de la mesme partie, & quant & quant à produire & associer à soy vne siccité immodérée, d'où par apres s'ensuyt vne plus grande & plus demesurée soif. Les chairs enfumées, salees, & espicees, les fromages forts & pourris (ie tais les autres esguillons à vin) ne sont seulement suffisants pour desseicher leurs estomachs, mais aussi pour l'eschauffer, & tout de suite pour l'inciter à trop boire. Pour estendre ceste soif insatiable allumée par tant de viandes, ilz ont recours au vin pur, que faict le mesme effect à la soif que l'huile au feu. C'est ce que Galien nous enseigne, & l'expérience journaliere nous confirme, oultre que la raison nous monstre clairement que

le vin pur imprime vne alteratiō chaulde en nos estomachs, & par ceste alteration, la soif que nous appellons vulgairement alteration. Or est il trescertain que les Allemands boient ordinairement beaucoup, & que iamais ilz ne parlent de tremper leurs vins, d'où vient que l'on peut à bon droict dire d'eux ce que l'Ambassadeur des Scythes r'apportoit des Parthes, sçauoir que plus ilz boient plus ilz estoient alterez. De ces beuettes continuelles s'accumule quantité de crudités, & suc pituiteux, lesquels participants d'vne qualité salee, tant à cause de la matiere de laquelle ilz sont procreez que de la cause efficiente qui par sa chaleur peut imprimer vn tel accident en son subiect, vient à desseicher de plus en plus l'orifice de l'estomach, & l'espoinçonner d'auantage à la soif. Mais combien pensés vous que ces causes internes sont aydees & aduancees par l'air ambient qui leur apporte presque vn hyuer perpetuel tant il est aspre & rude pour son froid ordinaire, comme les puits, les caues, & aultres lieux soubterrains se retrouuent plus chaudes en hyuer qu'en esté, aussi les estomachs & parties internes des habitants Septentrionaulx surpassent aultant en chaleur les estomachs des peuples Meridionaulx, que plus leur air est froid & glacé. Que si l'Antiperistase des Phisiciens doit iamais estre admise, c'est en ceste endroit principalement où il nous est loisible

de croire qu'un froid extérieur à grand pouvoir d'accroître la chaleur intérieure des corps Septentrionaux, & que plus il refroidit, & gele les parties externes, plus il eschauffe, & embrase celles qui pour leur fit profond ne sont exposées à son aspre violence. Car ne plus ne moins que la chaleur de l'air ambient attire à soy la chaleur intérieure de nos corps comme familière, & sociable, d'où sensuyt la dissipation & resolution d'icelles en temps d'esté, ainsi la froidure de l'air hyemal fait retirer au profond nostre chaleur naturelle, laquelle par ce moyen ne se conserve seulement ramassée dans son centre, mais aussi se fortifie & augmente d'avantage. Et non sans cause puis que les pores ou pertuis insensibles de nostre corps estantz resserres par la rigueur du froid extérieur qui constipent tout, empeschent & bouclent le passage aux esprits, & au sang siege de la chaleur naturelle, laquelle autrement s'euacuant & dissipant en temps d'esté, laisse les corps autant destitués de leur chaleur intérieure, qu'ilz se retrouvent foibles & languides.

Le premier precepteur que nous ayons en ceste doctrine est nostre souverain Hippocrate lequel nous enseigne qu'en temps froid la chaleur naturelle de l'homme est beaucoup plus grande qu'en aucune autre saison. Ores bien que toutes ces causes semblent capables pour prouver vne fois per-

petuelle aux Allemands & aultres peuples Septentrionaulx, & consequemment assés valables pour nous persuader qu'elles sont les premieres allumettes de leur yurongnerie, si est ce que pour dire ce qu'il m'en semble, elles ne peuvent & ne doibuent estre seules reputees suffisantes, si elles ne sont accompagnées ou suiuiues de quelques aultres.

Pline dit qu'il s'en trouue aulcan qui boient le vin sans soif. Et que le vin seul a ceste propriété entre les aultres breuuages, qu'il se laisse boire, encores qu'on n'en aye necessité quelcōque, certes ie ne pense point que son dire se puisse mieux experimenter veritable qu'entre les nations Septentrionales, qui souuent prennent plaisir à boire & s'enyurer sans aucune soif, que s'il est ainsi & si dauantage nous en voyons bon nombre d'entre eux, qui changeant d'Air, & de nourriture, & d'aage, & consequemment de temperature, demeurent neantmoins autant yurongnes, qu'auparauant, il est bien raisonnable, qu'oultres les causes sus-alleguées nous accusions encore vne vitieuse habitude, qui les rēd enclins à ce vice provenant bien souuent des frequents exercices ausquelz ilz sont encore incités d'auantage, par l'exemple familier, & la coustume ordinaire du pays presque vniuersellement desprauée, d'où viēt que tant s'en fault que ce soit chose ignominieuse de s'enyurer, qu'au contraire ceux qui boient le plus, & qui

continuent plus gallamment en ce deduit, sont reputés les plus ciuilsés & honnestes. Mais il me semble que i'entends quelque esueille qui porté de curiosité m'interroge & m'obiecte, si la vitieuse habitude qui induict ces peuples à boire ordinairement, ne peut estre contractee que par les frequents & reiterés exercices, quelle cause m'assignerez vous donc qui les excite premierement à boire, auât qu'ilz enayent acquis l'habitude? Accuserez vous leurs volonteés vitiees & corrompues, comme premier & seul subiect de ceste inclination? Ou bien remarquerez vous au corps quelque impressiō de ce vitieux caractere, qui porte leurs volonteés à carousser? ie responds, que, comme pour l'estroite connexion du corps & de l'ame en vn mesme subiect: ces grandes & vehementes passions de l'Ame tirent incontinant le corps en Sympathie, comme és affectiōs amoureuses, appetits de vengeance, & ioyes immoderees: ainsy pour mesme raison le corps habitué contre son naturel, peut vitier & gaster les fonctions de l'ame, comme ez maladies melancholiques, & Phrenetiques, & quelquefois incliner la volonteé plustost à l'electiō du vice, que de la vertu. Et en ceste façon la volonteé des Septentrionaux peut estre portée à boire sans aulcune soif pour estre à ce esguillonnee par vne certaine indisposition de leurs corps, emprainte des le commencement de leur conformation en la

ſemence de leurs progeniteurs:leſquelz outre ce qu'ilz ſont la pluſpart du temps ſurpris de vin,n'embrasſent gueres ſouuēt leurs femmes ſinon apres auoir bien beu. Ores ſi les maladies corporelles ſe conçoient bien ſouuent auſſi toſt que la ſemence qui en eſt infectee & ſ'engendrent avec les enfans procreez de ce vitieux principe: auſſi ſont celles de l'ame. Les enfans ne ſe trouuent pas moins heritiers des mœurs, que des humeurs paternelles: & principalement de l'yurongnerie, qui prend ſes racines des mœurs & des humeurs enſemble, tient ſon origine, & ſon progres de tous les deux. O que ſagement le diuin Platon & apres luy Plutarque conſeilloient iadis à ceux qui deſiroient d'auoir lignee de n'approcher la compagnie de leurs femmes que du tout à ieun, ou auant que d'auoir beu du vin, ou pour le moins apres en auoir pris bien ſobremēt: pource que ceux qui ſont engendrès des peres ſaouls, & yures deuiennēt ordinairement yurongnes, ſuyuant ce que Diogenes reſpondit vn iour à vn ieune homme deſbauché, & deſordonné; ieune fils mon amy ton pere t'a engēdré eſtant yure. Mais outre l'yurongnerie paternelle, nous pouuons encores ſoupçonner le laiēt, & la nourriture puerile de noz Septentrionaulx. Car puis que les femmes, & meſmes les nourrices ne ſe contiennent ſoubs les termes de ſobrietez & boyuent & ſ'enyurent auſſi volontiers, que

leurs marits, qui doute que leur laiët n'en soit alteré, & que la nourriture communiquée au tendre corps de l'enfçon ne vienne aysement à agir contre luy, & luy empraindre quelque affection d'yurongnerie? Car ne plus ne moins que la nature & vigueur de la semence est suffisante de produire vn corps semblable à celuy duquel elle est deriuee, ainsy le laiët de la nourrice est capable de façonner les mœurs de son nourrisson, les rendant du tout semblables aux siennes. C'est pourquoy les medecins faisant electiõ d'une femme bien accomplie, & perfectionnee pour allaicter vn enfant, entre aultres conditions qu'ilz desirent en elle, recommandent principalement la sobriete, pour euitter les inconuenients qui par l'intemperãce & yurongnerie des nourrices, suruiennent bien souuent à la santé des enfants, & donnent vne atteinte mortelle, au moins tresdangereuse & au corps, & à lame. En quoy ilz s'accordēt fort prudēment à l'experience car on voit ordinaiemēt les enfçons succer quant & le laiët les mœurs de leurs nourrices. C'est ce qui rend les Troglodytes peuple d'Æthiopie si extremement farousches & esloignés de toute humanité. Ils despoüillēt entieremēt ce qu'ilz ont acquis d'humain par la generation, & acquierent vne nature brutale par leur nourriture en sucçant le laiët des bestes. On nous rapporte choses estranges de deux enfants qui pour auoir esté

nourrys longtemps, l'un de laiçt de Truye, l'autre de laiçt de cheure se plaisoiēt prodigieusement, celuy la à se veautrer dans la boüe voire tout vestu, & à mascher comme pourceaux, celuy cy à sauteller, & ranger l'escorce des arbres comme les cheures. Il ne faut donc trouuer estrange si les Septentrionnaux estants nourris & esleués par femmes subiectes à trop boire sont aussi doués de mesmes natures, Voila donc comme les fions de bien boire entés sur vn corps disposé à les receuoir & nourrir, puis cultiuez par ces frequents exercices, fomentés par vn air connaturel, esleués par les exemples ordinaires, & eschauffés par l'ardeur du vin, & par ie ne scay quel vain desir d'estre estimé bon beueur, produisent en fin tant de surgeons pernicioeux d'yurongnerie parmy les nations Septētrionales. Mais deuant que passer outre m'a semblé bon d'aduiser le lecteur que comme ie n'ay esté porté par aulcun esprit de mesdisance à tout ce discours, aussi que ie ne pretends y comprendre beaucoup de personnes rares en vertu, & admirables en doctrine, lesquelles entre les leurs ne sont moins recommandables pour leur sobriété que les autres sont reprehensibles pour leur intemperance.

SCAVOIR SIL'ON BOIT PLVS EN
esté qu'en hyuer.

CHAPITRE XXX.

Este maintenant à decider vne
cōtrouerſe assés opiniaſtremēt
agitee entre plusieurs, ſcauoir ſi
l'on boit plus en esté qu'en hy-
uer ſouſtenants la ſoiſ eſtre plus
grande en temps eſtial, & les aultres au
contraire. Ce qui nous a induict à mouuoir
ceſte queſtion, n'eſt ſeulement pource
qu'elle a grande affinité à noſtre diſcours
(pour eſtre bien ſouuent la ſoiſ mere de
l'yurongnerie) mais auſſi pour garantir
d'erreur ceux qui tirant conſequēce de ce que
nous auons en partie rapporté la ſoiſ des
Septentrionnaux à leur air froid, & Hyemal,
pourroiet conclure que la ſoiſ doit eſtre plus
grande en hyuer qu'en esté. Et de vray ceſte
opinion eſt appuyee de quelques belles rai-
ſons, ſouſtenüe de l'authorité d'hommes
graues & Galien ſemble luy eſtre fauorable.
Tout aliment (dit-il) doit eſtre proportionné
en quantité & correfpondant en qualité à
l'euaquation de la ſubſtance qui ſ'eſcoule de
noſtre corps. Ores eſt il qu'en hyuer ſe fait
beaucoup plus grande diſſipation d'icelle
tant ſolide, qu'humorale; car la chaleur na-

turelle se retrouue beaucoup plus grande, les suprefluitez mieux atteneues se purgent par le cuire pendant le long sommeil, les aultres conuerties en vapeurs s'euacuant par l'expiration, & celles qui sont d'une consistance plus crasse s'escoulent par les vrines, la quantité desquelles est beaucoup plus grande, & le sediment plus copieux en ceste saison, qu'en esté. De là donc pouuons nous inferer que les corps ont plus de besoing de nourriture liquide en hyuer & consequemment que la soif en est plus grande. D'auantage si la chaleur est cause de la soif (comme nous auons dit cy deuant) pourquoy n'accorderons nous pas que la soif est plus intense en hyuer, lors que la chaleur interieure de noz corps est aussi plus augmentee? Le mesme Galiē nous enseigne que lors que la coction des viandes se faict en l'estomach par la chaleur naturelle, certaines vapeurs & corps halitueux montants en hault, viennent à eschauffer les parties par lesquelles la viande est transmise de la bouche à l'estomach, qui de leur chaleur & aridité causent la soif: or en hyuer les ventres sont plus chauds (dit Hippocrate) plus chaudes aussi sont les vapeurs, donc par consequence necessaire, des deux ensemble n'aist vne soif plus cuisante. Les peuples Septentrionaux nous seruiron icy de tesmoins qui vivent en vn air Hyemal, boient neantmoins beaucoup plus que les Meridiōaux habitants

habitants en vn air estiuat (car quelle est la proportion entre l'hyuer & l'air des pays tirants au Nort, telle est celle d'entre l'esté & l'air des habitants des plages meridionales. A ce propos les Naturalistes racontent que les bestes sauvages qui se nourrissent ez ardens deserts de Lybie, ne boient iamais en esté: & que par vne disposition du tout contraire elles boient fort largement en la saison d'hyuer. Il semble donc du tout necessaire que nous accordions que la soif est plus grande en hyuer qu'en esté, principalement si nous voulons maintenir veritable ce que nous auons suppose cy dessus, sçauoir que les nations Septentrionales sont plus subiectes à boire que les aultres à cause de leur air froid & hyemal.

Pour mieux descouurir la verité de la question proposee me semble necessaire de sçauoir premierement que c'est que la soif, comme elle se faict; & quelles causes la produisent: car de ceste cognoissance nous tirerons aisement la decision veritable de la controuerse agitee. Comme le corps humain est composé de quatre corps simples & premiers que nous appellons elements, sçauoir le chaud, le froid, le sec, & l'humide, aussi est il subiect aux diuerses alterations causees par leur contrarieté, ces alterations bien qu'immediatement elles ne touchent que les qualitez, si est ce que des qualitez elles redondent à la substance, laquelle

ne pouuant ſe rendre impaſſible cōtre leurs efforts ſe reſoult, & diſſipe inſenſiblement, & en fin ſe diſſoult entierement.

Ceſte guerre inteſtine eſt biē la cauſe premiere & ineuitable de noſtre mort, non ſeulement toutesfois: les cauſes externes y ont bonne part, elles ont tellement coniuſe noſtre ruine, qu'il eſt impoſſible que le corps n'en reçoie quelque offenſe. C'eſt ce qui auance noſtre trespas & diminue noz iours d'heure en heure, de moments en moments par la diminution continuelle de noſtre humeur radicale. Mais la prouidence de nature qui n'a voulu creer l'homme pour le precipiter incōtinēt du berceau dās le tōbeau a voulu ſoigneuſemēt pourueoir à ce deffault, par l'aliment & nourriture qu'elle luy a begninemēt procuré; afin que par le moyen d'icelle il ſuruienne non ſeulement à vne ſuffiſante reparation de la ſubſtance eſpuiee de ſon corps, mais quelquesfois auſſi fourniſſe à vne plus copieuſe: d'oū ſ'enſuiuit par apres vne augmentation & accretion telle qu'il eſt neceſſaire à vn inſtrumēt capable de cooperer aux actions de l'ame raiſonnable.

Ores il n'eſtoit ſeulement beſoing que la munificence de nature fourniſt au corps humain la nourriture ſuſdicte, mais auſſi qu'elle luy eſlargiſt quelque reſſentiment du deffault qu'elle en a, ou autrement l'hōme n'ayant aucune cognoiſſance de la continuelle eſfluxion des diuerſes ſubſtāces de ſa com-

position, n'eust esté incité à les reparer. Afin donc qu'il fust pressé de rechercher ce qui qui manquoit à l'entretènement de son corps, elle luy a planté comme deux esguillons à l'orifice supérieur du ventricule (nous l'appellons ordinairement l'estomach) qui par leur espoignonement nous aduertissent & stimulent de restaurer ce qui sensiblement ou insensiblement se consume, ou evanoüit de nostre substance. Ces deux esguillôs que nous appellons faim & soif, ne nous enseignent seulement la quantité de l'aliment requis (car en vn corps bien sain leur grandeur correspond proportionnement à son deffaut) mais aussi nous aduertissent de la qualité conuenable à la resolution d'vn chacun des quatre premiers corps, qui entrent en nostre structure. la faim estant propremēt vn appetit d'aliment chaud & sec qui entretient les parties solides, & la soif vn appetit de breuvage, ou nourriture froide & humide, pour restituer les parties humorales. Je ne parle icy d'vne soif vitieuse contractee par quelque disposition contre nature, mais seulement de la soif naturelle, laquelle se fait en ceste sorte.

Quād les diuerses parties de nostre corps tant internes qu'externes se retrouuent espuisées de leurs substances froides & humides (ce qui se fait ordinairement par le chaud & le sec) alors elles viennent à succer & tirer de leurs voisines toute l'humidité &

frigidité qu'elles peuuent par leur vertu attractrice qu'elles ont commune avec les plantes, lesquelles en ceste mesme façon succent l'humour terrestre pour leur nourriture. Ces parties ainſy deſtituees de leur humidité ſuccée par les premières tirent ſemblablement de leurs voiſines, & celles icy par vne certaine continuation tirent des autres: & ainſi de partie en partie tant & ſi longuemēt que l'attraction eſt paruenue iuſques à l'orifice de l'eſtomach, auquel toute ceste attraction & ſuction vient à ceſſer.

Car ceste derniere ſuction cauſe comme vne vellication & diuulſion en la bouche ou orifice de l'eſtomach doué d'un ſentiment fort exquis, d'où ſenſuit par apres l'appetit de boire que nous appellons ſoiſ, paſſion treſdifficile à ſupporter, qui nous travaille iuſqu'à ce que nous ayons reſtably l'humidité qui deſſault au corps. Donc pour retourner à noſtre propos puis que les cauſes efficientes de la ſoiſ, ſçauoir le chaud & le ſec poſitif, imprimēt beaucoup plus leurs qualitez au corps humain en temps d'eſté, & conſument plus puiſſamment tout ce qui leur peut faire reſiſtence, qu'en hyuer. (Car l'air ambient non ſeulement eſchauffe & deſſeiche actuellement les corps, mais auſſi reſould en partie leur humidité, & en partie l'attire dehors en exerçant les ſueurs) nous debuons neceſſairement inferer, que les parties externes, cōme plus eſpuiſées

appetent beaucoup plus d'estre humectees, & que de cest appetit s'esuyt vne plus grande attraction; de ceste attraction, vne diuulsiō plus fascheuse de l'orifice de l'estomach, de ceste diuulsion vn plus grand & violent ressentiment: brief de ce ressentimēt est produite vne soif plus ardente & desmesuree. C'est la doctrine d'Hippocrate, de Galien, & generalement de toute l'Academie medicale, qui à ceste occasion non seulemēt permet, mais cōseille de boire plus copieusement en estē qu'en aucune aultre saisiō. Mais qu'est il besoing de raisons ou d'autoritez pour prouuer ce que le sens nous enseigne tous les iours? Qui est ce ie vous prie, qui ne se retrouve sans comparaison beaucoup plus alterē en estē qu'en hyuer? certes celuy la meriteroit d'estre priuē de breuuage tout le long des chaleurs qui voudroit opiniastrément soustenir le contraire.

Et quant aux raisons cy deuant alleguees pour la deffence du party contraire, elles semblent estre ou du tout nulle, ou pour le moins de petit efficace. Car quant à la premiere nous accordons bien que l'aliment doit estre proportionné & correspondant à la substance qui est escoulee de nostre corps; mais tant s'en fault que nous concessions 'que son humidité soit plus espuisee en hyuer qu'en estē, que nous estimōs auoir fait preuue suffisante du contraire, & ne sert rien de mettre en ieu la grande quātité

d'vrine que l'homme rend en hyuer, pour prouuer qu'il se fait plus grande euacuation de sa substance: car oultre ce que l'urine flue en esté aussi bien qu'en hyuer: la resolution insensible qui se faict par les pores tout le long de l'esté, avec la quantité notable des sueurs assidues & vniuerselles, surpasse de beaucoup la purgation qui arriue l'hyuer par les vrines. Pline rapporte qu'il y a vne certaine sorte d'hommes ayants les os massifs & sans aulcune moëlle, qui ne suent iamais, & ne sont iamais alterez: si ie n'ose dire absolument qu'ilz n'ont iamais soif, d'autant qu'ilz ne iettent aulcune sueur, pour le moins, qu'il ne soit loisible d'estimer que ceste raison y peut beaucoup seruir avec d'autres, puis que pour l'ordinaire lors qu'on sue beaucoup la soif s'augmente d'auantage. Et encores que la chaleur naturelle de noz corps soit beaucoup plus grande & vehemente en hyuer, si est ce qu'elle ne s'estend à tant de parties qu'en esté, les froids luy font sonner la retraicte à l'interieur pèdant l'exterieur en patit & frissone; au cōtraire les chaleurs l'espadēt iusques aux plâtes des pieds. Or plus grand est le nombre des parties eschauffees, plus grande en est la necessité de raffraichissement, & cōsecutiuemēt la soif, d'autāt plus que ceste chaleur est aiguisee par la seiche-resse. I'adiouste que la chaleur qui est en nous fort actiue, pendant l'hyuer est douce & begnine, c'est la naturelle mesme réforcee,

laquelle ne destruit pas son subiect, mais le conserue & l'entretiēt tant qu'il luy est possible, donnant vne coction parfaicte aux humeurs crues, & engendrant vn sang loüable en qualité & substance, & abondāt en quantité. Celle de l'esté tient de la nature du feu, brusle, & consume, emplit le corps d'humeurs acres, de bile cuyfante, de fumees arides & fuligineuses, vrays esguillons de la soif.

C'est tout la mesme cause que ceux qui sont ordinairement au feu pendant l'hyuer se trouuēt autant, ou plus alterés que l'esté.

De là vient aussi que l'air chauld des poilles, eschauffe & altere ensemble les Septentrionaux en hyuer. Car d'estimer que nous rapportions totalement l'alteration qu'ilz ont en ce temps glacé, à l'antiperistase, qui se faict par le froid exterieur, ce seroit vne raison trop froide d'une soif si ardēte, mais nous adioustons leur temperature naturelle, leurs viandes & breuages ordinaires, leurs repletions, & aultres causes & conditions, lesquelles si elles se retrouuoient pareillement en la nature & nourriture des Meridionaux, ie m'assēre qu'ilz seroient aultant ou plus alterez que les Tramontans exposez au Nort. Et quant est des bestes sauages d'Afrique, qui ne boient iamais en esté, ains seulement en hyuer, nous disons cela prouenir à cause qu'en ceste contree aride & sablonneuse, & exposee à la ferueur du midy

ne se retrouve point d'eau pendant les ardeurs estiuales, tellement que lesdicts animaux sont contraincts de supporter leur soif iusques à l'hyuer suyuant.

DE QVEL QVES PRODIGIEUX
beuueurs.

CHAPITRE XXXI.

L'Historien naturel parlant quelquefois de la diuerse nourriture des animaux, & de la quantité d'icelle, rapporte qu'il y a des hommes si gourmands qu'ilz ne peuent se saouler pour abondance de viandes qu'ilz deuorent : & s'estonne qu'entre tous les animaux l'homme seul est subiect à cest insatiable appetit de manger. Et à la verité ce grand naturaliste n'a escrit ce que dessus sans subiect, ayant esté bien informé de la gourmandise de ses deuanciers, & ayât trop bien reconnu celle de son temps. Les anciennes histoires rapportēt que l'Athlete Theagenes, & le Robuste Milō Crotoniate ont aultrefois deuoré chacun vn bœuf tout entier, en vn seul iour. Nous lisons qu'un Astidas Milesien inuité par le Persiē Ariobarzanes engorgea seul toute la viande qui estoit preparee pour le soupper de neuf conuiuēs : ce sont certes des exploits de goulus.

extremement auides, lesquelz toutesfois nous trouuerons aulcunement tolerables, si nous les conserons avec 'ce monstrueux Persien Cantibarie, qui apres auoir deuoré tant de viandes qu'il se sentoit plustost las de macher que d'aualler, plustost greué qu'allegé, se tenoit neantmoins la bouche ouuerte & s'y faisoit entasser nouuelle pitance, afin qu'il iouyst delicieusement de la saueur, sans auoir la peine de l'y porter, ny de la macher. Voila à la verité des gourmandises du tout prodigieuses, plus à detester qu'à admirer, plus bestiales, qu'humaines. Mais quoy que c'en soit ie trouue que l'extreme auidité de boire de quelqu'vns a esté encores beaucoup plus estrange & incroyable. Car il s'en est trouué de tant excessifz en leur yurongnerie qu'ilz semblent auoir esté pires que les brutes,

Il me souuient d'en auoir aultrefois quelques traicts, lesquelz, d'autant qu'ilz semblent surpasser toute creance, ie n'eusse iamais couché par escrit sans l'appuy d'auteurs si recommandés que leur reputation seule donne pleine auctorité à leurs histoires. Plutarque aultant admiré pour la gravité de sa Philosophie, que loué pour la verité de ses escrits, dict que du temps de ses peres il se trouua vn escrimeur de poings, (que le peuple d'Alexandrie appelloit le petit Hercules) lequel ne rencontrant beuveur qui luy peust faire teste & continuer les coups,

en inuitoit les vns à desieuner dès le matin, les aultres à disner, les aultres au soupper, & finalement quelqu'vns pour la quatriesme fois à la collation, afin que quand les premiers se retiroient, les seconds succedassent aussy tost en leurs places, à ceux icy les troisiemes, & à ces derniers, les quatriemes sans aucun delay. Et luy cependant sans bouger de sa place, ny faire intermission quelconque, prestoit le collet à tous les inuités. A la verité si cest Hercules estoit petit de nom, il estoit extremement grand en fait de carousses, & toutesfois si nous croyons ce que les histoires nous rapportent ce n'a esté qu'un Pygmee de table, aupres des aultres Hercules qu'elles nous ont depeints.

Ce que Paul Diacre raconte de quatre vieillards qui beurent leurs aages, ne semble estre des moindres, car leurs anneés montoient au nombre de trois cents, & le vin qu'ilz beurent à autant de verres: toutesfois ce n'est rien au pris d'aultres plus signalez qui se presentent en nostre memoire. L'Empereur Firmus a esté du tout admirable en cest exercice, car pour grande quantité de vin qu'il aualast, il se monstroît tousiours sobre, & en son bon sens. Estant vne fois prouqué à boire par un Capitaine Enseigne qui estoit des plus valeureux en ceste affaire, il vuida deux seaux pleins de vin sans se monstrer aucunement alteré de son entendement, & lors interpellé par ce port-Ensei-

gne de boire encor la lie qui restoit, il luy respondit bien à propos, que la terre ne se beuvoit point. L'Empereur Bonose a esté tellement excessif au vin que par gausserie ordinaire on disoit de luy, qu'il n'estoit pas nay pour viure, mais pour boire, en quoy rencontra fort bien Probus son successeur, lequel apres l'auoir faict attacher à vn gibet, dit, que ce n'estoit pas vn hōme qui pendoit, mais vn sac à vin. Alexandre | Roy de Macedoine fut à bon droit surnommé le grand pour ses exploits Martiaux, mais trop grand & superflu en l'yurongnerie, car il y passoit quelquefois (comme desia nous auons remarqué) les iours, & les nuiets toutes entieres. Tout l'aduancement de Lucius Piso, qui fut gouuerneur de la police de Rome, vint pour auoir tenu coup à table deux iours, & deux nuiets, tousiours beuant en la presence de Tybere l'Empereur: lequel cōme il estoit grand yurongne, aussy affectionnoit il singulierement ceux qui luy ressembloiet. Mais ie ne puis en cest endroit, que ie ne vous fasse part d'une histoire que ie doibs à Pline, & premierement à Aristote, que ie vous allegue pour cautions, autrement à peine me croyriez vous. Aristote au second chapitre du sixiesme liure de l'histoire des animaux, & Pline au cinquante quatrieme chapitre du dixieme liure de son histoire naturelle, rapportent qu'aultrefois dans Syracuse ville capitale de Sicile s'est trouué vn

yurøgne si excellent qu'il demeueroit à table beuant incessamment, iusques à ce que certains œufs qu'il mettoit dans terre, ou couuroit d'une natte, fussent parfaictemēt esclos, encores qu'il les y mist entrant à table. A la verité si cest excez de boire n'est trouué admirable, ie ne pense point qu'il y ait yurøgne-rie quelle elle soit qui nous doibue sembler estrange. Ores si les beueurs allegués sont du tout prodigieux pour la longueur du temps qu'ilz employoient à yurongner sans intermission: aussy certes seront les aultres que nous mettrons en ieu cy apres pour les grands traicts qu'ilz beuuoient, espuisant d'une seule halene des hanaps de mesure presque sans mesure.

Quintus Ciceron, filz du grand Ciceron tant renommé pour son eloquence latine, estoit si excessif que Tergilla calangeant son yurongnerie luy reprocha qu'il beuuoit ordinairement deux conges de vin à vn traict. Le conge anciennement estoit vne mesure, laquelle selon quelqu'vns pesoit huiet liures & quatres onces, selon les aultres neuf liures entieres: aulcuns mesmes (entre lesquelz est Dioscoride) font le conge de dix liures: Ceux qui le font de neuf mesurent le conge Atticque qui n'en pesoit d'auantage, mais ceux qui luy en attribuent dix, ont esgard au poidz du conge des Romains, deux desquelz (selon ceste supputation) reuiennent iustement à six pintes mesure de Nancy, quāt

aux premiers qui reduisent le conge à huit libres & quatre onces. Ilz semblent quitter la livre ponderale pour suivre la mensurale, laquelle selon l'advis d'aucuns estoit moindre de la sixieme partie que la ponderale: ceste derniere façon de recognoistre les anciennes mesures & les comparer avec les modernes semble estre beaucoup plus certaine comme estant fondee sur l'invariable longueur du pied Romain, lequel conféré avec le pied Parisien se trouve moindre d'un poulce & d'une sixieme de doigt, d'où vient que la livre mensurale Parisienne (c'est le demy sestier) surpasse iustement la livre des Romains d'une once & un drachme. Tellement que si nous voulons suivre ceste supputatio pour adoucir le rapport de l'histoire & rendre le fait moins incredible, nous trouverons que le vin que ledict Ciceron beuvoit d'un seul trait, estoit au moins neuf chopines une once & demye: & neantmoins ce memorable beuveur n'a jamais fait acte, duquel il tira tant d'honneur que de ce deshonorable exercice, auquel avec dessein sembloit il s'efforcer pour vaincre Marc Anthoine, comme pour tirer vengeance de celui qui avoit guetté, poursuivy, & assassiné son pere. En quoy il se pouvoit bien vanter d'avoir remporté une signalee victoire, ayant surmonté celui qui peu auparavant sembloit avoir emporté la palme en ce mestier, & qui

en faisoit trophée, ayant à ce subiect mis en public vn liure contenant vn denombrement de tous ses efforts, & faictsheroïques en matiere d'yurongnerie. Ores comme ce bon biberon surpassoit Marc Anthoine, aussy fut il deuancé en mesme carriere par Nouellius Torquatus Milannois, lequel s'est trouué entre les Romains le plus parfait pion de son temps, & plus inuentif en regles & ordonnances Bacchiques: & de fait s'il est vray ce que raconte Pline, toutes les loix receuës & vsitees pour lors entre les beueurs Romains estoient de son inuention. Il auoit d'auantage cela de particulier, qu'apres auoir bien beu, & à grands traicts, il faisoit la sentinelle, ne bescayoït aucunement, ne sentoït son estomach chargé, & ne se trouuoït incité à vomir, ny pressé d'vriner. Ceste grande facilité à boire fust cause de son aduancement, car de Preteur, il vint à estre Proconsul, pour auoir beu d'vn seul traict trois congés de vin en la presence & estonnement de l'Empereur Tybere, assistât par curiosité pour estre tesmoing oculaire d'vn tel miracle, miracle dis-je, vn tant prodigieux carousse reuenant selon la libure ponderale à neuf pintes mesure de nostre pays, selon la mensurale à treize choppines & demy Parisiennes avec deux onces & deux drachmes. Je pourroye reuoquer en doubte la verité de l'histoire n'estoit que le nouveau surnom qui luy fut imposé pour cet effect m'en assure Car

il est vray semblable que le furno de Tricongius qui luy dure encores, luy a esté donné pour rendre la memoire du fait immortelle.

Mais que dirons nous de ceux qui de leurs ventres, faisoient comme vne caue à vin, receuants, & logeants aultant de vin qu'on leur en eust sceu verser? Iadis s'est veu en Grece vn certain Macedonien nommé Alcetas, lequel tenant vn entonnoir dans la bouche beuvoit incessamment, & aualloit sans interual tout le vin qui luy estoit versé, dont par apres il fust nommé l'entonnoir.

Pline dit auoir remarqué de son temps vne annee si fertile en vins, qu'à faute de tonneaux il failloit reseruer les vins nouveaux dans les cysternes, mais si lors se fussent rencontrés beaucoup de telz beueurs que cest Alcetas on n'eust eu besoing d'autres cysternes que de leurs ventres. A la verité les estranges carousses & excez admirables des susnommez, & aultres rapportez par les histoires nous sembleroient presque du tout fabuleux, n'estoit que de nostre tēps nous auons veu quelque yurōgnes qui ont faict des efforts en ce mestier, autant ou plus admirables que ceux des anciens. I'en pourroye rapporter icy plusieurs qui sont venu à ma cognoissance, mais pour eiter prolixite & fuyr le nom de mesdisant (car la memoire en est trop recente) ie me contenteray d'en produire vn seul aultant prodigieux que bien reconnu & auéré en la

cōtree où il s'est paſſé. Au pied des monts Vosgiens expoſés au leuant du coſté qu'ilz regardent ceſte fertile & agreable plaine d'Alſace (delicieux domaine des Eueſques de Straſbourg) eſt ſituee vne petite villette nommee en ſon langage Allemãd Moutzich villette aultant bien auoiſinee de fructueux vignobles, qu'habitee de bons & excellents beueurs. Entre leſquelz aultrefois s'eſt trouué vn hoſtelain ou pend encores pour enſeigne la Couronne, qui ſortant de ſa maiſon pour s'acheminer à Straſbourg diſtant de Moutzich de quatre à cinq heures de chemin, rencontra vn ſien concytoien avec lequel il fiſt gaigere que deuant qu'arriuer à Straſbourg il vuideroit vn muid de vin contenant vne meſure. (Ce ſont enuiron vingt quatre quartes Pariſiennes) & ce ſans ſ'arreſter en ſon chemin, ſinon en beuant, ce que ne pouuant croire celuy cy, & en voulant faire l'eſſay apres auoir bien conditioné ſa gaigere eut le plaſir de le veoir commencer, continuer & acheuer de boire ayant mis le muid à ſec deuant qu'eſtre à my chemin de Straſbourg à vn certain endroit où ſe veoit encores vne croix erigee, aupres de laquelle il acheua de vider ſon tonneau. Ceſt excellent beueur eſt mort quelques annees & me ſouuiét d'auoir aultrefois ouy dire à ſon filz qui luy a ſuccedé en ladite hoſtellerie que quand ſon pere ſe vouloit eſgayer à table, il ne beu-
uoit pas

uoit pas moins de vingt quatre mesures,
ou quartes de vin pour vn repas.

*E LES FEMMES N'ONT ESTE
2 Vexemptes du vice d'yurongnerie.*

CHAPITRE XXXII.



Es anciēns Mythologes nous ont
diuerſement depeint leur ima-
ginaire Dieu d'amour, le faiſant
tantost gouuerner à beaux freins
de lyons trainans ſon chariot,
& tantost ornant ſa dextre d'vne maſſe de
fleurs, & luy donnāt vn poiſſon à la ſeſtre
pour ſignifier la puiſſance qu'il exerceoit
ſur toutes ſortes d'animaulx, voire meſmes
ſur les plus farouches, & qu'il eſtendoit ſon
empire vniuerſellement ſur la terre & les
eaux. Mais s'ilz euſſent voulu forger & re-
preſenter la grandeur & la puiſſance d'un
Dieu d'yurongnerie, & la grande eſtendue
de ſon Empire, ie croy qu'ilz euſſent eſté
bien empeschés à deſigner tant de lieu où il
fait reſſentir ſon pouuoir, de nombrer tou-
tes les nations de l'univers qui ont releué de
luy, & de monſtrer que l'un & l'autre ſexe ſe
ſont ſoumis de franche volonté ſoubs ſon
ioug. L'on ne peut iuſqu'icy doubter que
les hommes ne s'y ſoient rendus plus qu'eſ-
claues. S'il plaist aux dames me permettre de

leurs mettre en auât des exēples de leur ſexe, ce ſera avec proteſtation de n'entreprendre contre leur honneur; auſſi le vice des particulières ne peut faire breſche à la reputatiō & à la gloire qu'elles meritēt, pour eſtre auſſi tant recommandables en ſobrieté que loüables en modeſtie, oultre que celles de noſtre temps n'auront part non plus à noſtre diſcours qu'en ceſte volupté reproüuee.

Les anciennes hiſtoires nous enſeignent que iadis les femmes des Scythes & Thraces eſtoient extremement couſtumières d'yurongner tenant pour heureuſe & honneſte occupation de carouſſer, & d'eſpandre du vin ſur leurs robbes, ſe plaiſant en ſon odeur, cōme à vn parfum tresaggreable. Les femmes des Illyriens (ce ſont aujourd'huy les Eſclauons) n'eſtoient moins ſubiectes au vin que les precedentes, ſe perſuadant au ſurplus, qu'il leur eſtoit fort honorable de prouoquer à coups de gobelets vn chaſcun de tous ceux qui aſſiſtoient en leurs feſtins, ſans en obmettre vn ſeul. Les anciennes Thoſcanes & aultres habitātes de l'Isle de Corſe ſont pareillemēt notees dans les hiſtoires pour femmes fort addonnees au vin, & qui faiſoient meſtier ordinaire de carouſſer indifferēment avec vn chaſcun.

Quand l'Eccleſiaſtique dit que la femme yurongne eſt grand creuecœur, & grand blaſme, & que ſon infamie ne ſera pas couuerte, il nous donne aſſez à cognoiſtre que

l'yurongnerie regnoit aussi entre les femmes de son temps. Mais c'est assez parlez en gros des nations entre lesquelles les femmes se sont portees plus licentieusement à l'yurongnerie, venons aux particulieres, pour rendre exemptes d'infamie celles qui n'ont eu part au desbordement.

Nous commencerons par Cleo qui pour n'auoir rencontré qui luy fist teste ou qui l'osast entreprendre merite bien de mener les autres sur le champ de bataille : l'histoire porte qu'en recompense de ses valeureux exploitz & en action de grace de ses victoires Bacchiques elle fist iadis de grands presents au temple de Bacchus. Vne aultre nommee Nanuium (si les auteurs ne nous trompent) s'est tellemēt delectee au vin, qu'elle estoit ordinairement yure. Dequoy la taxant Sophocles disoit qu'elle estoit tousiours forcee & hors de son bon sens, pour le vehement amour qu'elle portoit à son bien aymé Bacchus. Il s'en trouue beaucoup d'autres de mesme farine dans les Epigrammes Grecs, i'en representeray icy quatre dignes d'estre leus, tant pour l'aggreable & ingenieuse inuention que pour la nayfue traduction par vn personnage de nostre temps aultant recommandable pour son grand sçauoir, qu'admirable pour son esprit, capable de tout ce qui est soubmis à l'entendement humain. Ce petit traict de louange (petit à la verité au prix de ses merites) me fera tenir son nom

caché pour euitier le surnom de flatteur: le premier se retrouue dans Argentarius, faisant mention d'une vieille yurongnesse, laquelle descendüe aux enfers, s'accusa faulxement au iuge Minos d'auoir meurtry son mari, afin qu'estant trouuee coupable du mesme forfait que les Danaïdes elle fut condamnée à mesme peine scauoir à remplir vn tonneau percé, celle icy donc estant fort affectionnee au vin reputa à consolation, pour penible que fust le trauail, d'auoir perpetuellement le tōneau pour obiect de ses yeulx, afin de ne perdre la memoire de ce qui luy auoit este plus cher.

*Minos iettant les yeux au milieu de la presse,
Veoit venir deuant soy vne vieille yurongnesse:
Il la condamne à l'eau, vent qu'au lac Auernal
Elle porte à iamais la peine de Tantal.*

*La vieille faussemēt se conuainēt d'homicides,
S'accuse du forfait des femmes Danaïdes,
Afin qu'accompagnant ceste troupe verseeau,
Elle eust tousiours à l'oeil son desiré tonneau.*
Il y en a vn aultre pris d'Antipater Sidonius
qui est tel,

*Cy gist soubs ce Tombeau la vieille Maronide
Qui au boire & parler couroit à toute bride,
Mettant tout soing à part & de pere & d'en-
fants,*

*Ores que pauureté leur liurast mille alarmes
Le verre que tu vois on luy donne pour armes
Mais elle se plaint fort qu'il ny a rien dedās.*
Voicy le troisieme.

Mortade cōmandant que dessus son Tombeau
L'on grauaſt proprement la forme d'un ton-
neau;

Je veux apres ma mort (dict elle) que l'on
voye

Ce que pendant mes iours m'a poſſedé le cœur,
Je veux que mon tōbeau teſmoigne ma valeur
Je veux que mon tombeau renouuelle ma ioye.

Le derniereſt d'une bonne Silenide laquel-
le ennuyee de perdre & la vie, & le vin tout
enſemble, ordonna par volonte derniere que
l'on inhumast ſon corps pres d'un preſſoir,
ſoubs eſperance que la mort meſme ne luy
pourroit du tout oſter la iouyſſance de ce
qu'elle auoit ſi tendrement chery pendant
ſa vie, s'il luy eſtoit loyſible de s'en appro-
cher, & que du moins elle ſe contenteroit
de l'odeur.

Cy giſt la vieille Sylenide

Qui n'eut oncques la paſſe vuide,

Elle ſe coïeſſoit le matin

D'une bonne taſſe de vin.

Si grande fuſt elle & ſi pleine

Elle l'aualloit d'une haleine

A la table eſtoit ſon ſejour

Le long de la nuit & du iour

Sans iamais deſmordre ſa priſe

Que le ſommeil ne l'eust ſurpriſe.

Afin de ne perdre l'odeur

De ſa bien aymee liqueur

Elle a par volonte derniere

Choisy le champ pour cymetiere

Voulant qu'on luy feist un caueau

Au loing du pressoir pour tombeau.

J'adiousteray à ces Epigrammes grecs deux
des latins tirés de Martial en confirmation
de nostre subiect, l'un contre Fescennia,
l'autre contre Myrtale.

Je ne puis donner le contentement à ceux
qui ne sont versez en ceste langue, par vne
version Françoisé, sans mescontenter les
doctes, ou me rendre reprehensible, entre-
prenant de rapporter la naïfueté d'un aucteur
presques inimitable en la traduction de ses
parolles.

Le premier est.

Ne grauis hesterno fragres Fescennia vino,

Fastillos cosmi luxuriosa voras.

Ista linunt dentes ientacula, sed nihil obstat,

Extremo ruētus cūm venit à barathro.

Quid, quod olet grauius mistum diapasmate

virus,

Atque duplex anima longius exit odor?

Notas ergo nimis fraudes, deprésague furti

Ia m tollas, & sis ebria simpliciter.

Voicy le second.

Fœtere multo Myrtale solet vino

Sed fallat ut nos, folia denorat lauri,

Merumque cauta fronde non aqua miscet,

Hanc tu rubentem prominentibus venis

Quoties venire paule videris contra

Dicas licebit, Myrtale bibit laurum

Les dep ortements intemperants des fem-
mes mentionnees, en ces Epitaphes & Epi-

grammes, & d'autres semblables ont souvent occasionné les anciens de reuoker en doubte la sobriété des autres, voire mesmes de porter sentence à leur preiudice. De là vient qu'Athence a estimé le sexe féminin estre fort friand du bon vin: de là vient qu'Antiphaes osa pronôcer que c'est chose miserable de se marier sinon en Scythie où ne croist aucune vigne: de là vient qu'Axionius asseuroit qu'il ne failloit adiouster foy aux femmes qui iuroient qu'elles ne beuuoient que de l'eau: en fin de là vient qu'Eubulus disoit que les femmes ne se plaisoient iamais de boire dans des petits gobelets.

Les anciennes loix qui interdisoient fort estroictement & seuerement l'vsage du vin aux femmes peuuent seruir de preuue à ceste opinion: car si les bonnes loix sont nees des mauuaises mœurs, là où est la loy, il y fault presupposer le vice. C'est dequoy Macrobe s'esmerueille que la loy qui est vne si bonne fille, soit engendree d'un si mauuais pere. Car ostez le vice, les loys, les deffences les punitiōs sōt inutiles. En quoy rēcōtra fort biē ce Lacedemoniē lequelestāt interrogé, pourquoy en la ville de Sparte il n'y auoit aucune loy establie contre les paricides; respondit qu'il n'en estoit besoing, puis qu'il n'y auoit homme si desnaturé entre les Spartiates qui voulust oster la vie à celuy qui la luy auoit donnee. Plutarque nous est tesmoing que Numa Pompilius Roy des

Romains ne deffendit le vin aux dames Romaines à aultre deffeing que pour leur retrancher toutes occasions d'yurongnerie, & leur entretenir ceste modestie naturelle, & ceste honte vertueuse qu'elles ont empreinte au front par la temperance & sobrieté. Je scay bien que quelqu'vns rapportent la fin de ceste loy à aultre subiect, sçauoir pour empescher ces dames Romaines d'encourir quelque infamie par adulteres & embrassements illicites, esquelz sont enclines celles qui s'esgayent trop largement à l'vsage du vin; quant à moy ie pense que la mesme loy qui deffendoit aussy le vin aux Marseilloises en France, & aux Milesiennes au Royaume de Carye, n'auoit aultre intention que de retirer les dames de ceste mesme infamie, on nous rapporte toutesfois vne aultre cause pour laquelle anciennement les femmes de toutel'Italie s'abstenoient de boire du vin. Iadis Hercules voyageant par l'Italie, & estant sur le chemin de la ville des Crotoniates, se trouua surpris d'une grande soif: pour l'appaiser il s'adressa à vn logis assis sur son chemin, & demanda à boire, la femme du maistre du logis qui auoit peu auparauant secretement crocheté la caue, & percé vn muid de vin qui estoit en reserue, craignant que son marit ne s'en apperceust, le destourna d'aller à la caue pour Hercules, disant qu'il seroit mal seant de mettre son muid en perce pour vn estrange incognu, &

qu'il se deuoit contenter à l'eau, Hercules qui estoit pres de la porte entendit tout ce discours & aultant malcontent de ceste yurongnesse, que bien satisfait de la bonne volonté du marit, le loua, & remercia, luy enioignant de descendre à l'heure à la caue, & qu'il y trouueroit vne estrange metamorphose. Cest homme descend, va recognoistre son tonneau, & le trouue transmué en pierre. Les Italiennes depuis ce temps là ont tousiours estimé deshonneste à vne femme de boire vin. Quelqu'un prendra ceste histoire pour vne fable, & certes elle paroist fabuleuse à ceux qui s'amusants à l'escorce ne voudrôt profiler iusques à moüelle d'icelle, mais si vous entendez sainement que veult dire ce tonneau metamorphosé en pierre, vous iugerez qu'il signifie vne vuidange, de laquelle vous ne tirerez non plus de vin, que d'un caillou. Ce changement descouure la secreete yurongnerie de la femme, qui la rend abhominable entre celles de son sexe, & avec elle son vice, & avec le vice le vin mesme, comme appast, & instrument tresdangereux d'intemperance, à un sexe fragile, & à ceux qui ne sçauent se commander. Que ce vice ayt esté ignominieux entre les Italiennes nous le pouuons colliger d'un edict que fit Zaleucus Legislatteur des Locriens peuple d'Italie, par lequel il deffendit aux femmes Locriennes de ne mener à leur suite plus d'une seruant, sinon lors qu'elles seroient

yures , pensant bien que l'ignominie, qu'elles encouroient, si elles estoient plus accompagnées, les retireroit de la folle & inutile despence qu'elles faisoient à l'entretenement d'une grande suite.

Mais ny le deshonneur qui diffame l'excès du vin, ny les edicts qui le condamnent, ny les peines qui le punissent, n'ont eu le pouuoir d'empescher que quelqu'un ne courussent à toute bride apres ceste delicieuse liqueur, car encores que les loix Romaines eussent anciennement estably mesme peine cōtre les fēmes subiectes au vin, que contre celles qui estoient conuaincues d'adultere, si est ce qu'il s'est trouué bon nombre de celles qui mettant toute crainte de punition en arriere, & foulant au pied tout honneur & reputation, n'ont laissè d'y contreuenir. Nous ne manquons pas d'exemples de telles eshontees qui ont este chastiees exemplairement. Nous lisons qu'un iuge Romain nommé Domitius priua vne femme de son douaire, pource qu'elle auoit beu plus de vin qu'il ne luy en estoit ordonné pour sa santé. Pline rapporte qu'Egnatius Mecennius (autres disent Egnatius Metellus) ancien Romain fut absout par Romulus pour auoir tué sa femme à coups de baston l'ayant trouuee beuuant du vin dans vn tonneau. Valere le grand dit bien d'auantage, que cest homicide ne fut accusé n'y repris, chascū estimant que sa femme auoit esté punie selon son de-

merite d'aautant que la femme qui se porte immoderement au vin, ferme la porte aux vertus, & par ce mesme moyen la tient ouverte à tous vices. On trouue dans des anciens Annales de Rome, qu'une bonne matrone Romaine, & femme de qualité fut adjugee à mourrir de faim par ses parêts pour auoir seulement crochete vn coffre où estoient serrees les clefz de la caue. Punition à la verité trop cruelle, & plus digne de compassion que d'approbation, encore que l'histoire signifie assez vne trop friande auidité, & friandise trop auide au vin. Ores ce glouton desir des femmes Romaines si tost qu'il vient à estre auctorisé par le Senat Romain, exempt de toute apprehension, & plein de licence, ne pouuoit trouuer nulle borne à son desbordement, ayant pour allechement & le sens, & l'impunité. Mais la nature de ces desnaturees leur en fit bien-tost & bien cherement payer la peine. Le sens premier auteur de ce desordre en ressentit la plus forte rigueur. Auez vous pas leu dans Hippocrates que les femmes ne sont point trauaillees des gouttes? Mais quelles femmes? Il ny fait point d'exception, ie croy qu'il parle de toutes & tiens ce qu'il dit pour veritable, & vniuersel tout ensemble. Ores escoutez Senecque ce graue Philosophe Romain qui luy cōtredit. Voicy comme Mathieu de Chaluët fait parler Senecque en François. Le plus grand des Medecins a

dit que les femmes ne deuenoient point chauues & qu'elles n'auoient iamais la goutte aux pieds. Et toutesfois maintenant les cheueux leur tombent & les pieds leur font mal. Ce n'est pas la nature des femmes, c'est leur façon de viure qui est changee: car ayants voulu esgaler la licence vitieuse des hommes, elles ont aussi esgalé les vices corporels des hommes. Elles ne veillent pas moins toute vne nuict entiere, elles ne boient pas moins, elles dessient les hommes à l'huile, & au vin. Elles rendent aussi par la gorge ce qu'elles ont mis dans l'estomach malgré luy, & remesurent le vin par le vomissement, elles rongent aussi bien la neige, soulagement de ceux qui ont le feu dans l'estomach. Quand à la paillardise elle n'en voudroient rien quitter aux masles, n'estant nees que pour souffrir. Pourquoi donc se faut il estonner si le plus grand Medecin du monde, & le plus sçauant aux secrets de nature, se trouue surpris en mensonge de veoir auourd'huy tant de femmes gouteuses, elles ont par leurs vices perdu les graces, & les faueurs qui estoient en leur sexe, & par ce qu'elles ont despouillé les mœurs des femmes, elles sont condamnées aux maladies des hommes.

De là pouuons nous colliger que la maladie articulaire à laquelle les femmes sont subiectes ne prouue pas tant que l'oracle d'Hippocrate soit abusif & trompeur, qu'il

taxe couuertement le luxe & l'yurongnerie d'icelles. Mais de peur de nous enyurer en la compaignee de tant d'yurongnes, mettons les à table par ensemble, & nous tenans vn petit à l'esquart considerōs soigneusement toutes leurs actions, & leurs gestes.

ASSEMBLEE CONVIVALE DES
anciens yurongnes.

CHAPITRE XXXIII.

NOus dressons icy vn banquet à l'antique pour assouuir l'appetit curieux de ceux qui se repaissent d'antiquitez, s'ilz y trouuēt peu à manger, qu'ilz se recompensent à bien boire, aussi bien nostre intention est d'enyurer ces anciens, ou du moins représenter les façons qu'ilz tenoient en s'enyurāt, qui les trouuera belles, qu'il entre en la compaignie, il n'aura pas faute de suite; car si nous prenons garde, à ce qui se passe de nostre temps, nous le trouuerons peu differēt des siecles passez en matiere d'yurongnerie, nous trouuerons dis-ie, noz yurongnes plus estroicts obseruateurs des loys & coustumes anciennes touchant le boire, que noz Philosophes des bonnes mœurs de ceulx qu'ilz alleguent en leurs escholes: mais par ce que ce discours est vn petit de lōgue

haleine, pour ne point ennuyer nos spectateurs, en les tenant continuellement les yeux fichez sur des yurongnes, nous les resiouyrans par quelque varieté curieuse, & les entretiendrons avec la plus grande briefueté qu'il nous sera possible. Si leur desir les porte plus avant ilz pourront auoir recours à ceux qui en ont fait des liures entiers. Or pour proceder avec plus de facilité en ce subiect, nous dresserons toutes les particularitez en chapitres particuliers comme en autant de mets, & suyurons le mesme ordre, ou à peu pres que ceux de qui nous parlons tenoient à table. Nous môstrerons premierement la forme de leurs sieges, & de leurs tables. Plus nous viendrons aux conuiez & représenterons les nations diuerses en quelque façon propre & particuliere à chascune, qui les fera recognoistre aux yeulx des assistants & aux oreilles des absents.

Nous prouuerons par apres qu'ilz se plaisoient à la diuersité des vins.

De là nous chercherôs de l'ordre en leurs desordres, & dirons quel ordre ilz tenoient en leurs brintz, & s'ilz faisoient difference des saisons pour yurongner, ou si indifferemment ilz s'y addonnoient en tout temps. Pendant qu'ilz s'entretiendront à boire nous leur preparerons des couronnes, & des onguents preseruatifs pour repousser les esclâdres qu'ilz pourroient receuoir du vin. Estâs couronnez & parfumez nous les ferons re-

tourner à la charge plus rudement qu'au-
parauant, & redoubler les coups de gobe-
lets, & de peur que quelcun ne se soustraye
de la compaignee ou se dispense de boire
cauteleusement, nous leurs donnerons des
inuentions nouuelles pour retenir chascun
en son quartier, & à son deuoir. Et afin de
ne les ennuyer à table par vne si longue de-
meure, nous y introduirons le chant & la
danse. En fin ne les y pouuant plus retenir
nous les ferons desseruir, pour leurs pre-
senter non de noz dragees musquées, mais
ces Tragemata qu'ilz appellent, vous serez
fort estonnez d'entendre quel appetit c'est.

Pour Catastrophe nous leur ferons repre-
senter à l'issue de table tantost vne tragedie,
tâtost vne Comedie, tâtost vne farce selon que
leur humeur bastera. Ores menôs noz cham-
pions sur le champ de bataille, & representons
premierement leurs postures.

*QUELLE POSTVRE OV SITVA-
tion les anciens tenoient à table.*

CHAPITRE XXXIIII.



E n'entreprend icy sur la charge
du maistre du banquet, ou de
son maistre d'hostel, ie luy laisse
prendre en main la liste & le
bordreau des viandes qui sont

apprestées pour noz conuiues, & donner ordre que tout soit seruy, comme il appartient, ie prends seulement le soing de les mettre à table, remettant à leur discretion le choix des places selon leurs grades ou dignitez. Vous les verrez tantost bien à leur aise, couchez sur beaux lits tout de leur lōg, & sur le ventre, au reste releués, & appuyés des coudes sur le cheuet, ayants les bras libres, pour les porter aux plats, & à leurs bouches, & pour les manier à leur volonté sur la table qui leur sera dressée au deuāt, ceste posture leur est autant familiere & ordinaire qu'esträge & inuisitee à nous aultres, ordinaire (dis-je) & commune à beaucoup de natiōs & particulierement à la Iuifue, Grecque, & Romaine, comme la tresbien enseigné ce docte Antiquaire Mercurial, & pour mon esgard ie croy qu'elle estoit obseruee presque par tout les peuples plus civilisés de la terre, principalement lors qu'il estoit question de faire bonne chere en quelque banquet solennel. Virgile descriuant le Royal festin avec lequel l'Emperiere Carthaginoise bienueigna le valeureux *Ænee*, nous faict veoir tous les conuiues couchez sur les lits couuerts d'escarlate. Les Perses aussy semblent auoir suiuy la mesme façon. pour le moins lisons nous que quand leur Roy faisoit festin à ses vassaux, il auoit accoustumé de se coucher tout seul sur vn chalit supporté par des pieds ou soubassement de fin or.

Eten-

Et encores que les Ægiptiens ayent quelque-fois accoustumé de se seoir à table, si est ce que les Alexandrins en leurs banquets publics dressez pour la celebrité de leur feste, dicté Lagenophorie (c'est à dire porte-bouteilles) se coucheoint sur des petits lits dressez à ceste intention. Ces lits prenoient leur nom ou de leur nombre ou de leur forme, du nombre, comme Biclinium, Triclinium. De la forme comme sigma; ilz appelloient Biclinium le lieu où il y auoit deux lits dressez, duquel parle Plaute en sa Bacchide, in biclinio (dit il) cum amica sua, vterque accubitus datus. Et en vn autre endroit Biclinium est vobis stratum, il y a deux lits prests pour vous receuoir à table. Triclinium estoit vn lieu où il y auoit trois lits contigus destinez aux conuiues, nous l'apprenôs de ces vers d'Horace.

Sape tribus lectis videas cœnare quaternos

Souuent l'on voit soupper quatre dessus trois lits.

Ce triclinium est la façon de liêt plus moderne, qui a esté trouuee plus propre & plus commode, & a esté substituee au Sigma.

Ce sigma estoit vn liêt seul releué sus vn piedestal, ou aultre engin de bois, ou aultre matiere plus pretieuse; assez grand & capable pour six à sept personnes; il a esté appellé sigma parce qu'il estoit en forme de croissant, comme est vn grand sigma entre les lettres grecques, duquel voicy la figure C

preſque comme vn grand C latin. Apulee nous le depeint ſans le nommer par ces parolles; *Viſoque ſtatim proximo ſemirotundo ſuggeſto propter inſtrumentum cœnatorium, rata reſectui ſuo commodum libens accumbit.* Ayant (dit il) veu vn lieu eminent à demy rond, inſtrument propre pour ſoupper, le iugeant commode pour prendre ſa reſection, elles'y couche volontiers. Toutesfois ie trouue que non ſeulement les liëts, mais auſſy les tables ont eſté appellees de ce meſme nom comme ie l'ay appris du Poëte Sydonius.

*Non tibi gemmatis ponentur prandia menſis
Affidens murex nec tibi ſigma dabit.*

Ditmarus en ſes chroniques a pris auſſy le ſigma pour la table nous en deſcriuant ſa forme ſans rapporter le nom, lors qu'il monſtre comme l'Empereur Othon curieux de remettre ſus pluſieurs couſtumes anciennes ſe ſeoit à table faiëte en demy cercle, & poſee en vn lieu plus eminent que les aultres.

Auſſy failloit il que la table fuſt faiëte en demy Lune, ronde d'vn coſté pour reſpōdre à la forme du liëct, & pour la commodité des cōuiues: de l'autre coſté en droiëte ligne, pour la commodité du ſeruice, afin que les ſeruiteurs qui ſe tenoient debout deuant la table, peuſſent plus facilement aborder par toute la table & porter le verre, ou aultre choſe neceſſaire à leurs maiſtres.

les tables dressées au Biclinium & triclinium respondoient de mesme à la forme & proportion de leurs lits. Or pendant que ces seruiteurs, ces pages, & laquais demeurent en pied, fort attentifz à leur deuoir; arrestons nous à contempler les façons diuerses de leurs maistres.

QUELLE FAÇON PARTICVLIERE auoit chasque nation à table.

CHAPITRE XXXV.



E vous ay promys de vous faire entrer en vn mesme banquet, plusieurs & diuerses nations ensemble, les y voila: mais ie vous voy fort empeschez de les recognoistre, & ietter l'œil tantost sur l'un, tantost sur l'autre, non moins en peine de scauoir quelz ils sont, que de remarquer ce qu'ilz ont de particulier. Employés voz oreilles & voz mémoires, aussy bien que les yeux, ie satisferay à vostre curiosité. Ceux que vous voyez avec ces grands hanaps à la main droicte, sont Grecs Insulaires de Thaso & de Scio.

Ceux icy les ont bien à la droicte, mais non pas de mesme qualibre, ilz sont beaucoup moindres, c'est en quoy ie les recognoy pour Atheniens, ou habitants du pays.

Attique. Ces aultres qui sont si aspres à la curee, qui commencent l'escarmouche avec le repas sont Thessaliens. Ceux là encor plus bouillants, qui desia ressentent les outrages de leurs premiers efforts, sont Macedoniens. En voicy qui font bon fondement, qui s'arment de choux bouillis, & de leur semence avant que d'entrer en lice, & prennent plustost le deffensif, qu'ilz ne sentent l'atteinte, ce sont parties Égyptiens, partie Sybarites. Ces mutins que vous voiez se forcer les vns les aultres à boire d'aultant sont Persans. Mais qui pensez vous que ce soient ces nouveaux courtisans qui tesmoignent leur affection par tant d'embrassements & mesme par la perte de leur propre sãg, qu'ilz font escouller de leur front, puis le ramassent dans leurs tasses iusqu'au moindres gouttes, pour servir de monstre exterieure, à leur amytié interne? Ce sont habitants de Carmanie peuple de la petite Asie. Ces friands qui succotent delicatements les vins, & les hument par delices à diuerses reprises dãs de petits gobelets d'argile ou d'argët, qui à peine tiennent vne once & demye, & sont moulez en façõ d'une toupie, ou pomme de pin, ce sont noz anciens Gaulois. Ie trouue leur friandise fort louable & iudicieuse de s'ahurter plustost à ceste agreable qualité du vin, qu'à la quantité desmesuree de s'arrester à ce qui entretient & contente le goust & l'appetit, & non à ce qui l'affoiblit

& l'oppreſſe.

Ces aultres derniers que vous voyez ſus la deffenſive avec leurs eſpees au coſté ſont Parthes: iamais vous ne les verrez deſarmer au banquet, ilz prenoient les allarmes du vin, & ſe remparent contre ſes offences, mais garde qu'eux meſmes ne viennent aux offeſes, la plus forte armure & moins offenſive contre le vin eſt la ſobrieté. Vous me demanderez que veult dire qu'aulcuns de la compagnee tiennent touſiours leur verre auprès d'eux: aultres n'en veuillent point qu'ilz ne le demandent? Cela ne deſpend ſinon de la volonté des particuliers. L'une & l'autre façon eſtoit bien receüe entre les anciens, mais plus la premiere que la derniere, c'eſt celle qui a eſté plus approuvee par Agamemnon lors qu'il diſt au Capitaine Idomeneus.

Vt mihi plena tibi ſemper ſint pocula, poſſis

Quo bibere ut mens ipſa lubet

Tenons touſiours nos verres pleins

Pour boire ſelon nos deſſeings.

Encores que nous liſons qu'ez banquets que Cleomenes Roy des Spartes faiſoit à ſes amys, on ne ſeruoit iamais à boire ſi on n'en demandoit; ce qu'aulcuns aymēt mieux attribuer à l'eſpargne, ou frugalité de ce Roy qu'à la couſtume ordinaire du pays. Iuſques icy nous auons attablé & reconnu nos conuiues, quel vin leur presenterons nous?

QUE LES ANCIENS SE PLAIS-
soient à la variété des vins.

CHAPITRE XXXVI.



omme les anciens Grecs estoient fort curieux en la diuersité des vins ausſy estoient les Romains.

Capaciores huc puer affer ſcyphos (dit le Poëte Lyrique)

Et Chia vina aut Lesbia,

Vel quod fluentem nauſeam coerceat

Metire nobis cacubam.

Et Martial ſemocquant plaisamment d'un qui entretenoit de long temps vne ſiebre lente par ſon intemperance, & ſa vie voluptueuſe, luy reproche qu'il enyure ſa ſiebre avec diuerſes ſortes du vin.

Ebria (dit-il) *ſetino ſit ſepe, & ſepe falerno,*

Nec niſi poſt nuceam cacuba potat aquam.

Plinc remarque que l'an ſix cents ſoixante & quinze de la fondation de Rome on donnoit aux feſtins ſumptueux vn verre de vin grec à chaſcun des conuiues, oultre le vin Romain, bien qu'il fuſt pour lors fort rare & precieus dans Rome. Et dit d'auantage que l'on vit ſeruir de quatre ſortes de vin au bāquet que Caſar dictateur fit pour ſon troiſieme Conſulat. Ceste couſtume ſe

retient aux festins de nostre temps, esquelz on a accoustumé de seruir diuersitez de vins, commenceant le plus souuent par quelque vin blanc deliciaux, & par apres seruant du clairot ou de quelque autre plus chargé de couleur. Et encores que Plin semble accuser quelqu'vns de son tēps qui aux banquets qu'ilz faisoient auoient leur vin à part, & n'en donnoient aux aultres qui estoient à leurs tables, ou bien s'ilz permettoient qu'il leur en fust versé ce n'estoit que pour vn coup ou deux: si est ce que les anciens (si ie ne me trompe) ne festoioiēt guere souuēt vn conuie avec quelque vin delicat qu'ilz n'vsassent de la mesme liberalité enuerstoutre la compagnee. Car en plusieurs lieux on tenoit le vin mēlangé & arrosé comme il estoit requis dans des grands vaisseaux ou hanaps, qu'ilz appelloient crateres à cause du mēlange, ceste mixtion seruoit indifferement à vn chascun des conuiez. Il est bien vray que c'estoit avec quelque distinction, car ilz en presentoient quelquefois à pleins verres aux plus apparens sans auoir aucun esgard à la quantité qu'ilz en beunoient, aux aultres moins dignes la distributiō se faisoit par mesure: non toutesfois qu'ilz obseruassent estroitement cōme les Spartes & quelques Candiots vne egalité de portiōs en telle distribution: permettons donc à noz bāqueteurs de boire à leur goust, & tant qu'il leur plaira, mais considerons à qui ilz adresse-

ront leurs brintz.

*QUEL ORDRE TENOYENT LES
anciens en leurs brints.*

CHAPITRE XXXVII.

DLutarque nous apprend que les anciens beuvoient les vns aux aultres, y obseruant vn ordre, & saluant auant tous aultres à coups de gobelets les plus eminents & releuez enquelque degré d'honneur les honorant au surplus.

D'assiete honnestes, & de plus de viandes,

De couppe pleine, & tousiours la plus grande.

Cecy se pratique encores aulcunement entre les carousseurs modernes lesquels dedient ordinairement les premiers traicts, & les plus grands verres ou au maistre du festin, ou à ceux qu'ilz iugeront surpasser en merite le reste de la compagnee. Les anciens apres s'estre eschauffez en ceste premiere rencontre ne laissoient de boire indifferement à tous les inuités dans vne mesme couppe, & quelquefois à vn chascun diceulx tant le nombre en fust il grand.

Alexandre Roy de Macedoine, aultant valeureux à table que redoubtable en guerre, estant vne fois inuité par vn Capitaine Thessalien nommé Medius beut à tous les

conuiues qui estoient vingt en nombre, & fist pareillement raison d'auntant à tous ceux qui le prouoquarent à boire. Mais deuant que passer oultre nous deuons scauoir qu'anciennement on practiquoit deux sortes de boire l'un à l'autre: la premiere & plus ancienne se faisoit en deux manieres, l'une estoit de boire bien peu, & comme gouster le vin, & puis presenter le vaisseau presque tout plein à celuy à qui on auoit beu: c'est ce que les Grecs appellent proprement *πεποτινεν*, & les latins *propinare* & *præbibere*. Ceste façon de boire se pratique quelquefois en Allemagne, mais c'est fort rarement, & seulement ez brints d'honneur & de sobriété. Elle a esté obseruee en la Royne Dido comme a remarqué le Poëte latin.

Primaque libato summo tenus attigit ore.

Tum Bitie dedit increpitās, ille impiger hausit,

Spumantem Pateram,

Philippe Roy de Macedoine ayant réduit en sa puissance la ville d'Olynte dressa vn festin sumptueux, & y inuita beaucoup de ses amys, & beut à tous leurs presentant par apres de sa main les mesmes coupes & verres, où il auoit beu. Il y auoit vne aultre façon approchante de celle icy, qu'on appelloit *Dætron* lors que celuy qui auoit receu la coupe de la main du premier, en ayant gousté, la donnoit à son voisin, & ainsi de main en main tant qu'elle estoit vuide ou que chacun auoit beu à son tour.

Quant à la seconde maniere de boire à son
compagnon moins ancienne, & plus frequen-
te, c'estoit celle mesme que les Allemands,
& beaucoup d'autres retiennent encores
de leurs deuanciers, & qui pour le iourd'huy
se pratique presques par tout, scauoir en
vuidant entierement le verre, puis l'ayant
fait remplir le presentent à celuy à qui on
l'a adressé pour en faire autant. Voila com-
me le rapporte Athence, *Antiqui euacua-
bant pocula sibi praeibentes, rursus re-
pleta praebebant bibenda iis quibus propi-
nauerant.* Ainsy en fit Alexandre le grand
lors qu'il beut vn grand hanap plein de vin
contenant cinq pintes & d'auantage à Pro-
teas, qui le receuât ioyeusement de la main
royale, apres auoir hault loué la valeur de
son Roy, l'espuisa si gallamment que cha-
cun luy fit la ioye de sa valeur & gentillesse.
Proteas ne se contentant de ce carouffe, cha-
toüillé de cest applaudissement redoubla
son escrime avec les mesmes armes, mesme
exploict, & mesme honneur. Or pendant
qu'il ioüit paisiblement du contentement
d'vne si glorieuse victoire, enquerons nous
briefuement, si ceste exercice estoit ordinaire
aux anciens, ou s'ilz y dedioient particulie-
rement quelque saison de l'année.

SI LES ANCIENS S'ADDON-
noient plus particulièrement à boire
en vne saison qu'en vne autre.

CHAPITRE XXXVIII.



Comme l'yrongnerie n'a trouué
nulle borne ou mesure, ny à la
quâtité du breuage, ny au nom-
bre des heures, des iours & des
nuicts, aussi n'a elle receu aucun
reglement touschant les saisons, ny accordé
tresues quelconques à ceux qu'elle a posse-
dé pour prendre temps de se recognoistre,
& se retirer de sa Tyranique domination.
Neantmoins il est vray semblable, que sa fu-
reur n'exerce tousiours esgallemēt son pou-
voir, & que lors qu'elle est comme voilee de
quelque plus doux attraiēt, elle alleche avec
moins de resistance ceux qui luy sont tribu-
taires; or auons nous dit que l'yrongnerie
n'ayt souuent de la soif, & la soif de chaleur
& seicheresse, & que d'aultant plus, ces qua-
lités excedent plus la soif en est excessiue &
poignante, plus elle nous excite & comme
contrainēt à vn boire demesuré, d'oū nous
pouons deduire vne consequence presque
asseurée que le desbordement à boire croist
avec la chaleur du temps, & conséquēment
que pendāt l'esté, les anciens y estoient moins

reglez. Pour ceste raison Callias a esté autrefois pouſſé par Protagoras à boire d'autant sur le leuer de la canicule, afin de preuenir l'influence dangereuſe de ceste conſtellation, ſe tenant la bouche fraiſche, & humectant largement les poulmons contre l'ardeur & ſeichereſſe de ceſt aſtre. Anacreon nous a donné le meſme aduis en ces vers.

Arroſe de vin ton poulmon,

Car la faſcheuſe canicule

Aſtre, qui ſeiche, eſchauffe & bruſle

Flamboye ſur noſtre horizon.

Il n'eſt beſoing icy de r'entrer en noſtre premiere diſpute, nous auons aſſez clairement monſtré que l'on boit plus l'eſté, que l'hyuer. Mais conſidez que pendant que nous diſcourons noz beueurs ſ'eſchauffent, que le vin leur monte en teſte, & gaigne leur cerueau, enſeignés leurs donc les moyens de ſegarantir contre ces aſſaults, remparer leurs teſtes, & rabbatre ou diſſiper les vapeurs enyurantes, ou pluſtoſt apprenons d'eux meſmes ceux d'ont ilz ſe ſont tant de fois ſeruys.



DES COVRONNES ET CHAPEAUX
de fleurs, que les anciens auoyent en
usage en leurs festins.

CHAPITRE XXXIX.

E ne veux icy entrer en discours
comme à mesure que le vin es-
chauffe le sang de noz conuiez,
esgaye les esprits, desploye leurs
langues, ilz viennent à se mettre
sur les hōnestetez & desployer leur beau di-
re, font de nouvelles cognoissāces, fondent
des amyties, & les confirment incontinents
par vn brints les vns aux aultres: voyes
pour cest effect ce grand hanap au beau
milieu de la table qu'ilz appellent la coup-
pe d'amitie, de laquelle comme d'une sour-
ce & viue fontaine de beneuolence ilz boi-
ront les vns aux aultres, cachetants leur con-
tract d'alliance au grand seau de leur puis-
sant & souuerain prince Bacchus.

Mais ce pēdāt que ce cachet s'imprimera,
ilz imprimeront quant & quant leur cer-
uelle, & lors ce sera recourir aux remedes,
d'enuironner leurs temples de couronnes &
chapeaux de fleurs & de se parfumer le chef
d'onguens preseruatifs contre l'effort du vin.
Cleopatra Roïne d'Ægypte banquetāt avec
son mignon Marc Anthoine sur le milieu

du festin comme elle le conuioit à bon esciant à boire, elle luy fit quant & quant vn chapeau de fleurs, qu'elle mesme luy posa sur la teste: les Iouiens selon que nous auons appris ont esté les premiers qui se sont ornez de couronnes & embamés d'vnguens precieux en leurs banquets. Or comme l'inuention des couronnes buttoit à diuerses intention, aussi estoient elles fort diuerses entre elles. Aulcunes se composoient des plus belles fleurs mieux riolees piolees & plus agreables à la veüe, lesquelles on destinoit particulièrement au contentement des yeulx, pour dessiller & esgaillardir leurs esprits visuels tout obscurs & tenebreux par le trouble des vapeurs plus grossieres. Aultres se faisoient & de fleurs & de feuilles pour accoupler par telle liaison le contentement à l'vtilité, resiouyssant la veüe par les couleurs & reprimant l'yuressse, & les incommoditez qu'elle apportoit par les vertus des plantes. Aucunes estoient propres à resserer, restraindre, & repousser; aultres à fortifier le cerueau & le resiouyr par la douceur de leur odeur, aultres à ouurir & dissiper, aultres à rabattre & attremper vne chaleur excessiue, & moderer les battemens importuns des arteres bouillonnans, celles qui estoient doüees d'vne temperature chaude, ouuroient mediocrement, & destouppoyent les pores occupez par les humeurs ou vapeurs crasses, & d'vn mesme effort at-

tenuoyent & subtilisoient les fumees & leur donnoyent issue: les mediocrement froides par vn gracieux attrouchemēt repoussoyent les vapeurs qui montent au cerueau, & les reprimoyent de leurs odeurs: temperoyent les ardeurs par leur qualité cōtraire, & consequemment diminuoyent les douleurs de teste, & l'emotion des arteres. Ilz se seruoient à cest effect de roses, & de violette de mars, mais non de violettes blanches, ny de marjolaine; laquelle ilz reiettoient souuent de crainte que la violence de son odeur n'esmeut le cerueau, ou l'employst, & l'enyrast du tout. Je ne scay si pour ceste occasion ilz reiettoient le Cabaret, lequel comme dit Pline s'appelloit Asarum à cause qu'il n'entroit point à la composition des couronnes, n'y aussy l'iris ou flambe, non plus que la Saliuicula, bien qu'ilz eussent vne odeur assez gracieuse. Quant aux aultres fleurs printannieres, plaisantes aux yeulx & agreables au nez, ie croy qu'elles auoient part indifferemment, ou toutes ou grande partie d'icelles es couronnes anciennes. Ainsy le chante le Poëte Lyrique en ces vers.

*Nunc decet aut nitidum caput impedire myrto
Aut flore terra, quem ferunt soluta.*

Entre autres Plutarque rapporte la fleur du souchet, du saffran, & de la gantelee, lesquelles appaisant la tormente de l'yuronnerie inuitent à dormir doucement ceux qui ont trop beu. Pline y admet aussy les

fleurs de geneste, passeuelours, rosagine, cyclauienus, & beaucoup d'autres qui semblent auoir esté introduites par les anciens plustost pour contenter leur veüe, & seruir à leurs delices, que pour l'aucun autre vsage ou necessité. Les fueilles qui ont heu l'honneur de se trouuer entre les fleurs ou sepagement aux chapeaux ou tortis dedies aux banquetz, estoient aussy diuerses: car tantost les anciens se couronnoyent de Peuplier comme le fugitif Teucer

Tempora populea fertur vinxisse corona.

Quelqu'vns portoient des couronnes d'Ache, les autres de Myrthe

Quis vdo

Deproperare apio coronas

Curatne myrto?

La couronne de melesot estoit en grande estime pour la vertu qu'ilz luy attribuoient de resister à la ferueur de l'yuressse, & pour ceste cause ils appelloiët le Melilot tousiours gardien.

Le chapeau de Laurier, de peruenche, & de pampre de vigne estoient aussy en vsage, mais sur tous celuy de lierre se trouuoit recherché pour son antiquité, & par ce qu'il pressoit, & serroit puissamment les arteres temporales, & qu'à leur compression la douleur excitee par le trop boire s'appaisoit aulcunement: oultre qu'il apportoit vn gracieux ombrage au front & aux temples par ses bayes, & son fueillage tousiours verd, & rafraischissoit

rafraischissoit l'ardeur de la teste des beueurs sans aulcune fascheuse odeur. Je ne veyx m'arrester à vous descrire les qualitez de la couronne de tillot qu'ilz auoient pour tant magnifique, ny de beaucoup d'autres semblables assez ordinaires en leurs festins (Je me feroye tort, & aux anciens & à ceux de nostre temps qui en ont escrit) il me suffira de vous aduertir deuant que passer oultre, qu'ilz ne se seruoient pas seulement de chapeaux simples faits d'une seule sorte de feuilles ou fleurs, mais aussy d'autres composés & ageancés de plusieurs especes ensemble, comme entre autres estoit celuy qu'ilz appelloient Naucratite tissu de Roses & de Myrte, l'une des ambitions du Poëte Anacreon qui desiroit d'en estre tousiours couronné; celle de lis & roses entremeslées luy estoit aussy en vsage.

Voyez en ceste couronne

Comme la rose boutonne,

Et d'un meslange si beau

Le lis blanchit le chapeau.

Mais c'est trop parlé de cest Antidot contre l'yuressé, disons quelque chose des onguents, & puis nous ferons de nouveau rentrer en lice nos beueurs.

DES ONGVENTS DESQUELZ

usoient les anciens aux banquets.

CHAPITRE XL.

LEs parfums & onguents odorés desquelz se seruoient les anciens estoient de diuerses sortes, l'onguent dit Oenanthinum, oultre ce qu'il estoit familier à l'estomach, leur sembloit aussy preseruer le cerueau d'yuressé. Les aultres qui tiroient leurs appellations de la marjolaine & du serpelet, estoient receus au mesme vsage, aussy estoit le Crocinum pourueu qu'en sa composition il n'y entrast beaucoup de Myrrhe: Le Staete ou bien l'huile exprimé de la Myrrhe (qu'aucuns estiment estre le Styrax liquide des modernes) en fin beaucoup d'aultres, & sur tous l'onguent Nardin semble auoir tousiours esté plus familier & agreable aux Grecs, mais principalement aux Romains qui en faisoient grand cas.

Nardo vina merebere:

Nardi paruu onix eliciet cadum.

L'vsage de tant d'onguents & autres huiles odorants ne visoit qu'a trois buts. Le premier n'estoit aultre qu'un entretien & surcroist de leurs voluptez & delices par les bonnes & souuesues odeurs que ces mix-

tions venoient à exhaler & espandre au milieu des conuiues: auquel desseing les Perses vsoient en leurs banquets de l'onguent Iasnim fort recommandable pour son odeur. Les deux aultres buts se rapportoient à l'yuresse, l'vn pour la preuenir & destourner: l'aultre pour se munir à fortifier contre ses allarmes, & rechasser les incommoditez & accidents qu'elle engendre en la façon mesme que nous auons dit des couronnes. L'intention de restraindre les venes & arteres, fermer le passage aux fumees du vin, moderer ses chaleurs, estouffer ses vapeurs, mouuoit les anciens Carmains peuple de la petite Asie à se seruir de l'onguent rosat, au default duquel ilz employoient l'huile rosat, ou l'huile de coings, medicaments qui sont tous doüez de vertu adstringente.

Mais la plus grande & principale vtilité que recherchoient les anciens en l'vsage des onguents precieux, desquelz ilz s'embaumoient non seulement les cheueux, mais aussy la peau du col, & du visage, estoit d'humecter le cerueau, estimâts que comme vne petite pluye abbat vn grand vent, de mesme ce peu de liqueur odorante pourroit calmer la tourmente de l'yuresse. Car prenant garde que les vieillards sont plus facilement surpris de vin que les ieunes hommes & attribuant ceste facilité de s'enyurer à la seiche- resse de leurs parties superieures attirantes & comme succeantes les vapeurs du vin,

desquelles elles demâdent d'estre humectees, ilz vindrent par apres à appliquer ceste Philosophie sur leurs excez particuliers & en faire leur profit contre l'yuressse, qu'ilz encouroient ordinairement, syllogisants & concluants en ceste maniere. La teste chargée d'onguents, n'aura tant d'espace vuide, & consequemment ne pourra où loger les fumées du vin, ny donner place à l'yuressse: de plus estant humectée, tout subiet sera retrenché avec la seicheresse de faire attractiō des vapeurs: que si neantmoins il y en aborde, elles rencontreront vne avantcouriere humidité, suffisante pour rebouscher la pointe de leur actiuité. Ores voila maintenant noz combattans armés de toutes pieces pour recommencer la charge plus viuement qu' auparauant. Voyons ie vous prie s'ilz s'y comporteront en homme de bien & de valeur.

COMME LES ANCIENS COURONNEZ ou parfumez redoubloyent la charge avec les plus grands verres qu'ilz eussent.

CHAPITRE XLI.



Oz biberons se sentants fortifiez pour auoir le casque en teste ne se contentent maintenant de leurs premiers gobelets (comme armes

trop foibles & peu correspondantes à la grandeur de leur courage) mais ilz crient à toute instance apres des plus grands hanaps, lesquelz ilz se font emplir tout combles.

Capaciores asser huc puer scyphos (dit le Poëte Lirique)

Garçon apporte moy des plus grands gobelets.
Et Virgil en descriuant le bouquet royal de Didon

Crateras magnas statuunt & vina coronant
Les grands hanaps sur table & les vins couronnés.

C'est dequoy le Philosophe Scythe s'esto-
noit, que les Grecs lors qu'ilz debuoient auoir plus de soif, sçauoir au commence-
ment du repas, beuuoient dans des petits verres, & sur la fin lors qu'ilz estoient saoulz, ilz venoient à desployer leurs grandes coup-
pes, & boire à oultrance. Cecy est encores fort gallamment practiqué par les Allemâds & aultres carousseurs, lesquelz sur la fin du repas apres estre desia entre deux & as produisent leurs homicides wilcômes, & aultres grandes coupes meurtrieres, pour mettre fin au combat, & donner le bon soir & le bonnet de nuict tout ensemble aux es-
crimeurs assoupys. Encore trouue ie quel-
que raison qui les poussoit à vne action si desraisonnable, & croy qu'ilz obseruoient ceste façon de faire pour engorger du vin d'auantage estendants dès le commencemêt, & eslargissants petit à petit la peau du vêtre

pour le façonner tout doucement, & le rendre capable des grands torrents qu'ilz y verfoient impetueusement sur la fin du banquet, qui au commencement eussent peu inonder & creuer leurs estomachs non encor disposés à les recevoir. Mais ce ne leur est assez d'avoir vn grand hanap, ilz veulent aussy qu'il soit couronné de vin. Ce mor de couronner les coupes est assés vsité entre les Poëtes Grecs & Latins, par lequel ilz entendent emplir tellement vn vaisseau que le vin surmonte & surpasse les bords cōme nageant au dessus.

Ceste façon de parler est encores à la bouche de noz beueurs d'aujourd'huy, mais en sens contraire, car voyants vn verre peu plein à leur gré, font difficulté de le recevoir, disants qu'ilz ne veulent porter vne si grande couronne. Estants donc noz soldats Bacchiques armez de tels bastons & chargés iusques au bout. Ilz commencent de rechef à s'attaquer les vns les aultres & carousser plus fort qu'auparauant. Les carousseurs d'aujourd'huy boient à la santé des Princes, aux bonnes graces de leurs amys presents & absents: & ceux qui se sont soubmis au service de quelque dame tesmoignent leur affection à coups de verre. Les anciens pareillement beuvoient quelquefois aux graces, aux Muses, & n'oubloient pas leurs maistresses: Martial en vn gentil epigramme montre comme ilz vuidoient aultant de

verres de vin qu'il y auoit de lettres en leurs noms.

*Mœnia sex Cyathis, septem Iustina bibatur
Quinque Lycas, Lide quatuor, Ida tribus.
Omnis ab infuso numeretur amica falerno
Et quia nulla venit tu mihi somne veni.*

Ceux qui pensent que la façon de boire la ronde soit inuention moderne, & depuis peu introduite aux festins, se mescontent de beaucoup, car les anciens Lydiens en sont auteurs, lesquels la cōmençoient tousiours à la main droite. Et noz vieux yurongnes eschauffés en ce combat la practiquoient fortbien, beuuant en cercle ou en rond (ainsi parle Athenee) vn page portant la coupe entour la compagnee & la presentât à chascun à son tour. Le docte Poëte François recognoissant ceste ancienne maniere de carousser, semble l'auoir representee au dernier festin que fist Holofernes auant qu'estre chastié par la main de la valeureuse Iudith. ;

La maluoisine coupe

Va souuent, & revient à l'entour de la troupe.

Ores comme si c'estoit peu de chose de n'auoir qu'vn ennemy sur les bras, vous verrez en ces entrefaictes noz anciens carousseurs en entreprendre deux ou trois & d'auantage, voire attaquer quelquefois toute la compagnee. Mais cependant qu'ilz s'entrechoquent avec tant d'efforts, qu'ilz s'efforcent d'espuiser leurs vaisseaux demesurés

avec tant d'opiniastrété, & qu'ilz s'opiniastrēt à terrasser leurs ennemys de table avec tant de courage & d'outrage, ilz nourrissent & augmentent leur yvresse, ou pour le moins, si elle n'est desia esclose se la font naistre incontinent. Ce n'est pas faict neantmoins, Ilz tiennent encores bonne mine, ilz ont encore du sens & du iugement de reste, qu'il faut employer à nouvelles inuentions pour s'acheuer de peindre.

NOUVELLES INVENTIONS DE
boire des anciens.

CHAPITRE XL

EL n'est ia besoing de fournir d'inuention à ceux de nostre temps, ils ne sont que trop ingenieux, toutesfois puis qu'il en est question nous leur descouurirons celles de l'antiquité s'ilz les iugent trop grossieres, ie les estime plus grossiers eux mesmes de subtiliser sur d'autres. Les anciens pour donner plus d'auctorité à leurs brints creoyent des iuges au fort des dez, esquelz ilz se rapportoient de toutes les difficultez qui arriuoient au boire. D'auantage ilz establissoient des loyx entre eux, dont celle icy en estoit l'vne (voyez la belle iustice distributue qu'ilz ob-

seruoient) il faut qu'un chacun de la troupe boiue comme les autres ou bien qu'il desguerpiſſe incontinent de la place qu'il occupe, car la loy dit *ant bibat*, *ant abeat*. En voicy vne autre. Ceux qui ne pourront reſoudre les ænigmes propoſez ſeront condânez & forcez à boire vne coupe de vin de telle ou telle grandeur : en Athenes vn ſemblable ou plus rigoureux edit ſ'eſt autrefois obſerué contre ceux qui ne peurent atteindre la ſignification d'un ænigme, aucuns d'iceulx eſtant condamnés de vider vn bocal ou caraffe de vin trempé, & les autres plus ieunes, contraincts de vider vn hanap de vin pur, de telle doſe neantmoins, que leur ſanté en eſtoit ou pouuoit eſtre offeñcée. La condamnation portoit quelquefois de boire de la ſaumure dans leurs vins, & vider la coupe d'une haleine, les mains garrotees derrier le dos. D'où (comme ie croy) eſt deſcendüe l'erronee opiniõ de ceux qui eſtiment le ſel infuſ & diſſoult dans le vin aduancer l'yueſſe à ceux qui le boient. Nous voyons ſouuent nos yurongnes boire dans des crouſtes de paſtés, & dans leurs ſouliers, tremper quelquefois de la ſüye, de la greſſe, des bouts des chädelles, & choſes plus ſalles dans leurs vins; Les anciens non moins ſubiects au vin que deſbauchés en ceſte brutalité y meſlangoient des œufs, de la farine, du fromage, du miel, de l'huile, & autres telz vomitoires. Alexidemus Mileſiẽ

bastard de Thrasybulus le Tyran, cōme on eut apporté à son pere de l'huile de parfum fort excellente, il la versa toute dans vne grande tasse de vin puis beut & aualla l'un & l'autre tout ensemble. Quelques'vns des Modernes plus aduisez que les precedents boient l'Hippocras apres qu'ilz ont perdu le goust du vin pour en auoir trop pris. Les anciens teignoient ou pour mieux dire aromatisoient quelquefois leurs vins avec du bois d'Aloës & Cynamome, aultrefois avec du safran, & bien souuent avec myrrhe, Nard Gallic, Calamus Odoratus, Aspalathus, Ionc odoré, Costus, Aspic d'oultre mer, Amomum, Canelle, Dattes & Cabaret. Mais reuenons à noz beueurs que vous voyez maintenant à bon estat & trempés iusques à la gorge, prenons garde s'il vous plaist, aux fructs de leur yurongnerie.

LA SVITTE DV BANQUET

CHAPITRE XLIII



Lutarque dit que l'amour ressemble à l'yuressse, d'autāt que l'un & l'autre rend les personnes chaudes, gayer, & ouuertes, & que depuis qu'elles sont

deuenües telles, elles se laissent aisemēt emporter au chanter & baller. C'est ce qui

donné lieu au commun prouerbe entre nous, après la panse vient la danse: vous en verrez la preuue en nostre bâquet si vous escoutez avec patience l'harmonie des discordans accords des conuiez, chantants à l'antique. Iadis tous les conuiues chantoient premierement ensemble vne chanson à l'honneur de Bacchus, & puis chacun à son tour faisoit sa musique à part, & bailloit-on de main en main vne branche de meurthe qu'on appelloit *Æsacos*, pource qu'il touchoit à celuy qui la receuoit de chanter à tour de roolle. Ce qu'ilz ne faisoient pas seulement pour se recreer, & resiouyr, mais aussy pour addoucir la petulante fureur de ceux qui portoient vn mauuais vin. C'est ce que quelcune de leurs loix commâdoit que tous ceux qui entroient en quelque festin, fussent chantres, ou bien suiuis de quelque musicien, qui par son industrieuse Harmonie peut appaiser la tormente des esprits agités d'orage, & de tempeste Bacchique.

Mais ilz ne se contentoient pas de chanter à table, ilz vouloient aussy faire paroistre en sale leur disposition en leurs balets & passepieds. Le Philosophe qui disoit que iamais personne sobre ne dansoit, ne se mescontoit de beaucoup, car ie croy que comme le vin a esté la source d'où sont escoulees les Tragedies, Satyres, & Comedies au pays Attique, qu'il a aussy esté le premier pedagogue qui a appris les hommes à bien

danſer, Anacreon l'a ainſy chanté en ces vers.

*Quand Bacchus race diuine,
Peut arroſer ma poitrine
De ſa tant douce liqueur
Il me rend habil danceur.*

Voila pourquoy entre autres Epithetes de Bacchus les anciens l'ont ſurnommé Chorius, qui vaut autant à dire meneur de bal ou de danſe. C'eſt ce que le Philoſophe Anacharſie, Scythe de nation nous a enſigné en la reſponce, qu'il fiſt à ceux qui luy demandoient, ſ'il y auoit des baladins, & menestriers en ſon pays : car il reſpondit promptement, qu'il ny auoit pas ſeulement des vignes. Entre aultres danſes, les anciens Frelots en auoyent vne dreſſee & compaſſee à l'Iouienne, qu'ilz appelloient le bal des yurongnes, qui leur plaiſoit ſur toute aultre apres auoir bien beu. Ores iuſques icy il n'y a qu'honneur : mais ceſte vne pitie quand l'on vient aux parolles, & pis encore d'en venir aux mains : pour les parolles elle ne ſont que trop ordinaires, & qui pourroit retenir vne langue ſans frein, eſpoingnément de viues eſperonnades, telle que donne le vin ? Les plus ſages ont peine de ſ'y commander : il n'y a reſpect qui les retienne. Plutarque, ſon gendre Craion, & Theon ſon familier tous gens de reſpect, & Philoſophes remarquables, ſe ſont trouuez parmy les inſolences : les Thraces ont eſté ſubiects à ces debats & contentions aultant pernicieuſes

que compagnes ordinaires de l'yvresse, lesquelles semblent auoir aultrefois troublé les festins Romains, puis que le Poëte Lyrique tasche de les en bannir par ceste Ode.

*Natis in usum letitiæ scyphis
Pugnare, Thraci est; tollite Barbarum
Morem, verecundumque Bacchum
Sanguineis prohibete rixis.*

Or graces à Dieu nostre banquet s'est passé sans querelle, ie croy que chascun se contente de son compagnon, & qu'il ny en a pas vn seul qui ne se soit acquis vn bon amy de la compagnee, mais ie m'assure qu'il ne s'en souuiendra demain : pour action de grace & pour confirmer d'autant plus leur amitie, presentons leur encore vn brintz, & le dedions (comme ilz faisoient anciennement) au bon Dæmon qui les a si sagement conduicts : ou bien à Iupiter seruateur qui les a preseruez des orages d'une mer si tempestatife, puis permettons que l'on desserue, & que le soupper se finisse.



CE QVI SE FAISOIT APRES
auoir deſſeruy les viandes.

CHAPITRE XLIIII.

DE ſoupper eſt bien finy, mais non l'eſcarmouche, il faut recommencer à boire, mais quel moyen? Qui n'a le gouſt irrité? L'eſtomach deſdaigneux? La volonté perdue avec le pouuoir d'en faire d'auantage? Courage mes amys, courage, voicy de nouueaux appetits, appetits (dis-je) ou allumettes à boire & non pas à manger, appetits du tout contraires aux appetits naturels. Voicy des dattes roſties, voicy de la ſemée de chanure fritte, voicy les oignons tant celebres par Homere, comme l'attraiſt & la friandiſe du boire: voicy des racines d'artichauds, & chardons boüillis en eau pour ſeruir d'eſperon à vin: voicy en fin centaultres ſortes de bigearres appetits, tous compris ſoubs le nom de Tragemata, que nous vous preſentons pour vous remettre en appetit de boire. Qui ne réderoit ſa gorge de noſtre temps, s'il entendoit ſeulement parler de telz appetits? Les anciens Macédoniens eſtoient bien plus ſages friands que les autres, auſſy les enſuyuons nous, ilz ſe reſeruoient du fromage cuit, & des bons ian-

bons pour refusciter le goust du vin amorty par les longues beuuettes, pour refueiller les sentinelles assoupies & endormies, faire virer & reuirer les rondes, & finalement pour comble d'une parfaicte yuressse. Nous lisons dans Macrobe que les anciens ayants faict leuer les viandes s'entretenoyent de diuers discours, & de frequents carousses qu'ilz s'adressoient les vns aux aultres. Caranus aussy entreprit de renoueller les carousses apres soupper, & commençant vne nouvelle salüe fit porter le verre, & presenter à boire de rang à toute la compagnee: mais en fin venons à la Catastrophe.

LA CATASTROPHE DE
l'Yuressse.

CHAPITRE XLV.

DE tous ces carousses, de tous ces efforts, de tant de vin engorgé excessiuement s'en ensuyuent diuers deportemens d'yuressse, selon que les enyurés seretrouuent de diuerses humeurs. Les vns restent du tout furieux, sanguinaires, & inhumains. Les aultres d'humeur moins farousche s'appaissent à briser & tronçonner ce qui se presente à eux, & à commettre quelque esclandre, fauorisez des tenebres de la nuict. Les aultres plus louiaux passent le temps à

ioüer au guignolet & se plaisent à dresser cent autres passetemps entre eux. Les anciens Celtes plus farousches à mon aduis par la trop grande quantité de vin que par default d'humanité se plaisoient de souiller leurs tables de leur propre sang, se provoquans & combatans homme à homme apres s'estre enyurés. Si les anciens Romains ne se querelloiët l'un l'autre iusques au duël pour le moins ilz introduisoient en leurs festins des Gladiateurs qui s'esgorgoient cruellement les vns les aultres, cômme veaux en boucherie, spectacle à la verité plus inhumain qu'aggreable : quelques Thraces se sont aultrefois monstrez aultant brutaux, & plus ridicules que les precedents, en se precipitans indiscrettement au danger d'une mort fort estrange, apres avoir bien beu ils auoyent accoustumé de pratiquer vn ieu de suffocation ou estranglement (ainsy l'appelloient ilz) lequel se passoit en ceste sorte. Ilz attachoient à quelque soliveau vn licol ou cordeau soubz lequel perpendiculairement, ilz posoient vne pierre grosse & ronde, afin qu'ilz la peussent aisemēt rouller, & pousser hors de sa place, Cela estant ainsy disposé, ils tiroient au sort celuy d'entre eux qui debuoit représenter le miserable badin de leur farce, lequel prenant vne faux en main mōtoit sus la pierre, & se mettoit le col dans le cordeau qui estoit attaché au dessus, puis quelcun de la troupe poussoit la pierre en
arriere

artiere tellement que le bon homme demeu-
roit pendu & estranglé, bourceau & patient
tout ensemble, si son industrie & sa faux ne
le rachettoit en couppant soudainement
la corde apres laquelle il estoit attaché. Ce
pendant les compagnons tornoient & sa
peine & sa mort en gaufferie n'ayants com-
passion de luy non plus que d'un veau qui
s'estrange. Mais tous les yurongnes ne sont
de mesme humeur. Il en y a qui ne sont
subiects à cruauté, sont toutesfois fort ra-
uageux & tempestatifz.

Quand Alcibiades fust prest de sortir
d'Athenes pour aller à la conqueste de la
Sicile, les Hermes qui sont Images & figu-
res de Mercure qu'on souloit anciennement
mettre és quarefours se trouuerent vne
nuict presque tous tronçonnés & gasts
mesmemēt aux visages, d'où l'on iugea aussi
tost que quelques ieunes gens desbauchés
apres bien boire auoient commis tel scandale
en se cuidant iouer. Ce iugemēt supposoit
assez la turbulence des ieunes yurongnes de
ce temps là, confirmee par quelque autre
histoire qui rapporte qu'autrefois la ieu-
nesse Athenienne gasta & rauagea tous les
iardins de la ville apres auoir trop beu.
Mais ces deportements sont trop tragiques
& mal conuenables à la liesse pour laquelle
le vin a esté créé: ie les veux aussi quitter
pour clorre ce chapitre par un acte plus co-
mique, vous representant d'autres yurongnes

lesquelz portants vn vin plus doux & plus plaissant ne demandent qu'à iouer & passer le temps paisiblement. Ce que ie feray d'autant plus volontiers que ie desire de monstrer que le ieu de guignolet n'est inuention moderne, mais fort ancienne.

Agamnestor Philosophe Academique ayant vne cuisse toute hectique, & pourrie se trouua en vn festin où il fut commandé que tous ceux de la compagnee se tenants debout sur le pied droit, beussent chascun vn pot de vin, autrement qu'ilz payeroient certaine somme d'argent pour l'amande. Mais quand le droict de commander à tour de roolle fut venu à luy il fit commandement que tous eussent à boire en la mesme sorte qu'ilz le verroient boire.

Ayāt donc fait apporter vn vaisseau de terre qui auoit le goulet fort estroit, & mettant la iambe hectique, & toute diminuee dedans, il beut: tous les autres apres auoir essayé cognoissants qu'ilz ne pouuoient faire comme luy se condamnerent volontairement à l'amande. Mais nous auons desormais trop abreuvé & entretenu noz hostes, rompons l'assemblée & les enuoyons coucher, pour leur faire cuuer & dormir leurs vins, & ronfler tout leur saoul, aussi m'est il aduis que i'entends la trompette des anciens Macedoniens qui sur la fin de leurs banquets solempnelz faisoient sonner la retraicte, pour aduertir noz beueurs qu'il est temps de se

retirer, & afin qu'à l'aduenir ilz ne recidiuent au mesme inconuenient, apprenons les à tremper leur vin.

*COMMENT LES ANCIENS TREM-
poient leurs vins.*

CHAPITRE XLVI.



'Est chose asseuree selon le rapport de Pline que les anciens ont esté fort curieux d'accoustrer & broüiller leurs vins par le meslange de diuers ingredients. Les anciens Romains, Galates, & aultres peuples les sophistiquoient avec poix & Resines; Les Africains, les Insulaires de Corfou & de Zante addoucissoient l'aspreté des leurs avec du plastre: quelques aultres y mettoient de la chaux pour cest effect. Et les Grecs vrayz miroüers de toute yarongnerie fortifioient leurs vins avec Argille, pouldre de marbre, sel ou eau marine pour les rendre plus delicieux, moins enyurants, & plus salubres, d'aultant (à leur aduis) que par ceste mixtion salee ilz n'engendroiēt aucune crudité, ilz aduançoiēt la coction ou digestion, & finalement resueilloient le ventre à son deuoir. Tout cecy leur estoit mystiquement signifié en la fable qui representoit Bacchus fuyant la fureur de Ly-

curge, & se cachant en mer pour l'euter.

Mais ce n'est de ceste mixtion d'eau marine que nous pretendons traiter, ains seulement de l'eau douce, laquelle a esté autrefois fort ceremonieusement pratiquée entre les anciens, tant à cause de la qualité & bonté de l'eau qu'ilz choisissent pour tremper leurs vins, que de la diuerse quantité & proportion d'icelle avec le vin meslé. Les Roys de Perse (si nous voulons croire les histoires) ne goustoient iamais que d'une seule sorte de vin, mais ilz auoient soixante & dix sources d'eau si relligieusement affectée à leur seule boite, qu'il n'estoit loisible à aucun sinon au Roy mesme & à son d'Aulphin d'en boire sur peine de mort.

Herodote toutesfois escrit que le Roy Persan ne beuuoit iamais aultre eau que celle qui se puisoit au fleuve Choaspes, laquelle pour estre fort legere & soüefue au goust luy restoit ordinairement conseruee dans des vaisseaux d'argent, & portée de part & d'autre à sa suite sur des chariots à quatre roues destinez à ce seruice, Si les Persans estoient si ialoux de leurs fontaines royales, l'eau desquelles ilz appelloient dorée, les Ægiptiens n'auoient pas moins leur Nil pour recommandé preferants son eau à toute aultre pour estre plus agreable à boire, legere au passer, facile aux Hypocondres, & plus propre à esteindre la soif. Je ne veux denier au Nil toutes ces proprietéz, puis

qu'entre les Medecins Galien & Auicenne, & entre les Philosophes Aristote, & Senec- queles luy accordent, & luy attribuēt d'a- uantage la vertu de nourrir & engraisser les corps, de rendre les femmes fort fœcondes, & de faciliter leurs enfantelements, d'où vient peut estre que les femmes d'Ægipe ont tant d'enfants, tesmoing celle qui en eust douze en trois portees, & que les Ægiptiens octi- mestres sont vitaux. C'est pourquoy les an- ciens prebstres dediēs au seruice de leur Dieu Apis ne beuuōient iamais de l'eau du Nil, craignants de se trop charger de chair, & d'accabler par la trop pesante nourriture du corps, l'agilité & viuacitē de l'esprit. Au contraire Philadelphie second du nom Roy d'Ægipe ayant mariē sa fille Berenice à Antiochus Roy de Syrie luy faisoit con- uoyer à grands fraiz de l'eau de ce fleue, afin qu'elle n'en beut iamais d'autre. Je ne veux icy rapporter les considerations me- dicales qui mouuoient quelques anciens à faire plus d'estat de l'eau de pluye que de celle de riuere : à priser l'eau de riuere, plus que celle de fontaine, & de choisir l'eau de fontaine plustost que celle des puits ; Je me contenteray de vous aduertir que comme ilz estoient trescōuoiteux de bons vins aus- sy estoient ilz fort superstitieux touchant l'eau d'ont ilz les trempoient, & encores plus bigearres en la diuerse façon d'en vser la prénants tantost chaulde, tantoist froide,

& aultrefois tiede. Ores comme nous scauons que ceste mixtion d'eau avec le vin est fort ancienne, aussi ne scauons nous à quel Autheur la referer tant les historiens sont differents entre eux touchant ce poinct. Il en y a qui tiennent qu'Amphiçtion Roy des Atheniens fut le premier qui trempa son vin ayant appris ceste mixtiõ du Dieu Bacchus. en memoire dequoy se voioit iadis en Athenes vn temple erigé au nom & à l'honneur de Bacchus, droit ou debout, signifiant que comme le vin pur faict souuent chancelier & tomber ceux qui en ont trop beu, ainsy le vin trempé, & bien arrousé d'eau les fait marcher droits, & les maintient tousiours sobres & debouts. Pline rapporte qu'un certain Staphilus filz de Sylenus ou Sithenus fut le premier qui enseigna la maniere de mettre l'eau dans le vin : aultres en attribuent l'inuention à vn nommé Melampus : & finalement il en y a qui tiennent ce mélange de la fortune, & disent qu'il a esté fortuitement communiqué aux hommes ou par Bacchus ou par Iupiter : en ceste maniere. Iadis comme quelques beueurs banque-toient en plaine campagne, suruiuent vne grosse & grande nuee, laquelle fondant en vn deluge de pluye sur eux, les contraignit de se mettre à couuert pour euitier l'orage. Ores apresque la serenité de l'air les eut tous rappelés au lieu de leur festin, ilz trouueret vn hanap dans lequel estoit resté quelque

peu de vin, tout remply de l'eau du ciel, duquel ilz gousterent, & l'ayant trouué fort bon en beurent par apres sans en ressentir nulle offence, comme douleur de teste, ou aultres accidents qui les trauailloit auparavant lors qu'ilz auoient beu. Apres auoir faict vn si sain & sauoureux apprentissage, ils le practiquerent à l'aduenir, & continuerent de là en auant de mettre de l'eau dans leur vin. Mais soit que ce soit de l'auteur de ce meslange, il est certain que quelques anciens ont beu de l'eau dans leur vin, & quelque fois si liberalement qu'ilz semblent pour ce seul esgard auoir esté fort sobres & temperants en l'usage du vin. C'est pourquoy les contes fabuleux de la naissâce du Dieu Bacchus contenoient entre aultres discours, que naissant pour la seconde fois il sortit de la cuisse de Iupiter son pere, tout rouge & enflammé, & à ceste cause fut aussi tost deliuré aux nymphes, deesses des eaux, pour estre bien laué, esleué, & nourry soigneusement, ce lauement denotant l'extinction de la chaleur ardente du vin; Et la nourriture demonstrent son accroissement qui se faict par l'addition de l'eau. Plutarque philosophant plus particulierement sur la quantité d'eau qui doibt estre meslée au vin, rapporte que Iupiter a eue deux nourrices, sçauoir Ide, & Adrastia, Iuno vne nommée, Eubæa, Apollon aussi deux Alethia & Corithalia. Mais que Bacchus en a eu

plusieurs scauoir Phylie, Coronis, Lyde, (oultre les sept Hyades trāsformees par Iupiter en ceste constellatiō qui se remarque au front du Taureau, le leuer de laquelle nous ameine de grandes pluyes) pour aultant qu'il fut nourry, & alaicté de plusieurs nymphes, c'est à dire plusieurs parties d'eau pour le rendre plus sage & mieux dompté.

Aussy les Mythologes voulants représenter le danger qui suruiuent de l'vsage du vin pur, disoient que Bacchus estoit ordinairement accompagné de certains demons malfaisants & frauduleux, nommez Cobales entre lesquels Acrat (c'est à dire vin pur) tenoit le premier lieu. Pour euitter la malice & nuisance duquel les anciens selon le rapport de Plutarque trempoient leur vin excessiuemēt, car ilz obseruoient de boire cinq, ou trois, & iamais quatre (i'uscray de ses termes propres) boire cinq, cest à dire à proportion sesquialtre qui produit la quinte, en mettant trois parties d'eau avec deux de vin, boire trois, c'est à dire le double d'eau avec vn de vin, faisant la mesure du diapason, c'est à dire de l'octaue. Et l'accord de la quarte qui est la plus obscure qui soit, se fait de la proportion sesquiterre en beuuant trois mesures d'eau avec vne de vin. Ceste dernière façon de boire est trop sobre, mais celle d'un à deux produit ce turbulent ton des Acrothoraces, c'est à dire de ceux qui ont

trop beu, & toutesfois qui ne sont du tout yures. Mais le meslâge de deux de vin à trois d'eau est la plus gentile & plus musicale proportion de toutes, faisant gracieusement dormir & oublier tous ses ennuyes. Mais ces diuerfes proportions & mesure d'eau avec le vin ont esté souuent mal obseruees, tant à cause de la nature du vin plus ou moins fort, que pour l'esgard des beueurs qui faisoient les accords à leur goust & non leur goust à ces accords. Car comme il y a meslange de l'homme avec le vin (dit Plutarque) aussy y a il temperance propre de chasque sorte de vin avec l'eau, laquelle les sommeliers des Roys & des Princes sçauoient bien discerner, & à ceste cause en vsoient tantost plus & tantost moins. Alcæus voulant boire ioyeusement commandoit qu'on luy versast deux parties de vin avec vne seule d'eau: voire mesmes Athenee escrit qu'anciennement on appelloit eschanssons de grenouilles ceux qui mesloient vne partie d'eau avec deux de vin, d'autant que selon leur aduis l'eau excedoit par trop en ceste mixtion. Nous lisons qu'au banquet solennel des nopces de Caxamus Macedonien, vn certain Protheas familier, & allié d'Alexandre le grand, beuant à tous les conuiues se leua debout. & apres auoir demandé vn grand verre remply de vin pur, il y fit mettre bien peu d'eau, & le beut ainsi, apres auoir dit que quiconque boiroit bien,

se feroit aussy bien ioyeux. D'avantage ceste affusion & temperature n'a esté practiquee qu'en bien peu de nations, puis que les anciens autheurs nous tesmoignent que quelqu'vns des Grecs, que les Thraces, les Scythes, les Gaulois, Teuthons, Juifs & aultres beuvoient ou tousiours, ou le plus souuent leur vin tout pur. La mesme façon de boire a aussy esté pratiquee par les anciens Arabes puisque les modernes tiennēt que leur tant renomē Medecin Melampulach qui vesquit cent soixante & quatre ans fust le premier qui deffendit aux Leuantins de boire le vin sans eau. Le Poëte Grec Anacreon voulant du vin pur, lequel il beuvoit fort volontiers, demādoit du breuuage Scythique, pour ce que les Scythes ne mesloïēt iamais eau dans leur vin. Quant aux anciens Allemands si l'histoire ne nous trompe, ilz estoient aultāt desireux de boire sans eau, que sont ceux d'aujourd'huy, qui trouuent fort estrange qu'un homme puisse supporter de l'eau dans son estomach qui n'en peut endurer tant soit peu dans son soulier. On dit qu'il y a vne fontaine en l'isle de Tenos qui rend vne eau incompatible avec le vin. Mais ie pense que toutes les eaux de la Germanie sont de semblable nature, puisque les Allemands ne les ont peu allier iamais ny mesler avec leur vin. Mais ie diray bien d'avantage que les nations qui faisoient semblant d'observer soigneusement la mixtion d'eau dans le vin,

le beuvoient souuent tout pur: comme lors qu'il estoit question de carousser en bon escient, & qu'ilz conuenoient ensemble pour faire bonne chere, car en telles assemblees conuiuales, ilz se dispensoient bien souuent de boire de l'eau, ou pour le moins n'en beuvoient ilz gueres: & comme ilz se plaisoient á boire beaucoup pendant les grandes chaleurs, aussi en mesme saison estoient ilz fort affriandis au vin suiuant la doctrine du Poëte Hesiodé, qui enseigne de boire sans eau, vingt iours deuant le leuer de la canicule, & vingt iours apres. Et quant a moy (si i'ose dire cecy en passant) i'estime que la coustume des Italiens vsants de leurs vins forts & genereux, cōme vin Grec, & Maluoisie, pendant les ardeurs estiuales, est tiree ou pour le moins fondee sur ceste façon de boire des anciens, car ie ne la voy appuyee d'aucune raison medicale.

Je ne veux icy faire mention de la mixtion du vin prescrite selon la doctrine des anciens Medecins, laquelle estoit diuersement ordonnee selon la diuersité des saisons, des aages, & des maladies, Car ilz permettoient aux vieillards de boire plus pur, qu'aux ieunes hommes; Ilz conseilloyēt de boire plus trempé en esté qu'en hyuer, & prescriuoient quelquefois du vin tout pur en certaines maladies, comme en cest appetit insatiable de viandes dict faim canine, & aux reliques d'une lōgue Ophthalmie causee d'une obstru-

ction de gros sang restant dans les veines des yeux, quelquefois ilz l'ordonnoient esgallement trempé, c'est à dire meslangé de portions esgalles d'eau & de vin, pour mitiguer les anxietés, empescher les oscitations, & horreurs, qui souuent arriuent. Et finalement presentoiēt à boire beaucoup d'eau & bien peu de vin à ceux qui auoient la teste trop debile, pour les garantir des douleurs d'icelle; mais toutes ces manieres de tremper le vin medicinalement sont hors nostre propos, puisque nous ne traictōs, que de la mixtion receue aux banquetts des hommes sains & pratiquee par les bons biberons. Et bien qu'elle semble estre fort sobre à raison de la grāde quātitē d'eau qu'elle cōtiēt si est ce qu'elle n'est pas suffisante pour prouuer que ceux qui en vsoient ayent estez bien sobres & temperants, & moins pour conuaincre de faulx ou infirmer les tesmoignages de leur excessiue yurongnerie, que nous auons deduit iusques icy. Car la force de leur vin bien que trempē n'estoit si fort rabbatue par l'eau qu'elle ne soit encore suffisante de se releuer, s'eslancer iusqu'à la teste & interesser les actions principales du cerueau.

Je ne veux icy mouuoir vne pierre assez roulee par quelqu'vns qui estimāts que toutes choses creées se laissent avec le temps emporter au bal de decadence agitant aultant curieusement que probablement ceste question assēs cōtrouersée, sçauoir si les vins du

temps iadis estoient plus genereux que ceux que la terre produit aujourd'huy. Mais ie diray en passant, que soit que la terre comme affoiblie & debilitée de tant de portees annuelles, semble se lasser de produire des fruiets aussi vigoureux qu'au temps passé: ou que nous y apportions moins de trauail ou d'industrie, il est certain que les vins des anciens (sinon tous pour le moins de certaines contrées) estoient si furieux qu'à grand'peine les pouuoit on dūpter à force d'eau. Homere celebrāt le vin que le bon Marō prebstre d'Apollon, donna à Vlysses, lequel croissoit ez costes de Thrace (c'est aujourd'huy la Romanie) dit que pour le rendre bon à boire il y failloit mettre vingt parts d'eau, tant il estoit admirable en sa force. Ceste force & vigueur indomptable, se fit encor recognoistre au mesme vin longtemps apres, comme recite Pline, car il rapporte que Mutianus iadis trois fois Consul qui auoit esté des derniers, qui eussent escrit de ceste matiere, disoit auoir veu au mesme pays mettre huit sestiers d'eau, sur vn sestier de vin Maroueen. Il ne faut donc trouuer estrange, si Plutarque dit, que les biberons des premiers siecles s'enyuroient en beuuant leur vin trempé fort l'argemēt, & que le meslange de deux parts d'eau avec vne de vin, les rendoit gaillards hōmes & fort voisins de l'yuresse. Car les vins des anciens, & ceux principalement qui croissoient ez regions chaudes

(lesquelles comme dit Galien produisent ordinairement les vins plus forts & fumeux hormis l'Ægypte) estoient si chauds & vapoureux au prix des nostres, que pour arroser qu'ilz fussent, ilz ne laissoient d'enyurer. Le vin donc de soy auoit assez de force & d'attraiect aupres des anciens pour les attirer & emporter, ilz ne manquoient neantmoins d'autres inuentions pour ceux qui ne se laissoient pas gagner par vn si maigre plaisir, ils les esbranloient & forçoient ou par ambition, ou par auarice: en voicy des preuues.

*DES PRIX PROPOSEZ AUX BONS
beuueurs.*

CHAPITRE XLVII



I nous considerons attentiuement les excez ordinaires des anciens touchant le boire, les demesurés carouffes qu'ilz engorgeoient d'vn seul traict, & tout ce que nous auons particulierement rapporté de leur prodigieuse yurongnerie, nous aurons bien de quoy nous esmerueiller, voire aurôs nous peut estre subiect de reuoquer en doubte les veritables discours que nous en auons tenus. Mais si d'autre costé nous remarquons qu'ilz n'ont rien oublié de tout ce

qui peut fométer, entretenir & esleuer ceste peste du corps & de l'esprit, nous serons induicts & contraincts de confesser franchement qu'elle n'a esté si extreme en son extremité, qu'elle ne correspondit proportionnement aux causes qui la produisoient & conseruoient en tel estre. Car oultre ce que la friande & sauoureuse liqueur du vin (le plus delicieux de tous les breuuages destinez à la nourriture du corps humain) est suffisante pour induire les hômes aux desbordements desreglez, l'ambition d'estre reputé bon maistre en ce mestier, & d'y acquerir reputation, avec la récompense proposée bien souuēt aux meilleurs beueurs, comme à des victorieux Athletes, estoient autant d'allechements pour les appaster, & enlacer dans les rets de ceste volupté outrageuse. Les anciens Parthes, les Scythes, les Esclavons, voire la plus grande partie des Grecs estimoient fort honorable de pouuoir boire beaucoup, & de surmōter les aultres en cest exercice: les Romains aussy n'ont esté aultrefois moins prodigues à conferer ce vain honneur à leurs biberons, puis que le graue Senecque les taxe de ceste gloire populaire, laquelle ilz recherchoient avec auliant d'ambition que d'effort.

Ores comme ceste gloire que l'on attribuoit aux maistres carousseurs, estoit vn esguillon poignant pour esueiller les plus endormys, & les faire aduancer en la

lice, aussy le salaire & recompense qui leur estoit proposé, estoit vn aultre esperon qui les picquoit iusques au vif & les poussoit à la desbandade à toute extrémité. Plin nous fait mention des prix establis de son temps pour les bons beueurs, & dit d'auantage qu'il s'en trouuoit, qui acheptoient les hommes pour les façonner à manger, aultant qu'eux pourroient boire, afin d'emporter le prix de gourmandise & d'yurongnerie.

A la verité nous pouuons bien croire cecy à Plin, puis que nous sçauons de beaucoup d'autheurs dignes de foy, que ses deuâciens estoient fort coustumiers de boire à qui mieux mieux, & d'inuiter les personnes à s'enyurer par des prix & loyers proposez. Nous lisons qu'un Antiochus Roy de Syrie dressa aultrefois vn festin solénel avec promesses de diuers & riches presents aux meilleurs pions, ces presents estoient couronnées d'or, grande quantité de vaisselle d'argent, esclaves, Cheuaux & Chameaux: mais il failloit apres auoir bien beu, que celuy en fin qui vouloit emmener son chameau beust encore vn coup, & puis il le pouoit dire à foy, monter dessus & s'en aller.

Caranus Macedonien, duquel nous auôs fait mention cy deuant, voulant exciter ses conuiues à bien boire, leur mit à chascun vne couppe en main, les asseurant qu'elle demeureroit en propre à celuy qui l'espuiseroit:

roit: alors les conuiues se leuants sur pieds, & se saisissants gayement chascun de sa coupe, se mirent en debuoir d'en venir à bout, il se trouua d'auanture vn petit delicat, entre eux qui se mit à pleurer, voyant que ses forces ne luy permettoient de participer à la recompense de ses compagnons, toutefois Caranus excusant la foiblesse de son corps ne laissa de guerdonner sa bonne volonté du mesme pris que l'effect des autres. Mais si ces presents estoient assés suffisantes & attrayantes amorces, pour couvrir l'hameçon de leur yurongnerie: aussi les façons d'excez qu'ilz establissoiēt quelquefois donnants comme ez ieux de prix le salaire à celuy seul des aspirants qui beuuoit plus que pas vn de ses compagnons, estoit vne nasse plus dangereuse pour les surprendre & arrester du tout en ce vice. Plutarque escrit que Mythridates Roy de Pont (celuy qui fit la guerre aux Romains) entre autres ieux de pris qu'il ordonna, en fit vn de ceux qui boiroient le mieux, & mangeroient d'auantage, auquel il constitua pour guerdon vn talent d'argent, & demeura vainqueur à l'vn & à l'autre. Il est bien vray qu'il ne voulut iouyr de son gain, mais se contentant de l'honneur quitta le profit à celuy qui auoit mieux fait apres luy, qui au iugement d'vn chacun fut vn certain Athlete nommé Calonodrys natif de Cyzic notable ville d'Asie. Mais entre autres combats de bien boire,

ie n'en ay iamais leu vn plus memorable que celuy qu'Alexandre le grand dressa à Passagarde (ou selon aulcûs aux faulxbourgs de Babylone) lequel pour sa singularité, merite bien d'estre rapporté icy. Ce victorieux Monarque retournant de la conquête des Indes orientales comme Prince instruiet és sciences naturelles, & partant affectionné à la Philosophie, voulut honorer les obseques d'un Gymnosophe Indien nommé Calanus qui l'auoit suiuy en son voiage. Pour donc rendre ses funerailles plus sumptueuses & magnifiques, il institua beaucoup de ieux de prix solemnellement entre les siens, comme de chanter, & de lutter, mais il guerdonna sur tous le ieu ou combat de bien boire, ordonnant vn talent pour premier prix à celuy qui le meriteroit pour auoir mieux caroussé que tous les aultres (ce sont fix cents escus François selon la supputation de Budee) & pour secôd prix trois cents escus, & finalement cent escus pour le troisieme. Ores côm il se trouueroit maintenant grande affluence de beueurs tous contendants courageusement, pour meriter & emporter quelcû de ces prix; s'lz estoient pour le iourd'huy proposez: aussy debuons nous croire que pour vn si fructueux salaire, il n'y auoit pas manque de biberons qui se vindrent presenter au combat, desquelz il s'en trouua bon nombre de si courageux, qu'ilz aymerent mieux mourir en cōbattant

valeureusement que faire vne retraicte vefue d'honneur & de recompense, de sorte qu'il resta trente cinq de ces champions Bacchiques, qui suffoquez de la quantité du vin rendirent les abbois sur le champ: & six aultres blessés au vif, les talonnants de bien prez furent aussy tost trouué morts dans leurs tentes. Celuy qui retourna victorieux d'une si chaulde charge, & qui emporta le premier prix, se nommoit Promachus qui ne suruecut sa victoire que de trois iours pour auoir beu quatre congés de vin, qui selon la supputation ponderale sont six quartes ou pots mesure de Nancy, ou au moins dix pintes, chopine & trois cinquiemes d'icelles.

Voila nos combattants amorcez, voyons de quel calibre sont leurs canons.

*DES VAISSEAVX A BOIRE DES
anciens.*

CHAPITRE XLVIII.



Comme les anciens obseruoient diuerses façons de boire, aussy se seruoient ilz de diuers vaisseaux destinez à cest vsage, les vns appropriiez aux malades, les aultres à vne sobre & iournaliere façon de boire, & quelqu'vns voües expressement aux grands carouffes & desbauches Bacchi-

ques. Apollonius & Dexippus anciens Medecins, fortis de l'eschole d'Hippocrate, fa-
çonnoient douze petites coupes de cire,
dans lesquelles de fois à aultre, ilz faisoient
boire leurs malades, pour mesurer & reco-
gnoistre la quantité de leur breuuage. Quant
aux gobelets ordinaires, ilz se retrouuoient
de diuerses mesures ne plus ne moins que
nous voions noz verres du iourd'huy n'estre
tous esgalement capables. Mais entre aultres
on en peut principalement obseruer dans
les auteurs de trois sortes: les vns conte-
nants trois onces de vin & vne duelle men-
surale qu'ils appelloient sextantes, à cause
qu'ilz contenoient la sixiesme partie de leur
fester, ils estoient reseruez au seruice des
malades & des hommes plus temperants.
Les aultres capables d'onze cyathes reue-
nants à dixhuiet onces & deux sextules de la
susedite mesure, estoient plus agreables aux
bons beueurs. Martial a cōprins ces deux
sortes de gobelets en ce vers

Poto ego sextantes tu potas Cinna deunces.

La troisieme sorte de coupes ou gobelets,
& la plus ordinaire de toutes, estoit celle qu'ilz
appelloiēt Triēs pour estre la troisieme partie
du fester, laquelle n'estoit pas beaucoup diffe-
rente des verres mediocres de nostre temps,
touchant leur capacité, car elle contenoit
six onces & deux tiers. Le Poëte Propertius
en a faict mention en ce carme.

Cum fueris multis exacta trientibus hora.

Les anciens auoient auffy des gobelets d'autre mesure contenant quelquefois cinq, six, & huit onces ou cyathes, desquelz Martial s'est ressouenu en ce vers.

Quincēces & sex cyathos beſſemque bibamus.

Mais d'autant qu'ilz estoient moins vſitez nous les tairons pour parler du gobelet Laconique nommé Cothon, lequel a esté haut-loué par les anciens, pour son industrieuse façon appropriée principalement à l'vſage des gens de guerre, parce qu'il estoit fait de sorte que la couleur engardoit l'oeil de cognoistre les eaux qu'on est contraint de boire quelquefois en vn camp toutes troubles & ordes, & si d'auanture il y auoit quelque ordure elle s'arrestoit aux bords du verre, & n'en venoit par le goulet que la plus nette partie à la bouche de celuy qui beuuoit. Mais tous ces vaisseaux differents en façon, mesure, & vſage ne ſont de nostre discours, puis qu'ilz ne conuenoient qu'aux beueurs moderés, hormis celuy d'onze onces, nostre discours ne viſe qu'à l'excez, auffy recherche il des verres & mesures excedantes ou en grandeur de mesure, ou en quelque autre curiosité, portant tesmoignage ſuffiſant des delices & deſbordements des anciens yurongnes. C'eſt choſe aſſeuree que les premiers beueurs ſe ſeruoient de cornes de bœuf pour carouſſer, ſoit que pour lors les hommes encores rudes & groſſiers n'eufſent deſcouuert l'artifice de ſe forger & fa-

onner quelque hanap plus commode & mieux seant, ou bien que desirants de boire à grands traits, ilz eussent preferé ces cornes à tous aultres instruments à boire, comme plus amples & capables, ou que les metaux, ou l'inuention de souffler des verres leurs manquassent, ou que ne manquant ny l'un ny l'autre, ilz eussent choisy tels engins pour boire avec plus grande assurance, esperants d'euitier l'yuresse par leur vertu, ou bien se rendre exempts des accidents qui en suruiennent, ou de quelques aultres maladies. Le docte Mercurial admet ceste derniere raison, outre les aultres, & pour la fortifier produit *Ælian* escriuant que les Roys des Indes beuoient ordinairement dans vne corne d'Asne Indien, pour estre preseruez du mal caduc, & asseurez contre tous poisons. Pour mieux authoriser ceste opinion on peut encores mettre en ieu la responce du Roy Indien, rapportee par *Apollonius*, lequel interrogé pourquoy il beuoit dans vn gobelet de corne de Rhinocerot, respondit que c'estoit pour se garantir de l'yuresse. Mais encor que ie n'ignore que les cornes de quelques animaux soient fort recommandees pour leur vertu medicale, & qu'à ceste occasion l'on les torne souuent & façonne en coupes ou gobelets, & principalement celles de Licorne, de Rhinocerot, & d'asnes Indiens, les gobelets desquels selon *Philostate* guerissent incroyable-

ment ceux qui boient dedans de plusieurs maladies estranges; si est ce que les anciens, & premiers beueurs ne semblent auoir tousiours eu ceste consideration, n'admettants à cest vsage pour l'ordinaire gueres d'autres cornes que de bœuf, esquelles ilz n'attribuoient, & ne recognoissoient aucune qualité salutaire. Or qu'ilz ayent employé ces cornes en gobelets ordinaires, ie le prouue par les anciennes peintures de leur Dieu Bacchus, & entre autres par celle qui se voioit anciennement en la ville de Cyzic, laquelle le representoit avec deux cornes en teste, pour signifier que le vin qui pour estre inuention & present de Bacchus est souuent appellé par les Poëtes anciens du nom de son Autheur) n'estoit iamais ou peu souuent beu aux banquets qu'en des cornes. Aussi les anciens Thraces, Paplagon, & Perrhoëbiens (si l'histoire est veritable) beuuoient ordinairement dans des cornes, dans lesquelles aussi beuuoit Philippe Roy de Macedoine, quand il vouloit induire à boire ceux qu'il festoioit.

Senthes Roy de Thrace fit aultrefois vn festin solennel à ses amys, auquel on ne vit autre vaisseau à boire que des cornes. Et comme avec succez de temps, tout ce qui est introduit pour quelque necessaire vsage, s'associe petit à petit de quelque delicieuse nouveauté; ainsi ces cornes comme trop viles & peu correspondantes à la magnificence

des festins, furent par apres bordees d'or & d'argent, pour estre renduës plus riches, & plus agreables à ceux qui y beuvoient, voire mesmes le luxe des anciens croissant de plus en plus, on cōmencea avec le cours du temps à se forger des vaisseaux, ou cors d'argent, à l'imitation de ces cornes de bœuf, dans lesquelles les plus somptueux prenoiët plaisir à carousser; & de fait le peuple Athenien iadis des plus opulents & somptueux de toute la Grece, est remarqué dans les Autheurs pour auoir esté curieux en ses festins de tels vaisseaux d'argent faits en forme & guise d'une corne. Longtemps apres Paulus Æmilius triomphant de Perseus Roy de Macedoine fit veoir à ces concytoyens Romains quelques antiquailles semblables: car il fit marcher en son triomphe des hommes portants des pots à boire fort rares, tant pour leurs grandeurs, que pour la singularité & grosseur de l'entaillure & des ouurages releués en bosse qui estoient en l'entour: & entre aultres, des coupes d'argent, & des tasses & gobelets faicts en forme de cors d'abondance. L'usage de ces cors d'argent & cornes de bœuf façonnés pour boire dure encores aujourd'huy en Allemagne où l'on en peut veoir bon nombre, non seulement ez buffets de plusieurs Princes Ecclesiastiques & temporelz: mais aussi aux tables de beaucoup de particuliers. Ores comme les combats Bacchiques des anciens estoient quel-

quefois aultant prodigieusement que diuer-
sement pratiqués, aussi ne se celebroyent ilz
guerres sans armés conuenables à tel subiect,
& sans grande diuersité de vaisseaux, quelque-
fois d'une grandeur excessiue & demesurée.
Les cornes donc ont bien esté les premieres
admises aux banquetz, mais avec le temps
accompagnees d'une myriade de diuerses
coupes, tasses, gobelets, & aultres hanaps,
desquelz nous ne traicterons icy d'auantage,
tant pour ce que les Autheurs en ont traicté
fort curieusement, que pource qu'ilz ne sem-
blent auoir esté tant destinez à l'yurongne-
rie des biberons, qu'à l'usage & seruice ordi-
naire des plus sobres. Si ne pouuons
nous passer sous silence en cest endroit ces
coupes vastes & extraordinaires qui ont esté
aultant admirees que renommées en c'est an-
cienage, & lesquelles pour leur capacité ex-
cessiue estoient tantost appellees des Puits
comme celle avec laquelle Socrates enyura
toute sa compagnee, hormis Agathon: tan-
tost estoient appellees Elephants, comme celle
d'Iplicelis qui tenoit trois congés, reuenant
à trente ou au moins à vingtsept liures de vin:
& tantost estoient appellees Hercules, cōme
celle qui tenoit deux congés dans laquelle
Alexandre le grand beut sa mort. Au nombre
de celles icy peut estre rapportee la chere
coupe d'or dicté Phialienne, bien aymée
compagne de Philippe pere d'Alexandre, la-
quelle luy estoit tant agreable, qu'il ne se

couchoit iamaïs qu'il ne l'eust posé ſoubs ſon cheuet, comme ſon filz mettoit ordinairement ſoubs le ſien vn poignard, & l'Iliade d'Homere. Cecy nous peut ſeruir de coniecture preignâte, & indice treſcertain pour recognoiſtre la ſoiſ inſatiable de ce Roy & de ſes ſemblables, leſquelz ont eſté aultrefois ſi eſperduement amoureux de leurs gobelets, qu'ils les nommoient bien ſouuent de leurs noms ou pour les rendre plus recômandables, ou bien pour perpetuer leur renommee, laiſſant comme vn acte à toute la poſterité de leur valeur, A leur imitation les Atheniens habitants de l'Iſle Lemniene, apres auoir eſté deliurez de l'oppreſſion Tyrannique de Lyſimachus par le bien fait de Seleucus Roy de Syrie, dreſſerent incontinent des temples à ſon honneur, & quant & quant firent fondre vne coupe extremement grande qu'ilz baptiferent du nom de leur ſaluateur, pour s'en ſeruir aux carouſſes ez feſtins ordinaires. Le grand Alexandre auoit auſſy ſa coupe honoree de ſon nom. Plutarque eſt teſmoing que le Philoſophe Calliſthenes fut diſgratié d'aupres de luy, pource qu'il alloit enuy ſoupper chez luy, & ne pouuoit s'exempter de boire en ſa cōpagnie, car il dit qu'vnefois la grâde coupe qu'on ſurnommoit la coupe d'Alexandre eſtant venue par tour iuſques à luy, il la repouſſa & ne la voulut boire craignant d'encourir quelque maladie, diſant que pour

boire en Alexandre, il ne vouloit auoir affaire d'un *Æsculape*.

La ville de Pruse en Bithinie ne recommande pas tant la memoire de son fondateur Prusias, que la coupe dicte Prusiade luy a donné de renom vray tesmoignage de la vie voluptueuse qu'il menoit. Les anciens Roy de Macedoine, ont aussy esté fort curieux d'auoir des coupes remarquables en grandeur, & de les signaler par l'imposition de leurs propres noms & se les conseruer de pere en filz cōme meubles fort pretieux & exquis; quelqu'vnes d'icelles furent exhibees au Triomphe de Paulus *Æmilius*, lequel entre aultres vaisselles du buffet du Roy Perseus fit porter les coupes magnifiques des anciens Roys de Macedoine, comme celle qu'on nommoit l'Antigonide, & la Seleucide, tirantes leurs appellations des Roys Antigonus & Seleucus.

Mais la curiosité de carousser des anciens a esté si desfreiglee qu'elle ne s'est fait cognoistre seulement en la capacité immense de ces grands hanaps, qu'ilz se forgeoient, mais aussy s'est fait admirer en la delicieuse & artificielle composition de quelqu'vnes de leurs coupes, lesquelles encores qu'elles ne fussent formees que d'Argille estoient neantmoins richement meflangees de plusieurs ingredients aromatiques, tant pour rendre le vin plus delicieux au goust, & au né des beueurs que pour le rēdre moins enyurant.

Je n'entends icy traicter des vaisseaux communs d'Argille simple desquelz les anciens ne se seruoient beaucoup (i'excepte toutesfois les Gaulois) car ilz estoient reputés trop viles & d'eshonneſtes aux banquets, & principalement aux Perſes, entre lesquelz personne ne beuvoit dans des vaisseaux de terre, ſinon ceux que le Roy auoit priué de tout honneur; Je parle ſeulement de ces pots à boire tant precieux aux anciens, non à cauſe de leur baſe, & plus copieuſe matiere qui n'eſtoit que terre, mais à cauſe de leur artiſcielle ſtructure & des corps odorants qui entroient en leur mixtion, Tels eſtoient les vaisseaux d'Argille, lesquelz ſe tournoient & cuiſoient par les potiers Coptiens fort celebres & priſez, pour leur meſlange qui conſiſtoit en myrrhe, Ionc odoré, Saſſran, Baulme, Canelle, & aultres ſemblables. La compoſition deſhanaps Rhodiés n'eſtoit moins delicieuſe, voire meſmes elle auoit d'auantage vne vertu particuliere de retarder l'Yvresse, & eſtimoit on que ſes ingredients auoient bien la force de reſoudre & diſſiper entierement les vapeurs & fumees du vin. Il ne faut donc trouuer eſtrange ſi les bons autheurs nous loient quelquefois les coupes des anciens tantost pour leur agreable odeur, & tantost pour la ſauueur delicieuſe, ou la vertu medicinale qu'elles communiquoient au breuage qu'on y verſoit, car ſi ces qualitez ne ſe peuuent ſans difficultez


reconoistre aux vaisseaux murrhins ou myr-
rhins de Pline, on les peut neantmoins fort à
propos attribuerà ces hanaps d'Argille odorés
desquelz nous venons de faire mention. Je ne
veux pourtant conclure que ce soient des
vaisseaux que le Royaume de Parthe & Ca-
ramanie enuoyoit à la ville de Rome elabou-
rés de ceste matiere condensée sous la ter-
re par la force de la chaleur: matiere fort
pretieuse pour sa splendeur, & varieté de
couleurs, mais beaucoup plus controuersée
entre les doctes de nostre temps pour l'in-
certaine cognoissance qu'ilz en ont, mais
qu'il me soit loisible de dire que ces vaisse-
aux d'Argille si pretieusement composez se
peuuent sans aucune absurdité appeller mur-
rhins, par quelque analogie ou ressemblance
qui se retrouue entre iceulx & les murrhins
de l'oriēt descrits par Pline, ne plus ne moins
que le mesme autheur appelle vaisseaux mur-
rhins ceux qui estoient soufflés de verre,
imitant les couleurs, splendeur, & aultres
perfections des vrays murrhins. Et en ceste
consideration pouuons nous accorder l'o-
pinion des doctes, les vns desquelz estiment
les vaisseaux de Porcellane pouuoir estre
appellés les murrhins des anciē, les aultres
maintiennent probablement qu'ilz estoient
faicts de myrrhe (laquelle ilz croyent estre
nostre benzoïn) tournée & creusée en gobe-
lets ou bien (si i'ose produire ce que i'en pen-
se pour appointer ce differēt) qu'ilz estoient

formés d'Argille claire, lissée, transparente & diuersement coloree comme la vaisselle de Porcellane, au reste bien estoffée & melangée de plusieurs corps aromatiques, & principalement de mirrhe de laquelle ilz semblent auoir tiré leur nom, & d'où vient que les anciens les ont recommandez pour leur bonne odeur & pour l'aggreable saueur qu'ilz communiquoient au vin.

Mais i'ay peur de m'esquarter trop loing de mon subiect il faut retourner à l'Yuresse sans m'enyurer à la recherche curieuse de ces vaisseaux des anciens, & veoir s'il y a point de moyen d'excuser ou couvrir le vice d'yurongnerie, comme vtile à la santé.

*S'IL EST SAIN DE S'ENYVRER
quelquefois.*

CHAPITRE XLIX.

 Eux qui ne peuvent dompter ceste passion effrenée qui leur bourelle & le corps & l'esprit, cherchent des eschapatoires pour faire trouuer leur cause bonne & valable, ou du moins se garantir d'un iuste reproche qui les accompagne. Ils nous veullēt faire croire que c'est pour leur santé ce qu'ilz en font, & qu'il est sain de s'enyurer quelquefois, ils en viennent aux raisons, ils alleguent leurs

auteurs. Entre aultres Auicenne prince de la faction Arabique qui suiuy de son compatriot Rhafis estime chose salutaire de s'enyrurer vne fois ou deux le mois. Quelques Medecins de l'eschole Grecque sèblent auoir esté de mesme opiniõ, comme Mnesithæus, Dioscoride, Paul Aginere, & Oribaze, lesquels permettent quelquefois de s'enyrurer à conditiõ neantmoins, que ceste desbauche ne soit trop souuent reïteree, l'autorité du souuerain Hippocrate doibt estre de tant plus grand poid que les precedentes que plus il excelle sur leurs fauteurs, en la fin du troisieme liure de la diette, il ne permet pas seulement l'yuresse, mais la prescrit comme chose tressaine. Oultre l'appuy des Medecins quelques Philosophes ont presté l'espaule à ce party, & entre aultres ce graue & seure Senecque, & le diuin Platõ selon l'aduis du Philosophe Candiote son disciple, lequel suiuant l'institution qu'il disoit auoir de son maistre, inuitoit la ieunesse à s'enyrurer, la preschant luy mesme & d'exemple & de parolle. Mais laissons les auteurs, escoutons les raisons. Premièrement (disent ilz) ce seroit vne ordonnance trop rigoureuse de bannir les carouffes des banquets, puisque par leur moyen l'esprit est relaxé, l'ame esgayee, le cœur resiouy, le corps esgaillardy, & toute tristesse & fascherie, tout soing & soucy enseuely dans le tombeau de l'oubly.

Que s'il est question d'une douce & gra-

tieuse purge à vn estomach Cacochyme: sil est besoing d'un moyen familier & naturel d'euacuer les superfluitez qui occupent tout son voyfinage, il ne s'en peut trouuer de plus à propos que l'yuresse: il n'y a que ce seul remede redoubtable à l'infirmité, & agreable au malade tout ensemble.

Qu'a l'homme de plus naturelle que le boire? Quel medicament plus delicieux que le bon vin? Quelle espee d'euacuation plus prompte & facile que le vomissement? plus douce & plus profitable à l'estomach & aux parties voisines? Si le diuin Hippocrate a raison de commander que l'on prepare les corps qui sont desobeissants aux vomissements par bonne quantité de viure humectant, auant leur donner l'hellebore de nous seruir du vin qui humecte sur tout aultre aliment, aussy bien pour purgatif, que pour preparatif, puis qu'il peut asseurement faire l'un & lautre? Le mesme Hippocrate nous ordonne de purger par les parties d'enhaut ceux qui n'estât fiebureux sentēt neantmoins vne amertume de bouche, & douleur de cœur, ou vertigine avec perte de leur appetit.

La pratique des anciens tant recômandee par Galien, nous enioint le vomissement incessamment apres le repas vne fois ou deux le mois, pour la conseruatiō de santé; Nous ne pouuons mieux satisfaire à ces belles & bonnes ordonnāces qu'en prouoquant l'homme à boire tant & si souuent qu'il vienne à
rendre

rendre gorge, ce qui toutesfois à grãd peine se peut pratiquer que l'yuresse ne s'en ensuiue. Polybe(si pour mieux dire ce n'a esté Hippocrate) nous donne les mesmes enseignements au liurè qu'il a faict de la diete saine & salubre, & pour vomitif tressalutaire aux corps gresles & imbecilles, il prescrit apres le repas du vin meslangé de trois diuers gousts, sçauoir du doux, de l'austere, & de l'acide. Or la purgation que nous esperons du vin, ne touche pas seulement à l'estomach & aux parties qui luy sont plus proches, elle passe iusqu'aux plus esloignées, non seulement accidentellement, & comme par vne suite, entant que par la violence du vomissement & l'esbranlement des cruditez & humeurs craupissantes aux premieres voyes, le reste du corps est esmeu, & ses humeurs vniuersellement esbranlees: mais aussi en premier ressort, le vin fait ressentir son pouuoir par tout: il coulle vistemment, penetre subtilement, eschauffe puissamment toutes les parties, il ouure & desopile les passages bouschés tant sensibles qu'insensibles, & s'insinuant tout de suite dans les plus petits pores du cuir, fond & dissoult les excrements plus grossiers, tire du profond des venes les sereux, stimule la vertu expultrice, & la contrainct de se descharger par les vrines & sueurs. Vous voyez doncque comme l'yuresse est vn doux & asseuré preparatif & purgatif de ce qui

est estrange en toutes les voyes de nostre corps , & s'accommode plus artistement que l'art mesme à l'inclination de nature, purgeant les premiers par vomissements ou par le ventre : les secôdes par vrines ; les troisiemes par sueurs , ou euaporations insensibles : ie la vous veux représenter pour corroboratif tressingulier de toutes les parties nobles : qu'elle resiouysse le cœur, ie m'en rapporte aux danses & chansons desquelles peu auparauant noz conuiues se sont melodieusement entretenus : qu'elle esueille les esprits & deslie les lîgues plus pesantes & retenûes ie m'en rapporte à ce vers d'Horace.

Fœcundi calices quem non fecere disertum?

Qui n'est trefeloquent apres auoir bien ben.

Bref elle conserue & renforce la vertu naturelle, retenant par vn long sommeil sa chaleur entiere à l'interieur , consequemment elle emplit les venes d'vn sang autant copieux & loüable, que loüable & copieux a esté la matiere dont il est sorty, & forte la puissance qui la produit : les sens interieurs & exterieurs recreus & abbatus de leurs actions ordinaires, cueillét nouvelles forces pendant ce long & agreable repos. Que si d'auanture on oppose que les euacuations susdites & aultres vtilités ruisselâtes de l'Yvresse sont souuent Symptomatiques, ou pour le moins suiues de plusieurs accidens, non moins dangereux que maladioux.

Nous respondrons qu'il n'y a point d'in-

conuenient de se soubmettre quelquefois à vn peu de mal pour receuoir vn plus grand bien, Galien enseigne qu'il est fort difficile trouuer aulcun remede grandement proffitable qui ne soit aucunement nuyfible: bref l'eschole medicale tient pour maxime qu'il est souuent loysible d'exciter vne maladie pour en guarir vne aultre. Ainsy l'ardeur de la fiebure est esteinte par l'ouuerture de la vene, la Sciatique appaisée par le cautere actuel: & le mouuement conuulsif retenu par la précision du nerf. En mesme maniere l'yuresse, encor que de soy elle semble estre quelque legere maladie, elle ne laisse pourtant de conferer au corps beaucoup de santé, elle doibt donc quelquefois estre permise. Vous auez ouïy parler les auteurs qui sont ordinairement allegués pour fauteurs de l'yuresse, ilz vous ont amplement desduit leurs raisons, qui à la verité ont vne belle apparence, mais si peu de poids, que i'estime que les plus doctes & clairuoyants, ne trouueront mauuais que i'entre en contradiction, les yurongnes mesmes en receurent sinon du goust & contentement pour le moins de l'vtilité, si se voyants descheus de cause ilz entrent en eux mesmes, & recognoissants ce traistre qui sous quelque leger ombrage de bien les conduit à leur ruine, ils le condamnent à vn bannissement perpetuel. Quoy qu'on en die les anciens Philosophes & Medecins, &

principalement les Grecs n'ont iamais tant approuuez l'yuressse que la sobriété, n'ont iamais recognu à la suite de l'yuressse tant de bien & de sâté que de mal & de maladies. Auât que de venir à mes preuues i'aduertiray le lecteur que ie ne veux icy disputer côme Philosophe moral, scauoir si l'yuressse est louable ou non, & consequemment si elle doit quelquefois estre permise: car c'est chose asseuree que toute homme ciuile & curieux sectateur de la vertu doit abhorrer ceste affection comme trop deshoneste & bestiale, encor que le nombre d'yurongnes de diuerses nations semble colorer sa laideur & la couvrir du manteau de tolerance, ie veux icy agir comme Medecin & prouuer, que l'yuressse est tousiours nuysible à la santé de l'homme & consequémēt qu'elle ne doit iamais estre recognüe ny aduoüee pour salutaire. L'appollō des Medecins ne s'est contenté de declarer en ses Aphorismes que toutes immoderations estoient contraires à la santé humaine, laquelle consiste en la Symmetrie naturelle des quatre premiers corps, mais a bien dit plus particulièrement, & en termes plus exprés que de s'emplir excessiuelement, de se saouler desreglement, bref de prendre des viandes d'auantage qu'il n'est requis pour la nourriture du corps, c'est chose dangereuse & pernicieuse & du tout contre nature. Car ne plus ne moins qu'une faim, qu'une euacuation, qu'un

deffault de nourriture, est dommageable à la santé, ainsy par la loy des contraires, vne satieté, vne repletion desordonnee est du tout nuyfible. Et non sans cause puis que la santé qui depend d'une certaine temperature de ses premiers principes, consiste aussy en vne proportion & harmonie, laquelle estant vitiee par vne disproportion de nourriture excessiue destruit en fin & ruine son suiect. Les anciens *Ægiptiens* comme escrit *Herodote* pratiquoient curieusement la Medecine naturelle de leur docteur sans doctrine *Ibis*, se clysterifants & purgeâts chascun mois trois iours de suite, estimants que leur santé ne pouuoit estre alteree que par trop de repletion ou nourriture. A la verité les Medecins ont bonne raison de fuyr & blasmer ceste repletion comme mere nourrice de toutes sortes de maladies: mais quand ilz tiennent l'yuresse pour salubre, ilz s'oublient du tout, & se contredisent eux mesmes. Car ie ne puis comprendre que la repletion de l'estomach, des venes, des arteres, du cerueau, bref de tout le corps, puisse estre quelquefois de soy & de sa nature à salut. Je sçay bien que ce soleil de Medecine *Paul Æginete*, & ceste aultre lumiere des Grecs *Oribaze* estiment la repletion du ventre estre beaucoup moins à craindre pour maladie que celle des venes, mais neantmoins ilz condamnent tousiours & l'une & l'autre pour estre toutes deux contraires

à la santé, voire mesmes que de l'une bien souvent s'ensuit l'autre. Car encores que la faculté digestiue de l'estomach puisse surmonter en eschauffant, cuisant, & chylistant ce grand amas de vin, duquel il est tout bouffy, par apres neantmoins les venes s'en remplissent tellement, qu'elles, & tous les membres s'en retrouuent extremement greuez, pultre le danger d'obstruction, extension & ruptio d'icelles. Que si d'auanture ceste vertu concoctrice ne peut maistriser & digerer tout le vin qu'on a beu, il en resultera vne autre affection beaucoup plus perilleuse que la precedente, sçauoir vne crudité d'aliments de laquelle cōme d'une pernicieuse boïette de Pandore, cent mille maladies seront versees & espandues par tout le corps. Car tout ainsy que la cōcoction & des humeurs & des viandes est vtile & necessaire tant pour l'entretien de la santé, que pour la guerison des maladies: aussi l'abondance des cruditez offence totalement les parties où elle croupit & les expose au rauage de toutes sortes d'infirmitéz. D'icelle viennent les douleurs d'estomach, des intestins, du foye, des reins, de la ratelle, & de la poitrine, les intolerables cruantez de la goute, le manquement du goust, & d'appetit, les coliques venteuses & humorales, & quelquefois vn vitieux & bigearre desir de viandes du tout contraires à nostre nature. C'est elle qui rend l'homme lent & paresseux à toutes

aetiōs, qui appesantit la teste, & les sens, l'entendement, le corps entier, qui desrobe le sommeil pour travailler l'homme de veilles continuelles: c'est elle qui engendre les horreurs, rigueurs la siebure: & pour le faire court, c'est la mere de la Cardialgie, de l'Epilepsie, de la folie, des affections ecstati-ques, comateuses, Hypocondriques, & gene-ralement nous la pouuons accuser de tous noz maux. Et encores qu'elle ne produise pas tousiours necessairement qu'elcune de ces infirmittez, si est ce que pour la plus part l'on s'en trouue saisy tost ou tard, il est de bonne paste qui n'en recoit quelque dure atteinte, & qui en fin ne succombe. Ce que considerant aultrefois Auicenne a hardiment prononcé qu'elle estoit la vraye source de toutes les infirmités humaines. Galien passe plus oultre, & nous assure que l'homme ne seroit iamais attaqué de maladie qui prendroit peine d'euitier les crudités, il en a fait l'experience car il se vante que par ce seul moyen, il s'est longtemps conserué en bonne santé. Si donc l'yuresse est la vraye mere de repletion & de cruditez, & si la repletion & la crudité sont comme vrayes pepinieres de toutes maladies, qui est ce qui ne voit claiement que l'yuresse en est de mesmes? Je sçay bien ce que les fauteurs de l'aduerse partie allegueront au contraire il me semble entendre desia leurs instances & repliques.

Nous aduouons (diront ilz) que les yures-

les frequentes & ordinaires engendrent le plus souuent & les repletions & les cruditez, & d'icelles tous les dangereux symptomes susmentionnés, ne plus ne moins qu'un médicament, encor que salubre de soy mesmes cause en fin beaucoup de fascheux accidets quand il est trop souuent repeté, nous reconnoissons l'yurongnerie ordinaire pour estre la mere de tant d'infirmités, lesquelles toutesfois ne peuuent & ne doibuent estre attribuees à vne seule yuresse pratquee raremēt: yuresse (dis-ie) non ja ordonnée pour accroistre la nourriture au corps, mais comme instrument medical pour diminuer & extirper les causes des maladies. Car quelle difference y a il entre la purgation causee par vn vomitif, ou par vne grande quantité de vin? Est il possible que le vomissement cause par l'yuresse soit plus perilleux & moins salubre que celuy qui est excité par vn médicament vomitif? Iugez la nature de l'un & de l'autre: cestuy cy tient le milieu entre nostre nature & celle du venin, c'est pourquoy les anciens ont quelquefois appelle les médicaments purgatifs & les poisons d'un mesme nom: l'autre est vnaliment agreable à noz yeux, plaisant aux narines, saoureux à la bouche, amy du gosier & de l'estomach, en fin le vomissement faict ou par l'un ou par l'autre est vne mesme euacuation en effect, si bien les matieres en sont diuerses & bien differentes: que si l'on accuse l'yuresse d'em-

plir le corps de cruditez : elle s'absoulit fort bien de ceste accusation, puis que par les euacuations copieuses elle repare son dommage, & tire avec le mal qu'elle a fait les causes & amorces des maladies qui s'estoient auparavant campees en noz entrailles : Voila ie croy tout ce qui peut targuer noz aduersaires contre les traicts que nous leurs auons eslançés ; ces targues font bien quelque resistance & semblent aulcunement destorner noz coups, mais en fin nous les presserons de si pres qu'ilz seront contraincts de se rendre à nostre opinion. Premieremēt ilz nous accordent (c'est aussy vne chose si euidentement veritable qu'elle ne se peut nier) que les frequentes yuresses peuuent causer les maladies & symptomes mentionnez cy dessus, qui est vn grand preiugé contre eulx, & qui les doibt induire à cōdamner vne yuresse plus rarement pratquee. Les raisons mesmes qu'ilz admettent contre ce frequent exercice, sont les mesmes qu'ilz militent contre ce qu'ilz soustiennent, puis que & les vns & les aultres sont fondees sur l'excez, sur la repletion, & les cruditez qui consistēt aussy bien en vne yuresse pratquee vne fois que repetee plus souuent. I'adiousteray bien d'auantage concludant sur vn principe puisé d'Hippocrate & de l'experiance, que ceux qui s'enyurent moins souuent sont ceux qui en ressentent plus d'interest & d'incommodité. Car ce que l'on a accoustumé de long-

temps faiſt moins de violence, la nature y eſt toute faiſte, elle ſ'y accommode comme à vne choſe toute familiere, & l'habitude qu'elle en acquiert luy eſt vne ſeconde nature.

A ce qu'ilz obieſtent que l'vtilité ſe doit conioindre avec la douceur; & que c'eſt vn grand bonheur au Medecin & au malade de rencontrer vn medecament plaiſant & profitable tout enſemble tel qu'eſt le vin. Nous aduoüons l'vn & nions l'autre: nous aduoüons le bon heur, nous nyons qu'il ſe retrouve au vin, qui ſouuent eſt faſcheux à vn gouſt deſia aigri par tant de carouſſes, difficile à aualler à vn gozier relasché par ſon humidité trop copieuſe, ennuyeux à receuoir à vn eſtomach gonflé & bandé de ſi grande charge plus preſt à rendre qu'à prendre, preſt à ſe rendre luy meſme ſous ſon faix. Nous admettons (dis-je) avec Aſclepiades que le Medecin doit guarir ſon malade avec la plus grand aſſurance, briefueté & volupté qu'il ſera poſſible, mais nous craignons le mal qui peut arriuer, & le peril qui nous menace, eſtants bien aduertys par le Cicerō des Medecins ce docteur Celſe, que la trop grande haſte de guarir, & la trop grande curioſité de complaire au patient portent touſiours leur danger en crouppe. Certes c'eſt vn vice trop familier à pluſieurs Medecins de ce temps qui ayment mieux ſeruir la delicateſſe & flatter la

mollesse de leurs malades que procurer leur santé. C'est la guerison & non ceste flatteuse ambition de complaire qui fait reluire l'industrie, & admirer l'artifice d'un Medecin. C'est la fin pour laquelle il visite son malade, c'est celle qui luy fait porter le nom & la robbe, c'est à dire en un mot qui le fait estre Medecin. Or supposons que le vomitif soit plaisant & agreable au malade, ou à celuy qui craint de le devenir, qu'elle assurance peut avoir un Medecin de le luy presenter, s'il en voit reüssir journellemēt vne Iliade de plainte, de maux, & de morts. Vous me direz que ces maux sont comme suffoqués en leur naissance par le vomissement suivant? m'assurerez vous avec caution suffisante que tout hōme enyuré vomit? Chascun est il porté egallement & avec mesme facilité à ceste evacuation? Celuy qui vient à vomir par force encourt il pas d'autres accidents plus facheux que ceux qu'ilz veulent guerir? N'aurez vous point peur de la subuersion de son estomach desbauché, craindrez vous point quelque rupture des vaisseaux? Qui a il de plus ordinaire aux vomissemētsviolēts? Aurez vous point esgard au danger qui en survient aux parties pectorales? Qu'il vous souviennē que Galien enseigne que les convulsions tallonnent quelquefois les vomissemēt forceds? Prenez garde que le cerueau se charge, la veuë s'esbloüit & se diminue, les dents se

noircissent & se gâstent, les genciues se corrompent, oultre cent aultres symptomes qui souuent accompagnent les vomissemets. Certes si nous voulons meurement considerer toutes ces difficultez, nous aurons subiet de conclure avec assurance que le vomissement qu'ilz procurent par l'yuressse, traine apres soy plus d'incommoditez, qu'il n'apporte de commodité. Mais ie suis content de leur accorder que le vin ou l'yuressse excite tousiours vn vomissement, voire vn vomissement non violent ou forcé, mais facile & tolerable: vn vomissement non pernicieux ou maladeux, mais salubre & salutaire, vuidant doucement les cruditez qui croupissent en l'estomach, ie ne puis aduoüer pourtant que l'yuressse mesme ne soit vn plus grand mal, que n'est grand le bien qu'elle nous peut apporter. S'il se pouuoit faire que quelcun fust excité à vomir par vne si petite quantité de vin qu'elle ne luy peust imprimer aucun caractere d'yuressse, il n'y auroit pas grandes difficultez à nous appointer. Galien mesme n'improue pas les vomissements causez par le vin pris en petite quantité, mais que i'employe l'yuressse, à cest effect, Dieu m'en garde. Voulez vous veoir que l'yuressse est vn mal plus perilleux & dommageable que celuy dont elle nous preserue? Considerez la partie qu'elle attaque, les actions qu'elle blesse, & son essence mesme. La partie lasee est le cerueau principe

du sens & du mouuement, siege de la raison, partie la plus noble des parties nobles. Les actions offencees sont celles qui emanent & deriuent des facultez des sens interieurs & exterieurs, de la vertu motrice, de la raison mesme. L'essence de l'yuresse est si puissante que si elle n'abolit & ruine entierement toutes les fonctions des parties qu'elle assault, du moins elle les peruertit & depraue si outrageusement que l'on peut iustement appeller celuy qui est yure, homme insensible, immobile, & sans raison: car le sens qui luy reste, c'est pour le trôper: le mouuement qu'il a est pour redoubler sa cheute: sa raison n'est que pour quereller, & contrarier à la raison. On dit que le Roy Lyfimachus se trouuant dans le pays des Geres contrainct & forcè de la soif à se rendre prisonnier luy & son armee entre les mains de son ennemy pour auoir à boire, si tost qu'il eut beu son saoul d'eau fresche, & satisfaiet à l'importunité de sa soif, ressentant vn plus grand mal que ce contentement luy auoit procuré par la perte de sa liberté, que n'estoit celuy qu'il enduroit auparauant, s'escria à haulte voix, ô Dieux combien de fœlicité i'ay perdu pour vn si court plaisir! Celuy qui s'enyure peut dire avec autant de raison que Lyfimachus, mon Dieu combien de santé ay-je perdu, & en combien de grandes maladies me suis-je precipité, pour vne si maigre volupté.

L'Historien naturel representant les diuerſes afflictions desquelles estoient assaillis les yurôgnes de son temps, en rapporte plusieurs, qui sont aussy bien suscitees par vne seule yuressse que par vne yurongnerie ordinaire. On voit (dit-il) les hommes yures tantost passés, tantost difformes, avec leurs ioües pendantes, le visage mal faict, les vns ont les yeux rouges, enflés, & souuent pleurants, les aultres tremblent si fort qu'ilz ne sçauroient tenir vn verre plein: tous songét des choses horribles & espouuentables (qui leur est comme vn commencement d'enfer) ilz ne dorment iamais souëfueiment la nuit, & le lendemain ilz puent le vin, & ne se souuiennent de chose quelcôque. De l'yuressse viennent les paillardises & pollutions infames & malheureuses. C'est elle qui engourdit les nerfs, debilité les pieds & les mains, relasche & noüe les ioinctures. Les Poëtes amoureux qui traitent quelquefois de la beauté du corps, nous ont bien voulu aduertir que la ieunesse & la grace se perdent & corrompent par la trop grande abondance de vin. Ainsi aultrefois la chanté le douce-reux Tibulle.

Vino forma perit, vino corrumpitur ætas.

Le vin perd nostre teint, le vin corrompt nostre aage.

Mais le diuin Hippocrate le plus clairvoyant de tous le Medecins discourant aussy de telles affections comme Medecin nous

enseigne de beaucoup plus griez accidents
prouenir de l'yuresse, desquelz nous auons
desia fait mention pour la plus part, sça-
uoir est tantost vne douleur de teste si ru-
de & si grande qu'elle saisit incontinent la
voix & abbat les forces, quelquefois vne
soubdaine priuation de la parolle avec fieb-
ure, autrefois des vomissements bilieux avec
frenesies & veilles continuelles. Il y adioust
des tréblements, Apoplexie, resueries, furies,
& conuulsions, en fin vn froid greuant tout
le corps & suffoquant tellement la chaleur
naturelle que la mort s'en ensuit. Ce n'est
donc sans subiect que le Philosophe Ana-
charsis disoit aultrefois que la vigne pro-
duisoit trois grappes, la premiere de plaisir,
la seconde d'yurongnerie, & la troisieme de
pleurs & tristesse. Si donc l'yuresse de soy
mesmes est vne maladie ou symptome beau-
coup plus grand que toutes les vtilités que
l'on puisse esperer ny du trop boire ny du
vomissement suiuant, pourquoy l'embrasse-
rons nous comme amye de nostre nature?
Pourquoy la conseillerons nous pour reme-
de salulaire de noz maulx? Sera ce qu'il est
loysible de guarir vne maladie par vne aut-
re? A la verité la Chirurgie extirpe bien
souuent beaucoup de grandes infirmités par
des moindres, de grandes blessures par des
legeres, elle dilate les playes, ouure les apo-
stemes, applique le fer & le feu aux maladi-
es contumaces qui se rebutent contre les re-

medes plus doux : mais ie n'ay iamais appris en Medecine qu'il faille dompter vne petite cōuulsiō par le frein d'vne grāde fiebure, que pour appaiser vne legere douleur, il en faille exciter vne plus griesue, bref que pour corrōpre vn petit mal, il en faille engendrer vn plus grand, ny consequemment que pour esteindre quelque petit feu vollage, il faille exciter vn deluge d'intēperance & de gourmandise. Platon voulant ramener les yurongnes au chemin de sobrieté leurs conseilloit de se mirer apres auoir bien beu, estimant bien par ce moyen leur imprimer vne hayne de leurs ridicules deportements, & brutale contenance. Mais c'eust esté à mon aduis vn remede beaucoup plus efficace pour leur faire abhorrer le vin & l'yurongnerie, de leur faire veoir la bestialité d'vn homme yure, car de toutes les affections qui condamnent absolument ce vice, il n'en y a point de plus grands poids ny qui merite mieux d'estre consideree que le deffault de raison & priuation de iugement qui accōpagne l'yuresse.

Perpetuò ebrium esse quam voluptatem affert

Dum prudentia vinus te ipsam priues,

Quod summā nature nostre bonum contigit?

L'homme n'a point de bien, qui tous les iours s'enyure,

Viure sans iugement à l'homme n'est pas viure,

L'yuresse oste l'esprit, qui vit yure, ne vit, Il meurt car c'est mourir de viure sans esprit.

L'excellence

L'excellence & perfection de l'homme ne consiste point en la masse de son corps caduque & perissable, mais en la beauté & dignité de son ame immortelle, l'ornement & enrichissement de l'ame ne se demonstre pas ez fonctions vegetatives & sensitives communes aux brutes aussy bien qu'aux hommes, mais en la noblesse de la raison. C'est la raison qui esleue l'homme par dessus les bestes, c'est la raison qui l'apparie à l'excellence des anges, c'est la raison qui fait reluire en luy le diuin caractere de son origine. Que si nous venons à l'obscurcir par les fumees du vin, ou à l'effacer par l'esponge d'une brutale yvresse, nous nous precipitons incontinent de ce hault degre de perfection dans le profond abyssme d'une bestialité, & nous despoüillons de la noblesse qui nous est commune avec les esprits angeliques, pour nous reuestir de la semblance des brutes, voire nous nous rendons beaucoup inferieurs aux brutes mesmes, qui par leur sensualité naturellement brutale n'abandonnent de si loing leur nature, qu'elles ne se rangent & retiennent sous ses loix communes à toute une espece, & retiennent quand & quand & le nom & les actions propres à leurs especes; au contraire les hommes par l'yvresse perdent les fonctions d'hommes, indignes de porter le nom d'hommes. On dit que le sommeil est l'image de la mort corporelle,

d'autant que le corps dormant semble ne produire aucune action : mais nous pouvons avec plus de subiect dire que l'yuresse est l'image de la mort de l'ame, puis qu'elle assoupit, endort, & estouffe ce qui nous faict iuger de sa vie. Quelcuns s'esmerueillent voyants les peuples Septentrionnaux tant portés à l'yurongnerie, si peu curieux de se conseruer en temps de pestilence: quant à moy ie m'estonne d'auantage de ceux qui rendent tant de soing pour se garantir d'une maladie si infecte, s'abandonnēt neantmoins à l'yurongnerie, infection plus pestilente. La peste comme beaucoup d'autres maladies corporelles offence seulement le corps sans attaquer l'excellence de l'ame; l'yuresse beaucoup plus dangereuse, bourrele le corps & captiue l'ame dans les ceps d'une bestialité.

Les autres maladies ne tuēt que le corps sur lequel seul elles estendent leur pouuoir; l'yuresse plus cruelle exerçant sa tyrannie sur l'ame & le corps est tousiours la peste de l'un & bien souuent la mort de l'autre. Mais ie me porte pl^r auant que ie ne m'estoy proposé reprenons vn peu noz airs & rentrons en nostre Medecine si nostre intention est de faire veoir le danger que l'yuresse porte tousiours en croupe & tout de suite retirer ceux qui se veautrent imprudemment dans ce borbier infame, nous pouuons autant profiter par les exemples puisez de nostre Medecine, que par les discours des miculx di-

sants Theologiens, aussy bien s'en trouue il assez qui ont plus de soing de conseruer leur vie corporelle que celle de leurs ames. Mettons les sur leur garde en leur representant la mort tragique des autres.

Nous auons desia cy deuant touché vn mot des trente cinq champions qui moururent soudainement au combat Bacchique dressé à Passagarde par Alexandre le grand. S'il nous est loisible nous attribuerons plustost la mort d'Alexandre mesme à l'yurelle qu'au poison que quelcuns estiment luy auoir esté donné. Plutarque, Athenec, Diodore de Sicile, & aultres escriuent que ce Roy puissant & valeureux au reste, mais esclau de son yurongnerie, estant inuité en vn festin solemnel par vn de ses Capitaines nommé Medius, se mit à carousser comme les aultres apres auoir desia bien beu ailleurs, & qu'en fin apres auoir vuidé vn grand hanap capable de deux conges surnommé la coupe d'Hercules, pour faire raison à son mignon Proteas qui auoit beu à luy. Il ne peut supporter cest effort, ains laissant tomber la coupe avec grands cris & gemissements, se coucha sur sont cheuet & mourut bien tost apres. Plutarque rapporte que de son temps vn puissant lutteur nommé Rigulus vint vn iour de bon matin à l'Empereur Titus qui l'auoit enuoyé querir pour se lauer & estauer quant & luy, & qu'apres s'estre lauë, il beut vn tel coup que l'Apo-

plexie le surprit de maniere qu'il en tomba mort sur la place. De mesme genre de mort perirent Ephestion mignon d'Alexandre le grâd, Eumenes nepueu de Philiterus Roy de Pergame, Le Philosophe Archesilaüs qui en l'aage de soixante & quinze ans se fit mourir par trop boire, & le Philosophe Stilpon qui aggraué de vielleſſe hasta la fin. en eſcien-
 ent par vne grande quantité de vin pur. Arcadion auſſy mourut ſoubdainemēt en aual-
 lant vn grand carouſſe cōme teſmoigne ſon Epitaphe qui ſe peut tranſlater en ceſte ſorte.

Les freres Charmyl & Dorcon

Filz de l'yurongne Arcadion

Ont drefſez ce tombeau, en regretant la perte

De leur pere, qui engorgeant,

Vn grand hanap de vin puiſſant

*Mourut en bon pion tenant la bouche ou-
 uerte.*

Puis donc que l'yureſſe eſt l'occident de la ſanté, & l'orient de toutes maladies: la mort de la raiſon, & la naiſſance de toute brutalité, bref la peſte du corps & touſiours le poiſon de l'ame: concluons avec les Phi-
 loſophes qu'il n'eſt beau ny honneſte, & avec les Medecins qu'il n'eſt bon ny ſain de ſ'en-
 yurer. Je diſ avec les Medecins, d'aul-
 tant que tous, ou la pluſpart d'iceulx ſouſcri-
 uent à ceſt aduiſ, voire meſmes ceux que l'aduerſe partie nous a mis en teſte. Car Hip-
 pocrate, Mneſithæus, Paul Æginete, Oribale,
 Dioſcoride, condānent abſolument l'yureſſe.

Que si aux mesmes lieux, où ilz la desconseillent, ilz semblent quelquefois pemetre de carousser liberalement, ilz conditionnent neantmoins ceste permission avec vne modestie ou mediocrité, laquelle tandis qu'elle accompagnera cest exercice, empeschera l'yuresse. Ilz n'ordonnent pas donc l'exces de boire puis qu'ilz en prescriuent la mediocrité, ou aultrement ilz conseilleroient deux aduis du tout contraires ensemble, ce que nous ne pouuons ny debuons croire. Or puis que l'yuresse se peut dire absolument vn mal qui en entraîne vn millier d'autres apres soy trouuons y vn preseruatif.

COMMENT IL SE FAULT PRESERUER de l'yuresse.

CHAPITRE L.



E n'est pas assez d'auoir enseigné que l'yuresse est nuisible & pernicieuse à la santé si nous ne donnons les moyens de la repousser lorsqu'elle s'est emparée de noz corps, & ce qui plus est à desirer, les remedes pour luy empeschier l'entree, & luy destourner ses coups lors qu'elle est presté de les descharger sur noz testes. En vain le Chirurgien descouuriroit la playe si ce n'estoit pour y appliquer son appareil:

& pour neant le Medecin nous descriroie les effects & proprietés des corps venimeux, s'il ne nous prescriuoit quand & quand leur contrepoison, & comme il faut se donner de garde de leur attainte. La deesse Circé n'aduifa pas seulement le prudent Vlysses de l'hazard qu'il couroit vogant à l'enuiron de l'Isle des Syrenes, mais aussy de l'adresse qu'il deuoit tenir pour eschapper les embusches qu'elles dressoyent aux Nochers qui laschement ou imprudemment se laissoient endormir au son de leurs voix charmeresses, luy enioignant de tenir les oreilles de ses compagnons bouschees avec de la cire, & de se faire luy mesmes estroictement lier à l'arbre de son vaisseau. L'yuresse est vne voix de Syrene qui de sa doulceur charme noz sens, c'est vn amiable poison qui sous couleur d'amy gaigne le cerueau, & se saisit de ses puissances plus nobles pour leur raur le gouuernement. C'est vn dangereux escueil couuert de quelque apparence de salut & d'assurance, contre lequel grand nombre de vaisseaux s'ahurtent & font bris, s'ilz ne sont guidés par Nochers experts qui n'ayēt seulement les oreilles fermées aux discours attrayants des yurongnes, mais aussy les yeulx à leurs exemples, & à la splendeur & magnificence des banquets; la bouche & les narines bien serrees à l'odeur & saueur du vin, s'ilz ne sont fermement attachez eux mesmes à leur timon & gouuernail, qui est

la raison. Ne regarde point le vin (dict le sage) quand il iaunit, quand sa couleur re-
luit au verre, car il entre doucement, mais
en fin il mordra comme le serpent, & res-
pandra le venin comme le Basilique. Ainsi
le Thyrsé ou iauelot des bacchantes estoit
bien couuert de la beauté & verdure du
lierre mais soubz iceluy estoit caché vn fer
dangereux de la blessure duquel furent tués
Penthee, Orphee, & plusieurs aultres. On
dict que le serpent sentant le charme &
sifflet se bousche vne oreille du bout de sa
queue, & ioint l'autre contre terre pour
n'entēdre la voix du charmeur qui le guette.
L'homme amateur de sobrieté fermera tou-
iours l'oreille aux persuasions trompeuses
des beueurs, fuyra leur conseil, iamais ne
prendra du vin plus que de raison pour faire
raison à leurs carousses sans raison. Le plus
asseuré est, suyuant l'aduis du sage, de se
retrancher de leurs compagnees, & quitter
du tout les assemblees conuiuales. C'est
chose difficile qu'avec vn bon l'on ne s'a-
mende, avec vn meschant l'on n'empire &
se peruertisse: vn boiteux, dict Plutarque
apprend son compagnon à clocher comme
luy, aussy faict vn yurongne à yurongner.
Philippe Roy de Macedoine addonné au
luxé oultre mesure, à l'yurongnerie, & à
toutes sortes de desbauches se plaisoit du
tout avec ses semblables, c'estoyent les
mieux venus, les plus estimés, les plus pres

de sa personne. Sil s'y rencontroit entre
autres quelcun plus ciuise & plus re-
tenu en ses actions, il le faisoit glisser petit
à petit & comme insensiblement au mesme
labyrinthe de gourmandise & deshonesteté
que les autres. La Peste disent les Medecins
se peut euitier au moyen de trois ad-
uerbes.

Mox, longè, tardè, cede, recede, redi.

Tire toy vite à l'esquart,

Va loing, & retourne tard.

Il fault quitter de bonne heure le lieu
infecté, s'en retirer bien loing, n'y retourner
que fort tard. Craignez vous que l'yuressse
autant pestilente que la peste n'infecte voz
corps & voz ames (car elle n'espargne ny
l'un ny l'autre) bânissez promptement les
yurongnes avec leurs carouffes des lieux où
vous aurez pouuoir, iamaïs ne leurs ouurez
la porte pour y rentrer, ne leur permettes
pas d'en approcher seulement. Mais de Phi-
losophe naturel ie le deuieus moral; c'est
l'affinité de ces deux philosophies qui m'y
porte, & la necessité qui m'y retient. Quelle
necessité dira quelcun là où il y a de l'im-
possible? voz preceptes sont beaux & bons,
mais trouuez qui les suyue: si vous l'entre-
prenez vous serez plus inciuile que ceux
que vous accusez d'inciuilité, l'on vous tien-
dra pour barbare, ou estrange, ou peu so-
ciable. Les Philosophes mesmes n'approu-
ueront point vostre humeur. Aule Gelle

apres le diuin Platon tient qu'il n'est pas
toufiours befoing de se forclorre des assem-
blees de table pour se tenir au couuert con-
tre la violence de l'yureffe. C'est vn tesmoi-
gnage de peu de courage de torner dos à
l'ennemy, vne ame genereufe est toufiours
ambitieufe de l'honneur d'un glorieux com-
bat, vn bon soldat se faict au beau milieu
d'une armee, & se parfaict entre l'efpoir &
l'effroy des exploits guerriers. Vn homme
sobre & temperant se formera entre deux
treteaux assiegé d'hanaps & de carouffeurs,
en refiftant au vin, aux delices, & aux
gourmands.

Il n'est donc hors propos de se rendre
quelquefois leur compaignon, & assister à
leurs beuuettes, non ja pour façonner noz
deportements sur les leurs, mais bien pour
combattre & r'abbattre courageusement les
plaisirs brutaux de l'yurongnerie. Il s'en faut
rédre asseuré & victorieux, non par la fuite
ains par vne refiftence & fermeté virile &
inflexible. Au milieu des perilz la prudence
reluit, & la vraye vertule couronnes pour-
fuit à trauers mille morts, scachant que la
victoire qui n'apporte d'ager n'apporte point
de gloire. La premiere loüange de la vertu
se trouue en l'action; surmontant le vice par
vne mediocrité nous acquererons plus ver-
tueusement, & conseruerons plus asseure-
ment la vertu contraire. La chasteté de
Lucrece eust esté incognüe à la posterité, si

elle n'enst esté assaillie. Qui a il de plus difficile, si ce n'est à vn reclus, que de mener vne vie solitaire, & manger son pain (comme on dict) dans vn sac? la bien seance y est negligee, la societé humaine offensée, & les affaires priuees & publiques y ont de l'interest. Et voulions ou non bien souuent vne rencontre nous porte fortuitement en compagnee, ou vne necessité absoluë ne nous permet de nous en excuser. C'est alors qu'il est besoing d'en venir à la pratique, & faire paroistre le commandement qui nous est acquis sur nous mesmes: comme par long & frequent vsage nous auons asseruys tous noz sens à la raison, comme nostre raison ne se laisse aller ny aux sens, ny aux vaines & folles persuasions. Mais c'est icy où git le nœud de la difficulté, car il est bien difficile en telles assemblees de se maintenir en vne mediocrité & accoustumee sobrieté sans se rendre ennuyeux & peu compagnable à toute la compagnee. La partie (disent les Philosophes) est difforme qui ne se conforme à son tout, il fault quelquefois se forcer pour estre veu ciuil & se rendre agreable à vne assemblee.

L'on rit avec les rieurs, l'on pleurt avec les pleureurs, l'on hurle avec les loups: qui s'empeschera de boire s'il se trouue parmi les beueurs? tant de consideratiōs qu'il vous plaira, vous ne pouuez vous en desdire, il faut de necessité que vous hantiez com-

pagnie: & puis que vous ne la pouuez hanter que vous ne courriez mesme fortune de trop boire comme les aultres, essayez pour le moins s'il est possible de vous garantir de l'yuesse. Icy moralité à part, vous y perdrez voz escrimes, Messieurs les Philosophes, vous ne scauriez beaucoup boire sans vous en ressentir. Tous voz ergo cōclurōt bien à la sobriété, mais voz testes se sentiront des coups de gobelets si vous n'avez recours à noz escholes.

Ne les desdaignez pas nous vous armerōs de pied en cap, auant que vous mener au combat, nous fermerons toutes les aduenēs à cest ennemy que vous apprehendez, nous vous mettrons premierement en deffence, & vous munirons de bons remparts à l'espreuue des canons renforcez auant qu'on vous liure l'assault: noz munitions vous feront totalement aduantageuses, quand à celles de gueule, vous naurez ny viande ny breuuage qui ne fasse teste à l'ennemy: sur tout le vin n'aura ny poussee ny fumees: s'il en a nous luy attremperons, & luy rabbatrons tellement qu'il ne pourra les releuer. Que si neantmoins vous succombiez à ses attaintes par quelque default de nature ou par mesgard, nous vous en retirerōs bagues sauues. Voila le suiect qui nous reste à desduire, continuez la patience d'vne briefue lecture, soubs l'esperance que ie vous donne d'vn si grand fruct. Commençons par

la deffensive, puis que c'est le premier poinct que nous nous sommes proposez & le premier où nous devons buter.

DES REMEDES PRESERVATIFS.

*contre le vin & l'yuresse. Et premiere-
ment d'aucuns vains ou dange-
reux qui nous sont enseigner
des anciens.*

CHAPITRE LI.

LEs auteurs traictants des Antido-
tes de l'yuresse nous en rapportent
de deux sortes : les vns qui estei-
gnent du tout en nous le goust du
vin, & le plaisir ou desir d'en boire : les
autres qui repriment & resfreignent seule-
ment sa vertu, & rabbatent ses vapeurs en-
yurantes. Les premiers se nomment impro-
prement preservatifs, puis qu'ilz ne com-
battent tant l'yuresse, que nostre goust, &
sont plustost le poison du vin, que l'anti-
dot de son venin. En voicy des exemples.
Pline escrit que pour faire hayr le vin
aux yurongnes, il leur faut faire prendre
trois iours durant des œufs de cheneche,
ou choüette dedans du vin. Et en vn autre
lieu il tient que pour faire perdre le goust
du vin à vne personne, il luy fault bailler du
vin où l'on aura estouffé, vn surmulet ou vn

pagel ou rouget (ce sont poissons marins)
ou bien deux anguilles, & dit d'auantage que
le vin où on aura fait resoudre ou putrefier
vne grappe de mer produira le mesme effect.
Democrite attribue la mesme vertu au suc
ou à l'eau distillante des ceps de vigne re-
centement taillez. Quelques modernes trai-
tants de ce subiect assurent que le vin
dans lequel deux serpents, ou vne grenouille
verte auront esté suffoquez sera indubitable-
ment suffisante pour procurer vn degoust
irreconciliable du vin à ceux qui en auront
beu. Le Poëte Ouide apres les naturalistes
tient que l'eau de la fontaine Clitoris fait
perdre pour iamais la volonté de goustier vin
& rend l'homme perpetuel beueur d'eau.

Clitorio quicunque sitim de fonte leuaret

Vina fugit gaudetque meris abstemius undis:

Qui abbrenne sa soif es sources de Clitore,
Ne goust plus que l'eau, & le vin il abhorre.

On en produit encor d'autres semblables
comme les œufs de choüette desquelz nous
auons fait mention cy deuant, mais preparés
& presëtez en aultre maniere, l'on les faict m-
ger bouillis à vn enfant deuant qu'il ait iamais
beu vin, & tient on que par apres il n'en
voudra iamais goustier. Vn homme qui boi-
roit à ieun trois iours de suite vn demy ver-
re de bon vin, dans lequel on aura bien la-
ué vne tortue, sentiroit le mesme effect.

Mais soit que ce soit de l'efficace de quel-
qu'vns de ces remedes l'experience m'a en-

ſeigné qu'ilz n'ont pas tous telle vertu qu'on leur attribue. l'ay eſprouué que les anguilles & ſerpents eſtoüffés dans le vin (ſeuls remedes que i'auoye lors en main pour l'effect qu'on deſiroit de moy) ny ont aucun pouuoir. Et pour mon eſgard ie conſeilleroie volontiers que les aultres remedes ſuſmentionnez comme inutiles ou pernicioeux ne fuſſent iamais mis à l'eſpreuue, ny receus en vſage. Car s'ilz ne peuuent rien c'eſt en vain qu'on en vſe: s'ilz ont la vertu qu'on leur donne, à peine à mon aduis donneront ilz vne impreſſion ſi viue & ſi permanente ſans offence notable de la ſanté de ceux qui ſe ſoubmettent à ſi folle experience.

Le Capitaine Lucullus ayant pris vn philtre ou breuage amatoire pour eſtre eſueillé à l'amour s'endormit auſſy toſt à la mort. Auſſy les yurongnes voulants faire mourir en eux le deſir du vin, ſe pourroient bien tuer eux meſmes. Le gouſt (comme dit le grand Ariſtote) ſemble eſtre vne eſpece du ſens, du tact, ou toucher, non ſeulement pource qu'il ne peut ſentir les ſauours ſans leur humidité, mais auſſy pource qu'en vn meſme organe ces deux puiffances ſe retrouuent enſemble & perçoient leurs obiects ſans aucun milieu externe, d'auantage comme le tact conſiſte en vne certaine harmonie ou conuenance reſultante de la mixtion des quatreſ premières qualités, ainſy la faculté & puiffance de gouſter eſt fondee

en vne temperature naturelle desdicts premiers principes, laquelle estant vne fois vitiee par quelque cause externe induit vne intemperature contrenature, & consequemment vne maladie au corps. Pour ceste cause les Ictériques ont ordinairement le goust depraué, à cause de l'intemperature du fiel qui abreuve leur palais, & leur langue, & leur fait bien souuent abhorrer les plus saueureuses viandes. Je m'en rapporte aux Medecins qui prennent pour signe infailible de mauuaise disposition principalement de l'orifice superieur de l'estomach quand l'homme se sent abandonné de son appetit, & quand son goust desdaigne la faueur d'un aliment proportionné à sa nature. Aussi seroit ce vne chose trop rigoureuse de pruer l'homme d'une tant singuliere nourriture que le vin, & des fruiets que nous receuons iournellement de son vsage. Lycurge Roy des Edoniens en Thrace fust chastié par Bacchus pour auoir exstirpé toutes les vignes de son Royaume en voulant quant & quant exterminer l'yurongnerie de ses subiects aussi celuy la meriteroit punition qui voudroit totalement supprimer les vtilités salutaires du vin pour crainte de l'yuresse qui peut estre empeschée par aultres moyens. Bannissons donc pour iamais de noz tables ces remedes qui font hayr & fuyr le vin, il vault mieux pratiquer ceux qui compatissent avec luy, & s'alliant à luy par vn gracieux accord.

luy esteignent seulement son feu & refrenent sa vertu enyurante. Les auteurs nous en fournissent en bon nombre, non pourtant tous esgaulx en vertu, à raison dequoy il ne sera que bon d'examiner particulièrement les principaulx d'iceux l'un apres l'autre.

DE L'AMETHISTE ET DV POVL-
mon de mouton rosty.

CHAPITRE LII.



Es Magiciens (selon le rapport de Pline) disent que les Amethystes tant herbe que pierres preseruent de l'yuressse, & que de là est venu leur nom *ἀμειδυσος* qui en Grec signifie gardant d'enyurer: plusieurs modernes traictants des admirables propriétés des pierres precieuses soubscriuent à ceste opinion laquelle a autrefois induit quelques anciens à se faire tourner des vaisseaux de la mesme pierre dans lesquels ilz beuvoient pour se garantir de l'yuressse. Quelques autres la prenoient & se l'attachoient à l'entour du col pour le mesme effect. Mais ie peus dire avec assurance on que nous n'auons la vraye Amethyste des anciens, ou bien que ceux qui luy ont attribué la puissance de resister à l'yuressse se sont abusez &

ses, & serions abusez comme eux si nous les
voulions croire puis que l'experience iour-
naliere nous enseigne le contraire. Plutar-
que semble toucher ceste fausseté en ses Sym-
posiaques introduisant Eraton parlant en
ceste sorte, quand à l'Amethyste tant l'herbe
que la pierre qui en porte le nom, ceux qui
estiment qu'elles ayent l'une & l'autre estez
ainsy nommées pource qu'elles empeschent
l'yuresse, ilz se mescontent: car l'une & l'aut-
re a pris son nom de la couleur qui n'estant
pas viue retire & ressemble à celle du vin passé
& vîs ou qui est fort destrempé d'eau. Si
nous ne recognoissons gueres de vertu à
l'Amethyste pour syncoper l'yuresse encores
en attribuons nous moins à la pierre Dyo-
nissias fort dure, noire & mouchetee de tas-
ches rougeastres laquelle broyee donne goust
au vin selon Pline & neantmoins garde d'en-
yurer. Si ceux qui luy attribuēt ceste propri-
eté se veulent contenir en vne sobriété de
boire tant qu'ilz l'aurent recouuerte, ie croy
veritablement ou qu'ilz ne seront iamais
yures ou que la priuation de ladicte pierre
leur sera plus Amethyste que la possession
d'icelle. Ores comme nous ne voulons dis-
courir icy des chapeaux de fleurs desquelz
se couronnoient les anciens pour se garan-
tir de l'yuresse, aussy ne ferons nous men-
tion de ces vaisseaux d'Amethyste, de corne
de Rhinocerot, de bois de lierre: ny d'aul-
tres semblables, d'autant que nous en auons

desia traicté ailleurs, & que nous n'y reconnoissons rien ou peu de ce que noz ancestres s'en promettoient. Plusieurs apres Plin ne prisent grandement le poulmon de mouton rosty & le mangent auant toutes autres viandes comme vn souuerain preseruatif d'yuresse: s'ilz attribuent ceste vertu à quelque qualité occulte, le remede m'est suspect, s'ilz la rapportent à la preparation & siccité acquise par l'assation, il me semble trop debile. Je ne veux point icy toutesfois condamner les secretes & admirables propriétés des corps naturelz, mais ie veux dire auoir aultrefois remarqué des bons beueurs s'enyrerer aussy bien apres auoir pris des poulmons de mouton bouillis, que s'ilz n'en eussent point mangé pour tout. Que si d'auanture l'on veut que ce secret vaille au moyen de la siccité contractee par la coction desseichante, i'aduoueray bien que toute siccité semble resister à l'humidité des vapeurs qui procreent l'yuresse, mais tout de suite vous verrez la force de ceste raison rabbatüe avec celle de cest Antidot comme inferieure à beaucoup d'autres plus desiccatifs.

DES BECS D'ARONDELLES AVEC
myrrhe.

CHAPITRE LIII



ce remede Pline en adiousté vn aultre qu'il dit estre inuenté par Horus Roy d'Assyrie, lequel s'en seruoit en ceste sorte il aromatisoit son vin d'vne composition faicte de cendre de becs d'Arondelles broyee & incoporee avec myrrhe. Et à la verité plusieurs estiment, & avec grande apparence, que ce remede n'est à reietter. L'eschole de Medecine tient pour assureé que les Arondelles, voire mesmes que les pierres que l'on trouue dans leurs petits sont tant aggreables & salutaires au cerueau qu'elles le peuuent deliurer des accès epileptiques.

Et de là vient que d'icelles les practiciens modernes tirent diuers medicaments contre l'Epilepsie, tant en eau distillee, qu'en forme d'aultres compositions, Et n'est hors de raison d'estimer que le bec participant à la vertu qui naturellement est empreinte au reste du corps, puisse corroborer le cerueau contre les assauls de l'yuresse, oultre ce que sa siccité rendue encor plus intense par la calcination peut beaucoup à rarir & espuiser l'humidité des vapeurs vineuses. Son

pouoir n'est pas peu augmenté par l'association de la myrrhe ; laquelle seule semble suffisante de destorner l'yureffe future pourueu qu'elle soit prise en petite quantité. Il n'y a rien qui aneantisse plus les fumées enyurâtes qu'une chaleur cōuenable à les resoudre & dissiper, & leur humidité ne peut estre cōbattue que par quelque siccité proportionnée, l'absterfion les destruiet, l'adstriction de l'orifice superieur de l'estomach ne leur permet la sortie pour s'essancer contremont, & l'adstriction des venes & arteres ne leur donne l'entree. La myrrhe (si nous croions Galien & son deuâcier Dioscoride) est douée de toutes ses qualités, elle astraint & reserre, elle eschauffe & desseiche au second degré, & deterge modement. A ceste Amethyste est fort affin celuy que Galien nous a rapporté au second liure de la composition des medicaments appropriés aux parties malades, scauoir de fleurs de meurthe, de la rue & de la myrrhe broiee ensemble, sinon que cestuy cy semble estre plus adstringent, & l'autre plus desiccatif.



*DES AMANDES AMERES, ABSYN-
the, & noyaux de pesches.*

CHAPITRE LIIII.



Outes ces qualitez de la myrrhe me reduisēt en memoire celles des amandes ameres qui luy sont fort approchātes, & se peuent mettre en son lieu : les Medecins aussy substituent les amandes ameres au lieu de la myrrhe. elles ont esté fort recommandees par Dioscoride, par Plutarque, & apres luy par beaucoup d'aultres qui tous semblent auoir puisé de luy l'histoire qui sensuit. Entre tous ceux qui estoient familiers de Drusus filz de l'Empereur Tybere, il y auoit vn Medecin qui deffoit tout le monde à boire, & sortoit tousiours victorieux de ses combats Bacchiques, mais estant espié de pres on trouua que deuant boire il prenoit à tous coups cinq amādes ameres, afin qu'il nes'en-yurast point, ce qu'ayant esté obserué, & luy ayant esté deffendu de ce faire, il ne peust depuis tant soit peu durer ny resister. Voila à la verité vn effect memorable, & vne experience signalée des amādes, le mesme auteur en adiousté incontinent la raison. Les amandes (dit-il) ont vne proprieté mordante, absterfiue & essuyant la chair (comme on le

voit en abstergeant les tasches & lentilles du visage) tellement qu'elles raclent par leur amertume les pores & petits pertuis du cuir, & y impriment vne morsure par laquelle elles rabbatēt la vapeur du vin qu'elle ne monte à la teste, & la font euaporer par ces petits trous, ou plustost l'amertume a force de consommer & desseicher l'humidité, si bien qu'elle desseiche le dedans du corps, & ne permet que les venes se remplissent, de la repletion, tension, & commotiō desquelles on dit que l'yuresse procede. Voila les causes que Plutarque rend de la vertu Amethyste des amandes ameres, auxquelles nous en pouuons adiouster deux autres qui sont bien considerables, sçauoir la faculté Anodyne contre la douleur de la teste, & la force de pousser l'vrine copieuse hors du corps, l'vne suffisante pour soulager le cerueau, le fortifiant contre l'yuresse: & l'autre retirant en bas & vuidant hors le vin qui demeurant dans le corps, & donnant en teste, cause ceste passion. Ores comme Galien & ses sectateurs attribuent mesme faculté à l'absynthe, & aux noyaux de pesches, qu'aux amandes ameres les substituans en leur place, aussy pouuons nous accorder à ces deux simples la mesme vertu Alexipharmaque contre l'effort du vin, croyants l'vn par autorité & asseurés de l'autre par experience. Je tiens pour certain que ceux qui mangent beaucoup de noyaux de pes-

ches, se sentent fort soulagés contre la grande quantité de vin qu'ilz boient, & se trouvent beaucoup mieux, que s'ilz n'en auoient point pris pour tout. Et pour l'autre Galien, & Dioscoride enseignent que l'absynthe pris deuant le repas empesche l'yuresse, ce que personne ne voudra nier qui aura reconnu sa qualiré adstringète, & amiere, eschauffante, & detergente, fortifiante & desseichante l'estomach, oultre sa vertu Diuretique par laquelle il pousse l'vrine hors du corps. Venons maintenant au safran qui est rapporté entre les Antidotes d'yuresse par quelqu'vns, & incognu pour tel par beaucoup d'autres.

DU SAFFRAN.

CHAPITRE LV.



Dioscoride tient que ceux qui en auront prins dans du vin doux fait de raisins seichés au soleil ou à la vigne ne seront aucunement infestés de l'yuresse. Pline est de mesme aduis, & autorise son opiniõ par la pratique ordinaire des biberons de son temps. Noz yurongnes (dit il) voulants boire d'autant pour se garder d'enyrurer boient du safran auant qu'entrer en combat de tauerne, & tient on que cela les garde

d'enyurer, vn chapeau de saffran prouoque à dormir, toutesfois il esmeut quelque peu le cerueau. Ces derniers propos de Pline qui semblent desroger aux premiers, ont fait penser à plusieurs & non sans cause, que tant s'en fault que le saffran retardast l'yuresse, qu'au contraire il l'aduanceoit. Aussi le mesme Pline semble s'oublier en asseurant que les chapeaux de saffran mitiguoient les fumees du vin, ne se souuenant qu'un peu auparauant il auoit dit qu'on ne se seruoit du saffran ny en chapeaux ny en bouquets, d'autant que ses fueilles estoient minces & deliees comme filaments. Mais soit que ce soit des chapeaux de saffran & de leur vertu laquelle (comme dit Plutarque aussi bien que Pline) attire doucement à dormir ceux qui ont beu par vne defluxion douce qui engendre vne tranquillité & rabbat la tourmente de l'yurongnerie, encores que quelques l'admettent pour vn remede curatif, si estce que ie ne le peux aduoüer pour preseruatif de l'yuresse. Ie ne veux estre de l'opinion de quelques Medecins anciens qui estimoient le saffran pris avec eau ou poids de trois drachmes estre pernicieux : mais ie diray apres Galien & Pline que la seule odeur du saffran peut remplir le cerueau, causer douleur de teste, & de plus que son vsage peut offencer le cerueau, & troubler la raison. C'est pourquoy Galien en la composition de la hierre, de six trespheaux de saffran

en soustait deux, craignant qu'elle ne soit nuisible à ceux qui ont le cerueau debile. Il ny a donc point d'apparence que le safran soit amethyste, si nous ne voulôs estouffer vne yuresse par la fuscitation d'une aultre, ou de quelque sēblable affection. Mais passons plus auant en ceste disquisition, & representons aussy les aultres antidotes rapportés par diuers autheurs: Dioscoride met encor en auant le vin de meurthe, quelques modernes de l'huile, les anciens la cigüe, & pierre ponce, nous discourerons de tous vn peu pour le contentement du lecteur.

*DU VIN DE MEURTHER ET DE
Pierre, de l'huile, de la cigüe, &
pierre ponce.*

CHAPITRE LVI



E croy que le vin de meurthe peut beaucoup pour ses facultés adstringentes, desiccatiues & refrigerantes, par lesquelles il contreuiend directement à la chaleur, humidité, & vertu penetrâte du vin & consequemment à l'yuresse, mais ie sçay qu'il aura encor plus d'energie apres boire qu'auant boire, & que l'on fera mieux d'en vser pour remede curatif que pour preseruatif. Ses bayes me reduisent en memoire vn Ame-

thylste qui me fait estonner, ie trouue estrange ce qu'aucuns nous veuillent persuader que les bayes de lierre preseruent de l'yuressse, veu que trempées dans le vin elles luy donnent force d'enyrurer, de trauailler & troubler le corps, d'autant qu'elles l'enflamment. Si Dioscoride n'enseigne cela de toutes les especes de lierre pour le moins nous assure il que le suc ou les bayes de lierre noir beuës en suffisante quantité rendent tout le corps infirme, & troublent l'entendement.

Pour l'esgard des lentilles & porreaux l'experience nous les fait rayer du catalogue des Amethistes. Mais ie ne peu taire l'admirable efficace de l'huile d'oliue remarquee par vn signalé Medecin de nostre temps, i'en puis produire moymesme vne experience oculaire. Il me souuient d'auoir veu autrefois vn ieune homme du pays de Liege, residant pour lors à la grande & magnifique ville de Coloigne (vray temple d'Apollon & delieieux Helicon des muses) lequel apres auoir auallé vn plein verre d'huile, beut du long d'vne apres disnee tant de double biere, & continua tant de prodigieux carousses que tous les assistants estoient presque plus enyrurés d'admiration que luy de son boire. Et neantmoins c'estoit vne biere fort vaporeuse, preparee avec de si vapoureux ingredients, qu'elle n'estoit pas moins genereuse pour enyrurer que les petits vins d'Al-

semaigne pour ny en point comprendre d'aultres, & rendre la narration suspecte. L'auoy veu le mesme personnage peu auparavant yure pour beaucoup moindre quantité de la mesme biere, ie puis dire avec verité qu'il en failloit les huitz parts. Rapportons nous c'est effect à l'humidité de l'huile esmoussante toute l'actiuité de la chaleur des vapeurs & du vin, & de la biere? ou bien la legereté & vnctuosité nageante dans l'estomach sur le breuuage, empesche elle l'eleuatiō des vapeurs? où plustost seroit ce point que l'huile coulant subtilement & rendant les voyes par où elle passe lubriques & glissantes, se iette droit aux reins & à la vescie, & ayant ouuert & disposé le passage sert comme de guide & vehicule à ce que l'on a beu sans luy donner temps de nuire au cerueau se vuidant par vn flux d'vrine cōme il fist à ce Liegeois? Certes quoy que c'en soit c'est vn effect admirable & que ie tiens bien certain & ne pense point que ny mon obseruation ny les rapports qu'on faict de semblables experiences m'ayent deceu. La cigüe & la pierre ponce n'en doiuent rien à cest alexitere si nous voulons croire ce que les anciens ont pratiqué & escrit pour veritable. Mais si nous voulons vn peu philosopher sur leurs qualités nous trouuerons que l'vn & l'autre sera esgallement la mort au vin, & poison à l'homme. La cigüe (comme dit Dioscoride) est vn venin, tant par son

excessiue froidure qui aultrefois a donné le dernier supplice & terminé la vie de plusieurs criminels: entre aultres celle du sage Socrates moins criminel neantmoins que ses criminateurs. Le poison l'aconit est refrené par la racine de L'aristoloche longue, la maladie venerienne par le guajac, & la seule pomme de coing aneantit le venin de l'herbe balestriere: ainsi le contrepoison de la cigue c'est le bon vin, & reciproquemēt celui du vin, c'est la mesme cigue. Ores ne plus ne moins qu'un homme piqué du scorpion amortist son venin par un autre venin contraire, comme par l'aconit, lequel a ce naturel qu'il s'employe seulement à rabbatre la force du poison qu'il trouue dans le corps, ainsi la cigue prise par un homme infecté d'yuressse entreprend & attaque seulement le vin n'agissant aucunement contre le corps, tellement que pendant que ces poisons se combattent l'un l'autre le corps demeure quitte & libre de leurs atteintes. La verité de cecy s'est obseruee par experience en la personne de Hirodes Roy des Parthes, auquel son fils Phraates meu de compassion presenta du suc d'aconit ne restant autre moyen d'adoucir ses douleurs que la mort, n'y autre esperance de terminer vne hydropisie deplorece qui le trauailloit. Mais (cas admirable) le poison & la maladie s'entrechocans l'un l'autre, firent vne si heureuse rencontre, que la victoire en demeura

au poison, la ruine à la maladie, le salut au malade. Quant est de la pierre ponce encores que peu d'Autheurs fassent mention de sa pernicieuse qualité, si est ce que plusieurs conuiennent de sa vertu Amethyste. Theophraste dit que ceste pierre est si froide & si contraire au vin, que la mettât dans vn tonneau de vin nouveau elle le gardera de bouillir. Ceste Antipathie obseruée par les biberons de son temps, leur enseigna de prendre de la poudre de pierre ponce deuant qu'entrer en lice, encores qu'il y ait grand danger pour ceux qui en vsēt, s'ilz ne boiuet par apres à toute oultrance pour reprimer la malignité de ceste poudre par vne force plus puissante de son contraire. Mais ja à Dieu ne plaise que nous employons à cest vsage des corps si veneneux & mortels, & que nous voulons mettre es mains de ceux qui nous consent leurs vies, des serpents pour des poissons, nous les reiettons & condamnons du tout, encores que les anciens biberons se soient quelquefois seruys de l'un & de l'autre. En voicy de plus coustumiers à noz tables, plus familiers à noz gousts, moins soupçonnez à noz santés que ie vous presente librement, ne les mesestimez pour estre viande ordinaire, & de peu d'estime. Vn mauuais morceau s'achepte souuent bien cher, & prend on bien de la peine de le recouurer. Ce met que ie vous presente se trouuera par tout, & à bon prix ce sont choux & ressorts.

DES CHOIX ET REFFORTS

CHAPITRE LVII.



Line escrit que la vigne & le reffort sont si grands ennemys que si l'un se trouue aupres de l'autre, il se reculera en arriere. C'est ce que ie ne peux asseurer pour ne l'auoir veu i'en laisse l'experience à qui voudra cōtenter sa curiosité: mais ie scay bien que le reffort soulage merueilleusement les beueurs. Auicenne en fait tant d'estat cōtre le venin des scorpions qu'il asseure ceux qui en auront mangez d'estre guarantis du danger mortel qui suruient de la picqueure d'iceux, & quant à moy ie le tiens aultant efficace contre le vin que contre le venin des scorpions. ie nen veux icy rechercher les causes cachees, ie les laisse comme cachees, j'ayme mieux produire celles qui me sont manifestes & desquelles ie peux rendre raison. Ie tiens que l'acrimoine du reffort tire la viande en bas, que sa vertu diuretique fait vistement sortir le vin par les vrines, que sa chaleur aide l'estomach à le surmonter & digerer, que sa siccité hume & absorbe les vapeurs humides, & sa vertu attenuatiue les dispose à resolutiō & dissipation: c'est pourquoy le reffort est à bon droict en bon-

ne réputation auprès des anciens pour sa vertu Amethyste. Les choux neantmoins ont emporté le prix auprès deux, & sont encores en grand credit auprès des beueurs modernes. Les naturalistes tiennent qu'il y a vne si grande Antipathie entre la vigne & les choux que s'ilz sont plantés l'un auprès de l'autre, ilz ny compatiront iamais, & que si quelcun met du vin où le choux cuit qu'il l'empeschera delà en auant de cuire & luy changera sa couleur.

Ilz disent bien d'auantage (mais le croye qui voudra) que la secrete hayne du choux ne se demonstre seulement contre la vigne, & son fruit, mais aussy contre la relaxation de la luette, à cause seulement qu'elle porte le nom d'vua ou raisin quand elle est estendue & relaxee par vne trop grande distillation, ou bien à cause qu'en ceste indisposition la luette ressemble à vn grain de raisin, qui fait que ce mal cede incontinent si l'on espend sur la teste le suc de choux. Quintus Serenus se sert bien des choux pour suruenir à la luette relaxée, mais c'est en autre façon.

*Aut unam (dit-il) rosti puluis relenabit anethi
Aut cinis en cochlea vel torrida brassica flāmis.*

La vigne dit Theophraste ne peut supporter l'odeur des choux tant elle luy est contraire & desaggreable, voire mesmes le vin produict en vne vigne en laquelle on aura planté force choux en sera beaucoup plus foible & debil.

Toutes ces secretes inimities, toutes ces haynes cachees, Antipathies couuertes firent croire au Medecin Androcides philosopant sur icelles que les choux pouuoient beaucoup à dompter le vin, & refrener l'yuresse, ce que l'effect depuis a tesmoigné veritable.

Les anciens Égyptiens, les Sybarites & beaucoup d'autres peuples addônés à l'yurongnerie se munissoient ordinairement de cest Antidot auant qu'entrer en affaires, les vns prenans les choux boüillis & les aultres se seruans de leur seule semence. Et d'autant que la nation Allemande est sur toutes aultres fort auide de carousser, quelqu'vns pensent & non sans grande probabilité que l'inuention des salades de choux cruds est introduitte aupres d'eux pour le remede qu'ilz en esperent contre le vin.

C'est aussy la coustume en plusieurs contrées d'Italie (si nous voulons croire vndocte escriuain de nostre temps) de prendre ce preservatif cōtre l'yuresse le premier iour d'aoust dedié à Bacchus, auquel il est permis de boire d'autant, & faire bonne chere.

Mais la diuersité des choux met quelqu'vns en peine touchant le choix du plus puissant d'iceulx contre l'yuresse. Il en y a qui pensent que les choux sauvages appelez petrea qui croissent ez costes & plages de la mer doiuent estre de plus grande efficace pour estre plus prisez par l'Ancien Caton, &

pour

pour se monſtrer plus grands ennemys de la vigne que tous les autres, d'autant (ſelon Plin) que ſi la vigne eſt contrainte de demeurer pres de ceſte plante ſans s'en pouoir retirer elle meurt de regret. Mais quãd ie conſidere que Dioſcoride n'attribue ceſte vertu Amethiſte qu'aux choux priués, ie ſuis contraint de les preferer aux ſauuages, & entre les priuez adiuger le premier lieu aux choux rouges, comme demonſtrats par leur couleur la puiffance qu'ilz ont de reſiſter à la rougeur & ferueur du vin. Les anciens Mythologes, voulants rendre compte de ceſte Antipathie des choux & de la vigne, comme ilz ſont raconteurs de fables, en rapportent auſſy vne raiſon toute fabuleuſe, Bacchus (diſent ilz) craignant autrefois la fureur de Lycurge ſe ietta dans la mer; en laquelle il ſe tint quelque temps caché, mais en fin ſortant ſecretement il ſurprit Lycurge, & le lia & garota avec des ſeps de vigne, dequoy Lycurge deſplaiſant, & oultré de regrets plora amèrement, & de ſes larmes ont eſté depuis engédrés les choux, de là eſt venue la hayne & inimitie mortelle entre ces deux plantes. Ariſtote comme grand Philoſophe rend vne raiſon Philoſophique de ce diſcours, & dict qu'il procede d'un ſuc doux & diſcuſſif qui ſe reſtrouue aux choux, par lequel ilz debilitent la force du vin, outre ce que le chou par ſa qualité froide rabat ſa chaleur, & tirant en bas les

humeurs du corps tant au ventre qu'à la vescie
guarantit par ce moyen les parties superieures
de l'effort du vin, & consecutiuelement de
l'yuresse. Mais si nous voulons admettre les
vertus quel'anciē Catō accordoit aux choux,
nous ne trouuerons estrange s'ilz resistent à
l'yuresse puis qu'ilz peuuent guerir tous les
Symptomes d'icelles. Car il le vante contre
la douleur & tremblement de teste, contre
la berlue, caliginosité & estincellements des
yeux, & d'auantage selon son opinion il
garde de resuer faisant dormir la personne
en repos. Que si nous adioustons à toutes
ces vertus la faculté abstersiue & discussiue,
par laquelle il peut mesmes effacer les meur-
trisseures & taches ternies du visage, nous
prouuerons assés que par ceste qualité il est
fort propre à destruire & aneantir les va-
peurs meres de l'yuresse. Ores encores que
les choux & aultres antidotes rapportés cy
deuant soient si puissants à refrener la force
du vin, si est ce toutesfois que nous ne deb-
uons pas estimer qu'ilz surmontent telle-
ment sa vertu qu'ilz puissent tousiours pre-
seruer totalement l'homme de s'enyurer. Car
il pourroit bien tant boire, & du vin si fu-
meux, qu'il n'y auroit Amethyste quel qu'il
soit qui peust empescher du tout vn si vio-
lent effort, encores qu'il retardast l'yuresse
ou bien qu'il la rendist plus legere à ceux
qui se seroient munys d'vn tel deffensif. Le
feu & l'ardeur avec laquelle Bacchus naquist

fut bien estainte par le lauement des Nymphes, mais sa puissance neantmoins luy resta entiere avec sa diuinité. Aussi peut on bien diminuer la vertu enyurante du vin, & retarder son action: mais s'il est pris en quantité desreglée, ie ne pense point qu'on le puisse surmonter du tout. Car comme l'ailun enduit sur la tour de bois d'Archelaüs, Lieutenant du Roy Mithridates la guarentit bien d'estre bruslée par le feu des Romains, non pourtant d'estre fort eschauffée, ainsi les alexiteres d'yuresse cy deuant mentionnés, encores qu'ilz puissent aulcunement garder le vin de surmonter du tout son homme, si est ce qu'ilz ne l'empescheront point de l'alterer, esmouuoir, & eschauffer.

DIETE PRESERVATIVE DE
l'yuresse.

CHAPITRE LVIII.



Ncores que l'Historien naturel semble accuser de flaterie ou d'ignorance le Medecin Asclepiades qui s'acquit tant de reputation par sa nouvelle methode de guarir les maladies avec la seule diete (soit qu'il n'ait eu la cognoissance de la Pharmacie ny de la Chirurgie, soit qu'il ait voulu flatter ses malades par remedes plus

faciles & aisez) si est ce que le bien-disant Cornelius Celsus semble le deffendre comme ayât à bon droit choisy & suiuy vne methode curatiue fort bonne & salutaire. Et à la verité des trois sources desquelles sont deriués tous les instrumēts medicaux, sçauoir de la Pharmacie, Chirurgie & Diete ou regime de viure, il n'en y a point de qui l'on puisse plus de remedes doux & plaisants à nostre nature & du tout necessaires à nostre santé que de ceste derniere. Les operatiōs Chirurgicales sont bien souuent douloureuses & quelquefois cruelles, les drogues sont la plupart mailplaisātes au goust, & nuisibles à l'estomach: mais le boire & manger, & aultres remedes dietetiques sont du tout agreables, & profitables ensemble à nostre nature. Le regime de viure prescrit bien à propos par vn docte Medecin, est quelquefois seul suffisant pour surmonter vne grande maladie, les deux aultres, instruments medicaux ont tousiours besoing de ce troisieme sans lequel ilz ne peuuent rien faire. Neantmoins nous ne debuons iamais embrasser vne seule partie de Medecine pour mespriser ou reietter les aultres nous mettāt en memoire qu'elles sont toutes trois esgallement establies pour l'estirpation des maladies & la conseruation de santé: aussy sont elles si bien vnies & si estroittement liees ensemble qu'elles ne peuuent estre totalement separees les vnes des aultres. Or icy puis qu'il est question

de la table, c'est où principalement il est besoin de regime, & d'adresse pour se bien deffendre contre les furieux assauls que l'on nous y dresse. Ceux donc qui desirent de n'estre point surpris & embarrassez dans les pieges de l'yuresse, doibuent premierement suiure le conseil que Plutarque a laissé entre les preceptes de la conseruation de santé, sçauoir est que deuant que se trouuer es assemblees esquelles on est forcé à boire d'aültât, ilz se tinsent tout preparés & bien disposez au combat, y ammenât vn appetit tout fraiz & bien deliberé, & y apportant vne bonne place vuide en leur ventre pour y loger & le vin & la viande. On ne sçauroit dire combien auidement vn estomach famelique & sitibonde reçoit la viande & le breuuage, combien estroittement il l'embrasse, & combien aisement il l'altere, cuit & digere: aussy ne sçauroit on exprimer combien l'action du ventricul ou estomach est lors vigoureuse, combien le vin auallé se trouue foible pour resister à son action, combien la force du vin en est debilitée & consequemment l'yuresse. Mais si au contraire on se iette la pâse pleine en ce deduit Bacchique, si on entasse vin sur vin, & repletion sur repletion il n'en fault tant esperer vne sobre issüe, qu'en craindre le hazard d'une grande maladie. Et d'aültant que les vns se trouuent mieux disposés au boire & au manger le soir que le matin, & les aul-

tres au contraire, celuy qui voudra entreprendre ce combat de tauerne doit sur tout choisir le temps auquel il se recognoistra plus valeureux à table, comme celuy auquel son estomach aura plus d'alteratiō sera desia façonné à boire d'auantage, & accoustumé à mieux porter son vin. Que si d'auanture toutes heures luy sont indifferētes, & se sent aussy bien disposez aux vnes qu'aux aultres, ie luy conseille neantmoins de faire choix du soupper plustost que disner, puisque la nuict suiuant emporte la moitié du danger à ceux qui boient carouffe, leur donnant moyen de dormir & reposer & couurant leur vergongne si d'auanture ilz sont surpris d'yvresse. Mais sur tout qu'il se garde bien de commencer l'assault estant trop eschauffé ou esmeu, ou bien trauaillé de douleur de teste. Car il seroit bien tost forcé à se rendre à la mercy du vin. Les grandes & vehementes passions de l'ame semblent desia tenir quelque chose de l'yvresse: celuy qui en est saisy ne peut bien supporter son vin. Elles attirent tantost la chaleur au centre du corps, tantost elles la renuoyent aux extremités, & à la superficie, elles enflamment quelquefois les esprits vitaux, aultrefois les suffoquent & bien souuent les dissipent: en ce desordre de nature la chaleur naturelle de l'estomach ne fait pas si biē son de buoir entour le vin aualé, son actiō n'est si vigoureuse, pour le surmonter du tout, & la vertu animale en

est affoiblie.

Ores comme les passions de l'esprit sont contraires à celuy qui veut carousser, aussy les alterations & maladies du corps, & principalement la debilité du cerueau naturelle ou accidentaire luy sont du tout nuisibles. Nous auons rendu raison cy deuant pourquoy vn homme trop eschauffé par quelque vehement exercice ou par quelque autres causes se sent incontinét surpris du vin, & l'experience nous en fait sages tous les iours. Si toutesfois nostre carousseur ne se pouuoit presenter au combat sans estre aucunement eschauffé comme il arriue ordinairement en temps d'esté, ie luy conseille de prēdre vn grand verre d'eau pour le premier trait, ou pour le moins s'il ne luy est loisible de ce faire, d'arroser son vin fort largement, afin que par ce moyen il vienne à amortir la chaleur du foye & des venes, laquelle augmentee par le vin pur prins des les commencement du repas n'est pas peu suffisante de donner en teste. Il faut donc venir en champ de bataille, sans aucune agitation ou alteration, & s'y presenter tranquil d'esprit, sain & reposé du corps, aussy est ce le moins que l'on puisse faire que d'estre modéré à l'entree de table, puis que bien souuent on est turbulent à la sortie. Que si l'on veut vser de quelque Antidot cōtre l'yuresse future, on se pourra munir du suiuant lequel nous auons inseré en ce lieu puis que nous

n'en anons fait mention au chapitre precedent, auquel nous rapportons les matieres en gros sans specifier la forme, ny l'vsage. Prenés 20. amandes ameres toutes entieres, c'est à dire sans estre pelées, & aultant de noyaux de pesches, de semence de choux rouges & de reffort de chascun demye once, de semence de coing, de plantain & haulte verueine de chascun deux drachmes, faiçtes bien broyer le tout avec du vin d'Absynthe en hyuer, & avec du vin de myrthe en esté, ou au lieu d'iceluy, avec du vin de Grenade puis adioustés de rasure de corne de cerf, & d'yuoire bien subtile de chascun trois drachmes, reduisés le tout en forme d'opiate de laquelle vous prendrés le poids de trois drachmes ou demye once avant que vous mettre à table. Que si cest Antidote nevous aggree munissiez vous en son lieu de deux drachmes de la pouldre suiuaute, prenez corne de cerf raspée, semence de reffort, & de choux rouges, & de haulte verueine, de chascun demye once de myrtilles, coriandre preparée & absynthe sec de chascun deux drachmes: de coral & santal rouges de chascun vne drachme, reduisés le tout en poudre. En ceste disposition donc & avec telles armes le soldat Bacchique se pourra presenter au combat plus toutesfois pour parer aux coups: que pour assaillir, se tenant tousiours sur la deffensue au commencement du repas. C'est chose asseuree que le via robant

dans vn estomach vuide excite bien tost l'y-
ureffe, nous l'auons demonstté par vnes rai-
sons en la decision de noz problemes, &
l'experience ordinaire le confirme. C'est elle
qui a meu quelques autheurs d'attribuer la
soudaine yureffe des anciẽs Macedoniens
aux grands hanaps qu'ilz espuisoient incon-
tinent des l'entree de table.

Il n'est que de faire bon fondement de-
uant que boire, & de munir l'estomach de
quelque viande, laquelle par sa solidité barre
le passage au vin qu'il ne passe si prompte-
ment au foye, & boiue par sa siccité les va-
peurs, & de son poids tire l'vn & lautre
quant & soy dans la sentine du ventre. Aussi
tant plus l'estomach appetera le breuage
tant plus le vin luy profitera, & offencera
moins le cerueau, principalement si le beu-
ueur masche & aualle vne crouste de pain
apres chascun traict. Mais comme il y a
quelques viandes fauorables aux bons pions,
aussy y en a il qui leur sont fort desadanta-
geuses. La chair & saulses trop grasses, le
laict, les dattes, les olines, les aulx, & oi-
gnons, les corps aromatiques, & tous au-
tres vapoureux causants douleur de teste
sont nuyfibles. Je loue l'aduiz d'Arnauld de
Villeneuve, qui conseille à celuy qui veut
bien boire d'vsfer de viandes solides, grossie-
res, & visqueuses.

Nous desirons y adiouster le rosty plustost
que le bouilly, & les viandes salces & de

hault gouſt, pluſtoſt que les fades & dou-
ceſtres. Entre aultres appreſts que le beu-
ueur ſe ſouuienne ſoigneuſement des anti-
dotes d'yureſſe qui entrent ordinairement
au ſeruice de la table, & principalement
aux premiers mets. Si la ſaiſon ne permet
touſiours les reſſorts aux banquets, les choux
pour le moins ny manqueront gueres.

En vain nature auroit procréé tant de plan-
tes pour le ſeruice de l'homme, ſi elle ne
les repreſentoit au temps auquel il en a plus
de beſoing. Pline ayant diſcoursu ſur la vertu
du freſne contre le poiſon des ſerpêts, louë
grandement le benefice de nature, laquelle
ſe monſtre mere ſi benigne qu'elle donne
des fleurs aux freſnes deuant que les ſerpêts
ſortent de terre, & conſerue leurs fueil-
les iuſques à ce qu'ilz ſoient rentrés, afin
quel'homme ne ſoit iamais deſtitué de ce re-
mede contre leurs venins. Nous ne debuons
pas moins admirer la prouidence de nature
en la production des choux leſquelz elle
fournit en toutes ſaiſons, & en tous pays
pour ſuruenir à l'yureſſe de l'homme qui
ſ'abandonne au vin en tout temps. Le choux
eſt ſeruy aux banquets diuerſemēt appreſtē
tantost en bouillon, & tantost en ſalade,
ou cuit ou crud. Auſſy eſt il bon contre
l'yureſſe en toutes façons, mais ſon premier
bouillon eſt principalement profitable: ores
bien que nous permettions maintenant de
boire après auoir bien mangé, ſi eſt ce que

Nous ne conseillons pas de commencer l'assault avec toutes sortes d'armes, mais deffendons serieusement les grands hanaps. Quiconque commence la querelle par grands carouffes se peut bien promettre qu'il ne durera pas longtemps à la meslee sans estre frappé à la teste. Il est beaucoup meilleur de boire d'un petit verre ou mediocre, pour n'aggraver l'estomach du premier coup, ne tarir si tost la soif, & ne retenir trop longtemps le soufflé ou respiration en l'espuisant; Ainsi façonne on petit à petit son estomach à recevoir le vin, & dispose on le cerueau à le supporter. C'est le conseil que Socrates donnoit à ses amys selon le rapport de Xenophon, leurs proposant tousiours des petits verres pour euter la tourmente de l'yvresse: si toutesfois la difficulté ne se pouvoit vider sans ioüer des grands gobelets, il les fault au moins renvoyer à la fin du festin. Nous deffendons aussy la vaiselle dorce, & odorant côme de bois de geneure & de noix d'Inde, & les vaisseaux qui apportent de la difficulté à boire. On en voit en forme ouale, d'autres tournez en limaçons, quelques uns formés d'autre bigearre maniere, mais aultant ou plus difficiles à estre espuisés que variables en leur structure, lesquels tous semblent estre forgés plustost pour empescher que pour servir à boire. Un bon beuveur doit savourer le vin à son aise, tels vaisseaux empeschent l'homme de le bien goustier

le mettent souuent hors d'haleine, & en le forceant pour les vider le debilitent. Aussi est ce chose absurde d'aualler le vin auectant de peine & trauail, qui peine & trauaille assés son homme quand il est auallé. C'est le seul & principal ennemy de la sobriété, c'est celuy au choix duquel les beueurs doibuent auoir grand esgard pour reietter le plus fort & fameux, & se plaire au moins enyurant.

A cest effect auons nous dressé le chapitre suiuant puis que nous ne pouuons tout cōprendre en cestuy cy, seulement aduertirayie les beueurs en passant, que s'ilz ne boient que d'un vin ilz feront beaucoup pour leur santé, ou bien s'il leur conuient d'en gouter de plusieurs qu'ilz commencent tousiours par le plus foible. Ores encores que les Amethistes prescits puissent rabbaire l'ardeur du vin, & que la diete presente puisse reprimer sa flamme, si est ce qu'ilz ne sont assés puissants pour estouffer du tout ses fumees, aussy ne fault il cesser de les combattre en tant que la saison, le festin, & les conuiues le permettront. Si les noiaux de pesches ne sont tousiours en main, les amandes ameres suruiendront à leur default, lesquelles encores que prescrites par les Auteurs auant la charge, ne seront toutesfois inuitiles sur la retraicte. Comme nous prenons maintenant les laictuës à l'entree de table pour exciter l'appetit, les anciens ne les

admettoient qu'à l'issuë du repas pour appaiser la ferueur du vin par leur grande froidure.

Or puis que nostre coustume ne porte pas que l'on serue les laiçtuës à l'issuë de table, nous pouuons substituer en leur lieu les pomes douces & aigres, aussy sont elles fort agreables aux bons biberons tant pource qu'elles resistent au vin, que pource qu'elles n'en font perdre le goust, & n'empeschent de carousser.

Philippe Roy de Macedoine, & le grand Alexandre son filz estoient excellents & parfaicts yurongnes, mais aussy estoient ilz autant friands de pommes, que curieux de bon vin. Il y a d'autres fruiçts qui peuuent bien soulager celuy qui aura trop beu, cōme les neffles, les poires adstringentes, les coings & autres semblables, lesquelz s'ilz ne diminuent beaucoup la chaleur du vin bouïllāt dans l'estomach par leur vertu refrigerante, peuuent toutesfois seruir par leur qualité adstringente, en bouschant & estreignant l'orifice superieur du ventricule, & empeschant les fumees du vin de monter en hault, & gagner la teste : mais quand vn beueur se retirera de la charge, s'il se sent trop plein de vin, & tant soit peu esmeu, alors deuant qu'il ait du tout perdu sa Tramon-tane, qu'il aualle hardiment vn grand verre d'eau fresche. La doctrine de Dioscoride & Pline conseille ce salutaire aduis, l'experiēce

ordinaire le confirme, & l'Edict du souuerain Hippocrate l'autorise. *A vini potu aqua exiguum superbibendum, nam hoc modo vini potentia caput mentemque minus tentabit.* Il fault dit il prendre vn petit traict d'eau apres auoir du vin, par ce moyen sa force ne portera pas si tost à la teste, ny à l'entendement: Or puis que nostre regime se termine par l'eau commençons vn aultre chapitre par le vin, & pour n'estre trompé au choix, faisons distinction des vins plus ou moins enyurants.

DES VINS PLUS OV MOINS ENYURANTS, & premierement des artificiels.

CHAPITRE LIX.

L n'y a personne qui ne scache que les vins sôt aultât differêts en force & vertu, qu'en couleur & saueur, tant les vns sont forts & genereux, & les aultres foibles & debiles. Pline dit que le vin exprimé des raisins noirs, que le vulgaire appelloit Poltronaz, auoit cela de partic'lier qu'il n'en-yuroit point pour quantité qu'on en beut. Le vin Ægyptien & principalement Mardotique, ainsy nommé d'vne fontaine ou marrest voisin de la ville d'Alexandrie, estoit si

peu fumeux qu'il n'enyuroit aucunement. C'est dequoy Galien s'esmerueilloit qu'un pays si feruent produisist du vin si petit & debile, qu'il sembloit plustost rafreschir qu'eschauffer ceux qui en beuuoient. Au contraire le vin qu'Aristote appelle Samagorien estoit si genereux, que moins d'une pinte de celuy, encor que bien arrosé aultrefois esté suffisant pour enyurer plus de quarante hommes.

Si tous noz vins estoient semblables aux premiers il ne seroit besoing de discourir d'auantage sur la preservation de l'yuresse, nous serions hors de peine de poursuiure ce subiect, & les beueurs garantis de ceste affection. Mais puis que les biberons rencontrent quelquefois des vins sinon tant fumeux & genereux que le Samagorien, telz neantmoins qu'il en fault bien peu pour terrasser son homme, il m'a semblé vtile & necessaire de les représenter chascun avec sa liuree, afin qu'estants recognus pour malfaisants les beueurs s'en donnassent de garde. Et encores qu'il soit fort difficile de donner des marques infaillibles des plus ou moins enyurants, à cause de leur diuersité, si est ce que nous nous efforcerōs d'en tirer quelque cognoissance agreable au lecteur, & profitable tout ensemble. Les vins plus puissants, & plus enyurants sont tels naturellement, ou par quelque mixtion ou artifice. Et comme ces derniers sont plus faciles à estre re-

cognus, aussy sont ilz plus aisés à euter. Plutarque enseigne qu'il n'y a rien qui enyure plus promptement que plusieurs vins meslés ensemble. Ce qu'il confirme par la pratique de ceux qui faisoient profession de bien boire de son temps, lesquelz fuyoient comme poison le vin broüillé. Si ainsy est nous deuons à plus forte raison nous abstenir de tant de vins mixtionnés & sophistiqués avec ie ne sçay quelz ingredients, qui sont souuent plus contraires au cerueau que la diuersité mesmes de vins broüillés ensemble. Les anciens toutesfois se sont pleus aux meslanges, & ont ferlatté leurs vins avec cendres, chaux, eau marine, argille, plastre, pouldre de marbre, poix & resine, les vns pour les conseruer, les aultres pour les fortifier & paraduanture pour corriger ou meliorer leurs saueurs.

Nous en auons desia touché vn mot auparauant, & ne sera que bon de recognoistre comme en passant ceux que nous iugerons plus pernicioeux à la teste.



DES VINS MIXTIONNEZ DE
plastre, ou resine, ou poiz,
ou chaux.

CHAPITRE LX.

E mestonne fort de la mixtion du plastre dans le vin, bien que ie croy que ceste inuention tend à rendre le vin plus friand, ou à luy cōmuniquer quelque vertu alexitere. Les Africains s'en seruoient pour addoucir l'aspreté de leurs vins, aussy faisoient ceux des Isles de Zanthé, de Corfou, & aultres. Et les Medecins le prescriuoient comme vn souuerain dompteur de tous poisons. Mais si par l'addition du plastre le vin s'en trouuoit plus medical, ou plus agreable au goust, aussy s'en rendroit il plus pernicieux & nuisible, ie ne diray seulement à la teste mais beaucoup plus à l'estomach, à la respiration & à la vie. Caius Proculus intime d'Auguste impatient d'vne cruelle douleur d'estomach qui le bourreloit, se fist mourir en beuant du plastre. Que si on m'oppose ce qu'vne si petite quantité qui entroit en la mixtion des anciens ne pouuoit nuire, ou que la preparation qui se faisoit par l'vstion du plastre seruoit de correctif, ie produiray incontinent Dioscoride,

& puis Athenée pour contraires. Celuy la eſcrit que le vin plaſtré des anciens eſtoit fort pernicioſe, offenceant les nerfs, aggrauant & enflammant la teſte, & nuyſant à la veſcie, & ceſtuy cy enſeigne que le vin l'Eucadien, & de l'Isle de Zanthé offenceoit grandement la teſte, à cauſe qu'il eſtoit plaſtré. Quant à la mixtion reſineuſe, ſi elle n'eſt tant à reietter que la precedente pour le moins n'eſt elle à admettre, car ſi elle n'eſt tant importante à la vie, elle ne laiſſe d'eſtre dangereuſe au cerueau: encores que les anciens ſemblent auoir eſté fort diſcordants touchant ſon efficace, & encores plus differents ſur l'intentiō qui les mouuoit à poiſſer & reſiner leurs vins. Il en y a qui tiennent que la reſine, & la poix ont eſtées miſes au vin pour luy concilier vne plus agreable odeur & le rendre plus ſouëſue au gouſt en contrefaiſant la ſauueur des vins du Viennois en Dauphiné, du pays Albigeois, Auvergne, & Comté de Bourgoingne, leſquels eſtoient fort delicieux aux Romains à cauſe de ie ne ſçay quel gouſt de poix qu'ilz reſſentoient. Les vns diſent que ceſte mixtion ſe faiſoit pour amortir la force du vin, & les autres au contraire que c'eſtoit pour le rendre plus fort & genereux. Galien apres Dioſcoride ſemble auoir mieux deſcouuert la fin de ceſte mixtion que les autres, enſeignant qu'elle ſe pratiquoit ſeulement pour la conſeruatiō du vin, & qu'elle l'empeſ-

choit de s'aigrir. Et de fait les anciens Galates pratiquoient ordinairement ce secret, d'autant que leur vin, qui n'estoit iamais bien meur à cause de la froidure de leur region, se corrompoit aisement s'il n'estoit fortifié par la mixtion de la resine. Quant à l'effect d'icelle Pline dit tantost que le vin qui n'a encores gueres demeuré avec la resine cause des vertigines, douleurs de teste, & yuressse, & tantost escrit que ceste sophistication amortist la force du vin, & l'empesche de monter en hault. Mais Dioscoride (à l'opinion duquel, ie soubscris la voyant confirmée par l'experience des anciens) enseigne clairement que tels vins sont nuisibles au cerueau, causent des vertigines & douleurs de teste. Le mesme se doit dire de la poix qui luy est fort affine puis que le vin conserué dans des boucs ou aultre vaisseaux poissés en est plus enyurant pour la forte odeur, & malplaisante saueur de la poix qui remplit le cerueau, fasche l'estomach, & offence la teste, Il n'est besoing en cest endroit d'accuser le vin dans lequel les anciens infusoient de la chaux, car il'a esté de leur temps mesmes conuaincu malplaisant, & condamné par les beueurs modernes pour son malefice. Toutesfois les vinatiers de ce temps ne cessent encores d'en alterer leurs vins aultrefois avec de l'eau de vie, quelquefois avec de la semence de moustarde, fiente de pigeons, & souffre, avec aultres ingrediets semblables

pour les rendre plus friands & fameux. Mais en voulant meliorer leurs vins par artifice, ilz le despoüillent de sa bonté naturelle, & en cherchant leur profit ilz procurent le dommage de ceux qui le boient.

*D'AVLTRES VINS MIXTIONNEZ
par divers artifices.*

CHAPITRE LXI.

NE ne sçay si ie doibs plustost des-
conseiller l'vsage du musc, de
l'ambre, & d'autres corps odorés
dans le vin, qu'accuser la mo-
lesse de quelques delicats qui s'en ser-
uent: ces odeurs alterent les sens, gagnent
la teste, accablent le cerueau, & leur vertu
enyurante est si bien recognuë & verifiée
par l'experience ordinaire de noz beueurs,
qu'il sembleroit superflu de l'enseigner, &
necessaire d'en reprimer l'abus. A la verité
ceux qui se seruent de ces corps vaporeux
& sont bien informés de leur faculté sont
par trop intemperants, & ceux qui l'igno-
rent sont coupables de trop de delicatesse.
Donnons soigneuse garde qu'un lascif &
desordonné appetit ne nous charme par ces
gousts & appasts fardés & sophistiqués, pour
nous plonger dans le goufre de l'Yvresse,
vray fleuve de Lethe, & entree de l'enfer.

Il en y a qui meslent du vin cuit avec de l'autre pour le rendre plus enyurant. Autres y trempent du styrax, ou bois d'Aloë, quelqu'vns y versent de la decoction d'escorces de mandragore, decoction à la verité non seulement contraire à la sobriété, mais mortele ennemye de la santé & de la vie.

Aulcuns escriuent que le vin dans lequel on aura infusé de la semence de Ricinus ou Paulme Dieu, ou bien meslé les excrements ou infects naissants es aureilles des chiens enyure celuy qui en boira. Mais ce seroit chose trop curieuse & blasmable d'en vouloir rechercher l'experience, puis que l'un est pernicieux à la santé, & l'autre contreuenant à l'honnesteté. Quelcuns pensent que le sel infus, ou bien vn bois de vigne ardent & puis estaint dans le vin le rendent plus enyurant, mais comme l'experience m'a enseigné la fausseté de leur opinion, aussy m'a elle assésuré que l'escorce d'orange trempée dans le vin donne fort en teste, à cause de ses vapeurs odeores : & que la fueille ou semence d'oruale infusée au vin, & cuite avec la biere, a grande vertu d'enyurer. Comme la vigne plantée aupres d'un choux se retire arriere, ainsi le choux se recule bien loing de l'herbe dicté Cyclaminus ou pain de pourceau. Si la vigne semble hayr la sobriété causée par le choux, le choux ne semble moins fuyr l'yuresse causée par

la racine dudit Cyclaminus. Ceste consideration ne doit sembler trop friuole puis que l'experience nous fait foy que le vin dans lequel est infusee ceste racine enyure puissamment ceux qui en boient. Mais ce n'est nostre intention de représenter par le menu toutes ces alterations, & diuers meslanges du vin, il nous suffit de conseiller en gros ceux qui voudront boire sobrement de s'en donner de garde, & fuyr generalemēt tous vins broüillez & aromatisez soit par les ingredients susdits, ou avec canelle, gingembre, poiure, macis, giroffles & semblables drogues desquelles se compose ce que nous appellons Hippocras. Mais c'est trop parlé d'un art si contraire à la nature, parlons de la nature mesme, & donnons les enseignes des vins naturels plus ou moins malfaisants, puis s'il se trouue quelque difficulté en nostre discours nous l'esclaircirōs.

*DES VINS NATURELS PLUS OU
moins malfaisants.*

CHAPITRE LXII.



Ncores que la diuersité des vins soit grande, si est ce que toutes les differences qui constituēt les diuerses especes d'iceux, se peuuent reduire à cinq chefs,

ſçauoir à la couleur, ſauueur, odeur, conſiſtence, & à la force où vertu. De la diuerſité des couleurs les vins ſont appellés blâcs, les aultres rouges, gris, claijets, à œil de perdrix, & aultres. La ſauueur ſemblablement les rend quelquefois doux, quelquefois acres, ameres, auſteres, acides: l'odeur en eſt tantot ſouëſue & delicièuſe, aulcuneſois malplaiſante & deſaggreable. On veoit des vins de conſiſtence fort craſſe & groſſiere, d'aultres de ſubſtance ſubtile & tenuë, & quelqu'vns de mediocre. La derniere difference, comme elle eſt la principale pour eſtre tiree de l'eſſicace & vertu du vin, auſſy eſt ce là ſeule que nous recherchons icy. Le vin fort & puiſſant eſchauffe ſoubdainement & puiſſamment tout le corps, mais principalement la teſte, remplit le cerueau de vapeurs & humeurs chaudes, procreë incontinent l'yueſſe, & quelquefois allume la ſiebure. Au contraire le vin foible & debile ne donne aulcunement en teſte, ne travaille les nerfs, n'altere trop manifeſtemēt le corps, ne l'eſchauffant que peu ou point. Entre ces deux eſpeces de vin ſe retrouue le mediocre en vertu & faculté, lequel participant des qualitez des deux extremes, n'eſt ſi genereux que le fort, ny ſi petit que le foible. Ores comme ceux qui deſirent de boire ſobrement doibuent faire choix des vins foibles & debiles, auſſy doibuent ilz fuyr fort ſoigneuſement les forts & genereux: mais

d'autant que la cognoissance de la force ne releue si immediatement des sens comme les autres differences, lesquelles sont soumises à l'apprehension de la veüe, de l'odorat, & du goust, ains se tire plustost de l'effect, sçauoir de l'alteration qu'elle imprime au corps, & principalement de l'yvresse, il nous faut chercher quelque autre moyen pour descouurir son feu, & preuenir sa nuisance sans nous precipiter à ceste extremité laquelle nous desirons euitier. Nous ne sçaurions mieux satisfaire à ceste disquisition que par la consideration d'un vin foible & debile, puis que l'un des contraires nous fait tousiours conceuoir la cognoissance de l'autre. Comme Galien appelle vineux le vin fort & puissant, aussy dit il aigueux le vin foible & debile, pour la ressemblance qu'il a avec l'eau, tant és qualités sensibles, qu'en celles qui sont plus esloignees de nos sens. Les conditions & qualités qui font que le vin soit vin, & d'autant plus esloigné de la nature de l'eau, que plus il retiët celle qui luy est propre, si elles se retrouuent suffisamment au vin le font & rendent vineux. Au contraire si toutes ou la plus part luy manquent, ou sont si foibles & debiles qu'à peine l'on les puisse apperceuoir, le vin s'appellera aigueux ou aqueux. Pour exemple s'il n'est pas seulement blanc, mais clair, pur, & transparent comme eau, d'une consistence fort tenueë, qui ne donne en teste,

qui ne laisse pas grande impression à la langue, n'y au palais, apres l'auoir longtemps tenu à la bouche, on auallé, qui ne supporte beaucoup d'eau, n'eschauffe manifestement, bref ne participe que peu ou point és qualités qui se retrouuent és aultres vins, n'ayant austerité, adstriction, douceur, odeur, ny acrimonie bien sensible, tel vin sera petit foible & aigueux. Et encore que Galien enseigne que ce vin est commun à toutes sortes de nations prouenant indifferemment en toutes regions tant froides que chauldes, si est ce que ie pèse qu'il se retrouve bien plus particulièrement és contrees Septentrionales comme sont les plus petits vins qui croissent ez costes du fleuve Necks en Allemagne.

Ce seul vin entre tous comme il n'est si foible que l'eau, n'y si fort que le vin puissant, ains tient le milieu entre les deux: aussy tient il vne mediocrité telles en ses effectz qu'il n'incommode par sa froideur & crudité, comme leau, & n'altere & ne nuyt par sa chaleur cuyfante, comme le vin genereux.

De ceste description du vin foible & debile pouuons nous maintenant comprendre & cognoistre qu'elz sont les vins forts & genereux, & consequẽment les plus enyurants. Car si on nous verse du vin de quelque region chaulde, comme de Grece, Candie, Espagne: bien coloré, & principalement de iaune, roux, ou de couleur sēblable ou plus chargée de bonne consistance, & bien sup-

portant son eau; bref d'odeur forte chatouillant les narines, estincelants aux yeux, fringât au goust, eschauffant la langue & le gosier, gaignant soudainement le dessus, & qui promptement allume comme vn charbon dans l'estomach, soions certains que ce vin sera fort, fumeux & enyurant. Mais ceste conclusion bien que veritable ne satisfera peut estre à tout le monde pour estre trop generale: descendons aux particularités, & vuidons quelques difficultés qui serviront pour la decision des aultres.

Trois petites questions, mais belles & curieuses suffiront à mon aduis, nous les traiterons briefuement. La premiere sera, si le moust ou vin nouveau enyure plus que le vin vieil, La seconde si entre les vins le doux est plus enyurant que l'austere. Et la troisieme, si le vin blanc cause plustost ceste passion que le rouge.

S I L E M O V S T, O V V I N N O V V E A U
enyure plus que le vieil.

CHAPITRE LXIII.



Velques Philosophes & des plus nobles, fondez sur les raisons suiuanes, ont aultrefois opiné que le vin nouveau enyure d'auantage que le vin vieil puis que

l'yuresse (disent ilz) n'est aultre chose qu'une turbulence du cerueau, puis qu'elle est causée par les vapeurs que le vin fournit & enuoye en hault, il ne fault doubter que le moust comme plus turbulent, bouillant, & vapoureux que le vieil n'excite consequemment une plus grande & plus soudaine yuresse, veu principalement que son odeur & fameé est quelquefois si genereuse qu'elle seule peut causer ceste passion. Que si la chaleur tient le premier lieu en la production de l'yuresse, certes le moust sera aussy plus enyurant pour estre plus chaud que le vin vieil, car il n'est pas seulement doué de la chaleur connaturelle du vin, mais d'une aultre chaleur accidentaire qui luy survient du lieu où il croist deriuee premierement du soleil, laquelle conioincte avec sa compagne rend le moust d'autant plus feruent qu'on le voit chaud & bouillant. D'avantage d'autant que le vin doux est plus enyurant que l'austere, il faut accorder necessairement que le moust qui conserve encores sa doulceur sera beaucoup plus fort pour produire ceste passion que tout aultre vin. Mais il n'est besoing de tant de raisons pour prouver ce que l'experience nous enseigne tous les iours, puis que nous voions que le vin nouveau attaque, offense, & surmonte beaucoup plus visteement, & vigoureusement la teste, le cerueau, & la raison que le vin vieil. Je veux maintenant produire le party

contraire, lequel ne nie pas seulement l'experience alleguee, la vertu supposee du vin doux, & la chaleur enyurate du moust, mais aussy prouue suffisamment le contraire par raisons, autorité, & experience contraires. C'est chose assuree que toute coction, depuration, & segregation des parties heterogenees se fait & parfaict par la seule chaleur. Or puis que le vin vieil est plus attenué, mieux espuré, & plus parfaictement cuit que le moust, puis qu'il est entierement despoüillé de sa lie & flatulence, de ses parties terrestres froides & aigueuses (lesquelles restées encores meslees au moust, estropient sa chaleur & la rendent plus debile) il faut necessairemēt conclure qu'il est beaucoup plus chaud plus fort & plus enyurat. Ceste chaleur se fait euidentement recognoistre au vin, s'augmentant de iour à aultre à proportion aussy que le vin s'enuieillit. La soüefuete suiuant la douceur l'argüe probablement, apres la soüefuete suruientie ne sçay quelle acrimonie qui la confirme avec plus d'assurance, & apres celle icy vn certain goust amer la conclut necessairement. Ces raisons accompagnees d'experience (d'experience di-je qui nous tesmoigne que le vin vieil eschauffe si auant que mesmes il vient à allumer la fiebure) ont enseigné à Galien & à toute l'eschole medicale, qu'il est plus chaud, plus vaporeux, & consequemment plus enyurant que le vin nouveau. Voilà les raisôs qui fauorisent

ces deux opinions, chascune desquelles ne semblera pas beaucoup esloingnee de verité si nous remettons en memoire ce que nous auons enseigné cy deuant, sçauoir que les vapeurs vineuses n'excitent pas seulement l'yuresse par leur intemperature, mais aussy par l'obstruction qu'elles causēt au cerueau. Suiuants donc ceste distinction nous pourrons dire que le vin nouveau est plus enyurāt que le vieil, à cause des obstructions produites par ses fumees & vapeurs plus copieuses, ou pour le moins plus crasses, que celles du vin vieil, & consequemment plus capables & idoines de boucher les ventricules, les venes, & nerfs du cerueau : Mais si d'aulture part nous considerons l'yuresse entant qu'elle se procree par la chaleur & ferueur du vin, le vieil doibt estre estimé plus enyurant pour estre beaucoup plus chauld que le nouveau, car il eschauffe si puissamment qu'il enflamme quelquefois le sang, les esprits animaux, le cerueau, & tout le corps. d'où sensuit incontinent l'yuresse. Ceux qui voudront obseruer curieusement les deportemēts des hommes enyurés par l'un ou l'autre des deux vins, ne feront difficulté de soubcrire à ceste verité car ilz verront les hommes enyurés de vin nouveau plus engourdis, plus pesants, tombants, vacillants & vertigineux, tous lesquelz accidents se doibuent attribuer aux obstructions susdictes. Mais au contraire ceux qui seront surpris de vin vieil, se

monstreront plus esueillés, plus prompts à toutes actions, plus procliues à la cholere, avec vne ardeur de teste, rougeur de visage, & babil importun tesmoings irreprochables de la grande ferueur du vin qu'ilz ont beu. Ceste decisiõ nous fera passage à la question suiuant.

*SCA VOIR SI LE VIN DOVLX EST
plus enyurant que l'autre.*

CHAPITRE LXIIII.



Eux qui le reputent tel s'arment premierement d'experience, & puis mettent en ieu le moult lequel pour estre bien doux enyure puissamment. En oultre ilz produisent Galien qui enseigne que tousiours le vin doux est fort crasse, & bien coloré, desquelles qualités s'ilz ne colligent necessairement vne grande chaleur, pour le moins concluët ilz que grande quantité de vapeurs crasses & espaises se peut esleuer d'un tel vin, suffisante pour enyurer le cerueau par l'obstruction qu'elles y induisent. Mais la partie aduersetenant le vin doux pour moins fort & moins chauld que l'austere (comme il l'est de vray) le tient consequemment pour moins enyurant. Et tant s'en fault (dit elle) que le vin doux soit plus enyurant,

qu'au contraire les anciens ont estimé que le moust meslé avec le vin fait cesser l'y-
uresse. Voire iadis certains Medecins or-
donnoient à ceux qui auoient trop beu, de
prendre du pain trempé dans du miel, com-
me si la douceur estoit le vray Antidot d'y-
uresse. D'auantage Pline escrit que le vin brus-
que & subtil donne plus en teste que tout
aultre.

Ceste opinion ne se deffend pas seule-
ment avec l'experience qu'elle produit, mais
aussy par l'autorité d'Hippocrate, de Ga-
lien; de Plutarque & d'aultres, qui ont creu
que le vin doux est moins enyurant. Et pour
clorre ceste controuerse avec le seel de la
verité, nous adherons à ceste derniere opi-
nion fondez sur la doctrine d'Hippocrate qui
est telle. *Vinum dulce vinoso minus caput gra-
uat, minusque mentem ferit.* c'est à dire que le
vin doulx appesantit moins la teste, & ne
blesse pas tant l'entendement que le vineux.
Et Galien son commentateur n'y soubscrit
pas seulement, mais aussy adioust la raison,
d'autant (dit il) qu'il n'est pas si chauld. *Vina
enim dulcia quò magis à vehementi caliditate
absunt, eò minus cùm caput grauant, tum men-
tem ledunt.* Car encores que le vin doulx
puis essancer aultant de vapeurs au cerueau
qu'un vin fort, si est ce qu'elles ne sont si
chauldes & consequemment moins capables
d'enyurer, puis que la chaleur immoderee du
cerueau est des premieres causes de l'yuresse.

Reste maintenant à respondre en vn mot à la troisieme question qui est.

*SILE VIN BLANC ENYURE PLUS
que le rouge.*

CHAPITRE LXV.

IL laisse à part ce que l'on peut mettre en ieu de costé & d'autre, tantost pour le vin blanc, & tantost pour le rouge, car puis que la couleur n'a aucune efficace pour la production de l'yuresse, il nous faut seulement arrester à la force du vin, & conclure que le plus fort & fumeux soit blanc, soit rouge, est tousiours le plus enyurant. Je dis cecy pource que des vins blancs, qui croissent en plusieurs contrées les vns sont beaucoup plus forts, les autres beaucoup plus foibles que quelques vins rouges. Si toutesfois il se trouuoit deux vins de pareille force, l'un blanc, & l'autre rouge, ie pense veritablement que le vin blanc enyurerait plustost pour estre plus subtil & penetrant, mais aussy n'enyurerait il si longtëps que le rouge. Car les vapeurs du rouge comme plus crasses & grossieres sont aussy plus difficiles à estre dissipees & aneanties. Ores d'autant qu'on ne recouure pas tousiours de ces petits vins que nous venons de descrire, & que le plus sou-
uent

nient on n'a aultre vin à boire que fort & fumeux, nous enseignerons au chapitre suivant le moien de luy reprimer tellement ses fumees, & refrener sa force, qu'il ne soit que peu ou point nuisible au cerueau des beueurs.

PAR QUEL MOYEN L'ON PEUT
rendre le vin moins enyuant.

CHAPITRE LXVI.

D'Aultant qu'il ny a medicament pour profitable qu'il soit qui n'ait quelque chose de nuyfible en soy, les Medecins ont prudemment inuenté les diuerses preparations & mixtions qui se font tant pour retrâcher leurs parties pernicieuses que pour corriger leurs qualités malignes, ou pour les approprier plus particulièrement à leurs intentions, & leur donner comme des guides & conduittes pour les adresser à leur but, les rendants par ce moyen de nuyfibles qu'ilz estoient, du tout profitables, & d'inutiles propres & salutaires.

La vipere est si dangereuse que son venin peut tuer l'homme en moins de sept ou huit heures, mais si on luy fait euaporer son fiel à coups de fôuet, si on l'esuentre, apres luy auoir retranché la teste & la queue, si on

la cuit diligemment en eau, avec huile, sel, porreaux, & anet, elle sera nettooyee de tout son venin, conuertie en bonne nourriture, & demeurera medicament tres-salubre.

Le vin est vne liqueur fort vitale, vn aliment fort gracieux, & peut seruir comme medicament tressain, mais sa chaleur, sa fumee, ses vapeurs enyurantes sont du tout nuysibles, & dangereuses au cerueau. Pour le rendre donc de tous points louable & empescher qu'il ne nous blesse, il faut par quelque artifice luy faire vomir sa cholere, & euaporer sa chaleur. Le Philosophe Anacharsis louoit les Grecs touchant l'vsage du charbon, d'autant que laissant la fumee dehors, ilz n'apportoient que le feu en la maison. Je pense que nous ne serons blasmes si permettant le vin à ceux à qui nous ne pouuons le deffendre, nous enseignons de le prendre interieurement, & laisser ses fumees dehors. Nous rapporterons donc icy diuerses façons de ce faire, & premierement celles que le bon pere de toute doctrine Hippocrate ou bien son disciple Polibe nous à laissez. Le vin (dit il) est rendu beaucoup plus petit, & plus debil s'il est bien trempé, coullé, & refroidy. Quant est de la premiere maniere sçauoir de la mixtion d'eau avec le vin comme elle est la plus ancienne, plus facile, plus frequente, & plus naturelle façon d'esteindre l'ardeur du vin, aussy est elle le plus certain & assuré, frein pour dompter

sa rage. C'est ce que les mythologes nous ont voulu enseigner en feignant que les Nymphes, c'est à dire les eau ou deitez aquatiques, voyants Semeles foudroyee & reduicte en cendre eurent pitie de son enfant Bacchus, & que l'ayant sauué & laué en vne fontaine d'eau viue elles le nourrirent cherement, d'où vient qu'il les print en amitie, & que tout son plaisir estoit de conuerſer avec elles, de sorte que si quelcun eut entrepris de le separer de leur compagnee il luy eust faict sentir la rigueur du feu duquel il estoit sauué. Gardons no⁹ bien donc de separer le vin d'avec l'eau, de le boire pur & tout rouge du feu avec lequel il est naiz si nous ne voulons ressentir les esclats de son foudre. Les naturalistes disent que la feroçité de l'Elephant, le plus grand de tous les quadrupes, est incontinent addoucie par la presēce du mouton, le moins farouche de tous les animaux. Le vin qui est le plus puissant, & le plus fort de tous les breuuages alimentaires, perd sa force & vigueur par l'imbecillité de l'eau la plus debile de toutes les liqueurs. A la verité c'est chose admirable de veoir vne liqueur tant ennemye du vin, s'allier si amiablement avec luy, vn contraire si foible dompter vn si puissant ennemy, mais beaucoup plus admirable qu'elle rabbat ſes violences, sans amortir ſes douceurs & leurs effects salutaires, qu'elle corrompt sa nuyſſance, en conseruant sa vertu en son entier. L'inuite icy

les plus curieux à l'obseruation de l'experience, ilz trouueront que le vin puissant reduit par l'affusion de l'eau a vne force esgale à celle d'un petit vin, se conseruera mieux avec son eau, que le petit vin tout pur. Cecy a fait croire à plusieurs Medecins que le vin fort & bien baptisé, est tousiours plus sain qu'un vin pur de pareille force.

Aussy les anciens considerants combien de rigueur & de nuysance le vin perdoit par ceste attrempance d'eau douce, & combien de santé en reuenoit à ceux qui le beuuoient ainsi trempé, en ont quelquefois attribué l'inuention non à un homme mortel: mais à la benigne prouidence de quelqu'un de leurs dieux, & principalement de Iupiter, lequel avec grande acclamation ilz appelloient leur seruateur quand ilz venoient à tremper leurs vins. Mais nous en auons desia amplement traicté en un de nos discours precedents, il nous faut passer oultre & auoir recours à un autre remede si d'auanture l'eau n'estoit en main, ou bien si la delicatesse du goust ou debilité de l'estomach des beueurs ne la pouuoit admettre ou supporter. Hippocrate nous propose en second lieu la colature du vin comme un autre moyen pour le rendre plus foible & moins enyurant. Cecy se pratiquoit anciennement en passant & frelattant le vin par vne estamine ou chausse d'Apoticaire, ou bien par un sac (comme dit Plin^e) afin que par ceste colature

le vin fust du tout séparé de sa lie, deschargé de ce qu'il a de plus pesant, espuré de ce qu'il a de plus vigoureux, & quant & quant denué de sa force. Et de vray comme ceste colature souuent reiterée esuente bien le vin, euapore ses fumees, & le priue du plus halitueux de son odeur; aussy luy diminue elle beaucoup, & affoiblit ses forces. Ceste espuration est vrayement chastrer le vin, c'est luy faire perdre sa masse vigueur & l'effeminer du tout. Les anciens ont esté portés à ceste colature de vin par deux considerations, comme ceux qui en faisoient m'estier estoient ou plus sobres ou plus yurongnes. Aucuns frelattoient le vin pour le clarifier & espurer de sa lie; aultres pour l'eneruer totalement, afin qu'ilz en peussent engorger d'auantage; ceux la ne visoient qu'à leur santé ceux icy n'auoient aultre but que leur gourmandise & yurongnerie. Mais à bon droit auons nous quitté maintenant ceste colature, puis que noz vins ne sont seulement plus clairs, plus purs, & plus nets que ceux des anciens, mais aussy sont vuides de tant de drogues, & aultres corps meslangés qui rendoient leurs vins plus troubles & plus crasses, que les nostres. La pratique toutesfois qui voudra luy rabbatre les cornes sans mixtion de son contraire, s'il n'ayme mieux combattre sa chaleur potentielle par vne froidure actuelle. Comme le vin eschauffé semble auoir acquis ailes pour se guinder plus promptement en

hault, s'emparer plus puissamment de la teste, & gagner le dessus de la raison d'autant que par la cuitre, il est rendu plus rare & subtil, ainsy par raison contraire le vin refroidy, semble estre beaucoup plus souple & obeyssant à noz mouuemēts propres, sans s'essancer contre nous, & sur nous. C'est à mon aduis, ce qu'aultrefois a enseigné l'eschole de Salerne en ces vers.

*Si bona vina cupis, quinque hæc laudantur
in illis*

*Fortia, formosa, & fragrantia, frigida,
frisca.*

Il faut qu'un vin soit fort, beau, & de
bonne odeur.

Qu'il soit froid, qu'il soit fray, pour meri-
ter honneur.

Car en recommandant le vin fray, elle n'a esgard au contentement des biberons (c'est aduis seroit digne d'un Apicius, & indigne d'un Medecin) mais elle prescrit un vin moins nuisible & outrageux au corps & à l'esprit. Ceux qui sont curieux de boire fray pendant les chaleurs estiuales me serōt tesmoings que le vin extremement rafreschy, ou avec glace ou avec eau bien froide, semble estre du tout despoüillé de sa force vineuse, tant il est foible au goust, & peu fumeux au né. Mais ceste debilité n'est rien au pris de celle que le vin contracte s'il est vne fois refroidy iusques au glacer: car comme le froid vehement glace & astraint

ce qu'il y a de plus froid & aiguëux au vin, ausſy exprime il & reſould ce qu'il y a de plus chaud & plus ſubtil. Cela ſe remarque encor au vinaigre, lequel pour fort qu'il ſoit perd ausſy toſt toute ſa force & vigueur, ſ'il vient vne fois à eſtre glacé. La froidure d'une grande Apoplexie ou emporte ſon homme, ou le laiſſe perclus d'un coſté ou d'autre: ſi la glace ne corrompt du tout le vin: à tout le moins elle l'eſtropie d'une partie de ſes forces. Il eſt bien vray qu'il en demeure quelquefois autant delicat, & agreable au gouſt, mais neantmoins il en reſte touſiours plus debile. Les Medecins enſeignent que la chaleur des vins doux, eſt beaucoup inferieur à celle des vins auſteres; & Plin tient que toute la chaleur du vin luy eſt acquiſe en bouillant & cuiſant dans le tonneau.

L'adiouſte icy que les vins des regions plus chaudes, cuiſent deux meſmes, & bouillent longtems, & violemment, au contraire ceux qui prouiennent és regions froides ne bouillent iamais ſans eſtre eſchauffés par la chaleur du feu, de la chaux, ou choſe ſemblable. De là donc pouons nous inferer que le grand froid empêche le vin de bouillir, le conſerue touſiours en ſa douceur, & conſequemment diminué ſa puiſſance.

Les Grecs voulants preparer leur vin aigleux qui demeueroit touſiours doux côme

moult, le rendoient tel en le gardant de bouillir. Car dès qu'ilz l'auoient tiré de la lune, & bien entonnez, ilz faisoient tréper leurs tonneaux en eau fresche iusques à la my Decembre lorsque la froidure est grâde, & qu'il commence a geler. Les Piedmontois au contraire, n'ayants encor l'inuention des caues, gardoient leurs vins de geler par le moyen du feu pour les garantir comme i'estime de ceste saueur douceuse, & consequemment de s'affoiblir.

Concluons donc que comme la chaleur fait bouillir & cuire les vins, & les rend plus forts & genereux, aussy que le froid glaceant, & estreignât les debilité beaucoup.

Voila vne methode ancienne aultant asseuree qu'industriuse, pour calmer la turbulence du vin, le rendre agreable au goust, sain à la teste, & profitable à tout le corps. Les modernes pratiquent encores quelques aultres manieres de le rendre sobre, lesquelles meritent aussy leurs louanges: vn petit bouquet de fleurs de bourrache, & fueilles de Pimpinelle ne resiouit pas seulement la veüe par sa couleur, mais aussy par sa proprieté rabbat les vapeurs & fumees du vin dans lequel il est trempé. Mais la mie de pain maceree dans le vin est de beaucoup plus grande efficace, tellement quelle se peut reduire à la classe des Amethystes qui plus affoiblissent & diminuent les forces du vin. La vertu enyutante du vin, ne co-

siste tant en la crassitude & corpulence de sa liqueur, qu'en ses vapeurs chaudes & subtiles, lesquelles esleuees du vin comme elles gaignent le cerueau y causent soudain la turbulence de l'yuresse. Le pain trempé dans le vin ne s'imbibe pas seulement de sa liqueur, mais aussy s'enfle de ses vapeurs, & esprits tenus & enyurants, desquelz il le priue & despoüille, les sucçant & attirant à soy de tous costés. Ceste vertu attraitrice des vapeurs se recognoist sensiblement au pain quand il est apposé aux narines de ceux qui ont trop pris de moustarde, car lors il attire si puissamment & soudainement les fumees qui assaillent le nez, les yeux, & le cerueau, qu'il semble plustost enchantement que remede naturel. Mais il ne faut appliquer à cest vsage que du pain bien leué ou autrement l'effect en seroit nul ou pour le moins fort debile: Car ie tiens que ceste faculté attraitrice de vapeurs & fumees, consiste principalement au leuain avec lequel le pain est pestry. Ce n'est donc sans raison que les Medecins ordonnent du leuain avec des Cantharides pour former vn vesicatoire, puis qu'il n'y entre seulement comme corps du medicament, mais aussy comme attirant suffisamment & servant de sa part à l'excitation & production des vescies. Mais ie voy bien que tous ces remedes seront inutiles pour la plus part de noz biberôs, soit qu'ilz les desdaignent, ou que l'effort de leur gour-

mandise surpasse la vertu d'iceux.

Je crains au contraire que quelque mal-
aduisé en voudra faire l'esprouue mal à pro-
pos, & se trouuera enlacé dans les rets qu'il
veut rompre, donnons luy les moyens de
s'en despestrer.

GVERISON DE L'YVESSE.

CHAPITRE LXVII.

DEs deux fins & offices propres &
reseruez au doctes Medecins, sca-
uoir la conseruation de santé, &
la guerison des maladies, le premier est iugé
plus noble & plus excellent par Galien, &
reconnu tel par toute l'academie medicale.
Aussy est ce chose bien plus louable de de-
meurer tousiours debout, qu'apres estre tombé
se releuer & se restablir à sa premiere dispo-
sition. Or puis que le premier tient aucu-
nement de l'impossible, & que les plus soi-
gneux & aduisez en leur santé choppent
ordinairement, la necessité nous oblige d'a-
uoir recours à l'autre. La Deesse Venus ne
peut garantir son filz Aenee de la playe qu'il
receut à la cuisse, qui l'empescha de mar-
cher & se tenir debout, mais elle eut bien
le pouuoir de l'en guerir par la panacee &
le dictam qu'elle donna secretement à son
Medecin lapis. Si nostre conseil ne peut pre-

seruer noz beuueurs d'estre blesez à la teste, si noz Amethyistes ne le peuuent garder de vaciller, & tomber, il faudra venir à la guerison, & soulager son cerueau par la vertu de quelque panacee ou dictam cephalique. Les anciens & modernes Medecins nous ont laissé vn plein magazin de remedes contre la douleur de teste causee par le trop boire, lesquelz tous, ou la plus part nous pouuons tirer à nostre vsage, & les pointer contre l'yuresse. Car puis que l'vn & l'autre de ces deux symptomes, i'entends l'yuresse & la douleur, sont effects d'une mesme maladie, c'est chose asseuree, qu'en aneantissant la cause de l'vn on destruit quant & quant la cause de l'autre, & ainsy exstirpe on la maladie & ses symptomes tout ensemble. Nous auons demonstté cy deuant, que l'yuresse estoit immediatement produicte par les vapeurs vineuses agissantes contre le cerueau, qui l'emplissent & opilent par leur quantité, souuent l'humectent par leur qualité, & plus ordinairement l'eschauffent. Si donc nous venons à deliurer le cerueau de ces obstructions, & le garantir de ces alterations nous l'aurons tout de suite affranchy de ses maux. L'euacuation, les vapeurs & fumees, qui remplissent la ceruelle doit estre pratquee, comme intention principale de ceste guarison, mais la purgation de l'estomach va deuant comme de la source premiere. En vain voudroit on espuiser le

ruisseau, si premierement on ne tarissoit sa source, ce seroit aussy vn travail inutile de vuidier le cerneau de ses vapeurs vineuses, tandis que le vin bouillant dans l'estomach en fourniroit plus qu'on n'en scauroit dissiper. l'adiouste que la dissipation seroit cause de nouvelle attraction, il faut donc vuidier l'estomach aussy bien que la teste, principalement si le vin y reste encorés tout crud, & indigeste. Pour cest effect les anciens & modernes Medecins ordonnent l'eau tiede, l'huile, l'oxymel, l'hydromel, & aultres semblables pour exciter le vomissement, euacuation certes tres-salubre & necessaire tant pour l'expulsion de la matiere d'yversee, que pour la descharge de l'estomach. Et encorés qu'en ce faisant ilz prescriuent vn vomitif suffisant pour prouoquer la vertu expultrice à relancer tout ce qui l'aggrave. Si est ce qu'à mon auis il sera encorés plus à propos si on y adiouste de la decoction de racine ou semée de reffort, tant pour sa vertu vomitive, que pour sa faculté Amethyste, & du tout contraire au vin. Mais d'autant que le vomissement semble fauoriser le chemin des vapeurs vineuses, à cause qu'il est excité par vn mouuement de bas en hault, il sera bon incontinent apres auoir vomy pour les repousser de lauer la bouche avec eau, vinaigre, & vn peu de miel, par mesme moyen l'on conseruera les genciues & l'on empechera la puanteur de la bouche. Ce sont les

vapeurs vineuses qui sont les plus grandes ennemyes de la raison; ce sont aussy celles qu'il faut ou du tout aneantir, ou pour le moins rabbatre, & diuertir de la teste. Cecy se pratiquera par ligatures de iambes, & des doigts des pieds, par frictions valides des cuisses, & des iambes de hault en bas, & principalement par l'iniection d'un seruitial qui ne doit estre negligé en ce cas, ny obmis quand le malade ne pourra ou ne debura vomir. Il en y a qui sont d'une telle disposition qu'ilz creueroient plustost que de rendre gorge, à ceux icy le clyster sera du tout necessaire, comme aux autres qui ne deburont vomir, lesquels pour auoir ja longtemps tenu leur vin & viande, semblent ou les auoir du tout cuit, ou pour le moins les auoir enuoyé de l'estomach aux intestins. Je tais les autres inconueniens qui desconseillent l'usage du vomitoire, puis que nous en auons faict mention suffisante au chapitre où nous auons condamné l'yuresse.

Quand donc le Clyster sera de saison on le pourra prescrire en ceste sorte. Prenés des fueilles de verueine, du fiel de terre, d'arroches, de bele, de parietaire, d'absynthe, & de reffort, de chascun vne poignée: de semence de Carthamus & d'anis de chascune deux pinçets: faites de tout ce que dessus vne decoction en eau commune selon l'art, dans vne liure de ceste decoction plus ou moins, vous dissouldrés de la hierbe de Galien

& de benedicte laxatiue de chascune trois drachmes; & de tout ce que dessus faictes vn seruitial. Mais quoy que nous sollicitons la nature, & par hault & par bas, quoy que nous resueillions la vertu expultrice à se descharger par l'vne & l'autre de ces deux voyes, si est ce que bien souuent nous ne pouuons tant faire, qu'il ne reste dans le ventre beaucoup de reliques alimentaires, & de crudités indigestes qui pourroient sinon augmenter l'yureſſe, à tout le moins l'entretenir.

Il faut donc que le Medecin ait esgard à ceste consideration & qu'il vienne à fomen-ter & corroborer l'estomach, tant pour cuire & digerer le reste qui le presse, pour recreer sa vertu à demy accablee par la trop grande quantité du vin, que pour le soulager contre l'effort du vomissement precedent. A cest effect suruiendront les liniments d'huyle d'Absynthe, de noix muscade, & de mastiche: & les fomentations seiches de fueilles de menthe, d'Absynthe, d'Origan, & de marjolaine, de bois d'Aloes, de giroffles, Macis, aspic d'oultre mer, Acorus, escorces de Citron, fouchet, & autres semblables mis en poudre & appliquez dans vn sachet, ou escusson. Il s'en trouue qui n'ayants le temps d'observer tout ce que dessus tentent vn autre moyen de guarir l'yureſſe, ilz resueillent l'homme assoupy de vin, en luy trempant quelque temps ses parties genitales & principalement les testicules dans l'eau la plus

froide qu'ils peuuent auoir: il ny a rien de plus aisé & le succès en est favorable. Car soit que la grande froidure de l'eau pour estre comme douloureuse à ces parties doüees d'un sentiment tant exquis par Sympathie sollicite l'estomach au vomissement, ou bien que la chaleur de ces parties reiteree par Antiperistaze viuifie quand & quand celles des parties superieures, avec lesquelles elle a grande communion. Ou soit que l'affluence de la chaleur des esprits & du sang en icelles apres qu'elles sont retiree de l'eau retire tout de suite la chaleur & les vapeurs ennemyes des parties superieures. C'est chose asseuree que l'administration de ce remede a grand pouuoir de guerir l'yuresse. Et d'autant que la constitution des femmes n'est idoine à receuoir ce remede, il leur faudra suruenir par la substitution d'un aultre qui ne sera de gueres moindre efficace, sçauoir par vne fomentation ou embrochation des mammelles avec vinaigre bien fort & appliqué vn peu chaud. Apres auoir bien pourueu aux parties inferieures, qui agissent en transmettant de bas en hault les vapeurs ennemyes, il nous faut ietter l'œil sur les superieurs comme patientes, & employer toute nostre industrie à leur guerison. Nous auons deduiet cy deuant comment il failloit dissiper, resouldre, & tirer hors du corps les fumees enyurantes, nous voulons maintenant enseigner, comme il les faudra gar-

der des'emparer de la teste, & combattre celles qui y sont desia campees : comme il faudra alterer l'intemperature qu'elles y ont causees & finalement dompter l'yuressse : cecy se pratiquera dès le commencement par remedes adstringents, refrigerants & Amethyistes, & sur la fin, par remedes discussifs ou resolutifs. Je louë qu'incontinent apres le vomissement on presente au malade vn verre d'eau fresche selon le conseil d'Oribaze, Paul Æginete, & Apollonius, ie n'improuue la mixtion d'vn peu de vinaigre, ou de vin de grenade dans icelle, selon l'aduis d'Arnauld de Villeneuve : mais ie trouue encores meilleur si apres auoir pris l'opiate ou poudre Amethyste cy deuant descrite, on presente trois ou quatre onces de vin de grenade tout pur.

Scribonius Largus fait parade d'vne plante qu'il appelle Polyneuros, laquelle nous pouuons appeller en françois l'herbe à plusieurs nerfs, la vertu de laquelle selon qu'il promet n'est de petite efficace à surmonter le vin, & restituer l'homme en son bon sens. Si ceste herbe n'est le grand plantain (que ie tiens fort bon pour cest effect) ie n'ay encor peu sçauoir dequoy il parle. Si le malade est plus disposé au manger qu'au boire, on luy permettra quelques fruiçts refrigerants, & adstringents, comme poires austeres, pommes aigres, sorbes, & neffles & aultres. Et visants tousiours à ce mesme but, nous apporterons au cerueau des remedes de faculté sèblable.

On

On pourra faire vn linimēt pour le front, la teste & les temples avec huile rofat, suc de choux, de lierre, & vn peu de vinaigre. Mais si quelque respect nous empesche de greffer la teste, nous vsurons au moins d'vn frontal adstringeant & refrigerant: ou bien selon le conseil de Galien, nous apposerons sur le sommet de la teste des fueilles de choux vn peu ramollies au feu, lesquelles contrarient naturellement au vin & à l'yuresse.

Je ne voudroye aussy obmettre d'arroser le visage avec eau rose & vn peu de vinaigre. L'approuel'onction des narines, avec huile, & vnguent rofat, l'admotion des odeurs des santaux, roses, violettes de mars, fleurs de nenuphar,, & vn peu de camphre. Ces remedes interieurs & exterieurs estoufferont la ferueur du vin bouillant, & appaiseront l'ardeur de la teste par leur qualite refrigerante, ilz empescheront l'eleuation des vapeurs & leur bouscheront le passage par leur adstriction (& si i'ose ainsy parler) par leur vertu Amethyste cobattront vigoreusement l'yuresse. Faisons trefues avec les refrigerants & adstringeants venons maintenant à la dissipation des vapeurs, puis que rien ne nous en diuertit, & que nous auons bien & diligemment pourueu au reste de tout le corps. A cest effect les Anglois, Holandois & aultres nations voisines se seruent de l'herbe dicte Nicotiane, qu'ilz estiment peut estre trop superstitieusement, non seulement pour preser-

uatif, mais aussy pour singulier remede curatif de l'yuressse. Ilz reçoient la fumee de l'herbe seichee & bruslee par vne petite canule ou entonnoir qu'ilz tiennent à la bouche, ou bien la font exhaler aux narines de ceux qui assoupis de vin ne la peuuent recevoir d'eux mesmes. Ceste fumee (comme ilz croient) resoult l'yuressse, & empesche les symptomes qui en suruiennent, corrobore le cerueau, & subtilise l'entendement, mais soit que nous leur accordions vne partie de leur narré, ilz nous excuseront si nous ne leur aduouons le tout. Je croy bien que ceste fumee par sa vertu desiccative & resolutiue peut aneantir les vapeurs vineuses qui causent les obstructions du cerueau, & en suite amoindrir l'yuressse qui en procede, mais d'autre part elle languente par sa vertu chaulde & subtile, tellement que comme elle semble suffisante pour diminuer ceste passion procreee en vn cerueau froid & humide par quelque petit vin enyurant plustost par ses obstructions, que par sa chaleur; aussy peut elle augmenter l'yuressse d'un homme de chaulde & seiche complexion, enyuré par vn vin fort & genereux: c'est pourquoy les Septentrionaulx se seruans de ce parfun se sentent à leur aduis soulagez, & estiment qu'il leur resueille l'esprit, d'autant que leur vin d'ours cause par les obstructiōs, ou (pour mieulx dire) leur biere d'ours (car c'est de quoy ilz s'enyurent plus ordinairement) se

change en culx par la vertu de ceste herbe en vn vin de singe, espece d'yuresse qui semble beaucoup plus legere que l'autre. Les simplistes, traictants de la vertu de ceste plante, escriuent que les prebstres Indiens, que les Indiens mesmes & Æthiopiens esclaves au Perou, reçoient souuent ceste fumee les vns pour tomber en exstase & se priuer de tout mouuement, les autres pour s'exciter à dormir incontinent & songer songes estranges, & quelcuns d'iceux pour tomber incontinent en terre comme forcenés & hors du sens. Que si ainsy est il me sera fort difficile de croire qu'une drogue qui cause l'yuresse, ou quelque chose de pris, ou de semblable, ait vertu de la guarir. Nous pourrons donc plus asseurement pourvoir à noz malades en les oignant d'huiles discussifs, leurs prouoquant la sueur, ou plustost le repos d'un doux & gratieux sommeil, lequel r'appellant la chaleur naturelle aux parties interieures resouldra & consommera les fumées enyurantes, r'enforcera les nerfs affoiblis, calmera les esprits esmeus, soulagera le cerueau offensé, esueillera les sens endormys, en vn mot restablira la vertu animale à demy accablee.

Les anciens medecins conduisoient au baing leurs malades apres les auoir bien faict dormir, & ce pour relaxer le cuir, ouurir les pores, & faire euaporer les reliques du vin. L'usage des bains n'est plus en vogue, il suffira de bien couvrir noz malades,

& les faire ſuer à bon eſcient principalement à l'entour du col & de la teſte, ilz en ſentiront du ſoulagement par l'euacuation des vapeurs du vin, & des humeurs qui y croupiſſoient auparavant. La vertu de ces remedes & ſur tous du ſommeil eſt bien approuuee des medecins, & recognue du vulgaire, qui enuoyt incontinent dormir ceux qui ont trop beu. Et quant à moy ie luy deſere tant (principalement ſi les euacuations & aultres remedes preſcrits ont eſté deüement adminiſtrés) que ie tiens preſques pour maxime infaillible que quiconque s'endort yure, ſe reſueille ſobre. Il eſt bien vray qu'il reſtera peut eſtre quelque peſanteur & douleur de teſte, quelque aſſoupifſement des ſens, quelque degouſt, quelque engourdiſſement de tout le corps apres auoir dormy, mais cela n'eſpeſchera pas que l'hōme ne ſoit hors de ſon vin, ayant la fonction des facultés princieres, ſaine & entiere. Ie ne peux toutesfois, & ne doibs l'aiſſer ceſte douleur de teſte ſans l'attaquer viuement & la ſurmonter, il faut guerir la teſte auſſy bien que la raiſon. Les Medecins oultre le repos, le baing, & la ſueur propres à diſſiper les fumees & vapeurs qui embarasſent la ceruelle & eſtendent violemment ſes membranes, d'où naiſt la douleur de teſte, recourent de nouveau aux huiles, & au vin meſme, pour les aneantir du tout. L'huile de Camomile, de lis, & aultres plus diſcuſſifs ſont appliqués en

liniment exterieur ; & le vin pris interieurement & quelquefois du tout souuerain pour le mesme effect: Hippocrate est le premier qui a prescrit ce remede, & l'eschole de Salerne apres luy la chanté & loüé en ces vers.

Si nocturna tibi noceat potatio vini

Matutina hora rebibas & erit medicina.

Pour auoir ben la nuit, si le vin vous faict mal,

Prenez en du matin il fera medical.

Delànoz biberons preschent tous les iours qu'il faut prendre du poil de la beste pour guerir la morsure du vin. Car ne plus ne moins que le vin suruient quelquefois à la douleur des yeulx en subtiliant le sang crasse & visqueux qui y est retenu, ainsi par la vertu alterante, attenuante, & discussive, il vint à eschauffer, subtilier, & resouldre les vapeurs crasses, & les esprits flatueux qui causent douleur de teste, guerissant de sa qualité les maulx procreez par sa trop grâde quantité. Ces remedes ne sont pas indifferemment conuenables en tous cas. Car nous ne debuons pas tousiours accuser les vapeurs vineuses comme seules causes des douleurs que nous ressentons, mais quelquefois l'intemperature d'un cerueau trop eschauffé du vin, & bien souuent la quantité d'un sang vapoureux estendant & trauaillant douloureusement les venes. Dequoy nous ne pourrons doubter si nous nous remettons en memoire, que le vin n'eschauffe pas seulement

tout le corps, & principalement la teste, mais aussy qu'il se conuertit incontinent en vne grande quantité de sang qui ne peut estre contenue des venes sans distension violente. De là les iouës rougissent, les yeulx s'enflamment, la teste entre en ardeur accompagnée d'une douleur pulsatoire des temples.

Si en ces indispositions nous offrons du vin au malade, ou si nous l'eschauffons par quelque remede que ce soit, nous ietterons l'huile au feu, & allumerons sa flamme pour mettre tout le corps en combustiō. En ceste occurrence il sera meilleur d'esuenter la vene, & descharger la teste par l'euacuation du sang. L'ouuerture de la cephalique diminuera la plenitude que nous supposons, & quant & quant rafraichira l'ardeur particuliere & vniuerselle. La nature par son exemple nous ouure le chemin à tel remede. Nous voions bien souuent qu'elle appaise les grandes douleurs de teste qui viennent de trop boire par vne Hemorrhagie ou flux de sang des narres: le Medecin son ministre, doit suyure ses mouuements, & inuiter ses effects sous esperance d'en receuoir les mesmes fructs, le tout à la gloire de Dieu, à la santé de son patient, & à l'honneur de sa profession, c'est à ces intentions ou buttent tous mes desseings, & la fin & le commencement de ce mien traicté, & vniuersellement toutes mes actions.

FIN.

